

პერენ ლორია

დედი მუჩადი

რომანი

აჭარის სახელმწიფო გამომცემლობა

ბათუმი

1939

ცხენს ბილიკზე დაუტურდა ფეხი და მუხლებით ჩაიჩოკა ქვიშიან მიწაზე. მოზრდილი ქვა მოწყდა ადგილიდან, დაგორდა. გზადაგზა კენჭები აიყოლია და ხრიალით დაეშვა ხევში.

— ჰეი, ჰეი—ამოიძახა ვილაცამ ქვემოდან. მთელი ხევი გაეხმაურა ამ ხმას. რამდენჯერმე განმეორდა იგი და სადღაც მთებს გადაღმა მიწყდა.

მგზავრი ჩამოხტა ცხენიდან. წამოაყენა დამუხლებული პირუტყვი, გაეაზე გადაუსვა ხელი და მოსართავეები ოდნავ შეუშვა.

ცხენი ნამიან ბალახს დაწვდა. ერთი მუქა მოგლიჯა, პირში მოიმწყვდია, მაგრამ ლაგამი არაჩხუნდა, კბილები ერთმანეთს ვერ მიეკარნენ და ბალახი პირიდან გამოუცვივდა.

მხედარს შეებრაღა ერთგული პირუტყვი. ლაგამი გამოაცალა, აღვირი კისერზე გადაადეა და ბალახზე მიუშვა. შემდეგ მობრუნდა, ტანსაცმელი დაიბერტყა, წელზე ქამარი გაისწორა და ხევში გადაიხედა.

ხევიდან გიჟი მდინარის ხმა ამოდითდა. ეს ხმა თავიდანვე მოჰყვებოდა ამ ბილიკს. ხან შენელდებოდა, ხან მიწყდებოდა, ხან კი საშინელი ქუხილით და გრიალით აყრუებდა ყველაფერს. ასე გრიალით მიდიოდა ის ახლაც და ნაპირებზე დაგორებულ ლოდებს ასკდებოდა.

ნაძვის, ფიჭვის, მუხისა და წიფლის ხეები ამაყად აზიდულიყვნენ ჰაერში. ქოლგასავით გადაეშალათ ტოტები და საჩრდილებლად გადაფენოდნენ მიწას. მზის სხივებს ძლივს მოეხერხებინათ ფოთლებს შუა შემოპარვა.

სამაჟრი სუნი იღვა. ბალახებზედ მარგალიტივით კიაფოდნენ ნამის წვეთები. ფრინველების ჟივილ - ხივილი აყრუებდა მიდამოს. დახტოდნენ ხიდან ხეზე, ტოტიდან ტოტზე. მიღმა შაშვის ჭახჭახი ისმოდა, გასაწრთვენელად გამოყვანილ ბარტყებს აძლევდა თავისებურ ნიშანს. საკვების შოვნასა და მტრისგან თავის დაცვას ასწავლიდა.

ცხენი გემრიელმა ბალახმა გაიტაცა. კარგა მანძილით ასცილ-

და ბილიკს, მაგრამ ვერ მოიკიდა ფეხი, ისევ დაუცდა და ფოფხვით დაეშვა. მხედარი მიეშველა. უნაგირის კეხს დასწვდა. აღვირში მოაველო ხელი და ბილიკთან ჩამოფოფხვილი პირუტყვი წამოაყენა.

ახლა უფრო მეტი ქვეები ამოძრავდნენ. უამრავი კენჭი აიყოლიეს და ისეთი გრიალითა და ლაწა-ლუწით დაეშენენ, თითქოს საშინელი სეტყვა მოვიდაო.

— რომელი ხარ შენ, ეი!—მოისმა უფრო ბრაზმორეული ხმა ქვევიდან და წყევლა-გინება ამოიყოლია.

მგზავრმა უნაგირი გაუსწორა ცხენს, მოსართავეები მოუჭირა, ლაგამი ამოღვა და შესაჯდომად მოემზადა.

— ვინ ოხერი ხარ შენ, ეი!—ისევ მოისმა. მგზავრმა მოიხედა. ახალგაზრდა კაცი მობობდავდა ხევიდან. ცალ ხელში გრძელტარიანი წალდი ეჭირა, მეორე ხელს ხან ბუჩქებს ჩასჭიდებდა, ხან ქვებს და ისე მოიწევდა ზევით.

მგზავრმა უზანგში შედგმული ცალი ფეხი გამოიღო. მობრუნდა და ახალგაზრდის ამოსვლას დაუცადა.

— გამარჯობა ამხანაგო,—უთხრა მან მოსულს და თავიდან ფეხებამდე დაათვალიერა.

— კარგი სათამაშო გიშოვნია, შენმა სიცოცხლემ—მოსვლისთანავე უთხრა ახალგაზრდამ, შემდეგ ქვემოთ გადაიხედა—რას აპირებდი, რომ ამ შენი თამაშობით ვინმესთვის თავი გაგეტება! რამდენი ბავშვია, რამდენი პირუტყვი!.. ცოცხალს არ გაგიშვებდი აქედან!—წალდი მოიმარჯვა ხელში და უფრო ახლო მივიდა.

მგზავრი არ შემეკრთალა. პირდაპირ დაუდგა და თვალეში ჩახედა.

— დამნაშავე ვარ, ამხანაგო,—უპასუხა მან — თუმცა ჩემი ბრალი არაა. ცხენს დაუტურდა ფეხი და... ძალიან ცუდი გზა გქონიათ. რატომ არ გიფიქრნიათ გზის გაყვანაზე!—იქით მხედავა მგზავრი.

ახალგაზრდამ წალდი დაუშვა, ოდნავ დამშვიდდა, სიბრაზის ნაპერწკლები ჩაქრნენ თვალეში, უხერხულად მიიხედ — მოიხედა და დაბალი ხმით უპასუხა:

— ვინ უნდა გაიყვანოს გზა. ხალხს არ უნდა და ალღახი ხომ არ ჩამოვა აქ გზის გასაყვანად.—გაიღიმა და ისევ განაგრძო:—ალღახის გაყვანილი გზა ესაა—გაიშვირა ხელი ხევისაკენ. მეტი რა გინდა. — მიწაზე დაწვდა, კენჭი აიღო და ისე შორს გასტყორცნა, რომ თვალი ვერ მისწვდებოდა.

— ნუთუ ამაზე უკეთესი გზა არ გჭირიათ. როგორ უნდა იცხოვროთ უგზოუკვლოდ, არ ფიქრობთ გზის გაყვანაზე?

ახალგაზრდამ გაკვირვებით შეხედა თვლებში უცნობს.

— რა ხეირს მოგვიტანს გზა!—თითქო თავის თავს დასცინისო, ისეთი კილოთი სთქვა ეს სიტყვები.—კარგი გზით მთავრობა ამოვა, მთავრობას კი კარგი არაფერი მოაქვს სოფლისათვის, გადასახადები ისედაც ბევრი გვაქვს და მაშინ ხომ სულ ველარ ავიტანთ...

— ასე ფიქრობ?—შეეკითხა მგზავრი.

— მე ვინ მკითხავს — ცოტა სიჩუმის შემდეგ მიუგო ახალგაზრდამ.—ასე ამბობენ ჩვენები, გზა რომ გვექონოდა, ამდენხანს არ დაგვაცენებდნენ. აქ ჩამოგვისახლდებოდნენ, ან ჩვენ გადაგვასახლებდნენ აქედანაოქ.. მართალია, ყველაფერი კარგი თავისთვის უნდათ.—ჯიბიდან სქელი ქალაღი ამოიღო, შუაზე გახია, მეორე ჯიბიდან ფხვიერი თუთუნის ამოფერთხა, ქალაღზე დააყარა და შეხვევა დაუწყო.

არ დაემორჩილა ქალაღი თითებს, არ მოიგრიხა, ფხვიერი თუთუნის არ გაჩერდა შიგ და მიწაზე დაიბნა. ახალგაზრდამ კიდევ ჩაიყო ჯიბეში ხელი, სულ გადმოაბრუნა ის, დაიფერთხა ხელის გულზე, მაგრამ უფრო მეტი მტვერი აღმოჩნდა, ვიდრე თუთუნის. ნერვიულად მტვერი იქით მიჰყარა, ქალაღი ჯიბეში ჩაიკუჭა და ბრაზმორევით გააფურთხა.

— მე მოგაწვეინებთ თამბაქოს — მგზავრმა ჯიბიდან ვერცხლის სათუთუნე ამოიღო, გახსნა და ახალგაზრდას გაუწოდა.

ახალგაზრდამ ჯერ სათუთუნეს დახედა, შემდეგ შიგ ჩაწყო-ბილი პაპიროსები დაათვალიერა, ბოლოს თითქოს საუკეთესო აარჩია, ერთი ამოიღო, შეაბრუნ-შემოაბრუნა ხელში, შეხედ-შემოხედა და პირში ჩაიღო.

მგზავრმა ერთი თავისთვის ამოიღო. სათუთუნე ჯიბეში ჩაიდვა და წუმწუმა აანთო.

— ჯერ თქვენ მოუკიდეთ—გაიპატიეთ ახალგაზრდამ, როცა მგზავრმა პირველად შესთავაზა ცეცხლი.

მგზავრი არ შედაგებია. მოუკიდა და შემდეგ მას მიაწოდა.

— რა კარგი თუთუნია!—ზედიზედ ამოუშვა ბოლი ახალგაზრდამ და მგზავრს მიუბრუნდა.

— საით მიბრძანდებით?—კითხა მან, დაგრეხილი კვამლი ისევ ამოუშვა პირიდან და სანამ არ გაიფანტა, თვალი არ მოუშორებია.

— სოფელ წყაენარაში—მიუგო მგზავრმა.—შორსაა აქედან?

— ორი საათის იქნება. მეც იქაური ვარ... რა კარგი თუთუნია!—კიდევ დახედა პაპიროსს და გაიღიმა.

— მოგწონს?

— კარგი ვის არ მოეწონება. ქალაღლის გემოც არ ახლავს. მე-
კი ქალაღლდაც ვერ ვშოულობ. თუთუნი ხომ არაფრად ვარგა.

— რატომ?— შეაწყვეტინა მგზავრმა — თქვენებურ თამბაქოს
ძალიან აქებენ.

— აქებენ— გაიმეორა ახალგაზრდამ— ტყვილა აქებენ... არა,
ასეთი თუთუნი ჩვენში არ მოვა. თუმცა... — გააბოლა და შემდეგ
დაუშატა.— მართლაც შეიძლება ამაზე უკეთესი თამბაქოს დამზა-
დება.— მაგრად მოსწია და კვამლი დიდხანს გაიჩერა პირში.—
დამუშავებაზეა ყველაფერი. ამბობენ, აქაურ თამბაქოდან ისეთ
სიგარებს ამზადებენ, რომ ხემწიფესა და ფაშას მიერთმევაო.—
წალდი ხეზე მიაყუდა, თვითონ ქვაზე ჩამოჯდა.

— რატომ მიბრძანდებით წყაენარაში?

— საქმეები მაქვს. მთავრობამ გამომაგზავნა დავალებებით.

— მთავრობამ?— ახალგაზრდა ცოტა ხანს ფიქრობდა.— ჰო,
ვიცი, ელბეთ გადასახადები იქნება. ჩვენი თავმჯდომარე ამბობდა ამ
წინაზე, მთავრობის კაცი ამოვა და მერე ნახეთ თქვენი სეირიო.
სულ ძალად წაიღებენო. ნეტავ სად მიაქვთ ამდენი ფულები! საწ-
ყალი კაცი ძლივს მოუყრის თავს გროშებს. ჩითი უნდა იყიდოს, ან
მარილი. წამოუვლიან ამ დროს და წაართმევენ.— მაგრად ამოიოხრა
და ფეხებზე დაიხედა. შალის წინდები მრავალ ადგილას იყო და-
ხეული და იქიდან წვირიანი ხორცი მოსჩანდა. თითებიც გამო-
ცვენოდა ქალამნებიდან.

მგზავრმა თანაგრძნობით გადახედა ახალგაზრდას. ის ლამაზი
და მიმზიდველი მოეჩვენა. შავი გრუზა თმა ეყარა თავზე. ეტყობოდა
მაკრატელი და სავარცხელი დამღურებოდნენ მას და ამიტომ იყო
ისე უწესრიგოდ მიბნეულ-მოზნეული. შავი უღვაშები ახალამო-
სული ჰქონდა და ისე უხდებოდა, როგორც მინდორს აბიბინებული
ჯეჯილი. შინ მოქსოვილი შალის ხალათი ეცვა, მრავალ ადგილას
დაკერებული და იმავე ფერის შარვალი უფრო დაცვეთილი და
თეთრი ძაფით დაღამებული.

მიუხედავად ასეთი ჩაცმულობისა, მიმზიდველი სჩანდა. ის
უფრო იმ ვეფხვს მოგაგონებდათ, რომელიც, საკუთარ ძალზე და
ბრქყალებზე დაყრდნობილი, უალრესად ამპარტაენი და მედიდუ-
რია.

— რა გვარი ხარ, ამხანაგო, შენ?— კითხა კარგა ხნის სიჩუ-
მის შემდეგ მგზავრმა ახალგაზრდას და კიდევ მიაწოდა პაპიროსი.
ახალგაზრდამ ჯერ პაპიროსი ამოიღო, მოუკიდა, გააბოლა
და შემდეგ უპასუხა.

— დურსუნოღლი... — უცებ გამოასწორა — არა, ეგ გვარი არ

არის, მამის სახელია. მამაჩემს ღურსუნი ქვიოდა. ნამდვილი გვარი ოდილაძეა. ჩვენს სოფელში ათამდე ოდილაძე ცხოვრობს... სახელად მურადს მეძახიან.

— მურად ოდილაძე—გაიმეორა მგზავრმა.—ჰო, ამხანაგო მურად, შენ ამბობ ძალიან გაწუხებენ გადასახადებით. ვერ დამისახელებ ამ მოკლე ხანში რამდენჯერ აკრიფეს და რა სახის?!.

ახალგაზრდა ჩაფიქრდა, რალაც თითებზე ჩამოითვალა, მაგრამ არ დაუჯდა თავისი ნაანგარიშევი.

— არ მახსოვს კარგად... ერთხელ ოც-ოცი მანეთი გადაგვახდევინეს. დიად, დიად, ოც-ოცი მანეთი. თემსაბჭოს შენობისათვის გვინდაო. ერთხელ კიდევ ათ-ათი მანეთი. ეს ზამთარში იყო, მინარეთი დაანგრია ქარმა და ის უნდა გააკეთოთო. ამ ზაფხულზე მედრესე ააშენეს და ოცდაათ-ოცდაათი მანეთი გაგვაწერეს. ძლივს გადაახდევინეს, თხები და ცხვრები წაართვეს გლეხებს. ახლა კიდევ თქვენ ამობრძანდით და ახალ გადასახადს მოიტანდით... ვინ გაუძლებს ამდენ გადასახადს!—ისევ დაიხედა ფეხებზე და ისევ დაათვალიერა გაცვეთილი ქალამნები.—ჩვენზე კი არავინ ფიქრობს.—მუხლის თვალზე დაიდო ხელი, სადაც გახეული შარვლიდან ხორცი მოსჩანდა.

— კი, მაგრამ ვინ კრეფდა ამ გადასახადებს? — შეეკითხა მგზავრი.

— ვინ კრეფავდა! ვინ კრეფავდა და მთავრობა. ჩვენი თავ-მჯდომარე გადიოდა, მილიციას გვიგზავნიდა. მინარეთის ასაშენებელ გადასახადს რომ კრეფდნენ, ხოჯაც დადიოდა მათთან ერთად...

მგზავრმა უბის წიგნი ამოიღო და შიგ რალაც ჩაიწერა. შემდეგ მობრუნდა და წასასვლელად მოემზადა.

— ნახვამდის, ამხანაგო მურად.—უთხრა მან. უნაგირს ხელი მოჰკიდა და უზანგებში გაუყარა ფეხი.

— ტყვილა ჯღები ცხენზე.—უთხრა ახალგაზრდამ, ცხენთან მივიდა და ლაგამში მოავლო ხელი.—მიღმა ისეთი გზაა, რომ ხოხვითაც ვერ გახვალ... მეც იქით მივდივარ. ერთად წავიდეთ, თორემ საფრთხილოა. სადმე არ გადაიჩეხო და მგლების გული არ გაახარო... არა უშავს, ცხენი წინ გაუშვათ, ეტყობა გამოჩვეულია მთაში.—გაევაზე გადაუსვა ხელი, შემდეგ აღვირი კისერზე გადაადო.

ცხენი ფრთხილად გაყვა ბილიკს.

გზა მართლაც ცუდი იყო. ეს ვიწრო ბილიკი ჩაშვავებულაყო ზოგიერთ ადგილას და ძლივს გადიოდნენ. ქვემოდან უფსკრული იყურებოდა. ოღნავ ფეხის დატურება და სიცოცხლეს გამოეთხოვე-

ბოდა ადამიანი. ცხენი მოხერხებულად გადიოდა. ერთი ნაპირიდან ისკუბებდა და მეორეზე ისე გაუხტებოდა, თითქოს იმავე ადგილას დგასო. მას მურადი ბაძავედა, შემდეგ მგზავრი, მაგრამ უკანასკნელს ძალიან უძნელდებოდა.

— ნუთუ ამ ერთადერთი ბილიკის მეტი გზა არ გაგაჩნიათ? — ისევ იკითხა მგზავრმა, როცა მურადი წაფორხილდა.

— რად გვინდა უკეთესი გზა! — მურადი შესდგა. — ამ გზით დადიოდნენ ჩვენი ძველები. ამ გზით უნდა ვიაროთ ჩვენც. დაბადებიდან სიკვდილამდე რამდენიმე გზაა, მათში ეს გზა უფრო მოკლეა, უფრო პირდაპირი. ჩვენი ხოჯაც ასე ამბობს. ჰო. და, ხოჯას რომ არ დაუჯერო, ვიასური იქნები და ვიასურობა ცოდვასო... აჩუ ცხენო, შე სამგლევ! — წიკეპელი გადაჰკრა ლურჯას. — ჰიკვიანი ცხენი გიშოვნია. ვისგან იქირავებ?

— ფურტიოში მომიყვანეს. მართლაც გონიერი და მარჯვეა.

— ჰო, ფურტიოელებმა კარგი ცხენები იციან. აბა სხვა კუთხის ცხენი აქ ვერ გაივლის. სჩანს ნამყოფია ჩვენს სოფელში. — კიდევ გადაჰკრა შოლტი და ცხენი ბილიკზე აათამაშა.

კარგა მანძილი გაიარეს. გზა ყოველგან ერთნაირი იყო. ხშირ და გადმობურულ ტყეში მიდიოდა, ხან ხევში დაეშვებოდა, ხან ზევით აიწივდა, ხან მდინარის ნაპირს მიყვებოდა.

— არის თქვენში ასეთი ადგილები? მართლა, სადაური ხარ? შეეკითხა მურადი მგზავრს, როცა ერთ ადგილს უშისვენეს.

— გურული. ვაგიგონია გურია?

— რას ამბობ, გურია როგორ არ ვამიგონია! ჩვენი გვარის კაცები იქაც ყოფილან. მამაჩემი იტყოდა, ძალიან კარგი ხალხიაო. ნამყოფი იყო გურიაში, თაფლი და სანთელი მიჰქონდა. მე კი ბათუმს იქით არ ვყოფილვარ... რა გვარი ხარ?

— ბერტაძე. ანდრო მქვია სახელად — მიუგო მგზავრმა.

— ანდრო ბერტაძე. — ვაიმეორა მურადმა. — რა საქმეზე მოდიხარ ჩვენში?

— ადგილობრივ ამხანაგებს უნდა დავეხმარო.

— ხა, ხა, ხა, ხა. — გადაიხარხარა მურადმა. — ვის უნდა დავეხმარო! ჩვენში ხეების მოჭრას ვერ შესძლებ და მორების დატურებას...

— განა ამიტომ მივდივარ! — შეაწყვეტინა ანდრომ. — მე საბჭოში უნდა...

— ვიცი, ვიცი. — არ დაამთავრებინა სიტყვა მურადმა. — გადასახადები ააკრფინო, ბეგარაზე ხალხი გაიყვანო და... რა ვიცი კიდევ რამდენ საქმეს გაიჩენთ...

— რატომ?!—ოდნავ ნაწყენი კილოთი შესძახა ანდრომ.—
ჯანა სხვა საქმეები ცოტაა? მივიდეთ, დავიწყებ მუშაობას და
წახავ!

მურადი ჩაფიქრდა. კარგა ხანს არ ამოუღია ხმა. მერე,
თითქოს რაღაც მოაგონდაო, თავი ასწია და ანდროს შეხედა.

— დიდხანს დარჩები?!

— სანამ საქირო ვიქნები. ან სანამ პარტია სხვაგან არ გამ-
გზავნის.

— გაგიქირდება ჩვენს სოფელში ცხოვრება. აი გახედე, სულ
ასეთი ტყეები და კლდეებია. აქა-იქ არის გაკაფული ადგილი და იქ
მოგვეყავს ჭირნახული. ძალიან ლარიბად ცხოვრობს ჩვენში ხალხი.

— არა უშავს—გადახედა ანდრომ მალალი ხეებით შემოსილ
გორებს—თუ ვიმუშავებთ როგორც წესია, ყველაფერი გვექნება. გა-
ნა ეს ტყე სიმდიდრე და ქონება არაა?!.

— სიმდიდრეა, სიმდიდრე.—ჩაილაპარაკა მურადმა. — მაგ
სიმდიდრეს წაღება უნდა. მამაჩემი სწორედ მაგ სიმდიდრემ და-
ლუპა. მორებს ატურებდა და წყალში დაიხრჩო. არა ჩემოვინაა, შე-
ნისთანა კაცი აქეთ ვერ იცხოვრებს. შემდეგ გაიღიმა და თვალბში
შეხედა—სად იშოვი აქეთ მასეთ ციგარებს!

— რატომ, ეგ სულ ადვილი საქმეა, ჩემო მურად. თამბაქო
ხომ მოდის თქვენში. იმას დავამუშავებთ კარგად, ამ ხე-ტყის გატა-
ნის საკითხს მოვაგვარებთ, გზას გავიყვანთ და...

მურადმა გადაიხარხარა. მუცელზე მოიქირა ხელი და ზედმეტი
სიცილისაგან ცრემლები გადმოსცივიდა.

— რამდენი შეპირებები იცით ამ ქალაქის ხალხმა — ძლივს
სთქვა სიცილის შემდეგ მან.—შარშან კიდევ ერთი კაცი ამოვიდა,
შენსავით გამოწყობილი იყო. იმ დალოცვილმა იმდენი ილაპა-
რაკა, იმდენი შეპირებები ამოგვილაგა, იმის მესამედი რომ გაეკეთე-
ხი, რა გვიშავდა. ერთი კვირა ძლივს იცხოვრა ჩვენში. ისე გაიპარა,
რომ არავის გაგვიგია. ქალაქელებმა ლაპარაკი და ანგარიში იცით,
სოფლელებმა მუშაობა. თქვენ ლაპარაკით სჭამთ პურს, ჩვენ მუ-
შაობით და მაინც უპუროდ ვართ. რას იზამ, ასე გაუჩენია ალღასს
ეს ქვეყანა...

ანდრომ მაჯაზე წაავლო ხელი მურადს და გააჩერა.

— გინახავს შენ ქალაქი?

— აკი გითხარი, ერთხელ ბათუმში ვიყავი-შეთქი! დიდი ხანია
მას შემდეგ. ახლა არც მახსოვს იქაურობა.

— მოგეწონა?

მურადმა მხრები აიჩეჩა.

— იმუშავებ, ქალაქში რომ გაგაგზავნო?

— რა უნდა ვაკეთო იქ, როცა არაფერი ვიცი. ჩემისთანა უსწავლელ კაცს ქალაქში რა უნდა. არა ჩემო ემიავ, ჩემი საქმე ქალაქი არაა „ჩიტი სადაც გაიზრდებოდა, მისი ბაღდადი იქ არისო“, ჩემი ბაღდადიც ჩემი სოფელია.— ცოტა ხნის სიჩუმის შემდეგ დაუმატა:— ეჰ, ბარემ კარგია ქალაქში ცხოვრება... კარგია სოფელშიც, მაგრამ... იცი რა გითხრა? წელან რომ ამბობდი, ისე თუ იქნება, მაშინ იქაც კარგია და აქაც. კაცი ყველგან კარგად უნდა ცხოვრობდეს. თუ ქალაქში სწავლობენ, მუშაობენ, მსახურობენ, რატომ სოფელში არ ისწავლება. მართალი სიტყვი შენ, თუ კარგად ვიშრომებთ, ყველაფერი გვექნება. კარგ მუშაობას სწავლა უნდა, ეს სწავლა კი არაა აქ.

— სოფელში სკოლა არა გაქვთ?

— არის. ეს მთავრობა რომ მოვიდა, მერე ააშენეს ერთი სკოლა, მაგრამ მართო სახლი რას გააკეთებს!

— როგორ, სწავლა არაა შიგ?!

— უინ უნდა ასწავლოს. მასწავლებლებმა ვერ მოიციადეს. ან როგორ მოიციდიდნენ, როცა არავინ ყურადღებას არ აქცევდა მათ. არც ბავშვებს აგზავნიდნენ. არ უნდა ხალხს სწავლა... თუმცა ხალხი რა შუაშია. აქ ყველაფერს ხოჯა და იუსუფ-ალა აკეთებენ. რას იზამ, უფროსი კაცებია და ყველა უჯერებს... ხომ გეუბნები, გაგიკვირდება-მეთქი! თუ შენც ისე დაიწყე, როგორც ზოგიერთმა მასწავლებელმა, ორ დღეს არ გაგაჩერებენ.

— რა ჩაიდინეს იმ მასწავლებლებმა? — დაუწყო გამოკითხვა ანდრომ.

— ისეთი არაფერი. ბავშვები აგზავნენ სკოლაშიო, წერაკითხვა უნდა ისწავლოთ ყველამო. ერთი მასწავლებელი ჩვენს თავმჯდომარეს შეედავა. რა უფლებით ახდევინებ ხალხს ჯამეს შესაკეთებელ ფულებსო. თუ არ სურთ გადახდა, შენ ვინ გკითხავსო. თავმჯდომარეს გული მოუვიდა და დაითხოვა. მთავრობის კანონს, ხომ ვერ შეცვლიდა, რა ხელი გაქვს, ჩემს საქმეში რომ ერევიო. ასეა, ჩემო ემიავ. არ უნდათ სკოლა. მედრესე გვაქვს და გვეყოფაო, ამბობენ.

— შენ როგორი აზრის ხარ?

— მე? მე რა ვიცი. მთავრობა რომ ვიყო, მასწავლებლებს დავუჯერებდი. კარგს ამბობენ ისინი. რა საჭიროა მართლაც კირნახული გაყიდო—ჯამე ააშენო.

— არც მედრესე?

— მედრესე? მედრესე. რა ვიცი. ვითომ საჭიროა მედრესე?

— მე შენი აზრი მინდა გავიგო. ხომ დადიოდი მედრესეში?

— ღაედიოღრი.

— ისწაველე რამე?!

— არაფერი.

— არ სწაველობდი?!

— რა უნდა მესწაველა. არაბულის რა გამეგება ან რად მინდა ლოცვების სწაველა. ღმერთს თუ ჩემთვის კარგი უნდა, ისე მომცეს. რცის, რომ გონჯათ ვცხოვრობ.

— არ ლოცულობ?!

— რას გამიკეთებს ლოცვა. ხუთჯერ დამწყველა ხოჯამ. ვიაურად გამომაცხადა... სულ არ მწყენია. ვიაურიც ადამიანია. ღმერთი თუ ჭკვიანია, ყველა ისე გააჩინოს ამ ქვეყანზე, როგორც მას უნდა. თუ ვიაურობა არ მოსწონს, ნუ გააჩენს ვიაურს.— ჩაიცინა — გადელეებულია მურადიო გამომაცხადა ხოჯამ, ასე რომ ვუთხარი, ჩემ დას უთხრა ნუსხას დაუწერო.

— მერე?

— ჩემი და ჩემზე დელია. შენ თავს მოუარე და შენი ნუსხა შენთვის შეინახე... ნაილე მოხერხებულია. ის რომ არ მყადეს, გავდელდებოდი... მართლა დელი არ გეგონო. ტყეში კი დავდივარ ხშირად, მაგრამ ეს ჩემი ხოჯია. საშიშია ტყეში სიარული, იქ ნადირი ბუდობს, მაგრამ ზოგიერთ კაცთან სიარულს ნადირთან სიარული სჯობია. ტყუილს მაინც არ გეტყვის. ძალიან ლამაზია ტყე. ხანდახან ჩამოვვადები წაქცეულ ხეზე და ვუსმენ ჩიტების ჭიკჭიკს. თითქოს მათობს მათი სტეენა. სისხლი მეყინება ძარღვებში. გული აღარ ძგერს. ხშირად საჭმელიც მავიწყდება. რამდენი ღამე გამითევია რომელიმე განიერ ტოტზე გადაწოლილს. მოვკალათდები, მარჯვენა ჯკლავს სასთუმლად ვიკეთებ, თვალებს ვხუჭავ და სმენას ვამახვილებ. ფოთლის გაშრიალება არ გამომეპარება. კურდღელი რომ გაცოცდება ნამიან მიწაზე, იმასაც ვყურობ. გამთენიეს ხომ მშვენიერა სეირობა გაიმართება. ერთხელ რომ ნახო, შემდეგ სახლში დაძინება შეგეზარება. მზე კიდევ არ ამოსულა. სიბნელე თანდათან იფანტება. ნამის წვეთები უხშირებენ ძირს ჩამოვარდნას. ჩხაკ! ჩხუკ! — იძახიან ისინი ჩამოცვენისას. ხეების ტოტებზე მჯდომი ჩიტები შეფრთხილდებიან. ერთი პატარა ჩიტი ტყვიასავით ავარდება ცაში და ისე არაკრავდება, როგორც სარკეელა. იმას აჰყვებიან სხვები და ეს ჩემი ტყე ისე ახმაურდება, რომ მკვდარსაც გაელვძება. თითქოს ხეს გამოუსხამს ენა. ფოთოლი მღერის და ლაპარაკობს. უკეთეს მუსიკას კაცის ყური ვერ მოისმენს. დელია მურადი, ასეთი რამეები რომ უყვარსო. ვიყო დელი, ხომ არავინ ვუშავებ რამეს. ტანსაცმელს ხომ არ ვიგლეჯ. ქვებს ხომ არ ვსროლილობ, მიყვარს ასეთი ცხოვრება

და რა ვქნა. ხოჯას ლოცვა უყვარს, თავმჯდომარეს გადასახადების კრეფა, იუსუფ-ალას სხვისი ნამუშევარის წართმევა. ყველას აქვს თავისი საქმე და მე რას მერჩიან!

ანდროს გულიანად გაეცინა. ის უფრო დაუქვირდა ამ უცნაურ ახალგაზრდას, რომელსაც არც სწავლა ჰქონდა, არც განვითარება, მაგრამ ისე მსჯელობდა და აზროვნებდა, რომ ბევრს შეეხარებოდა.

ბევრი რამე გაიგო ანდრომ მისგან. სოფელში, რომელშიაც ანდრო მიდის, ჯერ კიდევ არ შექრილა ოქტომბრის სხივი. გარდა ერთი სკოლისა, რომელიც დიდი ტანჯვა-წვალებით აუშენებიათ, აქ არაფერი მოიპოვება. ადგილობრივი ხელმძღვანელი პირები თვითონ წასულან სწავლის წინააღმდეგ. რამდენიმე მასწავლებელი იძულებული გაუხდიათ დაეტოვებინა სკოლა...

ბილიკი თანდათან ფართოვდებოდა და ბოლოს ისე გაგანიერდა, რომ დაბალთვლებიანი ურემიც გაივლიდა. აქ მდინარეც ახლო იყო და ტყეც ქარაფი.

— ეს არის ჩვენი გზა—სთქვა მურადმა—სათრიელა ურემი დაჰყავთ ზედ, ხან ხის მორებს მოათრევენ. ქირანახულიც ამ გზით მოაქვთ... გახედე გაღმა! თამარის ციხეა. მაქ ცხოვრობდა თურმე. წალიან ჭკვიანი ქალი ყოფილა. ხონთქარსაც შინებია მისი. ყველა აქებდა თურმე. ერთ დიდ სწავლულ კაცს წიგნი დაუწერია მისთვის... მოიცა, მოვიგონო... ჰო, შოთა რუსთაველი. ჰაი, რა წიგნი ყოფილა. კითხვა რომ ვიცოდე, აუცილებლად ვიყიდდი იმ წიგნს.

— საიდან იცი, მურად, შენ ეს ამბავი? — ჰკითხა ანდრომ გაკვირვებით.

— გავიგე, დიდი ხანი არაა, რომ გავიგე. ჩვენში ერთი მასწავლებელი ქალი იყო, ისიც გურიიდან. იქნებ იცნობ კიდევაც. ქეთო ჭვიოდა. მოიცა, გვარი მოვიგონო!—დიდხანს ფიქრობდა, მაგრამ ვერ მოიგონა.

— თქვი, გვარი არაა საჭირო.—უთხრა ანდრომ და კიდევ მიაწოდა პაპიროსი.

მურადმა ჯერ პაპიროსს მოუკიდა, მადიანად გააბოლა და შემდეგ ალაპარაკდა.

— გვარი არ მახსოვს. ვერ მოვიგონე.. ძალიან კარგი ქალი იყო. ქალი კი არა ბალვი იყო ჯერ, მაგრამ... ბევრი რამე შეუძლია სწავლას. იმდენი რამე იცოდა, იმდენი, რომ ჩვენმა ხოჯამ იმის შესამედიც არ იცის. აი, ქალი ის მითხარი. რომ დაიწყებდა ლაპარაკს, ყურს ვერ მოაშორებდი. არც კაცს ერიდებოდა და არც ქალს. რომ შემხედებოდა, ჯერ გამარჯვებას მეტყოდა, ხელს ჩამომართმევდა, ოჯახის ამბავს მკითხავდა. ჩემი დაც ძალიან უყვარდა. წერა-კით-

ხედავს ასწავლა. მეც მასწავლობდა, მაგრამ ვერ გაეუბნე. კაცი რომ ყოფილიყო, კიდევ შევეკადრებდი.—ცოტა ხანს ჩუმად იყო.

— თამარის ამბავიც იმან მოგვიყვა. ქართველების ხელმწიფე ყოფილა, მაგრამ მთელ დუნიას ეშინოდა თურმე მისი. შენც გეცოდინება მისი ამბავი.—მოუხედა ანდროს.

— ვიცი.—მიუგო ანდრომ.

— მაშ ტარიელის ამბავიც გექნება წაკითხული.

— წამიკითხავს.

— ძალიან დიდი ღონიერი ყოფილა. მღვებები და ქაჯები სულ გასწყვიტა თურმე. პირველად ისიც ჩემსავით დადიოდა ტყე-ტყე, კაცს არ იკარებდა. აი, დედასა, იმდენი ღონე მქონდეს, რა მიშავს! მაშინ ვინ გამიბედავს დელის დაძახებას!

— ანდრო უფრო დაუკვირდა მურადს. შეიძლება მართლაც აქვს ნიშანი შეშლილობისო, მაგრამ ვერაფერი შეატყო. მართალია, მურადი ხშირად აურევდა, ერთი ამბიდან მეორეზე გადავიდოდა, მაგრამ ანდრომ ეს სულ სხვა გარემოებით ახსნა.

— უკადრისი ქალი არ იყო ქეთო და იმიტომ უფრო შემოიყვარდა,—განაგრძო მურადმა—ერთხელ ჩვენსას მოვიდა, ყველაფერი დაათვალიერა ზაკუთარ ოჯახივით. ეს ასე არ უნდა გააკეთოთ, ეს აქ არ უნდა დადგათო. ასე არ უნდა ქამოთო. მაგრივად არ შეკეროთო. ყველაფერი დაგვიწუნა. ნაილეს არ სწყენია, როგორც ქეთომ უთხრა, ისე მოიქცა. მე ვიციანოდი, მიხაროდა. სასიხარულო იყო, მასწავლებელი გვესტუმრა. ნაილემ სთხოვა — მასწავლებლო, ანალამ დარჩი ჩვენსასო. მე მეგონა გაჯავრდებოდა, როგორც მკადრესო, მაგრამ... კარგი, აბა წიგნებს მოვიტანო, და გაიქცა. მართლაც მოვიდა, მოიტანა წიგნები, მაგრამ რა წიგნები! თოვდა გარეთ, ავაგუზგუზეთ ცეცხლი ბუხარში, მიეუჯექით აქეთ-იქედან და დავუწყეთ ყურისგდება. ისეთი ლექსები წაიკითხა, იმდენი ამბები, იმდენი, რომ ნახევარი არ მომაგონდება. ძალიანი იყო კაკო ყაჩაღის ამბავი. ვეყურბანე, კაცი ის ყოფილა. მთელი ღამე არ გვიძინია... ბედნიერი მისი ქმარი იქნება!—ცოტა არ იყოს ნაღვლიანად სთქვა მურადმა და მოუკიდა პაპიროსს, რომელიც ლაპარაკის დროს ჩამქრალიყო.

— სად არის ახლა ის ქალი?—ჰკითხა ანდრომ ცოტა სიჩუმის შემდეგ.

— ხომ გითხარი, ჩვენს სოფელში, მასეთ ადამიანს არ გააჩერებენ... მოიცილეს... გააგდეს.

— როგორ?

— დაითხოვეს.

— მიზეზი?

— მიზეზს მოგინახავენ, თუ მოინდომეს. ჩვენსას რომ ღამე გაათია, მეორე დღეს სკოლაში არ შეუშვენს. თავმჯდომარემ გამოაგდო, კახა ყოფილაო, დელ მურადთან იწვიაო. საშინელი ქორი მოუგონეს.

ანდრო დაინტერესდა. დაწვრილებით დაუწყო გამოკითხვა.

— თავმჯდომარე, იუსუფ-ალა და ხოჯა მამული შეკავშირებული არიან. რასაც მოინდომებენ, ყველაფერს გააკეთებენ—დაიწყო მურადმა და მოჰყვა რაც იცოდა.

— თავმჯდომარე დურსუნ შინდაძე სიძეა ხოჯა მამულის, იუსუფ-ალა ქონებიანი კაცია და ესაქიროებათ. რასაც იტყვის ხოჯა, იმას აკეთებს თავმჯდომარე, ხოჯის თქმული კი არასოდეს არაა ცუდი იუსუფისათვის. ხალხი მათ უყურებს: ხოჯა ჩივა, მთავრობაც ამას აკეთებს, იუსუფ-ალაც ამათკენაა, ჩვენ რას გავხდებითო — და არიან გაჩუმებული.

— თქვენში კომუნისტები არაა?—ჰკითხა ანდრომ.

— ჩვენი თავმჯდომარე თვითონ კომუნისტია. ერთი ფერშალია კიდევ, ისიც ამბობს კომუნისტი ვარო. მე არ ვიცი... მგონია, კიდევ არის ვიღაცა.

— შენ არ ჩაეწერები პარტიაში?—გაუღიმა ანდრომ.

— მე ვინ მიმიღებს! წერა-კითხვა რომ ვიცი...—

— წერა-კითხვას შეგასწავლით. შენ ის მითხარი, თუ გსურს იმუშაო პარტიაში?

— ელზეთ ვიმუშავებ!—ამაყად სთქვა მურადმა და გასწორდა.—მართლაც რომ ვისწავლიდე წიგნის კითხვას...—ლიმილით შეხედა ანდროს...

— ხომ გითხარი, გასწავლი-მეთქი.—შემდეგ ისევ იმ მასწავლებელი ქალის ამბავს დაუბრუნდა.

— იმ ქალს არ გაუსაჩივრებია ეს საქმე?

— არ ვიცი.—მიუგო მურადმა.—ამ სოფელში მაინც არ დაბრუნდებოდა. რატომ გაილანძლავდა თავს! მოსვლისას ვითომც კარგად მიიღეს, იუსუფ-ალასას დააბინავეს. შემდეგ შეუჩნდნენ, მაგრამ ვერაფერს გახდნენ, ეს ამბავი მოუგონეს... ყოჩალი იყო. ისეთი სიტყვები უთხრა თავმჯდომარეს, რომ ყველას გაგვიკვირდა. დაიცადეთ, მოგხვდებით მაგისათვისო. ჩვენ დაგვიბარა—ისწავლეთ ახალგაზრდებო, განოეჩვიეთ და მაგი ჯირკი ხევში გადააგორეთო... თავისი ყურებით ისმენდა დურსუნის, მაგრამ ენა ვერ დასძრა. აი, დედასა, ისეთი მშრომელი და ერთგული ჩვენს სოფელში აღარ მოსულა შემდეგ.

გზა თანდათან დაბლა ეშვებოდა და ბოლოს სულ მდინარის ნაპირს მიჰყვებოდა. გიჟი მდინარე ვიწრო კალაპოტში იყო მოქცეული. შიგ ბლომად ეყარა კლდიდან მოხეთქილი ქვები.

მდინარის ნაპირას ეყარა ფიქვისა და ნაძვის ხის მორები, დასაცურებლად გამოშვადებული. როცა მდინარე ადიდდებოდა, ამ მორებს მიაწვდიდნენ და მიყვებოდნენ ბათუმამდე, სადაც გაყიდდნენ და აღებული ფულით ოჯახისათვის საჭირო ნივთები მიჰქონდათ.

მდინარის გაღმა, ოდნავ შეფერდებაზე ჩამდენიმე სახლი მოჩანდა ყავრით დახურული. სახურავზე უამრავი ქვა ეწყო.

— ლურსმანს ვერ შოულობენ და ყავარს ქვებით ამაგრებენ— აუხსნა მურადმა ქვების დანიშნულება სტუმარს.

ქვემოთ, გაშლილ შეფენებაზე დასახლებული სოფელი მოჩანდა. ეს სოფელი უფრო ლამაზად იყო გაშენებული.

— ეს ჩვენი სოფელია.— მიუთითა მურადმა.

ანდრომ გაიხედა სოფლისაკენ. ერთნაირი სახლები იდგა, ორ-ორსართულიანი. ისინი მხოლოდ მოცულობით განსხვავდებოდნენ ერთი-მეორისაგან. ქვედა სართული დაყრუებული იყო, მუქის ოდენა ნახვრეტი ჰქონდა აქა-იქ დატანებული. წინიდან ერთი კარი. ან სართულში პირუტყვი ჰყავდათ დაბინავებული. მეორე სართულიც ისეთივე ფორმის იყო, როგორც პირველი, მაგრამ მას ჩამდენიმე ადგილას ჩატანებული ჰქონდა უფრო განიერი გამოქრილები, რომლებიც ფანჯრების როლს ასრულებდნენ. ეს ფანჯრები ყველგან ჩამოფარებული იყო—ზოგან ხალიჩების ნაგლეჯებით, ზოგან ძონძეებითა და ჩერებით. სოფლის შუა ადგილას, ყველაზე უფრო მოხდენილად მოჩანდა ჯამე. ახალაშენებული მინარეთი ცას ებჯინებოდა. ის ლურჯად იყო შეღებილი და ზედ მრავალნაირი სურათები იყო გამოხატული.

— ის ჩვენი ჯამეა—სთქვა მურადმა—იმ მინარეთის ასაშენებლად ოცი მანეთი გადამანდევინეს. ორი თბა გამიყიდეს... ქვემოთ რომ დიდი სახლია—იუსუფ-ალასია! შენ, ალბათ, იმისას დაბინავდები. ძალიან მდიდარია. მის გვერდით ხოჯა მამუდი ცხოვრობს. მთავრობის კაცები მუდამ მაგათსა ბინავდებოდნენ. ყველაფერი ბევრი აქვთ და პატივისცემაც იციან.

— შენ მირჩევ მისას დაბინავებას?— შეეკითხა ანდრო.

— მე რა ვიცი.— მხრები აიჩეჩა მურადმა. — კარგი ბინა რომ მქონდეს...— უნდოდა ეთქვა ჩემსას წაგიყვანდიო, მაგრამ ვერ გაუბედა.

— შენ რომ ჩემს ადგილას იყო, ვისას დაბინავდებოდი?—

და ანდრომ პასუხის მოლოდინში სათუთუნე ამოიღო.

— მე?—ჩაფიქრდა მურადი.—რა ვიცი. ყველას თავისი ხასიათი აქვს.—თვალეში შეაჩერდა ანდროს.

— მაინც ვისას დაბინავებოდი?—კიდევ ჰკითხა ანდრომ.

— ყველა ჩემისთანა ხომ არაა, მე გლეხი კაცის მკადის ნატეხი: მიჩვენია აღისა და ნოჯის სადილს... რა ვიცი... ყველა ჩემისთანა ხომ არაა...—კიდევ გაიმეორა მან.

— მაშ მე შენსას ებინავებდი. — მტკიცედ უთხრა ანდრომ და ღიმილით შეხედა.

— ჩემსას?

— ჰო, რას იტყვი?

მურადმა თითქო შეურაცყოფა იგრძნო. დამცინისო გაიფიქრა, მაგრამ ანდროს სახეზე დამცინავი გამომეტყველება რომ ვერ შენიშნა, სახე გაუბრწყინდა.

— არ მიკადრებ, თორემ...—თითქო აღმური მოედო ტანზე—ვინ მომცა იმდენი შეძლება ობოლ კაცს, რომ შენისთანა კაცს პატავი ვცე. ეჰ!—ამოიხენეშა და შემდეგ დააყოლა.—ღარიბ კაცს არავინ კადრულობს.—ერთხელ კიდევ შეხედა ანდროს და შემდეგ ტანზე დაიხედა.

ანდროს შეებრალა გულკეთილი ახალგაზრდა. შეუყვარდა კიდევაც სპეტაკი და მართალი გულის ადამიანი, რომელიც ცხოვრებას ისე უყურებდა, როგორც ხედავდა.

— შენ ფიქრობ მე სასახლეში გაზრდილი ვარ? არა, ჩემო ძმაო, ჩემს მშობლებს საკუთარი ქონიც არ ჰქონდათ. დაქირავებულ სარდაფში ვიდექით და იქიდანაც გამოყრით გვემუქრებოდა სახლის პატრონი, ბინის ქირის გადახდა რომ დაგვიგვიანდებოდა. ლუკმა ზური მუდამ გვენატრებოდა და ფეხსაცმელი არასდროს არ ღირსებია ჩვენს ფეხებს. მაგრამ დღეს, როცა ძალაუფლება ჩავიგდეთ ხელში, როცა თვითონ შევიქენით ჩვენი თავის ბატონ-პატრონი, ბედნიერი ვართ.—ცოტა ხანს შეჩერდა, კიდევ გახედა მურადს, რომელიც თავდახრილი იდგა. შეებრალა, დაეწვა გული და სანუგეშო სიტყვები მიაშველა.

— სიღარიბე ჯერჯერობით სირცხვილი არაა ჩვენში. ძველმა წესწყობილებამ დაგვიტოვა ის და ასე უცებ ვერ მოგვიშორებია. მაგრამ ძალიან მალე ჩვენ მაგ სიტყვასაც გავაუქმებთ.

მურადს გული აუთრთოლდა. თავიდან ფეხებამდე დაათვალიერა ანდრო და თავისთვის გაიფიქრა: „ნუთუ ჩემზე მეტი სიღარიბე გაუვლია ამას“.

— მართლა დაბინავებდი ჩემსას?—დაბალი ხმით შეეკითხა ის:

— თუ თანახმა იქნები...'

— შენს უკეთესი ვინ მოვა ჩემს ოჯახში! ღარიბად ვარ, მაგრამ ყველაფერს გავაჩენ... გავყიდი რამეს... რძე, ყველი და მაწონი მაქვს. ხანდახან ქათამსაც დავეკვლავთ... ნაილემ ისეთი კარგი გაკეთება იცის, რომ მოგეწონება. ქეთომ ასწავლა... კარგი იქნებოდა ახლა, ქეთოც იყოს ჩვენს სოფელში... ორი ოთახი მაქვს, ერთი სამზარეულო. ერთ ოთახს მოგიწყობ კარგად. მეორეში მე და ჩემი და მოვთავსდებით. თუ ვინმე გესტუმრება... საგებ-სახურავსაც გიშოვი...

— არაფერზედაც არ შეგაწუხებ—შეაწყვეტინა სიტყვა ანდრომ.—ყველაფერი საკუთარი მაქვს. თუ შენსას დავბინავდები, ბინის ქირასაც მოგცემ. სასმელ - საკმელშიც ფულს გადავიხდი.

— რას ამბობ!—შეუხტა მურადი.—როგორ შეიძლება! ალა ხომ არ ვარ... — ცოტა ხანს გაჩუმდა, შემდეგ ექვის თვალით ახედა.

— მეხუმრები, შენც იუსუფ-აღასას დაბინავდები, როგორც სხვები—სთქვა გულნატკენად და გაიხედა თავის სახლისაკენ. რომელიც ყველაზე საწყლად გამოიყურებოდა სოფლიდან.

— პატიოსან სიტყვას გაძლევ, შენსას დავბინავდები.

— კიდეც არ მჯერა.—ყოყმანით სთქვა მურადმა.

— ბოლშევიკურ სიტყვას გაძლევ. გესმის?

მურადი რეზინის ბურთივით შეუხტა და შემოტრიალდა.

— მომეცი ხელი.—ორივე ხელი დასტაცა ანდროს ხელს და მაგრად ჩამოართვა.

მდინარეს მიაღწენენ. ცხენი თითქო მიხვდა, როგორ უნდა მოქცეულიყო, ცოტა ზევით შეჰყვა მდინარეს და ფონი მონახა. მურადი და ანდრო ძლივს გავიდნენ ვიწრო ხიდზე.

— განა ესეც სიღარიბის ბრალია, აქ რომ სასიკეთო ხიდი არა გაქვთ?—უთხრა ანდრომ და თვითონვე გასცა პასუხი...—პირიქით, სიღარიბე და გაჭირვება ამ უგზოზის ბრალია, ჩემო კარგო...—კიდეც უნდოდა ეთქვა რაღაცა, მაგრამ მურადმა დაასწრო.

— უთაობის ბრალია, უთაობის—თქვა მან.

— მართალია.—დაუმოწმა ანდრომ.

შევიდნენ სოფელში. გარედან უფრო ლამაზი მოჩანდა აქაურობა, ახლოდან ის სრულიად არ იყო მოსაწონი.

ვიწრო და უსუფთაო შუქები, ნეხვით სავსე ეზოები და უგეგმოდ აგებული სახლები ერთმანეთში იყო არეული.

ჯამესთან ახლოს იდგა ძველი შენობა, რომელშიაც სასოფლო საბჭო მოეთავსებინათ. იქვე შედრესე, ცოტა განზე—სკოლა.

ეს უკანასკნელი ახალაშენებული იყო, მაგრამ მოუვლელი და უპატრონო. არც ერთი მინა არ შერჩენოდა ფანჯრებს, აივნის იატაკიც აეყარათ და ფიცრები აქა-იქ ეყარა ეზოში.

საბჭოს შენობის წინ ჩრდილში გლეხები ისბდნენ და ბალი ხმით ლაპარაკობდნენ. მათში ორი ღრმა მოხუცებული ერია. ისინი ხანდახან ჩაერეოდნენ ლაპარაკში, მაგრამ როცა რასმე იტყოდნენ, ყველა გაკმედდა ხმას.

შორიასლო ბავშვები თამაშობდნენ. მხოლოდ ერთს ეცვა ქალამნები, დანარჩენები ფეხშიშველი იყვნენ. ჯამესთან, სადაც წყარო იყო გამოყვანილი, გოგონები გაჩერებულყვნენ, სპილენძის თუნგები ეჭირათ ხელში და იცდიდნენ. ძალიან ცოტა წყალი მოდიოდა ღარზე და თითო თუნგის ავსებას რამდენიმე წუთი სჭირდებოდა. გოგონებს ფერადი ჩითის კაბები ეცვათ, დანაოქებული, კოჭებამდე წვდებოდათ, თავზე მოხვეული ჰქონდათ დოლბანდის თავსაფარი (იაზმა). მართალია, ისინი ჯერ კიდევ არ იყვნენ იმ ასაკში, როცა სჯული სახის გამოჩენას უკრძალავს, მაგრამ მამაკაცის დანახვაზე მაინც იბურავდნენ თავპირს. აქედან ეჩვეოდნენ წესებს.

გალმა - გამოღმა სერები სიმინდის აბიბინებული ყანებით იყო დაფარული. აქა-იქ ამ ყანებში მოსჩანდნენ ქალები თოხით ზელში. ისინი თეთრ ტანსაცმელში იყვნენ გამოწყობილი, თავზე თეთრი იაზმა შემოეხვიათ და მარჯვედ იჭნეოდნენ თოხს. თითო-ოროლა მამაკაცებიც გამოსულიყვნენ სამუშაოდ. ისინი მარტოდ ან თორმეტ-ცამეტი წლის ბიჭთან ერთად თოხნიდნენ.

— ისინი ყველაზე ღარიბებია. ბეჩებს ეძახიან მათ. ცოლებს არ ამუშავენბენო, ამბობენ.—აუხსნა მურადმა ანდროს სამუშაოდ გასული გლეხების შესახებ.

— ოჯახში ვინლა რჩება?—იკითხა ანდრომ, რამდენიმე წუთი გაჩერდა და უცქირა ქალების მუშაობას.

— ბავშვები. ან სულ არავენ. რა საქმე აქვთ ოჯახში! სადილი დილით ადრე უნდა გააკეთონ და საქონელს კაცები უეღლიან. ასეა განაწილებული: კაცები დათესვაზე მუშაობენ და ნარჩენი ქალების საქმეა...

— კარგია მერე ეს?

— რა ვიცი... მე რომ ცოლი მყავდეს...—მხრები აიჩეჩა—სხვა საქმეზე ვამუშავებდი. თუმცა... ძნელია მიწის მუშაობა. შენ გიმუშაენია ყანაში?

— მიმუშაენია—მიუგო ანდრომ.

— კარგი სამუშაოა?

— როგორ გითხრა. უსათუოდ მაგარი სამუშაოა, მაგრამ მით უფრო ცუდია ქალებისათვის.

მურადმა გაიცინა.

— ქალებისათვის არაა ძნელი. — თქვა მან. — ერთი ქალი ცხრა უღელი კამეჩის ოდენას გასწევსო. იტყვიან. ჩვენებური ქალი მეტსაც შესძლებს. დაიცადე, დარჩები ჩვენში და ნახავ. ცოლიანი ხარ?

— არა.

— შეირთე აქაური ქალი. — შემდეგ სიცილით დაუმატა. იუსუფ-ალას ყავს ერთი კარგი გომბიო. ხისიმია მისი.

— მოგწონს?

— რომ მომწონდეს მერე რა. ვინ მომცემს. ბეგის შვილისათვის უნდოდა, მაგრამ ახლა ბეგობა აღარ არის და...

კიდევ უნდოდა რაღაც ეთქვა, მაგრამ შუკაში ერთი მაღალი, სქელი, ოღნავ შეჭალარებული კაცი გამოვიდა და პირდაპირ ამით შეეჩება.

— გამარჯობათ! — უთხრა ანდრომ გვერდით ჩავლისას მას. მან კი რაღაც დაიბურღლულა და ჩაიარა.

— ეს არის იუსუფ-ალა! — ჩუმად უთხრა მურადმა.

ანდრომ გვერდზე გახედა უცნობს და შემდეგ მურადს მიუბრუნდა.

— ვაჟაკის შეხედულება აქვს — უთხრა მან.

— ყაჩალია.

— მართლა?

— არა, ისეთი ყაჩალი კი არაა, წიგნებში რომ სწერია. ეს ჭალხს სძარცვავდა. იაილებზე საქონელს სტაცებდა ქურთებს. არდაგანში გადადიოდა. იქედან კონტრაბანდა შემოჰქონდა. ხიმშიაშვილთან კარგად იყო და არვისი ეშინოდა.

— ახლა?

— ახლა. ცხოვრობს დიდებულად. ფული აქვს გასესხებული. კონტრაბანდისტებს იცნობს, მთავრობაში კაცები ყავს და... ყველაფერი მის ხელშია. ელბეთ შენც გაიცნობ და კიდევ მისი დამხმარე იქნები. — თქვა მურადმა და ანდროს შეხედა.

— ასე გგონია?

— მთავრობის კაცები ყველა ასე შევბოდნენ.

— ჩვენი მთავრობა კი არაა ისეთი.

— არ ვიცი. — ამოიხენეშა მურადმა და ცხენს ლაგაძთი

მოჰკიდა ხელი. ის კიდევ ვერ დარწმუნებულყო, რომ ანდრო მის ოჯახში დაბინადებრდა, გვერდს აუვლიდა იუსუფ-ალას, საბჭოს თავმჯდომარეს, ან კიდევ უფრო გავლენიან პირებს.

არ უნახავს, არ ყოფილა ასეთი მაგალითი. ვინ იკადრებდა ფუხარა კაცისას მისვლას, ღარიბი კაცის ოჯახში დაბინავენას!

იყვნენ მოხერხებული გლეხები, რომლებიც იყენებდნენ მთავრობის კაცებთან დაახლოვებას.

მურადმა ერთი ამბავი მოუყვა ანდროს, სანამ საბჭოს შენობასთან მივიდოდა.

იუნუს ბეჟიოღლი ღარიბი, მაგრამ გამოქნილი კაცი იყო. ერთ-ერთ აისესხა მეზობლებიდან ზოგიდან ფული, ზოგიდან ქონახული, ამუშავა ხუროები. დაიდგა მშვენიერი სახლი და ბოლოს ყველა მევალეს უარი უთხრა. დაესიენენ აქეთ-იქედან. ზოგმა გადაწვა შეპირდა და შეიძლება მართლაც აესრულებინათ, მაგრამ, გავიხედოთ, ერთ დღეს სოფელში მაზრის უფროსი მოვიდა რამდენიმე რუსი მოხელის თანხლებით.

— სად ცხოვრობს აქ ბატონი იუნუს ბეჟიოღლი? — იკითხა მან. ყველას გაუკვირდა, რომ მაზრის უფროსი იუნუსას მორიდებით იხსენიებდა. მიასწავლეს. იუნუსა მიეგება დიდი ხნის ნაცნობივით, ხელი ჩამოართვა უფროსსაც, მის მხლებლებსაც, შეიყვანა სახლში, გაუმაროა დიდი ქეიფი, მოიყვანა ზოგიერთი მისი მევალე და გააცნო. ძალიან გთხოვთ ბატონო ნაჩანიკო, დაეხმაროთ ამათ. საწყლები არიან, მაგრამ დიდი ერთგული არიან თქვენით—უთხრა.

მაზრის უფროსს რა ენაღვლებოდა: კარგი, ყველაფერში დავებმარებიო და იმ გლეხებიდანაც მიიღო ოქროს თუმნიანები.

იმის შემდეგ ვინ გაბედავდა ეჩივლა ბეჟიოღლისათვის. აღას ეძახდნენ და ყველა მის პატივისცემას ცდილობდა. ნაჩაღნიკთან აქვს საქმეო, მთავრობა იცნობსო—ამბობდნენ.

მურადი არ ფიქრობდა ასეთ სახელზე, მაგრამ ანდროს დაახლოება მაინც ახარებდა—წიგნების კითხვას მასწავლისო—ფიქრობდა. ქალაქში წავალ, ნაიღესაც იქ წავიყვანო.

ქეთო მოაგონდა. სულ იმის ბრალია, რომ ასე გაიტაცა სწავლის სურვილმა მურადი. როგორ მშვენიერად კითხულობდა ქეთო წიგნებს! რა კარგი ხასიათის იყო! ნეტავი ის არ წასულიყო ამ სოფლიდან.

— რომ არ მოგცენ ჩემსას დაბინავენის ნება? — კიდევ დაეკვებით ჰკითხა მან ანდროს, როცა საბჭოს შენობას მიუახლოვდა.

— ვინ დამიშლის?

— მთავრობას ყველაფერი შეუძლია. თავმჯდომარე დიდი კაცია, შეუძლია გიბრძანოს....

— დარდი ნუ გაქვს.—ხელის ჩაქნევით უპასუხა ანდრომ.—მე აქ პარტიამ გამომგზავნა.

— გეტყვის, მურადი დელიაო, არაფერი არ მოეძევაო... ლარიბიაო და...

— არ დავიჯერებ. საერთოდ ეგ არაფერია. შენ საბჭოში მიმყევი და თქვენი თავმჯდომარე გამაცანი — უთხრა ანდრომ. აღვირი გამოართვა ხელში და ცხენი ბოძთან მიიყვანა დასაბმელად.

— არა. მე ვერ შემოვალ მასთან. არ მოსწონს ჩემი ნახვა. არც მე მიხარია მისი შეხვედრა... აქ დაგიცდი. ცხენს დავიკავებ.— აღვირში სწვდა. — შენ შედი. აი იმ კიბეზე ახვალ. იქვეა ოთახი.— უთხრა, ცხენი გამოართვა და გაატარ-გამოატარა.

ანდრო საბჭოს შენობაში შევიდა....

ჩარილქვეშ მჯდომმა გლეხებმა თვალი გააყოლეს ახალმო-სულს, ჯერ ერთმანეთს გადახედეს უხმოდ და შემდეგ ალაპარაკ-დნენ. •

— კიდევ ახალი მასწავლებელი გამოუგზავნიათ—ჩაილაპარაკ-ა ერთმა.

— ჯანდაბას მაგათი თავი. რა ოხრად გვინდა მაგათი სწავლა!

— განა ჩვენთვის გეასწავლიან? — ჩაერია ლაპარაკში ერთი ახალგაზრდა, რომელსაც წვერები მოშვებული ჰქონდა და თავი თეთრი იაზმით შეხვეული. ის უფრო მოშორებით იჯდა და იშვია-თად ერეოდა ლაპარაკში.

— მართალს ამბობს მოლა — სთქვა ხანშესულმა კაცმა. სწავლით თავიანთ საქმეს იკეთებენ. ჩვენ ბაღეები მედრესეში ვერ გაგვიშვია, ლოცვები და წინასწარმეტყველის კანონები ვერ შეგვისწავლებია, იმდენი საქმეები გვაქვს, და აქ კი სკოლა გაგვი-ხსნეს!

— სწორია, სწორია!—დაუმოწმა ისევ ახალგაზრდა მოლამ.— რჯულის კანონების სწავლა უფრო საჭიროა—და თავისი სიტყვის დასასაბუთებლად რაღაც არაბული სიტყვები წარმოსთქვა.

გლეხებს არაფერი გაეგებოდათ იმ სიტყვების, მაგრამ მაინც ჩაიქნიეს თავი, თითქოს ამბობდნენ,—მართლაც რომ დიდი სიბრ-ინეა მაგ სიტყვებშიო.

— თქვენ ნახავთ, თუ ეს კაცი გადასახადების ასაკრეფად არ იქნება ამოსული!—ყუმბარასავით გაისროლა ვილაცამ.

ყველამ მრისხანედ გადახედა მთქმელს და შემდეგ საბჭოს

შენობის კარებს მიაჩერდნენ, სადაც ორი წუთის წინ ანდრო შევიდა.

— ამოგებადონ ბარემ სული!—წყრომით სთქვა ერთმა და მაგრად შეიკურთხა.

— დელ მურადას ვკითხოთ. მას მოჰყვებოდა. ეტყოდა რისთვის მოვიდა—სთქვა მეორემ და გასძახა:—დელი მურადავ, ამოდი აქით!

მურადმა მწრალად ჭაიხედა იმათკენ. არ ესიამოვნა „დელი მურადას“ დაძახება. ანდრომ ზომ გაიგონოს, მართლაც დელი ვეგონები, ჩემსას არ დაბინავდებო—გაიფიქრა. არ უნდოდა მისვლა, მაგრამ, უარესი იქნება, უფრო მეტად დამცინებენო—სთქვა თავისთვის, ცხენი ალუბლის ტოტზე გამოაბა იქვე და თვითონ ჯღენებთან მივიდა.

— დელი მურადავ, ვინაა რომ მოგყვა?—ჰკითხა ყველაზე უხნესმა გლებმა იქ მყოფთაგან.

— მთავრობის კაცია—მიუგო მურადმა.

— გაუფრი ყველა მთავრობისაა!—მწყრალად სთქვა ახალგაზრდა მოლამ.—რა საქმისაა?

მურადმა ყურიც არ ათხოვა მას. მოლას ეს ძალიან ეწყინა, უნდოდა რაღაც მეტად მწარე, მეტად საწყენი ეთქვა მურადისათვის, მაგრამ გვერდით მჯდომმა გლებმა უჩრია არ გალაპარაკებოდა.

— დელია, რა პასუხი უნდა მოგცეს?

— დელია და ბრიყვიც!—დაუმატა მოლამ. გული მოიფხანა ამით და დელ მურადს ზურგი შეაქცია.

— გადასახადებისთვის მოდის?—იკითხა ერთმა ჩოფურა გლებმა.

— არა.—უპასუხა მურადმა.

— მაშ რა საქმე აქვს?

— დასახმარებლად მოვდივარო—განმარტა მურადმა.

გლებებმა ერთმანეთს გადახედეს.

— თონებაში თუ დაგვეხმარება!

— ან მორების დაცურებაში!

— ვიცი, ვიცი, რა დახმარებაც იციან მთავრობის კაცებმა!—ჩაილაპარაკა ვილაყამ—კრებას! გაგვიმართავს და ისწავლეთო გვეტყვის. ესაა მაგათი დახმარება.

არ მოასვენეს მურადი შეკითხვებით. ყველას აინტერესებდა გაეგო უცხო კაცის მოსვლის მიზანი, მაგრამ პასუხი მათ ვერ აცმაყოფილებდა.

მურადი აშეიდებდა მეზობლებს: კარგი კაცია, კეთილი გული აქვს, თავდადებული და პატიოსანია, ძალიან ბევრს დაგვენ-მარებო; მაგრამ ვინ დაუჯერებდა.

— დაანებეთ თავი, დელმა რა პასუხი უნდა მოგცეთ! — ჩაილაპარაკა ახალგაზრდა მოლამ და თურქულად შეიგინა მურადის მისამართით.

მურადი თოფის წამალივით აფეთქდა.

— გამიშვით, გავგლიჯო ეგ ლორიშვილი! — იყვრა მან და ვეფხვივით გადახტა. გლეხებმა გადაულობეს გზა, მაგრამ ერთი დარტყმა მაინც მოასწრო.

მოლას ხმა არ ამოუღია. ის ხეს მოეფარა და თავისებურად არაბული სიტყვებით ალულლულდა.

რამდენიმე კაცი შემოეხვია მას, დანარჩენები მურადს დაესივნენ.

— მიუყვანოთ თავმჯდომარეს, მიუყვანოთ! — იძახდნენ ისინი.

— მოგვაშორონ, მოგვაშორონ, დელი!.. — აღრიალდნენ გლეხები.

მურადი დამშვიდდა. ახლა იგრძნო, რომ დააშავა. სჯობდა მოეთმინა და ასეთი საქმე არ ჩაედინა. არ აეჯანყებინა მეზობლები მის წინააღმდეგ. ახლა ხომ მართლა შეუძლიათ მოსთხოვონ მთავრობას, გადაასახლე დელი ჩვენი სოფლიდანო. მერმე რა დროს! როცა აქ არის ანდრო, რომელიც მურადსასს უნდა დაბინავებულიყო. ახლა კი... საშინლად აემღერა გული მურადს — ანდროსაც ხომ დაარწმუნებენ, რომ მურადი დელია, რომ მან მასწავლებელ ქალთან გაათია ღამე, რომ ის მუდამ ტყეში დახეტილობს, რომ ის ხელს უშლის მშვიდობიან მცხოვრებლებს.

საშინელმა ტკივილებმა დაუსერა გული.

— გამიშვით ხელი — გაქანდ-გამოქანდა ის და გლეხები იქით-აქით მიყარ-მოყარა.

— რა გინდათ ჩემგან — და ქვემოთ წავიდა, რომ საბჭოს შენობას მოსცილებოდა, როგორმე დაეთარა ეს შემთხვევა ისე, რომ ანდროს არ გაეგო. მაგრამ გლეხებმა ის გააჩერეს. მაგრად ჩასქიდეს ხელი და ყვირილით წაიყვანეს საბჭოსაკენ.

— რა ამბავია? — გამოვიარდა კარებში თავმჯდომარე და გლეხებს მალლიდან გადმოადგა.

— მოგვაშორეთ დელი! მოგვაშორეთ გადარეული! — შეეგეზა თავმჯდომარეს რამდენიმე ხმა.

მურადმა აიხედა ზევით და თვალები ველარ გაუმავრა: თავმჯდომარის გვერდით ანდრო იდგა და გაკვირებული იტყობოდა.

— რაშია ხალხო საქმე?—გადმოსძახა ისევ თავმჯდომარემ.

— კაცი გაგვილახა! კაცი გაგვილახა! მოგვაშორეთ დელი!—
უპასუხა ისევ რამდენიმე ხმამ.

— კაცი გალახა?—ბრაზით სთქვა თავმჯდომარემ და სწრაფად დაეშვა კიბეზე.

ანდრო ფეხდაფეხ ჩამოჰყვა.

— კიდევე ვერ მოგაშლევინე შენ დელობა?—და გაშლილი ხელი მოუქნია რაც ძალი და ღონე ჰქონდა. უნდა გაერთყა, მაგრამ...

— შესდექ!—და ანდრომ გაუჩერა ხელი თავმჯდომარეს.

თავმჯდომარემ მრისხანედ მოუხედა ანდროს, მაგრამ რომ მეტი მრისხანება შენიშნა ჯერ კიდევე გაუცნობელი კაცის სახეზე, მოეშვა, ნაძალადევად დაიმშვიდა გული.

— გრძნობიდან გამოვალ კაცი ამ დელის გადაშკიდე...—
ჩაილაპარაკა მან. შემდეგ ხალხს გადახედა.

— ვინ არის ხალხო გალახული?

— მოლა ნური!—ერთხმად უპასუხეს გლეხებმა.

— ეს მერამდენეა!—მიუბრუნდა ანდროს თავმჯდომარე—
დღე არ გაივლის, რომ ვინმე არ გალახოს, რომ ვინმეს არ წაეჩხუბოს. დელია, რა გაეწყობა. მონდოდა გადამეგზავნა საგიჟეში, მაგრამ ვერ მოვახერხე. არც დამეხმარა ვინმე.

ანდრომ მურადს გადახედა. ის იღვა თავდახრილი მიწას მისჩერებოდა და ხმას არ იღებდა, ხოლო სხეული უთრთოვდა, თვალები ამღვრებოდა, ტუჩები უცახცახებდა.

დაენანა ასეთი ვაჟკაცის დაღუპვა ანდროს. დაექვდა. ვინ იცის იქნებ მართლა გიჟია, მართლა უელისო — გაიფიქრა, ახლო მივიდა და მხარზე დაადვა ხელი.

— მურად, რა ჩაიღინე?—შეეკითხა იგი ტკბილი ხმით.

მურადმა არაფერი უპასუხა.

— არ მეტყვი რა ჩაიღინე?—გაუმეორა ანდრომ.

მურადმა თავი ასწია, პირდაპირ შეხედა ანდროს და ორი მარგალიტის მგავსი ცრემლი გადმოვარდა თვალებიდან.

— რა მოგივიდა მურად? ავად ხარ?—მკლავზე მოჰკიდა ხელი ანდრომ და თვალებში ჩახედა.

— არა. — თავის გაქნევით დაადასტურა უარი მურადმა.—
არა. ავად არ ვარ.—გაიმეორა კიდევე — მაგრამ სიკვდილი მიჩვენებია...—ვერ დაამთავრა სიტყვა. ცახცახი აუვარდა და სახეზე აღმოჩნდა მოედო.

— წადი სახლში, მოისვენე. დამშვიდდი. — მხარზე ხელის დადებით უთხრა ანდროს, როცა შეატყო, რომ არ იძროდა.

— სახლში?—გაიმეორა მურადმა. შემდეგ თავი ასწია და ანდროს შეხედა—შენ?—კითხა მან.

— მოვრჩებო საქმეს და მოვალ.

მურადმა მწარედ გაიღიმა, შემდეგ თავი ჩაიქნია.

— მოხვალ— თითქოს თავს დაცინისო, ისე წარმოსთქვა მან და მაგრად მოკუმშა თითები.

ანდრო მიუხვდა, მაგრამ არ აგრძნობინა.

— წადი მეთქი, ცხენი მოშვივებულა. წაიყვანე, აქამე რამე, თორემ შეიძლება კიდევ რამდენიმე საათი დამაგვიანდეს.

მურადს სახე გაუბრწყინდა. უცებ მიტრიალდა. ალუბალზე ნიბმული ცხენი ახსნა და ანდროს მოუბრუნდა.

— ხომ ხედავ. აი იმ სახლში ეცხოვრობ.—თითი გაიშვირა მან თავისი სახლისაკენ. შემდეგ მიუბრუნდა და ჩქარი ნაბიჯით წავიდა.

გლეხებმა თვალი გააყოლეს მიმავალ მურადს, შემდეგ ანდროს ახედ-დახედეს და ერთმანეთს ჩაულაპარაკეს.

— ვინ იცის, იქნებ არ იყოს დელი. რას იტყვი, დურსუნ ეფენდი?—შეეკითხა ერთი გლეხი თავმჯდომარეს.

თავმჯდომარემ მწყურალად გადახედა გლეხს.

— შენი ჭკუისა! — მიუგო მას და ანდროს მიუბრუნდა წამობრძანდით ამხანაგო!—მიტრიალდა და ჩქარი ნაბიჯით წავიდა.

გლეხებმა თვალებით გააცილეს ისინი. შემდეგ ერთმანეთს გადახედეს და თავიანთ გულშიც ჩაიხედეს.

II

ბუდიდან ამოფრენილი წიწილი ნაილემ კარებთან მიამწყვდია, დაიქირა, ხელში აიყვანა და მიიხუტა გულზე.

— აი, შე ცელქო, გარეთ გავარდნას ფიქრობ? — თავზე აკოცა, —ჯერ პატარა ხარ. გაიზრდები და მე თვითონ გაგიშვებ გარეთ.—წაიყვანა და ჩასვა ბუდეში, რომელშიაც თუთხმეტამდე წიწილი კიდევ იყო, და ზემოდან ძველი ტომარი წააფარა.

კარებზე ვიდაცამ ფრთხილად დააკაკუნა.

ნაილე სწრაფად მიტრიალდა. კარებთან მიიბრინა და სმენად იქცა.

— ნაილე, სახლში ხარ?—მოისმა გარედან, თან ფრთხილი კაკუნიც განმეორდა.

— ნაზიმე!—შესძახა ნაილემ და კარები გააღო.

სახლში საშუალო ტანის, ლამაზი სახის და მოხდენილი აგებულების ქალიშვილი შემოვიდა, უფრო კი შემოვარდა, ვინემ შემოვიდა.

— მარტო ხარ?—ჰკითხა მან ნაილეს შემოსვლისთანავე.

— ელბეთ. რა მოგივიდა.

— არაფერი. მარტო მინდოდა მენახე...—იაზმა, რომელიც თავზე ჰქონდა შემოხვეული, მოიძრო და ნაილეს მოახვია.

— წავიდეთ ოთახში.—ნაილემ ხელი მოხვია ამხანაგს წელზე და სასტუმრო ოთახში შეიყვანა. — დაჯექი — განიერ ტანტზე დასვა და თვითონაც მიუჯდა.

— ვერაფერი მოაფერე?—თვალეებში ჩახედა ნაილემ ამხანაგს.

— ვერა.—უპასუხა სტუმარმა და თითებს მტკრევა დაუწყო.

— რას აპირებ მერე?

— თავი უნდა მოვიკლა. ისეთი კაცის ხელში ცხოვრებას სიკვდილი ბევრად სჯობია.—ტრემლები მოადგა თვალეებზე და იაზმით მოიწმინდა.

— რას ბეჩობ.—ხელზე მოჰკიდა ხელი ნაილემ.—თავის სიკვდილი რამ გაფიქრებია?

— აბა რა ექნა, თუ არ მინდა იმ კაცთან ცხოვრება?!

— ნუ წაყვები, უარი უთხარი. არ მინდა გათხოვებათქო ნაზიმემ ამოიოხრა.

— ჩემს დღეში რომ იყო, წყალში გადაეარდებოდი... ბედნიერი ხარ ნაილე, ნეტავი შენ, ვისაც გინდა იმას გაყვები ვერც მამა დაგიშლის, ვერც დედა...

— ობლობას ნატრობ?

— გლახა პატრონს უპატრონობა სჯობია... უბედურები ვართ ჩვენი ქალები. ვისაც გვინდა ვერ წაყვებით, ვისთანაც გვინდა ვერ მივალთ. რა გესურს ვერ ვიტყვით... გიაურები გლახაა, მაგრამ... იმათი წესი კი...

— კიდევ გიაურობა!—წყრომით სთქვა ნაილემ.—ყველა ავი კაცია გიაური. ჩვენ რომ გიაურებს ვეძახით, ისინი ნამდვილად ადამიანებია. ხომ გახსოვს, მასწავლებელი ქეთო რომ ამბობდა, ადამიანი ყველა ერთნაირია, ყველას ერთნაირი ცხოვრება უნდაო. ქალი და კაცი თანასწორი უნდა იყოსო...—ჩაფიქრდა ნაილე.—ჰო, „ლექვი ლომისა სწორია, ძუ იყოს თუნდა ხვადიო“, იცი, რას ნიშნავს ეს?

— არა.

— თურმე ხელმწიფეს მხოლოდ ქალიშვილი ყავდა. როცა მეფე მოხუცდა, დაფიშმანდა, ჩემს მაგივრად ხელმწიფედ ვინ დავსვაო. შეკრიბა ბრძენი კაცები და რჩევა სთხოვა.

— შენი ქალიშვილი დასვი ხელმწიფედო—უთხრეს თურმე, ქალია მარა სულ ერთია—ლომის ლეკვი დედალი იქნება თუ მამალი, მაინც ლომიაო... ხომ გაიგე. ქეთომ მელაპარაკა ეს ამბავი... ცოტა ხანს იყუჩა და შემდეგ განაგრძო.—ის რომ ახლა აქ იყოს, დაგეხმარებოდა. ხომ იცი რას ამბობდა: ძალად გათხოვება აკრძალულია, მთავრობა დასჯის თუ გეიგოო... ჰოდა ასეა. მურად რომ მოვა, იმას ვკითხავ. მან იცის მთავრობის ამბები.

— მურადს... — უნდოდა ეთქვა არაფერი დაეჯერება, დელიაო, მაგრამ ვერ გაბედა. იცოდა, ნაილე არავის აპატიებდა ძმის გალანძღვას და ამიტომ სიტყვის დაუმთავრებლად დატოვება ამჯობინა..

— მურადს არ დაეჯერებო, გინდოდა გეთქვა?—მიუხვდა ნაილე ამხანაგს—ნახავ თქვენ, თუ მურადი დელია. დაიცათ. მოვაგროვო ფულები, ბათუმში წავეყვან, აქიმებს გავასინჯებ, ქელელს გამოვართმევ და ამოვიტან. მურადი რომ დელი იყოს, ასე იქნება?!

ნაზიმემ შეატყო, ეწყინა ამხანაგს და უხერხულობა იგრძნო.

— არა, ნაილე. რახან ვთქვი, დელია მეთქი... ჰრა, მასე არ მინდოდა მეთქვა.—დაიწყო თავის მართლებას მან.

— შენ კი არა, სხვებიც დელს ეძახიან. მაგრამ ვნახოთ—ვიწრო ფანჯარაში გაიხედა, გული დაეწვა, რომ მის ერთადერთ ძმაზე ასეთი წარმოდგენა აქვთ. დელად, გადარეულად სთვლიან. მაინც სადაა, ამდენი ხანო, გაიფიქრა. სამი დღეა წასულია სადღაც და ნაილეს სტანჯავს მასზე ფიქრები.

კარგახანს ისხდნენ ქალიშვილები და თავთავიანთ ფიქრებს ესაუბრებოდნენ. ნაილე ძმაზე ფიქრობდა, ნაზიმე—მომავალ საქმროზე, რომელიც მის მშობლებს აკვანშივე გამოენახათ მისთვის. ექვსი თვის ნაზიმე დაენიშნათ ერთ გლეხის შვილზე, მაგრამ თექვსმეტი წლის ნაზიმეს აღარ უნდოდა მითხოვება მშობლების მიერ არჩეულ საქმროზე.

არც ნაზიმეს მშობლები იყვნენ მაინცადამაინც კმაყოფილი მათ მიერ არჩეული სასიძოთი. თექვსმეტი წლის განმავლობაში ბევრი რამ გამოიკვალა და ამ ცვლილებამ მათზედაც მოახდინა

გავლენა, მაგრამ სიტყვის გატეხა, უაროს თქმა და ნიშანის დაბრუნება უბედურებას მოასწავებდა. ხშირად საშვილიშვილო სისხლი ითვისება ასეთი საქმის გამო. მშობლებს ექვსი შვილი ჰყავდათ ნაზიმეს გარდა და ამდენი ადამიანის გაუბედურებას ისევ ნაზიმეს გაუბედურება სჯობდა.

ამის გამო იყო, რომ ისინი ვერაფერს ბედავდნენ. ხოლო ნაზიმე თავის გულში იწვოდა და იხრაკებოდა. არ უნდოდა და არა, გაყოლოდა მისთვის არა საყვარელ ადამიანს, თუმცა საქმროს ოჯახი არც ისე დასაწუნი იყო და არც საქმრო იყო ცუდი ბიჭი.

— კაცი მიყვარდეს და თუნდაც არაფერი ჰქონდეს!—ამბობდა ის თავის გულში. ყველა უფრო მოსწონდა, ვიდრე მშობლების მიერ არჩეული საქმრო. რატომღაც ეჯავრებოდა ნურის და ნახვა. ნეტავი მოკვდებოდესო, ნეტავი მეწყერს მოყვებოდესო—ნატრობდა. სრულიად უდანაშაულოდ სწყევლიდა ახალგაზრდა კაცს.

ნური კი შორიდან ადევნებდა თვალყურს საცოლეს. კმაყოფილი იყო ბედისა და მშობლებისაც, რომ ასეთი კარგი ქალი დაუბევეს მას თავის დროზე და დღედღეზე ელოდა ნაზიმესთან შეუღლებას, წინასწარ ოცნებობდა მომავალ ბედნიერებაზე, ოჯახზე, შვილებზე, მტერ-მოყვარეზე და სრულიად არ ფიქრობდა იმაზე, თუ ამ დროს რას გრძნობდა მისი დანიშნული.

— გლახა ბიჭი არაა ნური.—თითქო ახლს მოაგონდაო, ისე უთხრა ნაილემ ამხანაგს კარგახნის სიჩუმის შემდეგ.

ნაზიმე გამოერკვა ფიქრებიდან. იაზმის ყურით ამოიწმინდა თვალები და ამხანაგს შეხედა.

— არ მიყვარს, არ შემიძლია მასთან ცხოვრება. გესმის?! არ შემიძლია! გლახაა-მეთქი არ ვამბობ. ბევრს სჯობია ჩვენს ბიჭებში, მაგრამ არ მომწონს. იქნებ იმიტომ, რომ ჩემი სურვილის გარეშე ამოირჩიეს. ხომ იცი, რაც შენ არ ავირჩევია, არ მოგეწონება.

— იქნებ არჩევა არ შეგიძლია, რა უშავს სხვის არჩეულს?

— მაინც ჩემი არჩეული მირჩევნია.... ჰო, ნური გლახა ბიჭი კი არაა, მაგრამ მე რომ არ ამირჩევია ის, იმიტომ არ მომწონს.

— მართალი ხარ.—დაუმოწმა ნაილემ. — შეუთვალე უხარი. იქნებ დაგეთანხმოს. შეუთვალე—არც მიყვარხარ, არ შემიძლია შენთან ცხოვრებათქვა. ნუ დამლუპავ, თავსაც ნუ გაიუბედურებთქვა.

— შერბე რას იტყვის, დამეხსნება გგონია?!

— ვინ იცის, იქნებ დაგეხსნას. ქალების მეტი რაა!.. სხვას შეირთავს.

— ვინ მივეუზავნო, ვინ გაუბედავს მაგის თქმას! არც მშობლები დაეთანხმებიან.

— მშობლები არაფერია. ვაჟი უფრო ადვილად დაითანხმებს მშობლებს. არ მომწონს ქალიო, — იტყვის... მიზეზებს მონახავს. შენ მხოლოდ ნური დაითანხმე.

ნაზიმეს წუთით სახე გაუბრწყინდა.

— ის რომ ჩემზე უარს იტყოდეს, მე არ შემირთავდეს, ყველაფერზე თანახმა ვიქნები. სამუდამოდ ავიღებ გათხოვებაზე ხელს... ნაილე, შენ გეყურებანე, მომიხერხე რაზე, დამეხმარე. გეყოლება ვინმე, მიმეგზავნოს, უთხრას ჩემი დარდი...—თვალეებზე ცრემლები მოადგა და სიტყვა ვერ დაამთავრა.

— მოგხერხებ.—მტკიცედ უთხრა ნაილემ. შემდეგ ჩაფიქრდა. ახლა დაიწყო ძებნა, რომელი ივარგებდა ნურისთან მისაგზავნად. რამდენჯერ გაიფიქრა—მურადს მიეუგზავნი, ყველაზე უფრო დამეგობრებულა ის ჩემს ძმასთანო, მაგრამ არ დაუჯდა. იქნებ ექვი დაეზადოს, იფიქროს თავისთვის უნდაო და გადაემტეროს. ნუ გეშინია ნურის მეტი ამხანაგი არ ყავდეს. ერთადერთი ნურია, რომელიც დელს არ ეძახის. კაცად მიაჩნია.

ნაილეს თითქოს ამ მოგონებაზე შეუყვარდა ნური. გახედა ნაზიმეს, რომელიც თავდახრილი იჯდა. ნეტავ რაზე არ მოსწონს ამ გომბიოს ისეთი კეთილი ადამიანიო—გაიფიქრა.

— მე მივალ. თვითონ ვეტყვი ყველაფერს.—გადაწყვეტით უთხრა მან ნაზიმეს.

— შენ?

— რა უშავს?

— ხისიბია შენი?

— არა, მაგრამ...

— სხვა კაცთან რაეა მიხვალ აბა!

— რა მიშავს, ხომ არ შემეჭამს. ამხანაგისათვის მეტი საქმე

უნდა გააკეთოს კაცმა...

— არა. არ ივარგებს.

— რატომ?

— გაიგებენ. თავი მოგეპყრება. ქორებს დაგიყრიან: თვითონ უნდოდა ნური საქმროდო. ესეც არ იყო, ახალგაზრდა კაცთან ლაპარაკს ცეცხლთან შებრძოლება სჯობია.

ნაილე ჩაფიქრდა.

— მართალია, ნაზიმე, რას იტყვიან, რომ გაიგონ—ნაილე მივიდა ნურისთან მარტო, ელაპარაკაო... მართლა არ შეიძლებაო, გადაწყვიტა. ქვეყანა ახმაურდება. თითქოს მეტი არაფერი ჰქონდეთ საქმე...

საშინელია ქორი. უცებ გააღებს პირს და აქაქანდება.

ნაილეს პირდაღებული ვეშაპი წარმოუდგა თვალწინ.

— ნეტავ ენა არ ჰქონდეს ადამიანს,—გაიფიქრა—მაშინ არც ქორი იქნებოდა, არც შური და მტრობა.

— კარგი, სხვა ვინმეს მოვნახავ... დაიცა, დაიცა! მასწავლებელს ვეტყვი. ის კარგი ამხანაგია ნურის. ყველაფერს მოახერხებს.

— მასწავლებელი?

— ჰო, ახალმოსული რომაა.

— იცნობ?

— არა, მაგრამ რა უნდა მის გაცნობას?

— როგორ? შენ უნდა გაეცნო?

— რა უშავს! შინ მოვყვანილებ მურადს. სადილზე დავპატი-
ებ. მაშინ ვეტყვი.

— შენ?

— გინდა შენც მოდი. თვითონ უთხარი.

— ჩემი სიკვდილი!.. რას ამბობ ნაილე? რას იტყვის უცხო კაცი!

— რა უნდა თქვას. საქართველოში ქალები ხომ ლაპარაკობენ მამაკაცებთან? მას არ გაუკვირდება. მე აკაკის არ ვემალები. რომ დამირჩეს შემთხვევა, გავყვები საკუთარ ძმასავით.

— ნუ მბეჩებ!

— გეფიცები! ძმასავით მიყვარს!

— უცხო კაცი?

— მერე რა! ხომ გეუბნები, ძმასავით მეთქი. აკაკი ცოლშვი-
ლიანია.

— ბეჩი!...ცოლშვილიანია. კაცებმა რა იციან ცოლშვილიანობა!

— პატიოსანია...კაცი ხომ ყველა ერთნაირი არაა. უსინდისო
კაცებშიც არის და ქალებშიც.

— არ ვიცი, მე ჩემი დარღები მაქვს.—ნაღვლიანად სთქვა
ნაზიმემ, წამოიწია და ფანჯარაში გაიხედა.

— უიმე, მურადი მოდის!—უცებ ჩამოიბურა სახე და გასაქცე-
ვად მოემზადა.

— რა ამბავია?—შეაჩერა ნაილემ,—მურადი ხომ უცხო არაა.
არ გახსოვს, ბავშვობისას მხარზე რომ შეგვიჯენდა და ისე წაგვიყვან-
და სათამაშოდ?

— მაშინ სხვა იყო... გამიშვი, გამიშვი ნაილე.—თავპირი შეიხ-
ვია, კარი გააღო და ისე გაიქცა, თითქოს ვინმე მისდევსო.

ეზოში შემოსულ მურადს ცხენი მოყავდა. ნაილემ შენიშნა,
რომ მურადი რაღაცით კმაყოფილი იყო, უღიმოდა თვალები.

— ვისია, მურად, ცხენი?—მიეგება ნაილე ძმას. პირდაპირ
შეხედა თვალებში და გაუღიმა.

— სტუმარი გვეყოლება—უპასუხა დას მურადმა და საბქოს შენობისაკენ გაიხედა.

— ვინ არის?—გაიკვირვა ნაილემ, რადგან შემთხვევა არ ახსოვდა, რომ მურადს სტუმარი მოეყვანოს შინ.

— მთავრობის კაცია. ამბობს, პარტიამ გამომგზავნაო.—კიდევ მიიხედა უკან.—მოვა აქ. შეიძლება...—განგებ არ დაამთავრა სათქმელი.

— მურად!—შესძახა ნაილემ.

— რა იყო?

— ჩვენ რა გვაქვს, რომ სტუმარს ვემსახუროთ?

— არაფერსაც არ თხოულობს. მარტო ბინა უნდა. შენ სადღის გაკეთებაც იცი.

— გაკეთება! გაკეთებისათვის გასაკეთებელია საჭირო. არა, განსას მთავრობის კაცი როგორ დადგება?—ფერი ეცვალა ქალიშვილის.

— შემპირდა, უსათუოდ დადგებო, ცხენიც გამომატანა. აი, შეედავ?—ცხენი ვაშლის ხეზე მიაბა, ლაგამი გამოაცალა და ხმელი პალახი დაუყარა.

— უხუმრია, მურად...არ დაიჯერო...—გული აუტოკდა ნაილეს.

— დაიფიცა, ბოლშევიკურ სიტყვას გაძღვეო...

— ბოლშევიკურსო?—სერიოზული სახე მიიღო ნაილემ.

— ჰო, სხვაგან არსად დავბინავდებო.

ნაილე წუთით ჩაფიქრდა. შემდეგ სწრაფად ასწია თავი და მურადთან მივიდა.

— ჩვენმა კრუხმა თვრამეტი წიწილი გამოჩეკა. ჯაქვედაძ და ნაცარამ კვერცხის დება დაიწყეს. თუ სტუმარი გვეყოლება, საქამალზე არ შეეწუხდებით. იალიც მაქვს, მაწონიც, კაიმალიც, კვერცხიც, მაგრამ მქადი რომ არ გვაქვს!...

— მქადი!—გაიმეორა მურადმა.—ვის გამჩვენებთ მქადს?

— არავინ არ მოგვცემს.

მურადს ფერი ეცვალა.

— მთელი დღე უქმელია კაცი!—ჩვილპარაკს მანამ ახლაც რომ არაფერი ვაქამოთ...—თავი აჩვიქნინა.

— ახლა?

— ჰო, მთელი დღე არაფერი უქმელია. არც მე, მიუხედავად მურადისა.

— დღეს და ხვალ საყლოდ უქმელი გვაქვს. მთავრობის შემდეგ რა გვის ვაშობს.—უთხრა ნაილემ ძმას და შეხედა ტანსაცმელზე, რომელიც უფრო გატყეფილს ჰგავდა, სანამ დღის განმავლობაში.

— ნაილე!—აღფრთოვანებდა შესძახა მურადმა.—კარგად არააქამე. არსად ვერ ვაქამოთ. არცაა რა გვაქვს. ირცინი, ნაილე, რა

კაცია? აი ნახავ, წიგნის კითხვას გასწავლიო, პარტიაში ჩავწერო. ნაილე, დამეხმარე. წავიდეთ, ოთახი დავალაგოთ. ხომ იცი, ქეთომ რომ იცოდა ოთახის დალაგება, ისე დავალაგოთ!—ხელი მოკიდა დას და სახლისაკენ გაარბენინა.

მზე კარგა გადაიხარა. და-ძმამ დიდი ხანია დაალაგეს ოთახი, განიერ ტახტზე ნაილემ სქელი ლეიბი გააგო, ახალი ზეწარი გადააფარა და ზედ აბრეშუმის საბანი გაშალა. ეს ერთი ხელი ლოგინი ჰქონდა მას უცხო სტუმრისათვის შემონახული. ის დედამ დაუტოვებ ასე გამზადებული. ნაილეს ის ჯერ არავისთვის დაუგია. ან ვინ უნდო მისვლოდა ასე საპატიო! ფანჯარაზე დოღბანდი ჩამოაფარა, იატაკზე დედისეული ძველი ხალი გაშალა და აჭა-იქ კედლებზედაც მიაკრსხვადასხვა სურათები.

სადილიც მზად ჰქონდათ. მქადი უკვე გამომცხვარიყო. კვერხიც მოეხარშნათ და წვნიანი შეკამადისთვისაც მზად ჰქონდათ სმალენძის თეფშები.

მურადი მალიმალ გამოიხედავდა გარეთ, იქნებ მოდისო, მაგრამ სტუმარი ჯერ არსად ჩანდა. რაც დრო გადიოდა, იმდენად უფრო მეტი და მეტი მღელვარება ემჩნეოდა მას. რამდენი რა გაიფიქრა. ბოლოს მაინც გადაწყვიტა საბქოსკენ გავლა, გამოვიდა, ნაილეს დაუბარა, მალე მოვალო და წავიდა, მაგრამ ქიშკართან მივიდა თუ არა, დაინახა ანდრო და თავმჯდომარე მისკენ მომავალი.

მურადი უცებ მოტრიალდა. ნაილე გააფრთხილა, კიდევ გადაავლო თვალი ანდროსათვის გამზადილ ოთახს, შემდეგ გარეთ გაეარდა და სტუმრებს ქიშკართან დაუხვდა.

— მობრძანდი.—საკუთარ სახლკარს გადახედა—ეს არის ჩემი კარმიდამო...ღარიბი ვარ, მაგრამ...—ლოყები გაუწითლა სირცხვილმა.

თავმჯდომარემ მკვახედ გადახედა მურადს და შემდეგ ანდროს მიუბრუნდა.

— ვერ მოეწყობით, ამხანაგო ანდრო, აქ. დამიჯერეთ, უფრო კარგად მოგათავსებთ! წაიყვანე, მურად, ცხენი იუსუფ-აღისას!—ბრძანების კილოთი მიმართა მურადს.

ასეთი შეურაცყოფა-თავის დღეში არ განუცდია მურადს. საშინელი ტკივილები იგრძნო გულის არეში. ყელში მოაწვა ბოღმა, მაგრამ შესალო თავის დამორჩილება, უხერხულად გაიქნია თავი და ანდროს შეხვდა.

ანდროს თითქოს არ გაუგონია თავმჯდომარის სიტყვებიო, მურადთან მივიდა და მხარზე დაკრა ხელი.

— აბა, ჩემო მასპინძელო, გამიძებ!—შემდეგ თავმჯდომარეს

მიუბრუნდა. ხვალ მოვილაპარაკოთ კიდევ იმ საქმეების შესახებ. თუ საბჭოსაც შეკრებ, ძალიან კარგი იქნება.

— კარგი — დაეთანხმა თავმჯდომარე, — ჯუმა-დღეა და ხალხიც თავისუფალია. რა დროისათვის აჯობებს?

— თქვენ უფრო იცით. შეიძლება შუაღლისას, თუნდ საღამოს, როგორც აჯობებს. პარტიის წევრი რამდენი გყავს საბჭოში?

— სამი კაცია, მეოთხე მე ვარ, მაგრამ ჯერ მარტო კანდიდატობის მანდატი მაქვს.

— ჩვენ უფრო ადრე შევიკრიბებით. ამხანაგებს გავეცნობი. მოსალაპარაკებელიც მაქვს ზოგი რამ.

— კარგი, შევიკრიბავ... — წასვლა დააპირა, მაგრამ ისევ მობრუნდა და ანდროს მიმართა.

— ნუ დაგეხატობათ. წამოდით ჩვენსას. თქვენ იქნებ სულ სხვა მოსაზრებით არ გინდათ იუსუფ-ალასას დაბინავება. ჩემსას მოთავსდით, არც ისე კარგად ვცხოვრობ, მაგრამ ერთი და ორი კაცის პატივისცემა არ გამიჭირდება.

ანდრომ მადლობა გადაუხადა.

— არა უშავს, აქაც მოვეწყობი, მურადი ოთახის დათმობას შეშპირდა და სხვა არ მინდა რა... ოთახი ხომ გაქვს, მურად? — მიუბრუნდა მურადს.

— ელბეთ არის. — მოკლედ მიუგო მურადმა. — წამოდი, ნახე. ანდრომ ხელი გაუწოდა თავმჯდომარეს.

— ნახვამდის, დურსუნ. ხვალ დილით ადრე მოვალ. — ხელი ჩამოართვა და მურადს წამოყვება სახლისაკენ.

დურსუნი ერთ ადგილას იდგა იმ დრომდე, სანამ სტუმარ-მასპინძელი შინ შევიდოდნენ. მაშინ მიბრუნდა, ერთი მაგრად გაათურთხა და ჩქარი ნაბიჯით წავიდა.

ანდროს მოეწონა მისთვის გამოყოფილი ოთახი. ის მრავალ ოჯახში იყო ნამყოფი, მრავალ მდიდარ თუ ღარიბ გლეხისას გაეთია ღამე ზემო-აქარაში, მაგრამ არსად ასე არ მოსწონებია. თითქმის ყველგან და ყველასაც ერთნაირი შმორის სუნი იდგა. ეს იმიტომ, რომ პირველ სართულში პირუტყვები ცხოვრობდნენ და ხის ფატაკიდან ამოდით ნებხის სუნი.

ამით განსხვავდებოდა მურადის ბინა. აქ უფრო კარგი პაერი და შესაფერი სისუფთავე იყო.

— საქონელი არ გყავს და იმიტომაც ასე — აუხსნა მურადმა. — ნახლა, რომ შევეჩვიე, მეც მიჭირს სხვისას ღამის გათევა. მიკვირს, როგორ ვერ ვამჩნევდით წინათ.

— უპირუტყვობაც არ ვარგა, ამხანაგო მურად. ძროხა აუცილებლად უნდა გაიჩინო, თხებიც, ცხვრებიც...

— მერე ხომ ისევ ისეთი სუნი დადგება!

— რატომ? განა ბოსელი არ შეიძლება გამოეყოთ ცალკე?

— ცალკე. მართალია, შეიძლება ბოსელის ცალკე გამოყოფა, — გაიღიმა მურადმა. — დაჯექი, ახლავე სადილს მოვიტან. — ოთახიდან გავიდა სამზარეულოში, სადაც ნაილე პატარა დაბალფეხიან მრგვალ მაგიდაზე სადილს ალაგებდა.

— ყველაფერია? — შეეკითხა მურადი დას.

— ყველაფერი. — კიდეც დაათვალიერა. — დაიცა, მარილი კლებია. — თეფშზე მსხვილად დანაყილი მარილი დაყარა და მაგიდაზე დადგა.

— აჰა, წაილე, წყალი თუნგიტ დგას ბუხართან. ახალმოტანილია. ქიქაც იქვეა.

— შენ არ წამოხვალ? — ფრთხილად შეეკითხა მურადი დას და თვალეში შეხედა.

— მეე?! — გაიკვირვა ნაილემ.

— რა უშავს! — უფრო ფრთხილად უთხრა მურადმა, — ქალები იქ არ ემალებიან კაცებს.

— იქ სულ სხვაა.

— თუ აკაკისთან გამოდიხარ? — იპოვა საბუთი ძმამ.

— იმას შევეჩვიე, შენსავეთ მიყვარს. ჩემი და ხარო მეუბნება, მის ცოლს ვიცნობ და შვილს... ეს კი...

— უფრო კარგი ხასიათისაა... სულერთია, ხომ უნდა დაენახვო მაინც, დაელაპარაკო, სადილიც გაუქეთო. წიგნიც ისწავლო.

— შენ მირჩევ?

— რა უშავს!

— რას იტყვიან! ხომ იცი, რა იციან ჩვენში. არა, მურად, მასე არ ივარგებს. — თავი გააქანა ნაილემ.

— ვისი გეშინია! — ცოტა არ იყოს მწყურალად სთქვა მურადმა — დედა არ გვყავს და მამა. შენი პატრონი მე ვარ, რასაც გიტყვი, უნდა დაიჯერო — მე ხომ შენი მტერი არა ვარ!

— არა, მაგრამ სოფელს ანგარიშის გაწევა უნდა. ჩვენ აქ ვცხოვრობთ. როგორი ადათიც არის, ისე უნდა ვიცხოვროთ. ნაზიმეს ორი სიტყვის თქმაც ვერ გაუბედავს კაცისთვის... მართლა, მურად, უთხარი ნურის, ხელი აიღოს მაგ გოგოზე. არა უნდა ნაზიმეს მასზე გაყოლა.

— მერე ვინ ატანს ძალას!

— მშობლები. ნურის მშობლებს აკვანშივე დაუნიშნავთ ნურისათვის. ახლა სიტყვის გატეხის ეშინიათ, ხომ იცი რა მოყვება სიტყვის გატეხას. უთხარი, იქნებ დაგიჯეროს. ქალების მეტი რაა, უკეთესს შეირთავს.

მურადი ჩაფიქრდა.

— კარგი, ვნახოთ... ვეტყვი, უსათუოდ ვეტყვი.— დაავლო ხელი მაგიდას, ასწია და ფრთხილად გაიტანა.

— მოგშივდებოდა. მართალი რომ გითხრა, მეც მომშივდა.— მაგიდა იატაკზე დადგა და აქეთ-იქედან ორი სამუთება სკამი მიუდგა.

— დაჯექი, ვისადილოთ... აი აქ.— მიუდგა სკამი ახლოს. ვერაა ჩვენში ყველაფერი კარგად. ჯერ კიდევ ვერ ბედავენ ჩვენი ქალები უცხო კაცთან გამოჩენას. რას იზამ, ასეთი ადამიანი ჰქონიათ ჩვენს ძველებს და არ უნდათ მოშალონ.

— არა უშავს, ამხანაგო მურად, სწავლა-განათლება შემოვა, განვითარდებიან, გადახედვენ ცხოვრებას და მაშინ ქალებიც გამოვლენ ისე, როგორც მამაკაცები. არც იმათ დაერიდებათ და შერცხვებთ. უარს არ იტყვიან, მონაწილეობა მიიღონ ჩვენს მშენებლობაში.

— ქალები!— შეაჩერა მურადმა ანდრო.— ჩვენი ქალები კაცებზე მეტად არიან დაინტერესებული ქვეყნის საქმეებით. შენ არ იცი, ქმრების რომ არ ეშინოდეთ, ჩაჩაბსაც არ აიფარებენ. კაცები, კაცებია აქ დამნაშავე, ქმრები.

— შენ არ აუკრძალავდი ცოლს უცხო კაცთან პირახდომ შეხვედრას?— ღიმილით კითხა ანდრომ.

— მე რატომ აუკრძალავდი. არც შევირთავ ისეთ ქალს, თუ კარგად არ ვიცნობ. ვინ დამიშლის. დედა არ მყავს და მამა. ნაილე ჩემი აზრისაა. შერცხვა ახლა შემოსვლა. ჯერ მაინც ვერაა გაბედული, ხალხის ეშინია... სახელი წამიხდებოდა.. სულერთია, მაინც შემოვიყვან. რახან ჩვენს ოჯახში დაბინადი, ჩვენად ითვლები. ვითომც ძმა ხარ ჩვენი. რატომ უნდა გერიდებოდეს ჩემი და... ბრძანეთ! ბრძანეთ!— გადაუდგა თევზით მოტაფული კვერცხი.— ბრძანეთ! ჩვენში ღვინო არ მოდის, არც სვამენ, თორემ... მეც არ დამილევია. მინდოდა მესინჯა, ბათუმში რომ ვიყავი, მაგრამ ვერ მოვახერხე ყიდვა. რა ღვინო გინდაო მკითხეს. ვერაფერი ვუპასუხე. არ ვიცოდი რანაირი არსებობს ღვინო. შემრცხვა და წამოვედი. არ მოდის ჩვენში ყურძენი, თორემ გავაკეთებდი... გიყვარს შენ ღვინო?!

— არც' ისე. ხანდახან ვსვამ კი, ზოგჯერ უხდება სხეულს.

— ამბობენ ადლებს კოცნა.

— ვინც ბევრს დალევს კარგ საქმეს არ წაჰკიდებს.— უპასუხა ანდრომ და სადილობას შეუდგა. არაფერი ეკამა მთელი ღლის განმავლობაში და მოშივებოდა.

სადილობის დროს არ გალაპარაკებიათ ერთმანეთს. სკამდნენ თავდახრილი. ორივენი ერთი თევზიდან სვლემდნენ მაწონს და აქმევდნენ კარგად გამომცხვარ სქელ მქადს.

სადილის შემდეგ მურადმა აალაგა მაგიდა, ისევ გაიტანა ოთახიდან და მალე დაბრუნდა.

ანდრომ წიგნები და ჟურნალ-გაზეთები ამოალაგა პორტფელიდან, მიიხედ-მოიხედა, მაგიდა არსად იყო, რომ ზედ დაეწყო, და ამიტომ ტახტზე დაყარა. ეს ტახტი გრძელი და განიერი იყო, მთელი ოთახის სიგრძეზე გაკეთებული. ზედ შეიძლებოდა გაშლილიყო ორი ლოგინი და დაწოლილიყო შვიდი-რვა სული. ახლა ამ ტახტის მხოლოდ ნახევარი იყო დაგებული, მეორე ნახევარი კი სრულიად თავისუფალი. ანდრომ ნივთების დასაწყობად გამოიყენა თავისუფალი ნაწილი და ზედ წიგნები დაალაგა.

— მაგიდა დაგვირდება—უთხრა მან მურადს, როცა შეატყო, რომ ტახტი ვერ შესცვლიდა მაგიდას:

— მაგიდა. მაგიდას გავაკეთებინებ.—ჩაფიქრდა მურადი, ისევ ფეხებზე დაიხედა და გაჩუმდა.

— შენ დურგალი მომიყვანე, გაკეთებინება ჩემი საქმე იყოს. პო, მართლა, მურად, ხვალ ხულოში უნდა გაგაგზავნო, იქედან რაღაცები უნდა წამომიღო და ცხენიც მიუყვანო პატრონს. ხომ არ შეგეზარება?

— რატომ შემეზარება! ჩემი საქმე სიარულია. დილას წავალ ადრე და სალამოს აქ გავჩნდები. თუ დამაგვიანდეს, არა უშავს, ღამით სიარულისაც არ მეშინია.

მოილაპარაკეს ხვალინდელ გამგზავრებაზე. დავალება ჩამოუთვალა ანდრომ და შემდეგ სთხოვა წასვლისას კიდევ ენახა და მოლაპარაკებოდა.

III

ჯერ კარგად არც კი გათენებულყო, რომ მურადმა ანდროს ოთახის კარებს დაუკაკუნა.

— მივდივარ, რას დამაბარებ კიდევ?—დაუძახა მან კარებიდან.

ანდრო წამოდგა, კარი გააღო და მურადი ოთახში შემოიყვანა.

— აი რა, ჩემო მურად. ფოსტაში ჩემს სახელზე წერილები, ჟურნალ-გაზეთები და წიგნები იქნება. მაზრკომში შეივლი და ეტყვი, რომ ჩემგან ხარ გამოგზავნილი, გამოგატანებენ რამეს და წამოიღე. პო, მართლა.—ფული ამოიღო ჯიბიდან—კოლპერატივში შეხვალ, შარვალს, ხალათსა და ფეხსაცმელს იყიდი შენთვის და თუ მოგჩვენება, შენი დისთვისაც წამოიღე რამე.

მურადმა ტყვიანაცემივით დაიხია უკან.

— არა, არ წავიღებ. ტანზე ისედაც ვიყიდი. შენ რატომ უნდა მომცე, ბავშვი ხომ არ ვარ! არა, არ წავიღებ!

— მურად! — შესძახა ანდრომ. — საჩუქარს როდი გაძლევ! აი, დაითვალე. შვიდი თუმანია. ნაწილნაწილად უნდა გადამიხადო. მე ხომ აქ ვრჩები. ამჟამად მე ფული მაქვს. აქ არ მჭირდება. რად მინდა უქმად ჯიბეში მეწყოს. წაიღე, წაიღე, ნუ გრცხვენია. გუუბნები სესხად გაძლევ მეთქი. სინდისს გეფიცები, გადაგახდევინებ.

ძლივს დაარწმუნა, რომ სესხად იძლეოდა. შვიდი თუმანი ჩაუთვალა და კიდევ გაუმეორა დავალება.

მურადი წავიდა.

ადრე იყო, მაგრამ ანდრო არ დაწოლილა. ტანზე ჩაიცვა, ხელპირი დაიბანა და გარეთ გამოვიდა.

ჯერ კიდევ ეძინა სოფელს. ბოსლიდან მოისმოდა მხოლოდ პირუტყვის შეღმუფლება. ეჩქარებოდათ სუფთა ჰაერზე გამოსვლა, ნამიანი ბალახის ქამა და თავისუფლად განაფარდება.

ანდრო გავიდა ეზოდან, სერზე ავიდა და ჯამეს ახლო მალლობზე გაჩერდა.

სუფთა ჰაერი იყო აქ. უხვად დანაშულ ბალახს ზედმეტი მწვანე ფერი მისცემოდა. მობიბინე სიმინდის ყანები ამ დილით უფრო კარგი სანახავი იყო.

ანდრო კარგახანს ათვალეირებდა სოფელს. არ იყო ცუდ ადგილას გაშენებული ეს სოფელი. ლამაზი მალლობები ჰქონდა ირგვლივ შემოვლებული. ქვემოთ ნახევარი კილომეტრის მანძილზე გიჟი მდინარე მიგრიალებდა. მისი ხმა აღვიძებდა მძინარე მინდორ-ველსა და ტყეებით შემოსილ მთებს, რომლებიც იქით-აქით ამოსდგომოდნენ მას.

ყველაზე მალა მეჩეთი იყო წამომდგარი. მალალი ხის შენობა ოდნავ დაფერდებულიყო, მაგრამ საკმაოდ დაებიჯვათ და დაემაგრებინათ. იქვე ახლოს დაბალი ხის შენობა იდგა. ეს იყო მედრესე. აქ ასწავლიდნენ სჯულის კანონებს და ლოცვებს. სავალდებულო იყო ეს სწავლა ყველასათვის. შენობა ძველი იყო, მაგრამ საკმაოდ ახალი ყავრით დაეხურათ და ძველი კარებიც გამოეცვალათ მისთვის.

ცოტა მოშორებით იდგა ახალაგებული სკოლა — ორთვალის სახლი პატარა აივნით. ოთხი ფანჯარა ჰქონდა წინიდან, მაგრამ ოთხივეში ჩაემტვრიათ მინები. აივანზე აქა-იქ იატაკის ფიცრებიც აეყარა ვილაცას. პატრონის ხელი აკლდა ამ სახლს. წინ ეყარა უამრავი ნაგავი, ხეების ნაქრები, ძონძები, ფიჩხი, ქვები და ნახერხი. აქაურობა უფრო გაპარტახებულს ჰგავდა, ვინემ სკოლის ეზოს.

მეჩეთთან ახლოს ხის ღარზე წერილად მოდიოდა ანკარა წყა-

ლი. ეტყობოდა, რომ ის შორიდან იყო გამოყვანილი თიხის მიღებით. ამ წყალით სარგებლობდნენ მლოცველები. აბდესს იღებდნენ, ხელ-ფეხს იბანდნენ აქ და შემდეგ შედიოდნენ სალოცავად მეჩეთში. სოფელებს ნაწილი სასმელ წყალსაც სარგებლობდა აქედან, ვინაიდან სოფლის შუაგულში გამოყვანილი წყალი ვერ აკმაყოფილებდა მოთხოვნილებას.

ანდრომ დაუცადა სოფლის გაღვიძებას.

აქა-იქ სახლის სახურავიდან გამოჩნდა ლურჯი კვამლი. აქრია-ლდნენ კარები, გამოვიდნენ ძროხები, თხები და ცხვრები.

ერთ ეზოდან ფეხშიშველა ბიჭი გამოცუნცულდა თუნგით ხელში და წყაროსაკენ გაიქცა. შემდეგ რაქდენიმე ეზოდან მიბაძეს მას. შუქაში გამოვიდა თავებირახვეული ქალი ვებერთელა კოკით ხელში, დაწვერა იქაურობა და რომ შეატყო არავინ იყო, წყაროსაკენ გაექანა ჩქარი ნაბიჯით. თითქო მოსაპარავად მივიდაო, აავსო ქურქელი, სწრაფად აიდგა მხარზე და შინისკენ გაიქცა. მაგრამ უეცრად თვალი მოჰკრა მამაკაცს, შესდგა, პირი იბრუნა, ზურგი შეაქცია გზისკენ და ისე იდგა, ვიდრე მამაკაცმა არ ჩაუარა და კარგა მანძილით არ ჩასცილდა. შემდეგ მიბრუნდა და განაგრძო გზა.

ანდრომ მხოლოდ საწი გლეხი დაინახა თოხებით სამუშაოდ მიმავალი და კიდევ ერთი ქალი, რომელიც ბოსტანში მუშაობდა, რგავდა თუ კვალს ავლებდა სანერგისათვის.

სჩანს ყველა არ უქმობს დღეს.—გაიფიქრა ანდრომ და თვალი აადევნა სწორედ იმ გლეხებს, რომლებიც სამუშაოდ მიდიოდნენ. იმ დრომდე უყურა, სანამ თავიანთ ყანებში არ ჩავიდნენ და თოხნა არ დაიწყეს. დაიმახსოვრა ის ადგილი და ის ეზოც, სადაც ქალი მუშაობდა.

მზე გადმოადგა მთას მაღლიდან და ისრებივით ჩამოუშვა სხივები სოფელში. სოფელმა უკვე სავსებით გამოიღვიძა, ახმაურდა, ამოძრავდა; პირუტყვები გამოვიდნენ შუკებში, წყაროსთან აქრია-მულდნენ ბავშვები, ეზოებში აკაკანდნენ ქათმები, გამოშხურდნენ ინდაურები, აბტუნდნენ და აბლაგლდნენ დედას მოცილებული ბბოები.

ანდრომ საათს დახედა. რვა შესრულებულიყო. ძალიან გვიან ამოდის მზე ამ სოფელშიო, გაიფიქრა და ახედა იმ მთას, რომლიდანაც მზე იყურებოდა.

მაღალი მთა იყო. რამდენიმე საათი დასჭირდა მზეს, რომ ზედ შემომდგარიყო და გადმოეხედნა. წარმოიდგინა ანდრომ, თუ როდის ამოვიდოდა მზე აქ ზამთრობით.

წავიდა შინისაკენ, რომ პორტფელი წამოეღო და საბჭოში წასულიყო. წესით უკვე იწყებოდა სამუშაო დღე.

სახლის კარი ფრთხილად შეაღო, ფეხაქრეფით აუარა გვერდი

იმ ოთახს, რომელშიაც ნაილე ეგულვებოდა, მივიდა თავის ოთახთან, კარი გააღო და ის იყო უნდა შესულიყო, რომ ოთახში ნაილე დაინახა და შესდგა.

ნაილე ლოგინს ალაგებდა. გრძელი თმის ნაწნავეები კოკებამდე სწვდებოდა. თეთრი კაბა ეცვა წელზე ნაოქდაყრილი. ფეხები ქოშებში შეედგა და შიშველი კოჭი მოუჩანდა.

კარი რომ გაიღო, ის სწრაფად შემობრუნდა და ანდროს პირისპირ შეეფეთა.

— უიმე! — შეიძახა უცებ. პირი იბრუნა, უნდოდა ჩამოეთვარებინა სახეზე რამე, მაგრამ ვერათერს წააწყდა. იაზმა თან არ ჰქონდა. არ მოელოდა ანდროს მოსვლას და ოჯახში პირახდილი თავისუფლად საქმობდა.

პირველად ვერათერი მოახერხა ანდრომ, თითქო გაშეშდა. შემდეგ სწრაფად მიბრუნდა, გარეთ გამოვიდა და ეზოში გაიარ-გამოიარა.

ნაილემ უხერხულობა იგრძნო. ვინ იცის, იქნებ საჭირო საქმე ჰქონდა ოთახში და ხელი შევეშალეო, გაიფიქრა. არ იცოდა როგორ მოქცეულიყო, როგორ ეცნობებინა, რომ ნაილე არ არის ახლა შიგ. ძალიან ინანა, რომ მურადს არ დაუჯერა გუშინ, არ შეყვამ და არ გაეცნო სტუმარს. ახლა ხომ ასე არ შერცხვებოდა! გააფრთხილა, მაინც უხერხულად წარმოიდგინა ახალგაზრდა უცხო კაცთან მარტოდ გალაპარაკება.

სასწრაფოდ აალაგა ლოგინი, გამოასუფთავა ოთახი, მაგრამ მაინც ვერ დამშვიდდა. საჭირო იყო ეცნობებინა ანდროსათვის, რომ უკვე შეუძლია შესვლა.

არავინ იყო ამის მთქმელი.

კარგახანს იფიქრა. ჭუქურუტანიდან უჭკრეტდა ეზოში მოსიარულე ყმაწვილ კაცს და გული ძლიერ უცემდა.

— რა იქნება, გავალ, ვეტყვი, რომ შემოვიდეს ოთახში, — გაიფიქრა, — რა დაშავდება ამით! ვინ გაიგებს! თუნდაც გაიგონ, მერე რა. ვის რა საქმე აქვს ჩემთან! მართლა, მურადი თვითონ მუუბნება, — ნუ გეშინია, ჩემს მეტი პატრონი არ გყავსო და მე კი მასეთებისთვის არ გავიჯავრდებიო. სულ არ გავს ჩემი ძმა ზოგიერთებს. გავალ და ვეტყვი — გადაწყვიტა, თავპირზე იაზმა შემოიხვია, კარი გააღო, უნდოდა გასვლა, მაგრამ ვერ გაბედა და ისევ მობრუნდა.

— ასე არ ივარგებს, — და სულ სხვა მოიფიქრა. თუნგი აიღო ხელში, ვითომ წყაროზე მიდის. უფრო შეიბურა სახე, კარი გააღო და სწრაფი ნაბიჯით წყაროსაკენ წავიდა.

ანდრომ აარიდა პირი, მაგრამ როცა ჩასცილდა, თვალი

გააყოლა მოხდენილად მიმავალ ქალს, კარგახანს უცქირა, შემდეგ მიბრუნდა, ოთახში შევიდა, პორტფელი გამოიტანა და წაიღია.

საბჭოს შენობის წინ გლეხები გაჩერებულიყვნენ. ანდრო რომ დაინახეს, ერთმანეთს რაღაც გადაულაპარაკეს და თავით-ფეხებამდე აათვალ-ჩათვალაიერეს უცნობი ახალგაზრდა.

— გამარჯობათ, ამხანაგებო! — მიესალმა ანდრო შისვლისას. გლეხებმა კანტიკუნტად უპასუხეს სალამზე.

— ხომ კარგად ბრძანდებით, ამხანაგებო? — მიმართა ანდრომ საერთოდ და სათითაოდ გადახედა ყველას.

— ღმერთმა ბრძანებით გამყოფოს, რა გვიშავს, — უპასუხა მათში ყველაზე ხნიერმა გლეხმა, უფრო წინ წამოვიდა და ანდროსთან მივიდა.

— ბათუმიდან ხარ თუ ხულოდან? — კითხა მან.

— ბათუმიდან — მიუგო ანდრომ. — ხულოშიაც გამოვიარე.

— რაიზა გარჯილხართ? — ფრთხილად იკითხა მეორემ. დახეული ყაბალახი გაისწორა თავზე და შემდეგ ულვაშებზე გადაისვა ხელი.

— თქვენს საბჭოზე მომამაგრეს. უნდა დაგეხმაროთ, ხელი შეგიწყოთ, ერთის სიტყვით — რასაც შეეძლებ... —

— დიდხანს დარჩებით? — ჰკითხა ისევ უხნესმა.

— სანამ საჭირო ვიქნები. ან სანამ გამიწვევენ... სხვა, თქვენ რას გვეტყვით, რა გვაკლია, რა გვაქვს, რა გვესაჭიროება, რას მოვითხოვთ მთავრობისაგან? — კიდევ დაათვალაიერა სათითაოდ ისინი.

— რა უნდა გვინდოდეს — ჩაილაპარაკა ერთმა. — არაფერი არ გვაკლია, მთავრობა რაზე უნდა შევაწუხოთ.

— მართალია — დაემოწმა მეორე, — თუ ჩვენ არ შეგვაწუხებს, მთავრობას რაზე გავრჯით.

ანდრომ შეატყო, რომ ასეთი შეკითხვებით ვერაფერს გახდებოდა, მიბრუნდა და საბჭოს შენობაში შევიდა.

მარტო მდივანი იჯდა გაზეთგადაფარებულ მაგიდასთან და რაღაც ცნობას თუ მოწმობას წერდა. არ დაუჯდა, ასე თამამად შემოსული კაცი რომ დაინახა, მაგრამ რაზან სტუმარი არ გავდა ჩვეულგბრივ მთხოვნელებს და თან ხელში პორტფელი ეჭირა, არაფერი უთქვამს, თავი უფრო ჩალუნა და წერა განაგრძო.

— თავმჯდომარე არ მოსულა? — ჰკითხა ანდრომ მას და პორტფელი იქვე მეორე მაგიდაზე დასდო.

მდივანს თითქო არც გაუგონია. თავიც არ აუწევია ზეგდო.

— ამხანაგო, თქვენ გეკითხებით. — გაუმეორა ანდრომ.

— რა გნებაყს? — დინჯად ასწია თავი მდივანმა და სერიოზული გამომეტყველებით შეხედა სტუმარს.

— თავმჯდომარე არ მოსულა?

მდივანმა თვალის ქუთუთოები ააპარპალა, მიიხედ-მოიხედა და შემდეგ უპასუხა:

— ხომ ხედავთ, არ მოსულა! — კალამი მელანში ამოაწო, თავი უფრო დაბლა დახარა და განაგრძო წერა.

ანდრო კუთხეში ჩამოჯდა დანჯღრეულ სკამზე, პორტფელიდან რალაკ წიგნი ამოიღო და კითხვა დაიწყო.

ცოტა ხნის შემდეგ ერთი გლეხი ფრთხილად შემოვიდა, მიუახლოვდა მდივანს და მაგიდასთან გაჩერდა. კარგახანს იღვა უხმოდ. უცდიდა, როდის მორჩება საქმეს, როდის გამკემს ხმასო, მაგრამ იგი თვალაუღებლივ განაგრძობდა წერას. მოსწყინდა გლეხს ფეხზე დგომა. ცოტახანს გაიარ-გამოიარა ოთახში, შემდეგ ისევ მივიდა მდივანთან, თავი დახარა და მორიდებით მიმართა:

— ღიმიწერე ერთი განცხადება საბჭოს სახელზე, თეოფილავ, — და ისე დაიღრიჯა, თითქოს სიცოცხლის შენარჩუნებას სთხოვდა.

მდივანმა მას ყური არ ათხოვა, მაგრამ გლეხმა რაკი ერთხელ გაბედა და ხმა ამოიღო, თხოვნის განმეორებაც აღარ დაიწარა.

— რაო? — შეუბღვირა მდივანმა და კიდევ ააპარპალა თვალის ქუთუთოები.

— განცხადება ღიმიწერე საბჭოს სახელზე:— გაიმეორა გლეხმა.

— განცხადება?— გაიმართა წელში მდივანი. შენ გგონია მე შენი განცხადების საწერად ვარ აქ გამოგზავნილი?! ისწავლეთ მეთქი, რომ გეუბნებით, სწორეთ მაგისათვისაა საჭირო სწავლა. ტყვილა კი არ მისწავლია მე იმდენი წელიწადი!.. — ამაყად გაიხედ-გამოიხედა და შემდეგ ისევ პირდაპირ შეხედა გლეხს.

— ტყვილა არ გაგრჯი. იალი მოვიტანე. თუ ამართვამ იალს, კარგია, თუ არა, ყველს მოგიტან.

— რა გინდა ამხანაგო, შენ?—ჩაერია ლაპარაკში ანდრო, რომელიც თვალს ადევნებდა ამ სურათს.

გლეხმა მოუხედა და რომ შეატყო მოსულიაო, მას მიმართა.

— განცხადება მინდა მივცე საბჭოს, სახლი მემტკრევა თავზე. შვიდი სული სარჩენი მყავს. მომცეს ნება ხე-ტყე გამოვიტანო სახლისათვის. ამ ზაფხულში მოვამზადებდი მასალას.

— განცხადება საჭირო არაა. ისე გაკეთდება მაგ საქმე... სხვა ხომ არაფერი საქმე გაქვს?

— სხვა რა საქმე უნდა შექონდეს. ამას თუ მომიფერებ, შეტი რა მინდა. გაგახსენდება ჩემი საქმე?

— გამახსენდება, დარდი ნუ გაქვს.— და ანდრომ გლეხის სახელი და გვარი ჩაიწერა.

მდივანმა უკმაყოფილოდ გააყოლა თვალი მიმავალ გლეხს და როცა ის კიბეზე ჩავიდა, მობრუნდა და ანდროს შეხედა.

— თქვენ რა საქმისათვის ინებეთ მობრძანება?— ტკბილად კითხა მან.

— თავმჯდომარის ნახვა მინდა.

— თავმჯდომარის? თავმჯდომარე დღეს ვერ გეახლებათ. თუ საქმე გაქვთ, მე შემიძლია მოვაგვარო.— უფრო ტკბილად გამოთქვა ეს სიტყვები და ხელში კალმისტარი შეათამაშა.

— შემპირდა, რომ იქნება დღეს აქ.— უთხრა ანდრომ.

— დავიწყებია, რომ დღეს ჯუმა-დღეა. ესენი არ მუშაობენ დღეს. ეს საქმეს მაინც არ უშლის ხელს. როცა მე აქ ვარ, შემიძლია თავმჯდომარის არყოფნა არავის ვაგრძნობინო, ერთმანეთის საქმეს ხშირად ვაკეთებთ ჩვენ. მაგალითად, გუშინ მე არ ვიყავი აქ, ამალლება იყო და ვიუქმეთ ბიჭებმა, ცოტა ქეიფიც გავმართეთ. ბევრნი არ ეყოფილვართ, ზოგიერთი სოფლის მასწავლებელი იყო და მართალი ვითხრათ, გვარიანი დრო გავატარეთ. ჰო, იმას ვამბობდი, კარგი ბიჭია დურსუნი. იცის ამხანაგობა. არც მე ვარ თუმცა მისთვის ცუდი. ერთ თვეს რომ არ შემოიაროს აქ, მე თუ კი ვარ, უმისობა არ დაემჩნევა. ვიცო, ვის რა საქმე გავუკეთო, რა პასუხი გავუცე, ვის რამდენი გავაწერო და ვის რამდენი გადავახდევინო. თქვენ სკოლის საქმეებზე ხომ არ ხართ? . . . სკოლა ავაშენეთ, როგორც იქნა. ვერ წარმოიდგენთ, რამდენი შრომა მიმიძღვის მაგის აშენებაზე. მერმე ვინ გიმადლის! პირიქით, საყვედურობენ კიდევაც. არ უნდა, ბატონო, ამ ხალხს სწავლა. ნამდვილი კონტრარევიოლუციონერები არიან. უცხო კაცი ძალიან ძნელად იცხოვრებს ამათთან. ღამე ერთია და შვიდ კაცს მოჰკლავენ... დაბრძანდით, დაბრძანდით. სკოლების საქმეზე თუ ბრძანდებით, მით უკეთესი. დღეს ჯუმა-დღეა და ჩვენი მასწავლებლები არ არიან აქ, თორემ დავუძახებდი. ერთად დაემთხვა ჩვენი ამალლება და მაგათი ჯუმა. ორი დღე თავისუფალი აქვთ და წავიდა-წამოვიდნენ. თითო-ორ-ორი დღე რომ გადაამეტონ, არც იმით დაშავდება რამე. თქვენთვის თუ საჭიროა, სკოლის შესახებაც შემიძლია მოგცეთ ცნობები.

— სკოლების საქმეზე არ მოვსულვარ, მაგრამ ეს საკითხიც მაინტერესებს. ბევრი მოწაფე ყავს სკოლას?— შეეკითხა ანდრო ამ არაჩვეულებრივ მოტიტინე მოხელეს.

— სულ არ ყავს, ჩემო ბატონო!— ახლოს მოიწია და ყურთან

უთხრა:—მე რომ მთავრობა ვიყო, ამათ სკოლებს კი არა, ნაობახებს გავუხსნიდი. მათრახი, მათრახია მაგათი საქმე!.. ასეა ბატონო სკოლის საქმე. თუ გნებავთ სხვა მასალებსაც მოგცემთ... დღეს მიბრძანდებით?

— არა.

— მაშ რამდენიმე დღეს დარჩებით სკოლების გამოსარკვევად... ტყვილა დაცდებით, ჩემო ბატონო. როგორც გითხარით—ისეა. რაც უნდა ირკვიოთ, მეტს ვერაფერს გამოირკვევთ.

— ჯერჯერობით არ ვაპირებ მაგ საქმეზე მუშაობას, მაგასთან ერთად სხვა სამუშაოც მაქვს...

— მაშ ერთ კვირაზე მეტი მოგიწევთ დარჩენა.

— უსათუოდ. მგონია, რამდენიმე წელი თუ არა, თვე მაინც.

— მართლა?!—ეს არ მოეწონა მდივანს და განზე მიიხედა.

— საბჭოზე ვარ მომავრებელი პარტიის მიერ.

— ოჰო, აი რაში ყოფილა საქმე! დიდად სასიამოვნოა, დიდად სასიამოვნო. ხშირად გვითქვამს მე და ღურსუნს: რა კარგი იქნება, ერთ გამოცდილ კაცს რომ მოგვამავრებდესო პარტია... ძალიან ძნელია ისე აქეთ მუშაობა. მართალი გითხრათ, მთავრობისა და პარტიის ხათრისათვის, თორემ აქეთ არ წამოვიდოდი. მაგრამ ხომ იცით, რაც უნდა იყოს, ჩვენი მთავრობაა. ზოგიერთებს კი ეგონათ—მღვდლის შეილია, ჩვენ არ გამოგვადგებო, მაგრამ ნურას უკაცრავად, ბევრ კომუნისტზე (თქვენზე არ მიიღოთ, ჩემო ბატონო,) უკეთესად ვმუშაობ. განცხადებაც შეტანილი მაქვს პარტიაში მიღების შესახებ. თქვენ იცით, რახან ჩვენთან რჩებით, იმედია დამეხმარებით. ერთადერთი ისაა, რომ მამაჩემი მღვდელი იყო, თორემ სხვა დამაბრკოლებელი მიზეზი მე არა მაქვს. მექრთამე არა ვარ და ბიუროკრატი. დაბრძანდით, დაბრძანდით. მე თვითონ წავალ თავმჯდომარესთან, მოვიყვან. ჩანს, თქვენ იცნობთ მას.

— კი. გუშინ გავიცანი.

— ძალიან კარგი კაცია. ნამდვილი ბოლშევიკია, სიმართლე რომ მოგახსენოთ.

ამ ლაპარაკში იყვნენ, რომ ღურსუნიც შემოვიდა. ჯერ მიიხედ-მიიხედა და შემდეგ ანდროს მიესალმა.

— როგორი პარტივი გცათ თქვენმა არჩეულმა მასპინძელმა?—ლიმილით შეეკითხა თავმჯდომარე სტუმარს, ამ ლიმილში ირონიაც იყო.

— კმაყოფილი ვარ—ზიუგო ანდრომ—მშვენიერად მოვეწუვე. ჯერჯერობით მაგიდა და სკამი არა მაქვს, მაგრამ შემიძირდა მურადი ღურგლის მოყვანას. გავაკეთებინებ რამდენიმე სკამსა და ერთ მაგიდას. ბინას არა უშავს.

თავმჯდომარეს არ ესიამოვნა ანდროს სიტყვები.

— კარგია, თუ იმ დღელმა შესძლო თქვენი პარტიისცემა—ჭურით სთქვა მან.—თუმცა დაი ყავს კარგი, გაბედული გომბიოა, ალბათ გაგაცნობდა.—ეშმაკურად ჩაუკრა თვალი.

— მითხრა კი მყავსო, მაგრამ ჩემთვის არ გაუცნია—სერიოზულად უპასუხა ანდრომ.—საერთოდ, თქვენში არ ყოფილა მიღებულნი ასეთი წესი.

— არ არის, მაგრამ.—უხერხულობა იგრძნო ღურსუნმა—არ არის, მაგრამ... როგორ გითხრათ, ძნელი განსავითარებელია ჩვენი ქალები. თუმცა წესსაც ანგარიში უნდა გაეწიოს, ადათი!.. ადათი ბევრ რამეს ნიშნავს... ეგ არაფერია, მაგაზე შემდეგაც ვილაპარაკებთ. მაშ არ გაგაცნოთ დაი, ა?

— არა.

— რა ეშმაკია!—ჩუმად ჩაიცინა.—ზოგიერთებს კი...თვალი ჩაუკრა ანდროს, მაგრამ გამოწვევის საპასუხო ნიშანი რომ ვერ შეამჩნია, გაჩუმდა, თავის მაგიდასთან მივიდა, მედიდურად დაჯდა და კარებზე მომდგარ გლეხებისაკენ გაიხედა.

— რა ამბავია, რა დაგემართათ, ერთი წუთის მოსვენების საშუალებას რომ არ მაძლევთ?—ისევ ანდროს შეხედა.—ასეა ყოველდღე.—შემდეგ გლეხებს მიმართა.—შემოდით.—და როცა შენიშნა, რომ ოთახში ათამდე გლეხი შემოვიდა ერთად, წამოდგა და მრისხანედ შეუტია.

— კმარა, რა ამბავია, ერთად რომ შემოვარდით, გადით გარეთ. გადით მეთქი—რომ არავინ გადიოდა, მდივანს ანიშნა და იმან ხუთი-ექვსი კაცი გაიყვანა.

— რა გინდა ხუსიავე, შენ? არ მორჩა შენი საქმე? - მიმართა ერთ გლეხს თავმჯდომარემ და ისევ მედიდური გამომეტყველება მიიღო.

— თუ არ დამეხმარები, რაფრად მორჩება, ღურსუნ ეუფენდი!—ახლოს მოიწია გლეხი და მაგიდასთან დადგა.

— რა გინდა, რაზე მოსულხარ? რაზე უნდა დაგეხმარო? თქვი, ხომ ხელდავ საქმეები მაქვს!—უმატა ხმას ღურსუნმა.

იმ წყალის შესახებ მინდა გთხოვო, ღურსუნ ეუფენდი.—დაეღრიჯა გლეხი.

— რომელი წყალია?

—ხოჯა მამულდი რომ არ გვაძლევს,—გლეხმა მიიხედ-მოიხედა,—ყველამ იცის, ის წყალი ყოველთვის რწყავდა. ჩვენს ყანიებს. ხოჯის ადგილიდან ჩემს მიწაზე გამოივლიდა...ახლა ადგა ხოჯა და წყალს აქეთ არ უშვებს. ჩემი მიწიდან წყალს არ მოგცემო, მეუბნება. სადაური სამართალია, ღურსუნ ეუფენდი. კაცი ხარ, ჩვენი მთავრობა ხარ და მოგვიფერო უნდა ეს საქმე.

— რა უნდა ექნა შენი აზრით!— შეუბღვირა ღურსუნმა.

— უნდა დაგვეხმარო, ღურსუნ ეფენდი. ერგზობა უთხარი ხოჯას, რომ უსამართლოდ ირჯება. ღმერთმა წყალი მისცა კაცს, მაგან რეიზა უნდა წაართვას. შენ დაგიჯერებს, ღურსუნ ეფენდი, ხოჯა და ნუ დაგვამადლი მაგის თქმას, შენ გეყურბანე.

— მოდი და ელაპარაკე ასეთ კაცს,— ხელების გაშლით სთქვა თავმჯდომარემ და ანდროს მიუბრუნდა.— არ სჯერათ, რომ მთავრობას არ შეუძლია ხოჯის საქმეებში ჩარევა.— შემდეგ ისევ გლენს შეხედა,— რად ვერ გაიგე, რომ ნებით არ იძლევა ხოჯა იმ წყალს. დასახლებას აპირებს იმ ადგილას და როგორ ფიქრობ, შენი გული-სათვის მოსახლობაზე აიღებს ხელს?!. მთავრობაც გვიშლის ხოჯის საქმეში ჩარევას.

— ღურსუნ ეფენდი, ასე როგორ შეიძლება,— წამოეშველა გლენს ერთი ახალგაზრდა,— იმ წყალით მთელი სოფელი ვსარგებლობთ. რალა მაინცდამაინც იქ აპირობს ხოჯა სახლის დადგმას, სადაც წყალის გადმოსაშვებია!

— ეს უბრალო მიზეზია და მეტი არაფერი.— დაიძახა ერთმა მოხუცმა გლენმა, რომელიც კარებთან ატუხულიყო:

— ღვთის კაცი კი არა, ეშმაკის ხისიშია, უწყლოდ უნდა დაგეტოვოს ამდენი მოსახლე.— სთქვა ისევ ახალგაზრდამ და ანდროს გადახედა.

— გეყოფა.— შეუყვირა მას თავმჯდომარემ და მაგიდაზე დაკრა ხელი.— თქვენ ვერ მასწავლით მე კანონს და სამართალს.

— მაშ უწყლოდ დავიხოცოთ?!— ხმის აწევით უთხრა მოხუცმა გლენმა და წინ წამოიწია.— ტანზე ჩვენ არ გვაქვს და ფეხზე, სიმი-ნდი არ. მოგვდის და პური, საქონელს ათასნაირი კირი გაუჩნდა და გვეხოცება, გზა არა გვაქვს და კვალი. ფული რომ ვიშოვოთ, საყიდელს ვერაფერს ვშოულობთ. ერთი წყალი გვექონდა და ისიც ხოჯამ უნდა წაგვართვას. აბა მითხარით, მითხარით, როგორი მთავრობაა თქვენი მთავრობა. ექვს ობოლს ეზრდი მოხუცებული კაცი, სიმწრით ლუკმა ჭადს ვაქმეე და ახლა იმ ლუკმის წართმევასაც მიპირებთ.— ხელები აუცახტახნდა მოხუცს.— ამ ხნის კაცი ვარ და გაპირებდა მალაპარაკებს. თავის საქმეებს რომ იკეთებს მუდამ ჩვენი ხოჯა, ჩვენკენ რად არ გადმოიხედავს. იმდენი ფულეები რომ გადაგვახნდა, მინარეთია გასაკეთებელიო— სად წაიღო, რად მინდა მე მინარეთი! რად მინდა ჯამე! რად მინდა ღმერთი!.. ალლახ!...— გული შეულონდა მოხუცს, კედელს მიეყრდნო და თვალებიდან მარგალიტივით ჩამოცვივდა ცრემლები, რომლებიც თეთრ წვერებზე ჩამოეკიდნენ.

ყველა მოხუცს მიაჩერდა. ანდროს აუთრთოლდა გული. ის იმ წუთში მზად იყო გაქცეულიყო, თავისი ხელით გაეჭრა გზა წყალი-

საკენ, ახლავე აქვე ეყვირა, რომ საშინელი დამახინჯებაა მთავრობისა და პარტიის პოლიტიკის, მაგრამ თავი შეიკავა.

— გაქირვება მალაპარაკებს, გაქირვება.—ამოილაპარაკა მოხუცმა. ღმერთსაც ვცოდებ და კაცსაც. თქვენ მთავრობა ხართ და თქვენთან მოვედი. ვის ვუთხრა, ვის შევჩვილო აბა! დღეს დილით ძროხა მომიკლა ქირმა. იგი იყო ჩემი ბაღვების მარჩენალი. რა ვქნა, სად წავიდე ახლა. აქ წყალიც უნდა წაგართვაო. გადავირევი, აბა რას ვიზამ. ამბობენ, სხვაგან არ არის ასეთი მთავრობაო. სხვაგან მთავრობა ეხმარება ხალხსო, ექიმები ყავთ, წამლები აქვთ, სწავლა აქვთ, განათლება აქვთ და ჩვენ კი...— ცოტა ხანს გაჩუმდა და შემდეგ დაბალი ხმით წარმოსთქვა:—ჩვენს სოფელში მზეც გვიან ამოდის და გასაკვირი არაა, ჩვენამდე რომ არ მოულწევია იმას, რაც სხვაგან არის. მაგრამ წყალი!... წყალი ხომ მუდამ გვექონდა! ვინაა ის, რომ წყალის წართმევას გაგვიბედავს, ხალხო!... ჩვენ ვერაფერს დაგვიდგება წინ. მთავრობა თუ არ დაგვეხმარება, ჩვენით გავაკეთებთ ჩვენს საქმეს.

— მართალია, მართალი.—დაიძახეს იქით-აქედან და ოთახი ისევ აივსო გლეხებით.

თავმჯდომარეს, ცოტა არ იყოს, აეწვა კუდი. უშოვეს რაღა ღრო მომაგრებულ კაცთან. ანდრო არ იყოს აქ, უჩვენებდა სეირს მაგათ, მაგრამ ახლა... გაბრაზება არ ივარგებს, სჯობს ისევ დამშვიდდეს და როგორმე ტკბილი სიტყვები მონახოს.

— ხალხო, რომ შემოცვივდით და მეხვევით აქ, მე ხომ ჯიბეში არ მაქვს წყალი. თქვენ კარგად იცით, ამასწინათ რომ მთავრობის კაცი იყო აქ, ის შეგვპირდა, გამოგვიზავნით ინჟინრებს, ტექნიკებს, მასალას, გამოგიყვანთ წყალს და ერთი კაპიკი არ დაგეხარჯებათო. ხომ სთქვა ასე!—გადახედა გლეხებს.

—მართალია, სთქვა—დაიძახეს გლეხებმა.

— ჰო და, დავიცადოთ ცოტა. მე ხოჯა კი არ მიყვარს, მაგრამ ხომ იცით, რაც არ უნდა იყოს, სახათრო კაცია.

— ჩვენ არ ვართ სახათრო?!...—შესძახა ისევ ახალგაზრდამ.

— შენ ახმელავე, ცოტა ენას მოუკელი თორემ.... მრავალწერტილებით სთქვა დანარჩენი თავმჯდომარემ.

— თორემ რა?!... ძალიან შემსჭრები რაღაცას...ვიცი, ვიცი, რაც გაწუხებს, მაგრამ არ გაგივა...

თავმჯდომარე აღელდა. ვერ მოითმინა ახალგაზრდა გლეხის სიტყვები. წამოვარდა, წაიწია, მაგრამ ანდრომ შეაჩერა.

— დამშვიდდით ამხანაგებო,—მიმართა ანდრომ გლეხებს—მე გაძლევთ პატიოსან სიტყვას, რომ ყველაფერს მოგავაგარებთ ისე, როგორც თქვენ გინდათ. ახლა წაბრძანდით. მე და ღურსუნი მოვი-

ლაპარაკებთ აქ ამხანაგებთან, გავერკვევით საკითხებში და სრული იმედი იქონიეთ, რომ თქვენი ინტერესები არ იქნება შელახული.— მოხუცთან მივიდა.— თქვენც დაგეხმარებით, ნუ გეშინიათ. შემოიარეთ ამ სალამოს აქ, ამიხსენით თქვენი მდგომარეობა და მივიღებთ ზომებს— მხარზე დაადო ხელი და კარებამდე მიაცილა.

გლებები ახლა ანდროს შემოეხვივნენ, დაუწყეს ლაპარაკი ყოველი მხრიდან, მაგრამ ანდრომ ისინი პასუხით დააკმაყოფილა, გაისტუმრა და დუკსუნთან მარტო დარჩა, რომ მოლაპარაკებოდა იმ საკითხებზე, რომლებიც აუცილებელ გადაქრას საჭიროებდნენ სწრაფად და დაუყოვნებლივ.

— ვინაა ქოვ, ის კაცი?

— მომაგრებულიაო.

— არ უნდა იყოს ცუდი ადამიანი.

ანდროს შეთქამბაში იყვნენ მთელი დღე გლებები და მასზე ლაპარაკობდნენ.

IV

მთელ სოფელს მოედო ახალი ამბავი. ყველა ლაპარაკობდა საბჭოს გუშინდელი სხდომის შესახებ. თურმე რა ამბავი დაუთენებია იმ ახალგაზრდასო, ამბობდნენ ანდროსზე და ქებით იხსენიებდნენ.

— რა უფლებით აკრიფეთ მინარეთისა და მედრესეს შესაქეთებელი თანხებით, უთქვამს.

— წყალს კი არა, თუ ძალიან გაძალდება და წინააღმდეგობას გაგვიწევს, სახლკარს ჩამოვართმევთ ხოჯას და სულ გადავასახლებთ აქედანო.

— ღარიბ გლებობას უნდა დავეხმაროთო.

— ვენაცვალე, ნამდვილი ბოლშევიკი ყოფილა.

— ამბობენ, ჩვენს თავმჯდომარესაც შეუყენებს წყალსო.

— აბა რა დღეს დააყრის. ხიმშიაშვილის ნასტრატინიკალი კაცი რას ვარგა თავმჯდომარედ!

— მწერალი თეოფილე მოუხსნია უკვე. საჩვენო კაცი არ ხარო, უთქვამს.

— მართლა?

— დღეს აღარ მუშაობდა, მივდივარო მითხრა.

— აი, აშენდეს მაგის ოჯახი.

— კარგ დროს მოგვეშველა. ნეტა კიდევ რა საკითხები გააჩნია საბჭომ, თუ იცი.

— მამულამ მელაპარაკა. ის ხომ საბჭოს წევრია...

— ჰო!

— რაო და, ჯერ ასეთი საკითხები არასოდეს არ მდგარა ჩვენს საბჭოს სხდომაზეო—და გლებმა ამხანაგებს დაწვრილებით უამბო ის, რაც მან საბჭოს წევრ მამულსაგან იცოდა.

მართლაც არაჩვეულებრივი იყო საბჭოს ის სხდომა. ანდრომ ჯერ თავმჯდომარესთან დაამუშავა საკითხები, შემდეგ საბჭოს კომუნისტ წევრებთან და ბოლოს საბჭოს სხდომაზე გაიტანა.

დურსუნი ენაჩავარდნილი იყო. აღარ ისმოდა მისი მრისხანე ხმა და ჩვეულებრივ ამაყი ლაპარაკი. ახლა უკვე საბჭოს წევრები კამათობდნენ. ისინი, მართალია, ფრთხილად, მაგრამ მაინც ააშკარავებდნენ იმ შეცდომებს, რომლებიც საბჭოს დაეშვა თავის მუშაობაში. აქ მრავალჯერ მოიხსენიეს ხოჯის ოინები, მისი ფარისევლობა, ახსენეს იუსუფ-ალაც, როგორც კონტრაბანდისტების მფარველი და ხელის შემწყობი, როგორც გაიძვერა და ყაჩაღებთან კავშირის მქონე.

— საჭიროა მოვეულოთ ბოლო ჩვენში კონტრაბანდისტების თარეშს—მკაცრად სთქვა ერთმა ახალგაზრდამ საბჭოს კრებაზე.

— კონტრაბანდისტებს არა მარტო კონტრაბანდა გადმოაქვთ, არამედ რალაც წვრილები და ფურცლებიც. გადმოყავთ ვილაც უცხო პირები და თუ ჩვენ თვითონ არ მივიღეთ ზომები ჩვენი თავისა და ჩვენი ქვეყნის დასაცავად, არ ივარგებს.—დაამთავრა მან.

აქ თითქო იშოვა მიზეზი თავმჯდომარემ.

— სანაპირო რაზმის საქმეებში ჩვენ ვერ ჩავერევით, ამხანაგებო,—სთქვა მან და ანდროს შეხედა, დამიმოწმებსო, მაგრამ ანდრომ მის სიტყვებს თავის ქნევით უარყოფითად უპასუხა და ამით სულ ჩაუგდო ენა.

დიდხანს გაგრძელდა სხდომა. ბევრი საკითხი გაარჩიეს. სკოლის, კოოპერატივის გახსნის, გზის გაყვანის, საქონლის დაავადებასთან ბრძოლის. იღვა საკითხი ხოჯა მამულის მიერ მოსარწყავი წყალის დაკავების შესახებ. ამან დიდი კამათი გამოიწვია. საბჭოს თავმჯდომარეს აქ ხუთამდე სხვა მიემხრო, ისინიც ამართლებდნენ ხოჯის საქციელს, მაგრამ ანდრომ სათანადო ახსნა-განმარტების შემდეგ ხზების უმეტესობით დაადგენია საბჭოს, რომ წყალი მიეცეს გლეხებს იმავე ადგილიდან, საიდანაც ის დღემდე ეძლეოდათ.

ეს იყო პირველი დამარტება, რომელიც დურსუნმა განიცადა საბჭოში. არასოდეს მის წინააღმდეგ არ დაუძრავს ვინმეს ამდენხანს ენა და დღეს კი....

— სულ ამის ბრალია.—სთქვა თავის გულში მან და ანდროს განზე გახედა.—დამაცა!—ჩუმად ჩაიმარხა გულში ბოლმით გამოთქმული სიტყვები. იმ ღამეს კი გაჩუმება არჩია.

აი, ამ ამბებზე ლაპარაკობდნენ მეორე დღეს გლეხები და თაყიანთ შეხედულებებს გამოსთქვამდნენ.

ხოჯა მამული ვერ იყო კარგ ხასიათზე. მას უკვე გაეგო საბჭოს გადაწყვეტილება, მაგრამ ეს იმდენად არ სწყინდა, რამდენადაც ის სიტყვები, რომელიც ანდრომ წარმოსთქვა საბჭოს კრებაზე.

— როგორ, — ცხარობდა ხოჯა, — ვილაც მოთრეულმა გიაურმა უნდა გამლანძლოს, მან უნდა ილაპარაკოს ჩემს გადასახლებაზე?! — ცეცხლს ყრიდა პირიდან — დამაცადოს, მე ვუჩვენებ მაგას სიერს! — იუსუფ-აღასთან მივიდა და ახლა ისიც ამხედრა — შენზეც ულაპარაკნიათო უთხრა, გადასახლებას გევიპირებნო, პირი შეუთქვამთო.

იუსუფ-აღას მუდამ ყავდა თავისიანები გვერდით და, გაიგეს თუ არა ეს ამბავი, ჩახმახებივით შეიშარტნენ ფეხზე.

— გავცვითათ, მოვკლავთ, გამოვშიგნავთ! — აყვირდნენ და აცახცახდნენ ისინი. ხალხში გამოვიდნენ, გლეხებს მოედუნენ, მაგრამ მათგან ვერაფერი საიმედო მიიღეს და ისევ თავიანთ ქერქში ატრუსდნენ.

ვერც თავმჯდომარე იყო კარგ ხასიათზე. მას მთელი ღამე არ ეძინა. სულ იმაზე ფიქრობდა, როგორ გადაეხადა სამაგიერო ანდროსათვის, როგორ მოეცილებინა ის თავიდან, როგორ დაექირა მუქში ისევ მთელი სოფელი, მაგრამ გამოსავალს ვერ პოულობდა.

ანდრო არ ჰგავდა იმ პირებს, რომლებიც წინათ იყვნენ მომარებელი საბჭოზე, თორემ ადვილად გაუსწორდებოდა. შეაშინებდა, როგორც ეს ერთ მომარებულ ამხანაგს უქნა. დაახვედრა გზაზე ყაჩაღები და სიტყვა დაადებინა, რომ მიატოვებდა აქაურობას. მეორეს კიდევ შარი მოსდო, ჩვენს ქალებს ეარშიყებო, ოჯახებში დაღის შეუქითხავადო. მართალია, ამის საბუთები არ ჰქონდა, მაგრამ კომიტეტი დაარწმუნა. ათიოდე გლეხი გაგზავნა საჩივრით. ისიც მოხსნეს. მესამე, მართალია, ყველაფრამდე კარგი იყო, ყველაფერში ეთანხმებოდა ღურსუნს, მის ჭკუაზე დადიოდა, ის რომ დარჩენილიყო, იმის საწინააღმდეგო ღურსუნს არაფერი ექნებოდა, მაგრამ გაიწვიეს, პარტიის ხაზს ამხინჯებსო. რამდენიმე დღე გავიდა იმის გაწვივის შემდეგ და ანდრო მოვიდა. პირველ შეხვედრისას ღურსუნს ეგონა, გავკეთდი კაცი, ეს სწორედ ისეთი იქნება, როგორიც მე მინდოა, ყველაფრის დამჯერე და გამგონეო, მაგრამ... ყველა დაავიწყა და დაალტყვინა.

— არა, როგორ შეისწავლა ამ ბაღემა ამდენი. — ბრაზით სკდებოდა ღურსუნი და ძილი არ ეკარებოდა.

ღილით არაჩვეულებრივ ადრე აღგა, ტანთ ჩაიცვა, მოემზადა და წასვლას აპირებდა, რომ სიმამრი ხოჯა ესტუმრა და ყველაფერი გამოკითხა.

ძნელი იყო მისთვის განაჩენი წაეკითხნა სიმამრისათვის, ეთქვა ის, რაც მასზე სთქვეს, მაგრამ გამოსავალი არ იყო. დღეს თავისი ხელით უნდა მოეყვანა სისრულეში საბჭოს გუშინდელი დადგენილება. თვითონ უნდა გამხდარიყო ჯალათი თავისი მოყვრისა და მეგობრის. ამიტომ აშკარად და დაუფარავად უთხრა ყველაფერი და დაარიგა კიდევაც.

— არაფერი წამოგცდეს, წინააღმდეგობა არ გასწიო, თორემ ეტყობა დაზოგვა არ იცის. სულ ტელეფონთან ზის. ათასნაირ ცნობებს აგზავნის აქეთ-იქით, სჯობს მოვეთმინოთ, ავიტანოთ დრომდე და შემდეგ მე ვიცი.

სიძის დარიგება მიიღო ხოჯამ. თავის მხრივ იუსუფ-ალაც ასე დაარიგა და, რახან შეატყვეს, რომ აქ ძალა ვერ გასკრიდა, შეუდგნენ ქსოვას ბადისა, რომელიც ოდესმე თავის საქმეს შეასრულებდა და მოწინააღმდეგეებს მაგრად და მოხერხებულად დაიჭერდა.

ხოჯის მომჩივანი გლეხები დილაადრიან მისულიყვნენ საბჭოს შენობის წინ, თოხები და ბარები მოეტანათ. გაეგოთ საბჭოს გადაწყვეტილება და ახლა მის შესრულებას მოითხოვდნენ. მხიარულად ლაპარაკობდნენ, უხაროდათ, რომ მთავრობამ მათი ინტერესები დააყენა ხოჯის ინტერესებზე მალლა.

იმედიანი სახეები ჰქონდათ. უფრო გაბედულად ლაპარაკობდნენ და ელოდნენ თავმჯდომარეს, რომელიც მათ წაყვებოდა წყლის გადმოსაშვებად.

დურსუნის გაჯავრებული და ნაწყენი მოდიოდა, მაგრამ გლეხები რომ დაინახა, ვითომც მხიარული სახე მიიღო, ახლოს მივიდა და საერთო სალამი მისცა.

გლეხებმა უპასუხეს სალამზე და მიიწ-მოიწიეს.

— ხომ დავაკმაყოფილე თქვენი თხოვნა. მეტი რაღა გინდათ, — თავმომწონედ მიმართა მან.

— მადლობელი ვართ, დურსუნ ეფენდი. ჩვენი მთავრობა ხარ, სხვა ვინ დაგვენმარება აბა. — უპასუხა ყველას მაგივრად იმ გლეხმა, გუშინ რომ პირველი მივიდა საჩივლელად.

— მთავრობა ვარ. — გაიმეორა მან რამდენჯერმე ეს სიტყვები, — რა მთავრობა ვარ, როცა არაფერს მიჯერებთ და ჩემი არ გეყურებთ. მე თქვენთვის ვშრომობ, ვმაცადინობ, მინდა კარგად იყოთ. კარგი ჯამე გქონდეთ, კარგი მედრესე, კარგი წყალი, მაგრამ თქვენ მაინც საყვედურობთ. ძალად გვახდევინებენ ჯამეს ფულსო, დამასმინეს მომაგრებულ ამხანაგთან. ასე ეგონათ, მე მაგისათვის დამსჯიდნენ. თქვენ არ იცით და მე რამდენი შუამდგომლობა მაქვს აღძრული მთავრობაში იმის შესახებ, რომ კოოპერატივი გაგვიხსნან, გზა გაგვიკეთონ, წყალი გამოგვიყვანონ, გადასახადები შეგვიმცი-

რონ, მაგრამ თქვენც იცით, ჯერჯერობით არაფერი გაკეთებულა. გლეხებმა კიდევ მადლობა გადაუხადეს, თუმცაღა ღურსუნნი კარგად ატყობდა, რომ ეს მადლობა მას არ ეკუთვნოდა და გლეხები ჩვეულებრივი პირთერობით ელაპარაკებოდნენ.

ამ ლაპარაკში იყვნენ, რომ ანდროც მოვიდა, გლეხებს მიესალმა, ღურსუნს ხელი ჩამოართვა და გაუღიმა.

— აქტიური წევრები გყოლია საბჭოში.— უთხრა მან,— ასეთი აქტივით სანქმის გაკეთება შეიძლება.

ღურსუნს გული დაეწვა. მან თავის დამარცხებად მიიღო ყოველივე ის, რაც წუხელ მოხდა და იმ მომხდარი ამბის ქებით მოხსენიება არ იყო მისთვის სასიამოვნო, მაგრამ მაინც გაიღიმა და ისე შეხედა ანდროს.

— არა უშავს, მეტ აქტივობას კი მოველოდი. იმიტომ იყო, რომ არაფერს ვლაპარაკობდი. მინდოდა თვითონ ეთქვათ რა აწუხებდათ... აბა, ამხანაგებო,— მიუბრუნდა გლეხებს,— წავიდეთ, გამოვიყვანოთ წყალი. თქვენ ხომ არ წამოხვალთ, ამხანაგო ანდრო.

— წამოვალ.— დაეთანხმა ანდრო.

— თუ ხოჯამ არ დაგვერია კეტით.— მწარე ღიმილით ხტკვა ღურსუნმა, ვითომ ხუმრობით.

— იმ შემთხვევაში დაეაპატიმროთ.— სერიოზულად უთხრა ანდრომ.

— გეხუმრებით, ამხანაგო ანდრო. ხოჯა არაა. ისეთი კაცი, რომ საბჭოს დადგენილების წინააღმდეგ წავიდეს. ჩემი სიმამრი რომაა იმით არ ვიტყვი, არაა ურიგო ადამიანი. შეგნებულა, კულტურული, განათლებული. სკოლას რომ ვაშენებდით, ხე-ტყის მასალაც კი შემოგვაწია. მართალია ხომ, ხასიავ!— შეეკითხა ერთ გლეხს.

— მართალია, ღურსუნ ეფენდი.— დაუმოწმა ხასიამ.

— ეს რაღაც ამ წყალზე შეიქნა გაუგებრობა. მთავრობა შეგვიპირდა წყალის გამოყვანას და ხოჯამაც იფიქრა, ჩემი მიწიდან გაყვანილი წყალი აღარ დასჭირდებათო და იმიტომ გადაკეტა, თორემ სხვა საქმეში როდის იყო, ხოჯას რომ ხელი შეეშალოს რამეში.— ისევ გლეხებს მიმართა.

— მართალია, არ შეუშლია.— ჩაილაპარაკა ვილაცამ, მოაშუშა ტკივილები თავმჯდომარის ტკბილმა სიტყვებმა.

— მგელი მუდამ მგელი იქნება— ჩაილაპარაკა თავისთვის ახალგაზრდა გლეხმა და ბარი გაიდვა მხარზე.

გლეხებმა უთანაგრძნეს მას, მაგრამ ეს თანაგრძნობა მხოლოდ თავიანთ გულში გამოსახეს.

წავიდნენ წყლის გადმოსაშვებად.

გლეხები არ მოელოდნენ, რომ დღევანდელი დღე მშვიდობი-

ნად ჩაივლიდა, რომ ხოჯა მამული აურზაურს არ ასტეხდა. ღურსუნის, როგორც საბჭოს თავმჯდომარის, ხალხისკენ გადაბირება ყველასათვის გასაგები იყო. აქ მთავრობისა და პარტიის წარმომადგენელი იქონიებდა გავლენას, მაგრამ ხოჯა მამული თუ ამ საქმეს დამწევიდებული შეხედებოდა, არავის ეგონა.

ანდროც არ მოელოდა.

— რა ვქნა, რახან ასე გინებებიათ... მაგით არ დავივსებო, მაგრამ კარგი იყო არ გეწყენიებიათ ამ მოხუცებულობის დროს—ემმაკურად უთხრა ხოჯამ გლეხებთან ერთად მისულ ღურსუნსა და ანდროს.

ანდროს არაფერი უპასუხნია, ღურსუნს შეხედა და ანიშნა შენ გაეცი პასუხიო, მაგრამ ღურსუნმა პასუხის ნაცვლად სულ სხვა საგანზე დაიწყო ლაპარაკი.

წყალის გასაყვანი თბრილი, რომელიც ხოჯას ამოეცო, გლეხებმა მალე ამოწმინდეს, შემდეგ ახალი თბრილიც წააბეს ზედ და წყალს მიმართულება შეუცვალეს.

ეს იყო პირველი გამარჯვება, რომელიც ამ სოფლის გლეხებმა მოიპოვეს საბჭოს დადგენილებით, და ძალიან კმაყოფილი იყვნენ, როცა წყალმა გადაუარა გლეხების ეზოებს, აჩხრიალდა კენჭებზე და შეიქრა ნათესებში. მთელი სოფელი ფეხზე დადგა. კარგახანია ამ წყალით არ უსარგებლნიათ მათ. მას შემდეგ, რაც ის ადგილი, სადაც წყლის სათავეა, ხოჯამ ჩაიგდო ხელში, წყალი სანატრელი გაუხდა გლეხებს, მეტადრე ნაწილი გლეხებისა დაიჩაგრა. სულ გადაუშენდათ რაც კი დაერგოთ. ნათესის მდგომარეობა ხომ სულ უმწეო იყო. რამდენჯერ მიმართეს ხოჯას, ღვთის კაცია, იქნებ შეგვიბრალოსო, შემდეგ საბჭოს,—მთავრობამ სამართალი გაგვიჩინოსო, მაგრამ დღემდე არც შებრალება ჩანდა, არც სამართალი.

ახლა კი თითქო ორივეა. საბჭომ სამართალი გააჩინა, ხოჯამ კი უყოყმანოდ და უსიტყვოდ მიიღო საბჭოს დადგენილება და ამას გარდა წყლის გასაყვანად ერთი ფერდობიდან მეორეზე დიდი ხის ღარიც კი შესწირა.

— აკო, გეუბნებოდით,—გლეხების გასაგონად უთხრა ღურსუნმა ანდროს.—შეგნებული კაცია მეთქი... ხალხი, თვითონ გლეხებია მასთან დამნაშავენი, გააბრაშეს, გული მოაყვანიეს, თორემ წყალს როგორ დაუშლიდა!—შემდეგ მიუბრუნდა ხოჯას, რომელიც გლეხებს დადგომოდა თავზე და ვითომ ასწავლიდა, როგორ გაეყვანათ წყალი.

— შენ რომ წაბლის ხეები გაქვს, უნდა დაგვითმო ორი ძირი

სკოლისათვის გვინდა—უთხრა მან სიმამრს და თვალით ანიშნა, როგორი პასუხი იყო საჭირო.

ხოჯამ მოიხედა, ვითომ არ იცის რა უპასუხოსო, ცოტა ხანს დაღუქრდა და შემდეგ:

— ინებეთ, თქვენ რატომ დაგიკავებთ.—ლიმილით სთქვა მან, —რომ გადასწყვეტოთ ხოჯა გადავასახლოთო, იმასაც შესძლებთ. თორემ ორი ძირი ხის წაღებას რა უნდა.—ეს სიტყვები ანდროს გასაგონად იყო თქმული, მაგრამ მას ყურადღება არ მიუქცევია.

— ჩვენ გვინდა შენი სურვილით მოგვეცე, თორემ ძალა რომ შეგვეწივს, ეს კარგად ვიცით.—ამაყად უთხრა სიძემ და კიდევ ანიშნა, როგორი პასუხი იყო საჭირო.

— გეხუმრებით.— სთქვა ხოჯამ.— ხე რა ოხრად მინდა აბა. ასეთ საქმისათვის, ჩემი რომ არ მქონდეს, ვიყიდი და იმას მოგცემთ. ინებეთ, მხოლოდ ახალგაზრდა წაბლებს ნუ მომიჭრით, არც თქვენთვის ივარგებს და სამერმისოლაც არ დაგვირჩება.

— არა, არა.— უთხრა დურსუნმა,—ახალგაზრდა ხე რად გვინდა.— შემდეგ ანდროს შეხედა.— აი, ხედავ? — უჩვენა ხოჯაზე. ამით უნდოდა კარგი რეკომენდაცია მიეცა სიმამრისათვის, მაგრამ მაინცადამაინც საიმედო პასუხი ვერ მიიღო ანდროსაგან. უკანასკნელმა ხელი ჩაიქნია მხოლოდ. ასე ურწმუნო ადამიანები ჩაიქნევენ ხოლმე ხელს.

სიძე-სიმამრმა ერთმანეთს შეხედეს და შემდეგ ცალი თვალთა ანდროს გაუქვრიტეს. კარგი ეშმაკი ყოფილხარ, მაგრამ არც ჩვენ ვართ ნაკლებიო, გაიფიქრეს ერთსა და იმავე დროს ორივემ.

V

ხვეი-ხევ ამოიპარა მურადი, თხრილს აყვა და ისე მივიდა შინამდე, რომ არავეის დაუნახავს. კარგა მოზრდილი ტვირთი ჰქონდა აკიდებული ზურგზე. სახეზე ოფლი წურწურით ჩამოსდიოდა, მაგრამ მხიარული და კმაყოფილი იყო.

სწრაფად ჩავიდა ეზოში, ქურდულად გაიხედ-გამოიხედა და სახლში შევიდა.

ნაილე სამზარეულოში იჯდა. კარის გაღების ხმა რომ გაივინა, ფრთხილად გამოიქვრიტა. ანდრო ეგონა, მაგრამ მურადი რომ იცნო, სწრაფად გამოვარდა და ძმას მიეგება.

— სადაა ის?—მაშინვე კითხა მურადმა დას და როცა პასუხი მიიღო, ზურგიდან ტვირთი მოიხსნა და იატაკზე დასდო.

— რა არის ამოდენა.— შეეკითხა ნაილე, ტვირთს ხელი მოჰკიდა და სამზარეულოში შეიტანა.

— სიმინდი ვიყიდე. დანარჩენი კი ანდროს წიგნებია. . . გახსენი—გაულიმა დას, დაბალ სკამზე ჩამოჯდა და ქალამნების გაძრობა დაიწყო.

ნაილემ მოკრული გახსნა. წიგნები, გაზეთები და რაღაც რვეულები ცალკე იყო შეხვეული და მოკრული, ხოლო სიმინდიან ტომარაში აგრეთვე თავსაფარში გამოხვეული ნივთებიც იყო ჩადებული.

— ეს კი ჩვენია. გახსენი, ნახე რა არის.— და კიდევ ღიმილით შეხედა მურადმა დას.

— რა არის?— ხელით დაუწყო სინჯვა ნაილემ გარედან.

— გახსენი მეთქი.— წამოდგა მურადი, შეხვეული გამოართვა და თვითონ გახსნა.

— ეს შენთვის ვიყიდე,—თეთრი ტილოს ფეხსაცმელები და აბრეშუმის წინდები გადასცა ნაილეს.— ეს კი ჩემია, — ხალათი, შარვალი, წულები და ქუდი ამოიღო მურადმა.

— ნენეე!— შესძახა ალტაცებით ნაილემ,— სად გიშოვნია ამდენი ფულები.— კიდევ გასინჯა ნაყიდი ნივთები.

— ფულები. ფულები, ვისესხე.— ამაყად მიუგო მურადმა. ნაილემ გაკვირვებით შეხედა ძმას.

— ვინ გასესხა ამდენი ფული? ამას ასი მანეთიც არ ეყოფოდა.— მესამეჯერ გადააწყო ყველა ცალ-ცალკე.

— შვიდი თუმანი მასესხა ანდრომ, სამი მანეთი კიდევ დამრჩა, ერთი ფუთი სიმინდი ვიყიდე.

— ანდრომ.— ნაილემ მწყრალად გახედა ძმას.

— რა იყო! კი არ უჩუქებია, სესხად მომცა. შენ თავს ვფიცავ, ნაილე, არ ვართმევდი. ძალად მომცა. მე ახლა არ მქირიაო, თანდათან გადამიხდიო. ეწყინებოდა, რომ არ ამერთმია.

— თანდათან გადამიხდიო — გაიმეორა ნაილემ. ჩამოჯდა და გულდაწყვეტით შეხედა ძმის მიერ მოძღვნილ ფეხსაცმელებს.

— რატომ მოიწყინე, შენ გგონია ტყუილს ვამბობ?!

— არა, მაგრამ ვერ გადავიხდით. აბა რა მოგვეძევა. რა უნდა გავყიდოთ. უცხო კაცს ფული რაფა გამოვერთმევა.

მურადს აუარ-დაუარა ფერმა.

— მართლაც, რით უნდა გადავიხადო — გაიფიქრა მან. — მოდი და, ანდრო არ დარჩეს ამ სოფელში, ან გადაიყვანონ, ან თავისით წავიდეს, მაშინ ხომ უნდა მისცეს ვალი. საიდან შეუძლია მერე ამდენი ფულის შოვნა!.. კარგა ხანს იჯდა დაფიქრებული. . . დამაც შეატყო ნალველი ძმას და შეებრალა.

— ამეებს გავყიდი, ნაილე.— მოკიდა ხელი მის. ტანსაცმელს,—

შენ კი გქონდეს. ახლა ამაში აღებული ფულიც რომ მივცეთ ანდროს, ისიც იქმარებს, მერმე კიდევ ვიშონით რამეს.

— რას ამბობ.— შეედავა ნაილე.— ესენი გავყიდოთ. მე სახლში ვარ, რად მინდა ასეთი ფეხსაცმელები. შენ კი კაცი ხარ, უნდა ხალხში გამოხვიდე.

ბევრი ილაპარაკეს, მაგრამ ვერ შეთანხმდნენ, ვერ გადაწყვიტეს, როგორ მოქცეულიყვნენ.

ნაილეს, ერთი რომ ესირცხვებოდა უცხო კაციდან ფულის ასესხება, შეორედ ეშინოდა, ვაი თუ ისეთ დროს მოგვთხოვოს, რომ არავითარი საშუალება არ გვექნესო. ან და ვინ იცის, რამდენნაირია ადამიანი. იუსუფ-ალა ასე ფულების გასესხებით გამდიდრდა თურმე, დედისაგან გაუგონია: გაასესხებდა ფულს, დაუნიშნავდა ვადას და თუ იმ ვადაზე ვერ უშოვნიდნენ, ერთი-ორად გადაახდევინებდაო. ბევრია ისეთი გლეხი ამ სოფელში, რომელსაც ლუკმა ამოაცალა რამდენჯერმე იუსუფ-ალამ. ვალის ძალიან ეშინია ნაილეს და ურჩევნია მშიერ-შიშველი იყოს, ვინემ სხვისი ვალი ჰქონდეს.

— ანდრო ბოლშევიკია, ნაილე, ვალში ლუკმას როგორ წაგვართმევს.— გაამხნევა ნაილე ძმამ.

— სირცხვილია — უთხრა დამ. შემდეგ უამბო, რომ წუხელის ანდრო არ მოსულა ლამის გასათევად.— კაცი გამოგზავნა. შენ გიკითხა, თუ მოვიდაო. შეიძლება დაეხატა. ვინ იცის, ვისას გაათია ლამე.

— რას ამბობ— ეწყინა მურადს.— იქნებ არ უნდა ჩვენსას დარჩენა.. სულ იმის ბრალია.— თავმჯდომარეს გადააბრალა.

— არა, ემინეს ვკითხე. ჩვენსას არ ყოფილაო. არც იუსუფ-ალასას ყოფილა. დღეს დილით მოვიდა, რალაც ქალაღდები წაიღო და საბჭოსაკენ წავიდა.

— ვერ კითხე, რად არ მოვიდა წუხელის?!— შეაწყვეტინა დას სიტყვა მურადმა.

— რას ამბობ. როგორ მეკითხა!.. თუმცა..

— არ ვარგხარ.. ნაილე, თუ ჩემი და კი ხარ, თუ ჩემი ხატრი გაქვს,— წამოდგა, მივიდა ნაილესთან და თავზე დაადო ხელი,— ანდრო ძმასავით უნდა მიიღო, გესმის?! ძმასავით. შემპირდი, შემპირდი, რომ გაეცნობი მას. კარგი?!

ნაილემ დიდრონი შავი თვალები შეანათა ძმას.

— შენ თუ გინდა, ასე იყოს,— უთხრა მან, სიმინდიანი ტომარი აიღო და კუთხეში მიიტანა.

მურადმა მქადი და მაწონი შექამა, ფეხზე ისევ ქალამნები ჩაიცვა და გარეთ გამოვიდა. მას ერთი სული ჰქონდა, სანამ ანდროს ნახავდა. ის პირდაპირ საბჭოსაკენ წავიდა. იქ უნდა ენახნა ანდრო და მასთან ერთად წამოსულიყო სახლში, მაგრამ ანდროს

სკოლაში თათბირი ჰქონდა მასწავლებლებთან და ამიტომ კარგახანს ელოდებოდა კარებთან გაჩერებული. ვერ გაბედა შესვლა თათბირზე, თუმცა ძალიან აინტერესებდა დასწრება.

დალამდა. სულ ჩამობნელდა, მაგრამ თათბირი მაინც არ თავდებოდა. მურადს გარეთ ესმოდა ანდროს ლაპარაკი. ის მასწავლებლებს არიგებდა, უხსნიდა, თუ როგორ უნდა ემუშავნათ, რა ამოცანები იყო მათ წინაშე დასმული ამჟამად. ვერ მუშაობთ კარგადო, ვერ ხელმძღვანელობთ სკოლასო, ძალიან ბევრ საყვედურს ეუბნებოდა ყველას.

უკვირდა მურადს. ვინ ყოფილა ეს, რა უფლებებით აღჭურვილი, რა შეგნებისა და სწავლის პატრონიო, ფიქრობდა. შელაპარაკებასაც რომ ვერ უბედავენ!.. ალბათ მართლაც დიდი ვინმეა. დიდი, მაგრამ პატარაც. სასტიკი, მაგრამ ლმობიერიც. ნეტავ ასეთი იყვნენ ყველანი.

ფრთხილად შეალო კარი და შეიქვირიტა. ეგონა ვერავინ შემინშნავსო, მაგრამ ანდრომ მაშინვე იცნო.

— შემოდი, მურად.— დაუძახა მან. — და ისევ განაგრძო ლაპარაკი.

მურადი სირცხვილით დაიწვა. ფრთხილად შეიპარა და კარებთან აიტუზა. შვიდამდე მასწავლებელი იყო. ამ თემში შემავალი ყველა სკოლიდან მოეწვიათ. კრებას რამდენიმე ადგილობრივი ახალგაზრდაც ესწრებოდა. ესენი კუახეში მიმჯდარიყვნენ და განაბული ისმენდნენ ანდროს სიტყვებს.

მურადს ცოტათი გაუარა მორცხვობამ. ის ნელნელა წავიდა და ნურისთან ახლოს ჩამოჯდა. ეს ერთადერთი ახალგაზრდა ემეგობრებოდა მურადს და ამიტომ უფრო გაბედა მასთან მისვლა.

ანდრომ კიდევ ბევრი ილაპარაკა. ჯერ მასწავლებლებზე, შემდეგ ახალგაზრდობაზე. ყველა ესენი ჩავაბათ უნდა მუშაობაშიო, სთქვა. ახალგაზრდებს მიუბრუნდა და კომკავშირის უჯრედის ჩამოყალიბებაზე და მის ამოცანებზე ილაპარაკა. პირველად კი საჭიროა მომზადებაო, წერა-კითხვის შესწავლაო. კიდევ მრავალი რამ აუხსნა. ხვალდანვე უნდა დაგაარსოთ წერა-კითხვის უცოდინარობის სალიკვიდაციო სკოლაო. ერთერთი მასწავლებელი გამოძყო, დაავალა ამ საქმის მოწესრიგება. ახალგაზრდებს კი წინადადება მისცა ევლოთ სკოლაში საღამოობით. შეპირდა, ვინც უკეთესად ისწავლის, იმას დავაწინაურებთ, ბათუმში გავგზავნიცო, კოოპერატივში დაენიშნავთ, საბჭოში ვამუშავებთო.

ახალგაზრდებმა ერთმანეთს გადახედეს. ზოგიერთი დაეკვდა, არ გვატყუებდესო, მაგრამ მეტი ნაწილი კმაყოფილი იყო.

გვიან გაათავეს თათბირი და გამოვიდნენ.

ახლა მივიდა მურადი ანდროსთან და უამბო, თუ რისთვის

დაიგვიანა. კომიტეტში შეეჩერებინათ. რალაც ქალაქლები იყო გადასაბეჭდი. დავალება კი შევასრულე, ყველაფერი მოვატანე, რაც დამაბარეო, უთხრა მან.

ნაილეს არ ეძინა, შინ რომ მივიდნენ. ის სამზარეულოში იჯდა და ძმას და სტუმარს მოელოდა. მკადი გამოეცხო, მაგრამ ისევ კეცზე ჰქონდა ლადარწყარილი. მოხარული კვერცხი, მაწონი და ერბო ცალცალკე ეწყო თეფშებით.

მურადი უწინ შემოვიდა, გააფრთხილა სტუმარი მოვიდაო და ლამპა წაიღო ანდროს ოთახში.

ანდრო ცოტა ხნის შემდეგ შემოვიდა. განგებ შეჩერდა გარეთ, რომ უხერხულობაში არ ჩაეყენებინა მასპინძელი.

— მობრძანდით — მიიპატიუა მურადმა და ოთახში შეუძღვა. წუხელის არ გაგითვისებთ აქ. იქნებ იმიტომ, რომ მე არ ვიყავი სახლში.— თვალელებში შეხედა და პასუხს დაელოდა.

— მართალია — მოკლედ მიუგო ანდრომ. ძალიან გაუკვირდა, რომ მურადი რალაც უფრო ზრდილობიანად და მორიდებულად ლაპარაკობდა. თქვენობით იხსენიებდა და თან დაკვირვებულად გამოსტკვამდა სიტყვებს. ჩანდა, რომ ხულოში ერთი დღით ჩასვლას, იმ ღამეს კი მასწავლებლებთან თათბირზე დასწრებას, მათს ლაპარაკსა და ერთმანეთისადმი მიმართვას გავლენა მოეხდინა მასზე.

— მე ვარ დამნაშავე — სთქვა მურადმა.— უნდა დავბრუნებულყავი გუშინვე. აწი კი არ იქნება ასე.— მობრუნდა, სამზარეულოში შევიდა და იქიდან დაბალი, მრგვალი მაგიდა შემოიტანა ვახშმით გაწყობილი.

მადიანად ივახშმეს. ხანდახან შეხედავდნენ ერთმანეთს უსიტყვოდ და ისე ილუქმებოდნენ. ორივეს მაგრად მოშივნოდა.

— ჯერ ხომ არ დაწვებით? — შეეკითხა ვახშმის გათავების შემდეგ მურადი და სუფრის ალაგებას შეუდგა.

— არა. ეს ქალაქლები უნდა დავათვალიერო — რამდენიმე კონვერტის გახსნა მოესწრო ანდროს.

— მაშ კარგი. — მურადმა მაგიდა გაიტანა და გავიდა.

ანდრომ გახსნა კონვერტები, გადაიკითხა ცირკულარები, მობრძანებები და შემდეგ გაზეთებს დაუწყო თვალიერება.

ის მოქანცულობას გრძნობდა, მაგრამ ახალი გაზეთების წაუკითხავად დაწოლა მანაც არ უნდოდა. კარგა ხანს კითხულობდა. ყველა გაზეთი გადაათვალიერა და როცა სულიერი კმაყოფილება მიიღო, წამოდგა, წიგნები და გაზეთები ერთ ადგილას დაალაგა და დასაწოლად ემზადებოდა. ამ დროს კარი გაიღო და მურადი შემოვიდა.

ანდროს არ გაკვირვებია მისი შემოსვლა. ცნობისმოყვარე ახალ-

გაზრდა გლეხი ასედაც უნდა მოქცეულიყო. მისთვის ჯერ უცნობი იყო კარებზე დაკაკუნება, შესვლის ნებართვის აღება და სხვა ამგვარი.

— მოდი, მურად, — უთხრა ანდრომ — დაჯექი, მიაშვებ რა ნახე ხულოში. როგორ იმგზავრე. — ტახტზე ჩამოჯდა და მურადიც მიიწვია.

მურადი წუთით უხმოდ იდგა, თითქო რალაცის თქმა უნდოდა, მაგრამ ვერ გაბედა. ბოლოს უხერხულად მიიხედ-მოიხედა და ძლივს გასაგონი ხმით წარმოსთქვა:

— მე მინდა... — კიდევ მიიხედ-მოიხედა, — მე მინდა ჩემი და გაგაცნო — გაბედა. — ნაილე გაგაცნოთ და... — ამის მეტი ველარაფერი სთქვა.

ანდრო წამოდგა. უხერხულობა იგრძნო. ტანსაცმლის სწორება დაიწყო.

— ძალიან კეთილი. ძალიან კარგი. — უთხრა მან სახეაწითლებულ მურადს. — გთხოვთ. — და ამ შემთხვევისათვის მოემზადა.

მურადი მოტრიალდა, გავიდა და ერთი წუთის შემდეგ ნაილე შემოიყვანა.

ანდრო ფეხზე იდგა. ის მიეგება, მორიდებით მიესალმა ახალგაზრდა ქალს და ხელი გაუწოდა. ნაილეს თავზე თეთრი იაშმა მოეხვია, მაგრამ სახე დაუფარავი ჰქონდა. ანდრომ რომ ხელი გაუწოდა, მან პირი გვერდზე მიიბრუნა, თვალები მოარიდა და ისე ჩამოართვა ხელი.

ეს იყო უცხო მამაკაცის პირველი ხელი, რომელიც ნაილეს ხელს შეეხო. ნაილეს ხელს კი არა, მთელი მისი ამხანაგებისა და ტოლების ხელებს. პირველი შემთხვევა იყო ამ მხარეში, რომ აქა-რელმა ქალმა თავისი სურვილით ჩამოართვა ხელი უცხო კაცს, პირლია დაენახა და გაეცნო. ვინ იცის, რას იზამდა სოფელი, ეს რომ გაეგო. შეიძლება ცეცხლის ალში გაეხვიათ მურადის სახლკარი, გამოეყვანათ ნაილე და სამაგალითოდ ჩაექოლათ. უცხო კაცი რომ ქალს შეხედავს, ვინ იცის რას გაიფიქრებს. მერმე ეს გაფიქრება ხომ ცოდვია. წინასწარმეტყველი კრძალავსო, გაუგონია ნაილეს. ნაილეს კი არა, ყველას ასე სწამს. ქალი დამალული უნდა იყოს. ჩადრში შეხვეული, ჩაჩაბჩამოფარებული. მარტო ქმარს აქვს უფლება შეახოს ხელი, შეხედოს, უკან ჩამოიყენოს და ისე წაიყვანოს, თუ სადმე მიდის. უკან ჩანჩალი დაუწესებია მისთვის სჯულმდებელს. მორჩილება და სხვის ნება-სურვილზე ცხოვრება!... საწყალი ქალი!.. რისთვის იყო საჭირო მისი ასე დამონება და უუფლებობა!..

ნაილეს გააერთოლა, თავისი დანაშაული რომ წარმოიდგინა. სწრაფად გამოსტაცა ხელი ანდროს და უკან დაიხია.

— დაბრძანდით — მიუთითა ტახტზე ანდრომ. — დაჯექი მურად შენც.. კარგი და გყოლია. — ნაილეს შეხედა — სასიამოვნოა თქვენი გაცნობა. დაბრძანდით, დაბრძანდით, ნუ გერიდებათ. მეც სწორედ თქვენი ხნის და მყავს. დაბრძანდით.

ნაილე ფრთხილად მივიდა ტახტთან, ძლიერ მოახერხა დაჯდომა. ხელები ხან მუხლზე დაიწყო, ხან ტახტზე. ვერ უპოვა ადგილი.

— უპირველეს ყოვლისა მადლობა უნდა გადაგიხადოთ პარტივისციემისათვის, ამხანაგო ნაილე. იმედია შემადგლებინებთ სამაგიეროს გადახდას. ჩინებული კერძის გაკეთება გცოდნიათ, — სცადა ანდრომ სალაპარაკოდ გაწვევა, მაგრამ ნაილე ვერ ბედავდა ხმის ამოღებას. ის ხანგამოშვებით გაიხედავდა ანდროსაკენ და თუ ანდროს თვალებს შეეფეთებოდა, უცებ ისევ გამოიხედავდა.

ისევ მურადს გამოელაპარაკა ანდრო, უამბო გუშინდელი ამბავი, საბჭოს დადგენილება კოოპერატივის გახსნის შესახებ, გზის გაყვანის შესახებ და კიდევ მრავალი რამ.

— თუ ხვალდანვე შეუდგები წერა-კითხვის სწავლას და იბეჯითებ, ახალგაზსნილ კოოპერატიულ საეაქროში დაგნიშნავთ და მერმე თანდათან დაგაწინაურებთ. რას იტყვი! — მიმართა ანდრომ მურადს.

მურადმა ნაილეს გადახედა, იმან კიდევ ძმას და ორივემ ერთად — ანდროს.

— დღედამ ვისწავლი. ერთ თვეში მეცოდინება წერა-კითხვა. ზოგიერთი ანბანი ახლაც ვიცი. ნაილემ მასწავლა. ამან თავის სახელისა და გვარის დაწერაც იცის. — მიუთითა დაზე.

— მართლა?!. იცით წერა-კითხვა?!. — შეეკითხა ანდრო ნაილეს.

— ცოტა ვიცი. — გაბედა ხმის ამოღება და რახან შეატყო, რომ ამით არაფერი დაშავდებოდა, ცოტა სიჩუმის შემდეგ დაუმატა: — აქ ერთი მასწავლებელი ქალი იყო, იმან მასწავლა. — შერცხვა, ბევრი ხომ არ მომივიდაო.

— გინდათ ისწავლოთ უფრო კარგად?!. — ღიმილით ჰკითხა ანდრომ

— ელბეთ მინდა, მაგრამ. . .

— მაშ ვისწავლოთ. კიდევ ხომ არაფერ გყავთ თქვენს ამხანაგებში ისეთები, რომლებსაც უნდოდეთ სწავლა?

) — არ ვიცი. ქალებს არ ასწავლიან ჩვენში. რა ქალის საქმეა სწავლაო. ქედელდის კითხვა ხოჯიების საქმეაო, ამბობენ. — ახლა უფრო გათამამდა ნაილე.

— ეს კი შემცდარი შეხედულებაა. აი, ამხანაგო ნაილე, რაშია საქმე. თქვენ რომ დედა ნასწავლი გყოლოდათ, თქვენც ნასწავლი იქნებოდით. თქვენ თუ ისწავლით და სწავლული იქნებით, თქვენი

შვილებიც ნასწავლი განოვლენ. კარგი დედა კარგ შვილს აღზრდის. ჩემი აზრით, თქვენ უნდა ისწავლოთ და ისწავლოთ იმდენი, რომ შესძლოთ შემდეგში ასწავლოთ სხვებს. გინდათ მასწავლებელი ქალი შეიქნეთ?.

ნაილეს გული კინალამ ამოუვარდა ბუდიდან. პასუხის მიცემა ვერ მოახერხა და ძმას შეხედა, თითქოს სთხოვდა დამეხმარეო.

— ჩვენი ქალი მასწავლებლად რავე გამოდგება — დის მაგივრად უპასუხა მურადმა — მასწავლებლობას ბევრი სწავლა სჭირია...

— ნაილემაც ისწავლოს ბევრი. შენ რა, წინააღმდეგი ხარ?!

— წინააღმდეგი რავე ვარ! — წამოხტა მურადი — ობლად გაზრდილია... — ცოტა შეჩერდა ამ სიტყვებზე და შემდეგ განაგრძო: — კარგი არათფერი უნახავს. ამ სოფლიდან ფეხი არ გაუდგამს. ქვეყანა არ იცის როგორია. მაგი თუ ისწავლის, მე სიხარულის მეტი რა შეიქნება!..

ნაილემ ალტაცებით შეხედა ძმას. მის გულში ახლა უფრო გაღვივდა ნათესაური სიყვარული. ამდენხანსაც უყვარდა ძმა, ცდილობდა პატივი ეცა მისთვის, ესიაშოვნებინა, მაგრამ თავის მხრივ კი არ იცოდა რა შეხედულების იყო მასზე მურადი, სამაგიერო სიყვარული და პატივისცემა იყო თუ არა მის გულში. ახლა, როცა ასეთი სიტყვა სთქვა, ნაილეს თვალებში სიხარულის ცრემლები აუბრწყინდა.

— მაშ ნაილე ისწავლის. — გადაჭრით სთქვა ანდრომ.

— მე მინდა მურადს ასწავლოთ. მაგი კაცია. კაცისათვის უფრო საჭიროა სწავლა. მაგას დაეხმარეთ, ბატონო — ხმის კანკალით წარმოსთქვა ნაილემ და თვალებზე იაზმა აიფარა.

— მაგანაც უნდა ისწავლოს, — უთხრა ანდრომ, — თქვენც უნდა ისწავლოთ. თქვენმა ამხანაგებმაც... ყველამ, ყველამ უნდა ვისწავლოთ. მეც ვსწავლობ. ხედავთ რამდენი წიგნი დამაქვს თან?!. სწავლა ძალიან დიდია საჭირო. კომკავშირშიაც უნდა ჩაეწეროთ. გაგიგონიათ კომკავშირი? კომუნისტური ორგანიზაცია ახალგაზრდების.

— გამიგონია — სთქვა ნაილემ და ძმას შეხედა. — ქეთო ამბობდა კომკავშირში ვარო. მეც მითხრა ჩაეწერეო... ვიცი, ერთხელ გველაპარაკა გოგოებს. ჩაგწერავთო გვითხრა, მაგრამ...

— ვერ გაბედეთ?.

— რა ვიცი, გოგოებმა არ ქნეს... ყველას ეშინია. დედ-მამა ყავთ და...

— თქვენ ხომ ჩაეწერებით.

— მე? — ძმას შეხედა.

— რატომ არ ჩაეწერება?! — სთქვა მურადმა — მე თუ ჩაეწერები, ჩემს დას რა უშავს?!.

— მომწონს — უთხრა ანდრომ და და-ძმას მაგრად ჩამოართვა ხელი.

თ ა ვ ი მ ე ო რ ე

I

ზზისპირას ძველი წისქვილი იდგა. უფრო კი ნაწისქვილარი, რომელიც წყალს კარგახანია მიეტოვებინა, სათავე გაეგლიჯა, მიმართულება შეეცვალა და ახლა საკმაოდ შორიდან უვლიდა აქაურობას.

ათ წელზე მეტია მას შემდეგ. სოფლებმა სხვა წისქვილი ააგეს და ეს შენობა უყურადღებოდ მიატოვეს. რამდენიმე პატრონი ყავდა მას და ვერ შეთანხმებულყვენენ შენობის განაწილებაში. ან რა ღირებულებას წარმოადგენდა ის, თორემ დაშლიდნენ.

სოფლის ბავშვები იყრიდნენ თავს შიგ წვიმიან დღეებში. თამაშობდნენ, ექიას (ზღაპრებს) უამბობდნენ ერთმანეთს და ხანდახან ოჯახობიასაც თამაშობდნენ. ერთი მამა იყო, მეორე დედა, სხვები შვილები, ან სხვა მემკვიდრეები. აქ გოგოებიც იყვნენ. ქალს თავისუფალი ცხოვრების უფლება მხოლოდ თორმეტ წლამდე ჰქონდა. ამ დრომდე არავინ უშლიდა მას თამაშობას, მამაკაცის დანახვას, დალაპარაკებას. შემდეგ კი, გადაადგამდა თუ არა მეცამეტე წელში ფეხს, მისთვის ყველაფერი ჩამოზნეღდებოდა. მშვენიერი და წარმტაცი ბუნება შავი ან მუქი ფერის იყო. ჩაჩაბიდან უჭვრეტდა ქვეყანას და შავი ფერის ნაქერი ყველაფერს სამგლოვიარო სამოსელს აცმევდა.

თავიდან აჩვევდნენ გოგონებს ჩაღრის ჩაცმას, ჩაჩაბშიგნიდან ცქერას. იაზმით სწრაფად პირსახის დაფარვას. ამიტომ შვიდობა წლის გოგონებს შემოახვევდნენ იაზმას და ისე უშვებდნენ სათამაშოდ ან თიკნებისა და ბოხრიკების (ხბობის) სანწყესავად.

ისინიც ვარჯიშობდნენ. მოჰკრავდნენ თუ არა უცხო მამაკაცს თვალს, სწრაფად იბრუნებდნენ პირს, იაზმას შემოიხვევდნენ და ასე გაიყინებოდნენ ერთ ადგილას გამვლელისაკენ ზურგშექცეული, სანამ უცნობი არ ჩაივლიდა.

ასე შვებოდნენ დედები და შვილებიც მათ ბაძავდნენ. ამჟამად მათთვის საამაყო იყო, სასიამოვნო სათამაშო იყო ეს ცერკმონია, მაგრამ გამოუცხადებდნენ თუ არა, აწი სათამაშოდ ვერ წახვალთ, ბიჭებს ვერ დაელაპარაკებით, მამაკაცს სახეს ვერ დანახვებთო, ფრთებშეჭრილი ფრინველივით დაეცემოდნენ, დანაღვლიანდებოდნენ და დიდხანს დასტიროდნენ დაკარგულს, უკვე წარსული ბავშვობის თა-

ვისუფალ დღეებს. მერმე დაიკარგებოდნენ ისინი, დაკარგავდნენ სილამაზესა და სიკეკლუცეს. ჩადრში ყველანი ერთმანეთს გავდნენ. ერთნაირი სიბნელით მიდიოდნენ და ცხოვრებას სამგლოვიარო ელფერს აძლევდნენ.

არც ისე ადვილი შესაძენია ჩადრი. რამდენიმე არშინი ზედმეტი აბრეშუმი ან სატინაა საჭირო. ჩვეულებრივ კაბასთან შედარებით ის ძვირიც ჯდება. ოჯახში, სამუშაოზე, ან სხვა ხელსაქმის კეთების დროს ჩადრი არ იხმარება. მუდამ ჩადრში ყოფნა შეუძლია მხოლოდ უსაქმურს, მაგრამ თითო ხელი ჩადრი ყველას უნდა ჰქონდეს ტირილში, ქორწილში ან ნათესავეებში წასასვლელად. უამისოდ ქალის გარეთ გამოსვლა არ შეიძლება. მაგრამ ოჯახში, ყანაში, საქონელში, ჩვეულებრივ აცვიათ გრძელი ნაოქებიანი კაბა, რომელიც კოქებსაც უმაღავს. ყელზე და თავზე კი მოხვეული აქვთ დიდი დარაია, აბრეშუმის ან ჩითის. მაგრამ ყველას როდი აქვს იმდენი შეიძლება, რომ აბრეშუმი და ჩითის თავსაფრები იყიდოს. ყველაზე ხელსაყრელია დოლბანდის თავსაფარი, ფერადი ან უბრალო ფოთლებიანი. ათასობით საოდებოდა წინათ ასეთი თავსაფრები. ყველაფერზე რომ უარი ეთქვა გლეხს, იაზმა არ ეყიდა, არ შეიძებოდა. ის ქალის მცველი და ნამუსი იყო.

ამიტომ ქალის დაბადება არ უხაროდათ ხოლმე აქ.

მაგრამ ბუნება როდი აქცევდა ყურადღებას მათ წყენა-სიხარულს. თითქო ჯინაზე უფრო მეტი ქალი იბადებოდა და მრავლდებოდა. ავადმყოფობაც ნაკლებად კიდებდა ხელს მოძულებულ გოგონებს. მაინც იზრდებოდნენ, მაინც მატულობდნენ ფერსა და ხორცს.

ბევრი ქალი გამოდიოდა ლამაზი, ეშხიანი, თვალტანადი. რომ ჩადრის ქვეშ არ ყოფილიყო დამალული ეს სილამაზე, ცხოვრებას ერთი ათად უკეთესი შნო ექნებოდა. ახლა კი ფეროვნება აკლდა. სმა-ქამა, სიმლერა - თამაში, მოლხენა და დროს ტარება უფერული იყო. მარტო მამაკაცები ისხდნენ მაგიდასთან, მარტო ახალგაზრდა ვაჟები ცეკვავდნენ და მღეროდნენ. ასე იყო ქორწილში, ასე იყო ტირილში. ქალები მარტო ატარებდნენ დროს. ბნელ ოთახში ჩაიკეტებოდნენ, ცეკვავდნენ, ხუმრობდნენ, ამბობდნენ შაირებს, ხშირად მეტად უხეშსა და უწმაწურს.

მხოლოდ ერთადერთი ბავშვობა იყო უფრო ხალისიანი და სიცოცხლით სავსე. მხოლოდ ბავშვები იყვნენ ერთმანეთისადმი კეთილსა და მეგობრულ დამოკიდებულებაში. საძოვარში, ყანაში, ტყეში, მინდორში, მედრესეში და უფრო კი ნაწისქვილარში ისინი ერთმანეთთან იყვნენ და მხიარულად ატარებდნენ დროს.

წვიმდა. მდინარე წამოდიდებულიყო. გრუხუნით მიაგორებდა დიდრონ ქვებს და მიატურებდა მორებს.

ნაგვალევი მიწას მალამოსავით ედებოდა წვიმის წვეთები. ბალახებს სიმწვანე მომატებოდა, სიმინდის ყანებს დაეცქვიტნათ ყურები. გოჯი სიმაღლე მოემატებინათ ერთი ღამის განმავლობაში.

წუხელ სალამოს დაიწყო და დღესაც შეუჩერებლივ უშვებს სწორედ ნანატრია ასეთ დროს წვიმა...

ძალიან კარგია მაისის წვიმა. თავშიშველი შეუდგნენ ბავშვები წვიმის პირველ წვეთებს. მაისის პირველი წვიმა თმასაც ზრდის იტყვიან. ზოგიერთების აზრით, მაისის პირველი წვიმის წყალი რომ შეინახო, ძმარად დადგება..

გლებები, ვისაც ჰქონდა სანერგე თამბაქო, გადარგვას შეუდგნენ. ქალებმა კეცერა ფხალი და კარხალი გადარგეს ბაღაში. ტომარწამოფარებული მუშაობდნენ.

ბავშვები თავიანთ საყვარელ თამაშობაში გართულიყვნენ. ნაწისქვილარში შუაღმოსავლური დაენტოთ, აქეთ-იქიდან შემომსხდარიყვნენ და გაცხარებით ლაპარაკობდნენ. ირჩევდნენ ოჯახის მეთაურებს.—მამას და დედას. ასახელებდნენ კანდიდატებს.

— მე ვიქნები მამა, ფადიკო იყოს დედა. თქვენ იქნებით შვილები.— ამბობდა ერთი პატარა ბიჭი, იქნებოდა შვიდი-რვა წლისა. თავი გაპარსული ჰქონდა, მაგრამ შუბლს ზევით ხელის სიფართოვარეზე თმა ისე იყო დატოვებული, თითქოს მაკრატელი გატეხნია გამკრეპავს და ბავშვი გაუკრეპავი დაუტოვებიაო. გრძელი ბალანი შუბლზე ეფინა მას. შიშველ ფეხებზე საშინელი ქუქკი აჩნდა. ეტყობოდა, საპონი არასდროს არ ღირსებია.

— შენ გუშინ იყავი, დღეს სხვამ ითამაშოს.— უთხრა მეორე ბიჭმა.

— მოდი, ენვერი იყოს მამა და მე დედა ვიქნები.— დაიძახა ცქრილა გოგონამ, რომელსაც იაზმის ნაჭერი შემოეხვია ყელზე.

— კარგია, კარგი — შესძახეს ბავშვებმა.— ენვერი და ფადიკო იყოს. ჩვენ შვილები ვიქნებით.

მოიწონეს ბავშვებმა.

ფადიკომ მაშინვე მიიღო დედის პოზა, აიხვია იაზმით პირი, მარტო თვალები გამოაჩინა. ენვერი კი გაიბუტა, კარებთან მივიდა და წვიმის წვეთებს დაუწყა ცქერა.

— რატომ არ თამაშობ?— შეუტყის ბავშვებმა.

— არ მინდა, ეს თამაშობა არ მომწონს -- სთქვა მან ისე, რომ ბავშვებისაკენ არ მიუხედავს. თუ გინდათ სხვა რამე ვითამაშოთ.

— ჯერ ეს, შემდეგ სხვა.— უთხრა პატარა დიასახლისმა, წამოდგა, კარებთან მივიდა, ენვერს ხელი მოჰკიდა და მოსწია.

— წამოდი, წამოდი, ცოტა ხანს ვითამაშოთ. აი, შენ მამა ხარ, მე დედა, ეს ორი ჩვენი შვილებია, ესენი მეზობლები, შენ ვითომ

ყანაში წადი. მე სადილს ვაკეთებ.. მერმე ყანიდან დაბრუნდები, მე სადილს გაგიწყობ. მოდი ქოვ, მოდი.— უფრო მაგრად მოსწია, მაგრამ ენვერი უარზე იდგა.

— სცხვენია.— ჩაულაპარაკა ერთმა ბიჭმა მეორეს.

— რატომ? — ახლოს მიუტანა ყური ამხანაგს მეორემ.

— დაოჯახებულია და სცხვენია ჩვენთან თამაშობა.

— დაოჯახებული?!.— გაიკვირვეს ბავშვებმა.

— ჰო, თორმეტი წლისაა. აწი შეიძლება დაოჯახება.— განმარტა ჩუმად პირველმა.

გოგონებმა ერთმანეთს გადახედეს და გააღიმეს.

ესენი ბავშვები იყვნენ, ბავშვები, რომლებმაც ოჯახური ცხოვრებისა და სქესთა დამოკიდებულების შესახებ არაფერი იცოდნენ, მაგრამ მათი ლაპარაკი და ყოფა-ქცევა სავსებით შეეფერებოდა მოზრდილი ადამიანების საქციელს.

ყველაზე უფროსი ამათ შორის თერთმეტ-თორმეტი წლის იქნებოდა ვაჟებიდან და ცხრა-ათი წლისა გოგონებიდან. ნამდვილი უმანკო ადამიანები, ნამდვილი გაუფურჩქნელი კოკორები ცხოვრებისა, მაგრამ საკმაოდ დაბეჩავებული და მოძულებული იმავე ცხოვრებისაგან.

არავის ეცალა მათთვის, არავინ ზრუნავდა მათზე, არც მოვლაზე, არც სწავლაზე, არც ჩაცმა-დახურვაზე, დაბან-დარეცხვაზე.

სილარიბეს აბრალებდნენ ყველაფერს. არქონებით ხსნიდნენ შვილების მოუვლელობას. სილატაკის ბრძლი იყო ყველაფერი, მაგრამ ყველაფერში არც ამის მთქმელები იყვნენ მართალი..

— არ გინდა ჩვენთან თამაში?!.— კიდევ კითხეს ბავშვებმა ენვერს და რადგან უკანასკნელმა ისევ უარი უთხრა, ოჯახის მამად სხვა აირჩიეს, მაგრამ ახლა ოჯახის დედაც ასარჩევი გახდა, ვინაიდან ფადიკომ არ ისურვა სხვასთან თამაშობა.

თამაშობა მაინც არ დაშლილა. ოჯახი ისევ შექმნეს, მამაც გამოყვეს, დედაც, შვილებიც, მეზობლებიც და ოჯახური ცხოვრების სცენები გაითამაშეს.

ენვერი არ ლებულობდა მონაწილეობას თამაშობაში. ის კარებთან ჩამომჯდარი ადევნებდა თვალყურს ამხანაგების თამაშობას და ხანდახან ნაღვლიანად ამოიოხრებდა.

წვიმა ოდნავ შენელდა. სქელი ორუბლები გადაშორდა მთებს და ცამ პირი მოიწმინდა. საშუალოდოზე გადაცილებულმა მზემ მორცხვად გადმოიხედა.

ბავშვები გამოცვივდნენ გარეთ. მოჩხრიალე ღარზე დაიწყეს წისკვილების აგება. ბორბლები აატრიალეს, საცეხველი მოაწყვეს ახლა უფრო კარგი სათამაშო იპოვეს და უფრო გამხიარულდნენ.

ბოლოს ესეც მოსწყინდათ. დაანგრის წისკვილები. მოხსნეს ბორბლები, ფეხებით გაასწორეს პატარა თხრილები და ერთად შექუჩდნენ.

— კრებაა, ამხანაგებო, კრება.— დაიძახა ჭერთმა ბიკმა, ხის მორზე შეუხტა და ხელი გაიშვირა. ყური დამიგდეთ. მე ვარ თქვენი თავმჯდომარე. მე ვარ თქვენი მთავრობა, თუ რამე საჩივარი გაქვთ, მე მითხართ. . . .

— შენ კი არა, მე ვარ თავმჯდომარე — ჩამოაგდო. მეორემ ამხანაგი და თვითონ შეუხტა მორზე.

— მე ვარ თქვენი თავმჯდომარე — დაიწყო ახლა მან, მაგრამ ბავშვებმა უცბად გაკმინდეს ხმა და სოფლიდან მომავალ გზისკენ გაიხედეს.

საბჭოს თავმჯდომარე და რამდენიმე სხვა კაცი დაინახეს აქეთ მომავალი და ცქერა დაუწყეს.

— ვინ ახლავს თავმჯდომარეს?— გადაუჩოჩოლა ამხანაგს ერთმა ბავშვმა.

— ბათუმიდან ამოსული კაცია.— უპასუხა ამხანაგმა.

— თურმე დიდი მთავრობის გამოგზავნილია.

— მთავრობის კი არა, პარტიისაო, ბაბამ სთქვა.

— ჩვენს თავმჯდომარეს ეშინია თურმე მაგ კაცის.

— თავმჯდომარეს რაღა შეეშინდება. თვითონ მთავრობაა.

— დიდი მთავრობის გამოგზავნილი თუ კია, ელბეთ შეეშინდება.

ბავშვებმა ჩურჩული შეწყვიტეს, რადგან თავმჯდომარე და მისი მხლებლები უკვე სულ ახლოს მივიდნენ.

პატარებმა იცნეს სოფლის მასწავლებელი ნური ბერაძე და დელი მურადა. დანარჩენი ორი მათთვის უცნობი იყო.

უცნობთაგან ერთი ანდრო იყო, მეორე—ჩამოსული ინსტრუქტორი.

მოსულები ნაწისკვილარში შევიდნენ, დაათვალიერეს, გაზომ-გამოზომეს და გამოვიდნენ.

— დროებით გამოდგება—სთქვა ანდრომ.— შემდეგისათვის კი კარგი შენობა უნდა ავაგოთ. 1

— რასაკვირველია,—დაემოწმა თავმჯდომარე.

— მაშ ხვალდან შეუდექით შეკეთებას. გაწმინდეთ, გაასუფთავეთ და მოაწყვეთ ისე, რომ შეიძლებოდეს საქონლის დაწყობა—სთქვა მაზრიდან მოსულმა.

— უსათუოდ, ამხანაგო დურსუნ. დურგლები და ხურაობი, მგონია, გყავს, დეაყენოთ სამუშაოდ. სახურავიც შესაკეთებელია. კედლებიც. ნაწილობრივ ბოძებიც გამოსაცვალა. ჯერჯერობით იატაკს თავი დაეანებოთ. რას იტყვი.

— სწორია, მეც მასე მგონია—დაეთანხმა დურსუნს.

— თუ შენობის საკითხს დროზე მოვაგვარებთ, მომავალ თვეში უკვე კოოპერატიული სავაჭრო გეგმებათ, ამხანაგებო.— სთქვა მაზრიდან მოსულმა და შემდეგ ისევ თავმჯდომარეს მიუბრუნდა.

— გზის საკითხი გაქვთ ძალიან ცუდად. ამხანაგო დურსუნ, წარმოიდგინეთ, რომ ძალიან გავგიჟირდება საქონლის გადმოზიდვა.

— ამჟამათ შეუძლებელია ამხანაგო ერასტი, საგზაო მუშაობის დაწყება და ოდნავ უფრო თავისუფალი დრო რომ გვექნება, უნდა შევეუდგეთ გზის გაყვანას. რას იტყვი, დურსუნ, შენ—შეხედა ანდრომ დურსუნს.

— ეგ ჩემი საქმე იყოს.—შეაწყვეტინა ისევ ანდრომ.—რაც საჭიროა, გავაკეთებ—გადახედა ბავშვებს, რომლებიც ერთად შექურბულიყვნენ და ყურს უგდებდნენ ამათ ლაპარაკს.

— გამარჯობა ახალგაზრდებო. როგორ ცხოვრობთ.—შივიდა და ერთ ბავშვს, რომელიც ყველაზე პატარა იყო, თავზე გადაუსვა ხელი.

— გონჯად რაიზა ვიქნებით.—უპასუხა უფრო მოზრდილთაგანმა, რომელიც ენვერის გვერდით გაჩერებულყო.

— რა გვარი ხარ შენ?—შეეკითხა ანდრო.

— დევაძე.—სწრაფად მიუგო ბავშვმა.

— სკოლაში დადიხარ?

— არა. რაი უნდა ვაკეთო სკოლაში.—ამხანაგებს გადახედა.

— მედრესეში ვისწავლეთ—დაეხმარა ენვერი ამხანაგს.

— წელა-კითხვა იცი?—ახლა ამას მიუბრუნდა ანდრო.

— არა. ლოცვებს გვასწავლიდა ხოჯა.

— სკოლაში უნდა იაროთ. ხომ ხედავთ როგორი სკოლა ავაგეთ. ესეც თქვენი მასწავლებელი იქნება—მიუთითა მასწავლებელზე—სწავლა ყველაზე უფრო საჭიროა ჩვენთვის!

— ხომ არ უნდა გავგიაურდეთ, რად მინდა სწავლა?!—სთქვა ერთმა ბავშვმა. შემდეგ ამხანაგებს გადახედა, თუ დამიდასტურებნო.

ამ თქმაზე ზოგმა გაიცინა, ზოგმა ანდროს შეხედა.

— შენ რა გვარი ხარ?

ბავშვმა ვერაფერი უპასუხა.

— არ იცი რა გვარი ხარ?—განუმეორა შეკითხვა ანდრო.

არითფაი მქვია, გვარი არ ვიცი.—ცოტა არ იყოს შერცხვა

ბავშვს და ამხანაგს გადაულაპარაკა.

— მე რაი ვიცი, ჯოვ,—ნიდაყვი გაკრა ამხანაგმა.

— აი, ხედავ, უსწავლელი რომ ხარ, იმიტომაა, რომ საყუთარი გვარიც არ იცი. ასე არ ვარგა, ჩემო არიფ. შენ ხეაღოდანვე მოხვიდე უნდა სკოლაში. წიგნებს მოგცემთ, ფანქრებს, გასწავლით, მუშაობას შეგაჩვევთ, გათამაშებთ. ხომ გესმით! ხეალ დილით უსათუოდ მოდიო სკოლაში. რას იტყვიო!

— ელბეთ მოვალთ.—აქა-იქ ჩაილაპარაკეს ბავშვებმა.

— ბაბაი არ გამომიშვებს—გულისტკივილიო სთქვა ენვერმა და დამნაშავესავით დახარა თავი.

ანდრო მას დააქცერდა. ეს ბავშვი, მართალია, პატარა იყო, ათი-თორმეტი წლის იქნებოდა, მაგრამ მას სახეზე უკვე დასრულებული ადამიანის საქმიანობისა და დარდიმანდობის გამომეტყველება ემჩნეოდა.

გინდა შენ სწავლა?—შეეკითხა ანდრო.

— ელბეთ მინდა.

— მაშ ხეალ დილით მოდი სკოლაში. რა გქვია?

— ენვერი.

— გვარი?

— დევაძე.

— მაშ, ამხანაგო ენვერ დევაძე, შენ ხეალ უსათუოდ მოხეალ სკოლაში. გესმის?

— ელბეთ მესმის.—უპასუხა ენვერმა, ამხანაგებს გამოეთიშა და ჩქარი ნაბიჯით წავიდა შინისაკენ.

II

საშუაღლოზე გადასული მზის სხივი მორცხვად შეპარულიყო ოთახში ვიწრო ფანჯრიდან და კედელზე ჩამოკიდებულ ხალიჩას მისჩერებოდა. ნაწვიმარზე გამოსული მზე აასკეცებდა სიცოცხლენს, ახალისებდა სულს ზედმეტად ამგერებდა გულს და აღვიძებდა გრძნობებს.

ფარდაგადაგებულ ტახტზე ფეხმორთხმული იჯდა საკმაოდ ჩასუქებული, დაახლოებით ოცდაათი წლის ქალი. მაღალი თავყელი ჰქონდა. ოღნავ ცენიანი ცხვირი და სანდომიანი სახე. თვალები ვნებიანი და მიმზიდველი. თავზე იაზმა მოეფარებია. ხელში საკერავი ეკირა და ზანტად აბნევდა ნემსით.

მზის სხივი რომ დაინახა, წამოდგა, ფანჯარასთან მივიდა, ფრთხილად გაიხედა გარეთ, შემდეგ მობრუნდა, მკლავები მკერდზე მიიკრა და ოთახში გაიარ-გამოიარა. თითქო გადასაფრენად ემზადებოდა,—რამდენჯერმე გადაიხედა ფანჯრიდან, შემდეგ ყარებთან ვილაცის ფეხის ხმას მოკრა ყური. მივიდა და ფრთხილად გაალო.

— შორეთი, მარტო ხარ?—მოესმა კარისგაღებისთანავე და კედელთან ატუზული გოგო დაინახა.

— შემოდი ქვესერ.—ხელი მოხვია ქალმა და ოთახში შეიყვანა.

ბავშვმა მიმოავლო თვალი იქაურობას და როცა გარეშე არავინ იყო, იაზმა მოიხსნა და მასპინძელთან ერთად ჩამოჯდა ტახტზე.

— როგორ ხარ, ქვესერ!—ჰკითხა ქალმა და გამოცდილი თვალებით ჩახედა მოსულს.

— რავე უნდა ვიქნე!—ნაღვლიანად უპასუხა გოგომ.—ქალის ცხოვრებას სიკვდილი სჯობნებია.—მორცხვად ჩაღუნა თავი და შიაჩერდა იატაკზე მჯდომ ბუზს, რომელიც რაღაც გემრიელს წუწნიდა.

— არაა ქმარი კარგი, არ მოგეწონა?!—ეშმაკური ღიმილით შეეკითხა ქალი. ხელები მოხვია, მაგრად მიიკრა მკერდზე და ტუჩებში აკოცა.

გოგონამ თავი უფრო დაბლა დახარა და სირცხვილისაგან ქარხალივით გაწითლდა.

— ქმარს რა სჯობია, ქვესერ! ქალისათვის ღმერთს მარტო ერთი სიკეთე გაუჩენია ქვეყანაზე, ეს არის კაცი. ქალს თუ კაცი ადგას თავზე, ბედნიერია.

— მე მგონია ქმარი ყველაზე უბედურებაა ქალისათვის.—თავი ასწია და ქალს შეხედა.—შენ გიყვარს ქმარი?!. შეეკითხა ის.

— ქმარი?!. ქმარი როგორ არ მიყვარს, მაგრამ ჯერ მე ნამდვილი ქმარი არა მყავს.

— ენვერი?!.—გაკვირვებით შეეკითხა ქვესერი.

— ჯერ პატარაა. რა იცის იმან ქალის!

— ენვერი ჩემზე უფროსია ერთი წლით.

— ქალი სულ სხვაა.

— ნეტა მეც ვაუი ვყოფილიყავი!.. ძალიან ძნელი ყოფილა ქალობა. შენ არ გიხარია, რომ ენვერი პატარაა? დიდი რომ იყოს, ხომ შენც ჩემსავით შეწუხებულა იქნებოდი?—გულუბრყვილოდ უთხრა ქვესერმა.

შორეთი მიუხედა რაზედაც ლაპარაკობდა ქვესერი. მას სახეზე ეტყობოდა უდროო ქორწინების შედეგი. თორმეტი წლის კიდეც არ იყო ჯერ და მისი ბავშვური სხეული უკვე გადაეთელათ. ბოლმა აწეებოდა გულს. სიცოცხლის სიძულვილს იწვევდა მასში ოჯახი, ქმარი და ყველაფერი ის, რაც მან ორი დღეა ნახა და განიცადა.

— რატომ ნატრობენ ქალები გათხოვებას!—ამბობდა ის თავის გულში.—რად უნდათ ქმარი, რის გულისათვის უნდა აიტანონ ყველაფერი ის, რაც მას მოყვება!

გაახსენდა წუხანდელი ღამე.

მხეციც არ მოეჩქევა ისე საშინლად თავის მსხვერპლს. მხეცზე უმხეცესი ყოფილა ქმარი. არც ხათრი, არც სიბრალული. რამდენი ცრემლი დაიღვარა! რამდენი კენესა აღმოხდა, რამდენი თმის ბეწვი ჩამოყვია ქვესერის ხელებს, მაგრამ.. შეუბრალებელი, უღმობელი ყოფილა ქმარი. კაცი!.. ნეტავ ყველა მამაკაცი გაწყდებოდეს. მაშინ ბედნიერად იცხოვრებენ ქალები, იზრომებენ და იქნებიან ტკბილად.

შორეთის გაელიმა.

— ჯერ პატარა ხარ, ჩემო ქვესერ! და მიტომ გეჩვენება ასე, თორემ კაცთან...—არ დაამთავრა სიტყვა.

— ფუ, კაცი!—გაათურთხა ქვესერმა.—სიკვდილი, სიკვდილი სჯობია ქალის ცხოვრებას... შემდეგ ყველაფერი დაუფარავად მოუყვია, ყველა წერილმანი უთხრა. აუწერა ის წუთები, ქმრის ვერაგობა, დაუნდობლობა, შეუბრალებლობა...

ზოგიერთი ადგილიც აჩვენა დალურჯებული. ეგონა სიბრალულს აღძრავდა შორეთის გულში, თანაგრძნობას გამოიწვევდა. ეგონა თავის მხრივ შორეთიც შესჩივლებდა მას ქმარზე, უარესს ეტყოდა, ისიც ხომ ახალდაქორწინებულია. ფიქრობდა ერთმანეთს მიუტირებდნენ თავიანთ უბედურებას, მაგრამ ქვესერის ლაპარაკი თითქო არც კი წვდებდა გულამდე შორეთს.

სიამოვნებით იღიმება. კმაყოფილებით იზმორება და თითქო ქვესერის ბედი შეშურდა, ისე უცქერდა ბავშვის მწუხარე სახეს.

— ეგ არაფერია. ყველაფერს შეეჩვევი და შეეგუები, ქვესერ. ასეთია ქალის ბედი. პირველად მეც გამიჭირდა, მაგრამ შემდეგ თანდათანობით შევეჩვიე. მერმე ცი...

— არა.—თავის გაქანებით სთქვა ქვესერმა.—მე შინ აღარ მივალ აწი. მასთან არ დავწეები. არა მეთქი. თავს მოვიკლავ, წყალში გადავვარდები, გესმის?!; აი ამიტომ მოვედი შენთან. დამბალე, ან თავს მოვიკლავ.—თვალებზე ხელები აიფარა და აქვითინდა.

შორეთის ახლა შეებრალა ქვესერი. ბავშვის უმანკო ცრემლები მიწვდნენ გულამდე. უფრო დედის გრძნობამ წამოიწია და საკუთარი შვილის ბედი წარმოუდგა.

შორეთი დასრულებული ქალია. მან დიდი ხანია გამოსცა და ქმარშვილიანობა. მართალია, ის ქვესერივით მცირეწლოვანი არ ყოფილა, თექვსმეტი წელი ჰქონდა შესრულებული როცა გაათხოვეს, მაგრამ მაშინაც საკმაოდ გაუჭირდა ოჯახის სიმძიმის ატანა. მართლაც ძალიან ემძიმებოდა ქმართან ცხოვრება, მაგრამ შეეჩვია და ახლა... რამდენჯერ უნატრია ვაჟკაცის გვერდით ყოფნა.

ორი წელია ქმარი მოუკვდა. ათი წლის ვაჟი დარჩა და ის არის მისი სიცოცხლის მიზანი. თუმცა ვინ იცის... ჯერ ახალგაზრდა ქალია... შვილები კიდევ შეიძლება ეყოლოს. ავადმყოფი ქმარი რომ არ ყოლოდა, ერთი შვილის ამარა არ იქნებოდა ახლა.

თავის ბედს ქვესერის ბედი შეადარა. ერთმანეთთან ეს ორი ქალი მოქიშპებესავით იდგნენ. პირველს მეორის ბედი შეშურდა, მეორეს—პირველისა...

არც ერთ მათგანს არ უნდოდა ყოფილიყო ასე. ორივე სიამოვნებით დასთანხმდებოდა ერთმანეთისათვის გაეცვალათ მდგომარეობა, მაგრამ ეს ხომ მათ ნება-სურვილზე არ იყო დამოკიდებული. აქ იყო ხალხი, სოფელი, სარწმუნოება, წესი, ადათი, ყურანი, ჯამე, ხოჯა და კიდევ ვინ იცის რამდენი მოღესილი ენა, რომელიც გველის ენაზე უფრო წხამიანია და გესლიანი.

დიდხანს ელაპარაკა შორეთიმ ქვესერს, აუხსნა, რომ საჭიროა ბედის დამორჩილება, უფროსების აყოლა და, ყველაფერი როგზე იქნება, მაგრამ ქვესერი ვერ დაითანხმა. ვერ ათქმევინა თანხმობა ქმრის ოჯახში წასვლაზე. არც თავის მშობლებთან წასვლა ისურვა.

— ნენეი მომკლავს.—ტირილით სთქვა მან.—არა, შენ გეყურებანე შორეთი, უნდა შემიწახო შენთან. უნდა დამმლო. არაფერს არ გთხოვ, ტახტქვეშ ვიქნები დღედაღამ, შემდეგ სადმე გავიპარები, თუ გამაგდებ. ახლა სხვა გზა არა მაქვს.—ხელები დაუჭირა, ყელზე მოეხვია და მშობელსავით ამოუკოცნა თვალებში, მაგრამ მაინც ვერ დაითანხმა.

— უბედურებას დამიტრიალებს ოჯახში შენი ქმარი. გადაგვწავს, გადაგვბუგავს... მალე წადი ქვესერ, თორემ მოვლენ ყანიდან. ოსმანი და ესმა გაჯაერდება.—ხელი მოკიდა, კარებთან მიიყვანა, ერთხანს უცქირა სიბრალულით და შემდეგ ჩუმად უთხრა.

— ნაილესთან მიდი, ის დაგმალავს. ყველაფერს მოგიწყობს. გესმის? აქედან გადადი და პირდაპირ მიხვალ.

— იქ ვილაც გიაური კაციო, ხოჯაი ამბობდა წინაზე.—
ნაღვლიანად უთხრა ქვესერმა და თვალეზი ცრემლებით აეცსო.

— ჰო და მით უყეთესი. იმ კაცის ყველას ეშინია. იქ ვერა-
ვინ ვერ მივა შენს საძებნელად. ხომ გესმის, იქ უყეთესია.

— შერე ის კაცი! უცხო კაცი?!

— შენ ის არაფერს დაგიშავებს. ამბობენ პატიოსანიაო. შენ
გგონია გიაურები ყველა ერთნაირია?!

— რაი ვიცი,—ჩაილაპარაკა ქვესერმა.—შენ რომ დამმალავ-
დე, უყეთესი იქნება.—ისევ შეეხვეწა, მაგრამ შორეთიმ მრავალი
მიზეზი დაუსახელა და გაისტუმრა.

ქვესერი ფრთხილად გავიდა. ყორეებს მოეფარა და შუკაში
მიიმალა.

— საცოდავი გოგო! — ჩაილაპარაკა შორეთიმ და სახლში
შებრუნდა. თავისი ქალიშვილობა მოაგონდა; ქმართან გატარებუ-
ლი წუთები. ხან მეტად ტკბილი და ბედნიერი. ხან მწარე და
ნაღვლიანი. ცამეტი წელი იცხოვრა ქმართან და მხოლოდ რამდენ-
იმე დღე თუ ექნება გატარებული ტკბილად. ხნიერი ქმარი მა-
ლე მოტყდა და დაეცა. ერთი ვაჟი დაუტოვა ცოლს და სამუდა-
მოდ გამოეთხოვა. ძმას დაუბარა, მიხედვ ჩემს ცოლშვილსო, და
დამშვიდებულმა დახუჭა თვალეზი.

მიხედა ოსმანმა ძმის ოჯახს. არ გაუშვა მშრომელი და ოდ-
ნავ ქონების პატრონი. ქალი ოჯახიდან. მოელაპარაკა და შორე-
თიც დასთანხმდა მაზლს. სხვა გზაც არ იყო. უარის თქმაც არ
შეიძლებოდა. ქალს ვინ მისცა უფლება იმსჯელოს თავის ბედ-
ილბაღზე. კაცმა სთქვა და მორჩა. კანონია ქალისათვის მამაკაცის
სურვილი.

უცდის, ელოდება ახალგაზრდა ქერივი მაზლის გადაწყვე-
ტილებას და ეღირსა კიდევ.

უნდა დარჩეს ქმარისეულზე შორეთი; უნდა აღზარდოს
შვილი და რახან ის ჯერ ახალგაზრდაა და უქმროდ ვერ მოიციდის,
პატარა ენვერზე დაქორწინდება. ენვერი მაზლიშვილია, მაგრამ...

მაზლისა და რძალის სურვილია ასე. მეზობლები, სმეჯული,
წესი და ადათი არ წავა ამის წინააღმდეგ.

ქონებიან, ლამაზ, მშრომელ, ჯანმრთელ ქალს არ გაუშვებენ
ეზოდან. რატომ სხვამ უნდა წაიყვანოს? ^{უცდის ელოდება} ^{ქალს არ გაუშვებენ}

ახლა ქმარის გაზრდას უნდა ელოდოს. შორეთიმ მხოლოდ
ლოდ თორმეტი წლისაა.

ოსმანმაც დაარიგა რძალი. ჯერ არ დააძალოს, არ შეაშინოს ბავშვი, მაგრამ მოწიფული ქალის სისხლი მღელვარეა, ზღვაზე უფრო ძლიერ ტალღებს ისერის და...

შვილზე უფრო შეიყვარა შვილის ტოლა ქმარი. როცა დაიმართობნებებს, კოცნის, გულში იკრავს, ეხვევა.

ენვერი გაურბის. რატომღაც არ მოსწონს ბიცოლას საქციელი. რატომ წინათ არ ეპყრობოდა ასე. ის კი არა, ხშირად ჩუმად აკმევედა საკუთარ შვილს რჩეულ საკმელს და ენვერს ყურადღებასაც არ აქცევდა. ერთ ოჯახში ცხოვრობდნენ, მაგრამ შორეთი კერძს ცალკე აკეთებდა შვილისათვის. ახლა თითქო შეიცვალა გული შვილზე. უფრო მეტ პატივს სცემს ენვერს. უფრო უვლის და ეალერსება.

შორეთიმ ფანჯარაში გაიხედა. ნაწვიმარზე ფერშეცვლილი მოსჩანდა მიდამო. აბიბინებული ყანები მშვენიერი სანახავი იყო. გაღმა სერზე სიმინდის ყანაში მაზლი, რძალი და შვილი იცნო, სამივე თოხით მუშაობდა.

ენვერი არ იყო მათთან... არ უყვარს ენვერს მუშაობა. სულ ბავშვებშია გართული და თუმცა სკოლაში არ დადის, მაგრამ მუდამ სკოლის წინაა გაჩერებული.

— ნეტავ სად იქნება ენვერი. გაიფიქრა შორეთიმ, გარეთ გამოვიდა და ეზოში მიიხედ-მოიხედა.

— ენვერ, ენვერ!—ფრთხილად დაიძახა მან.

— აქ ვარ.—საბძელიდან გამოეძახა ენვერი და ცოტა ხნის შემდეგ გამოყო თავი.

— მოდი აქ.—და შორეთიმ თითქო ცხელი წყალი გადააფლესო, ისეთი სითბო იგრძნო სხეულში.

ენვერი თავდახრილი ამოვიდა კიბეზე.

— რა გინდა.—უთხრა მან.

— მოდი აქ.—შორეთიმ ხელი მოაელო მკლავში, თავისკენ მიიზიდა და ასე შეიყვანა ოთახში.

— გამიშვი, რაი გინდა. გაიწია ბავშვი, მაგრამ ქალმა უფრო მიიზიდა ის და მაგრად ჩაიყრა.

ენვერს გული კინალამ შეუსუსტდა. შეეცადა თავის დაღწევას, მაგრამ ღონიერი ხელები მას არ აძლევდნენ წასვლის საშუალებას.

ქალი უფრო მეტად იკრავდა. მას გულმკერდში, კოცნიდა, კბენდა, ლოწინდა. მეტსა და მეტ ჟინს იჩენდა და თანდათან აძლიერებდა შეტევას. შემდეგ უეცრად მოეშვა, მიიზნიდა, თავლები დახუჭა და უფრო ძლიერად მიიკრა მკერდზე.

— ფუ!—გააფურთხა ბავშვმა. მას შეძაგდა ბიკოლა. საზიზ-
ლარი მოეჩვენა. ასე საძაგელი სუნი ჯერ არ უყნოსავს. ვინ იცის
რა სასჯელს აირჩევდა ის ამ საშინელი წუთების სანაცვლოდ.
ასეთი არც ალერსი უნდა, არც ჭვევნა, არც კოცნა. ძლივს გა-
ინთავისუფლა თავი. კარი გააღო და გარეთ გაეარდა.

მთელი ღამე დაეძებდნენ ქვესერს. ქმარი, სიმამრი, მამა,
ძმები, მაზლები, დადიოდნენ ცალ-ცალკე და ყოველ ბუჩქის ძირს
ათვალიერებდნენ. სათითაოდ ჩამოიარეს. ზოგს შეეკითხეს, ზოგს
ოჯახიცი გაუსინჯეს, არავის დაემალღოსო, მაგრამ ვერსად ვერ
იპოვეს. ნაკვალევიც ვერ ნახეს. შორეთიმც დაფარა. უარი სთქვა,
დაიფიცა, რომ თვალთ არ დაუნახავს რამდენიმე დღეა.

ერთხმად უარყოფდა ყველა. არავინ იყო მისი მნახველი.
დილით საბჭოში შეიტანეს განცხადება. თავმჯდომარეს მოელა-
პარაკეს და ანდროსაც გააცნეს მდგომარეობა.

ყველას ძალიან გაუკვირდა ქალის დაკარგვა, მაგრამ ანდ-
როზე უფრო იმოქმედა ამ ამბავმა. ის თვითონ შეუდგა ამ საქმის
გამორკვევას, შეკრიბა ახალგაზრდები, ზოგიერთ ხნიერ გლეხსაც
მოელაპარაკა, მაგრამ ვერაფერს გახდა.

— ყაჩაღები გადმოდიან, იტაცებენ ადამიანებს და მიყავთ.
შეიძლება შემოუთვალონ ქალის ქმარს სადა ყავთ მისი ცოლი,
ფულები მოსთხოვონ და ქალი დაუბრუნონ.—აუხსნა თავმჯდომა-
რემ.

სხვებმაც ასეთივე აზრი გამოსთქვეს, ხლებოდა წინათ ასე-
თი შემთხვევაო.

თავმჯდომარემ უფრო გააზვიადა.

ხანდახან მამაკაცსაც იტაცებენო. ჩამოთვალა მთავალღობი.
ზოგიერთებმა ქაჯებს გადააბრალებს, ლამაზ ქალს ქაჯიც ემტე-
რებო.

ძებნა მანც არ შეჩერებულა. მაზრას აცნობეს. გზებზედაც
დააყენეს მეთვალყურენი და ტყეები დაზვერეს.

მთელ დღეს ამაზე ფიქრობდა ანდრო. როგორ შეიძლება ასე
უგზო-უკვლოდ დაიკარგოს ადამიანი. ღამით კი არა, დღისით გაუ-
ჭირდება ქალს მგზავრობა აქეთ. სად უნდა წასულიყო?!

მას არც ერთისა არ სჯეროდა. არც მოტაცება, არც ქაჯები.
აქ უთუოდ სხვა რამეაო, ფიქრობდა.

მარტო მურადი იყო დამშვიდებული. ილიმებოდა უდარდე-
ლად.

— არაფერია. ნუ სწუხხართ მაგისტვის.—ეუბნებოდა ანდროს:

და ეშმაკურად ჩაუქნევდა თვალს.

ანდროს ექვი ებადებოდა.

— ან იცის რამე მურადმა, ან მართლაც გიჟი და სულელია, რომ ადამიანებს დაკარგვას არაფრად აგდებს.—ფიქრობდა ის და ბრაზი მოსდიოდა.

კარგა დაბნელებული იყო, ანდრო რომ წავიდა შინ. მურადმა მიაკითხა საბჭოში და წამოიყვანა.

გზაზე რამდენიმე სიტყვა უთხრა დაკარგული ქალის შესახებ, მაგრამ ანდროს მისთვის ყურადღებაც არ მიუქცევია.

— მისი მშობლების ბრალია. მისი ქმარის ბრალია.—იმიერებდა ის და იღიმებოდა.

ანდროს აბრაზებდა მურადის სიტყვები და უდარდელი ღიმილი. ნუთუ მეტი შეგნება არ აქვსო, ფიქრობდა და ექვის თვალით უყურებდა.

ნაილეს ვახშამი გაემზადებია და ამათ ელოდებოდა.

— რატომ არ მობრძანდით სადილად?—მორიდებით კითხა მან ანდროს, როცა ოთახში შევიდნენ.

— ვერ მოვიცალე, ძალიან ცუდი საქმე შეგვემთხვა... ადამიანის დაკარგვა ხუმრობა როდია.—ანდრომ ქუდი მოიხადა, კედელზე მიაკიდა და შემდეგ ტახტზე ჩამოჯდა.

— ადამიანს რა დაკარგავს?!. — ჩაილაპარაკა ნაილემ და გაიღიმა. ამ ღიმილში მურადის ღიმილი დაინახა ანდრომ. არ მოეწონა, მაგრამ არაფერი უთქვამს.

— დიად, ჩვენში ადამიანი არ დაიკარგება.—დაიწყა ისევ ნაილემ.—შეიძლება დროებით დაიკარგოს. შემდეგ ისევ გამოჩნდება... ეს გასაკვირი არაა, ქმარის და მშობლების ბრალია ასეთი დაკარგვა...

— მშობლების?!.—ცოტა არ იყოს წყენით იკითხა ანდრომ.

— და კიდევ ქმარის.—დის მაგივრად უპასუხა მურადმა.

— კი, მაგრამ, რა უნაში არიან ისინი!..

— არიან. დიად, არიან დამნაშავენი. თქვენ ახლა ვახშამი ბრძანეთ და მერმე ყველაფერს გაგაცნობთ.

ისევ გაიღიმა ნაილემ და ძმას შეხედა.

ანდრომ რაღაც ექვი აიღო და ძმაზე. უთუოდ რაღაც იცინო, გაიფიქრა.

ანდრომ და მურადმა ივანშმეს ერთად! ნაილე ხან გავიდოდა, ხან შემოვიდოდა და მოვასშმეებს ემსახურებოდა. ხან წყალი შემოჰქონდა, ხან მაწონი, ხან ცხელ მქადებს უმატებდა სუფრაზე.

ვახშამი რომ გაათავეს, ნაილემ სუფრა აალაგა, მრგვალი მაგიდა გაიტანა და როცა შემოვიდა, თან პატარა გოგონა შემოიყვანა. ანდრომ შეხედა ბავშვს. ნამტირალევი თვალეზი ჰქონდა მას და შეშინებული სახე. ტანზე ჩვეულებრივ აქაურ ბავშვებზე უკეთესად ეცვა და ყურებზე ოქროს საყურეები ეკიდა.

— ეისია ეს ბავშვი?—ჰკითხა ანდრომ მურადს და უფრო დაუკვირდა მისს შემკრთალ სახეს.

მურადი გაიღიმა.

— ეს ქალია, რომ დაიკარგა და ეძებენ—უპასუხა მან.

ანდრომ წამოიწია და მურადს ჩახედა თვალეზში.

— მართალს გეუბნები. ეს არის ქვესერი.

ანდრომ კითხვის ნიშნით შეხედა ნაილეს.

— მართალია,—უპასუხა ნაილემ,—ძალათ გაათხოვეს... ხელი მოხვია გოგოს და მკერდზე მიიკრა.—დამალული მყავდა წუხელის. მინდოდა თქვენთვის მეთქვა და... მეცოდება. მეცოდება საწყალი გოგო!..—თავზე გადაუსვა ხელი და თმა გაუსწორა.

— აი, როგორი ადამიანია ჩვენში.—უთხრა მურადმა ანდროს და ქვესერს მიუბრუნდა.—არ გინდა დაუბრუნდე ქმარს?

ბავშვმა თავი დახარა და თვალეზზე ხელები აიფარა.

ანდროს კარგა ხანს არ ამოუღია ხმა. ის ფიქრობდა იმაზე, თუ როგორ უნდა მოქცეულიყო. მართალია მის მხარეზე იყო კანონი, ძალა და საზოგადოებრივი აზრიც, მაგრამ ამათი გამოყენებაც მოითხოვდა ერთგვარ მოფიქრებას, სიფრთხილეს, წინდახედულებას.

— როგორ უნდა მოვიქცეთ ახლა?—შეხედა დაძმას ანდრომ.

— რახან დავმალეთ, აწიცი უნდა დავმალეთ—უპასუხა მურადმა.

— როდემდე?

— სანამ არ დაქალდება... თქვენ იცით, მე ნაილეს გაუჯავრდი წუხელ, რად დამალე მეთქი, მაგრამ მერე მეც შემებრალა. წყალში ჩავიხრჩობი, რომ არ დამმალეთო. არ ვიცი რა ვქნა.

— მოველაპარაკოთ ქმარს. იქნებ დასთანხმდეს, რომ...

— არ მინდა... შენ გეყურებანე... დაეცა ანდროს ფეხებთან ბავშვი.— მომკალით, მასთან ნუ მიმიყვანთ... გეყურებანე.— მოეხვია ფეხებზე და კოცნა დაუწყო, მაგრამ ანდრომ ხელი მოჰკიდა, წამოაყენა და დაამშვიდა.

კარგა ხანს ითათბირეს, ბევრი ილაპარაკეს და გადაწყვიტეს, რომ სანამ სათანადო ნიადაგს არ მოამზადებდნენ, მანამ ქვესერი ყოლოდათ დამალული და ამის შესახებ არავისათვის არაფერი ეთქვათ.

თ ა ვ ი მ ე ს ა მ ი.

მთელი ღამე მუშაობდა მურადი. კარები ჩაეკეტა, სანათი აენტო და ისე აწესრიგებდა საქონელს.

ტომრებით, ყუთებით და პარკებით ეწყო გაუხსნელი საქონელი. შაქარი, მარილი, ბრინჯი, ასანთი, საპონი, ზეთი, ფერადი თავსაფრები, ხალათები და შარვლები, ქუდები, ფეხსაცმელები. ერთი სიტყვით, ყველაფერი, რაც უფრო საჭირო იყო გლეხობისათვის.

მურადი ფრთხილად ხსნიდა ტომრებს, ყუთებს, პარკებს, იღებდა საქონელს და აწყობდა თაროებზე. უფრო ფეროვანსა და მიმზიდველ ნივთებს გამოსაჩენ ადგილას აწყობდა. უფრო შეუხედავსა და მდარეს მოფარებულ ადგილს უთმობდა. თითქოს გამოცდილი ხელი მუშაობსო, ისე აკეთებდა ის ამ საქმეს.

სახელმწიფოს მართვა დიასახლისმაც უნდა შესძლოს — უთხრა ერთხელ მას ანდრომ, — ასე სთქვა ჩვენმა ბელადმა ლენინმაო: ჩვენ დაგავალეთ კოოპერატიული სავაჭროს ხელმძღვანელობა, შენც უნდა იკისრო და შეასრულოო.

ჰკვიანი კაცია ანდრო. მურადი აბა როგორ წარმოიდგენდა, რომ მას ოდესმე ასეთ საქმეს ჩააბარებდნენ. ანდრომ მოუწყო და მაზრაში გაგზავნა მოსამზადებლად.

გაეცანი, შეისწავლე და საქმეს მოჰკიდე ხელიო, — უთხრა.

არ ეგონა, თუ ასე ჩქარა შეისწავლიდა ვაჭრობას. წერა-კითხვის სწავლა არ გასჭირვებია, მაგრამ ვაჭრობის შესწავლას ვერ შესძლებდა ეგონა. ხუმრობაა, ამდენი საქონელის სახელი დაიმახსოვრო, ყველას თავისი ადგილი მიუჩინო, მათი ნაყიდობისა და გასაყიდი ფასი იცოდე?..

ეზინოდა, ეფიქრებოდა, ყოყმანობდა, მაგრამ უარის თქმას ვერ ბედავდა.

როგორ შეიძლება უარის თქმა. რახან ანდრო ავალებს, ეს მთელი მთავრობის სახელით მიცემული დავალებია. პარტია ავალებს. ჩვენი პარტია ავალებს და აბა მისი დავალების შეუს-

რულებლობა შეიძლება? მისი ნება-სურვილი ხომ ხალხის ნება-სურვილია და...

მურადი ვალდებულია ამ უძლიერეს ძალას დაემორჩილოს...

თურმე წერა - კითხვა ყოფილა ყველა საგნის შესწავლის საშუალება. ასე როდი ფიქრობდა მურადი. ახლა კი, როცა საქონელი შეისწავლა, მისი შეძენისა და ყიდვა-გაყიდვის წესებს გაეცნო, დარწმუნდა, რომ ამისთვისაც მთავარი ყოფილა იმ ანბნების ცოდნა, რომელიც მას მარტო წიგნებისა და გაზეთების წასაკითხად გამოსადევი ეგონა. წიგნი, წიგნი ყოფილა მთავარი.

წიგნის კითხვა კი ორ თვეში კარგად შეისწავლა, წერაც. ახლა აღარ სჭირია დახმარება, ისე კითხულობს და სწერს. რომელია დახმარება! პირიქით, სხვებს ასწავლის და უხსნის.

აკაკის ლექსები იცის, ილიას პოემები, ნინოშვილის მოთხრობები გადაიკითხა და ახლა ახალგაზრდა მწერლების ნაწერებს ეცნობა.

საკვირველი ენერჯია გამოიჩინა. წიგნს არ მოსცილებია. დღე-ღამე წიგნთან არის, ლექსებს იზეპირებს, სიტყვებს სწავლობს, რიცხვებს ამრავლებს, აკლებს, უმატებს და ყოფს ერთმანეთზე — ანგარიშს სწავლობს.

დაუხარჯავი და დღემდე გამოუყენებელი ენერჯია ერთბაშად გამოიყენა. ნოყიერ მიწაში რომ ჩქარა გაღვივდება თესლი, ისე გაღვივდა მასში ცოდნა. წვეთები მდინარეებად იქცნენ, სწრაფად და იწყობად ყველაფრის ათვისება.

სად იყო ამდენხანს... უსაყვედურებს თავს. გაქცეულიყო, გადავარდნილიყო, მისულიყო იქ, სადაც ანდროსთანა ხალხია, შეხვეწებოდა, ესწავლა იმათგან ყველაფერი. ახლა ხომ დიდი სწავლული იქნებოდა. რამდენი ეცოდინებოდა... როგორ ტყვილა გასულა რამდენიმე წელი. ოცდაორი წლისაა და ახლა დაიწყო, ათი წლის წინ რომ დაეწყო, ან უფრო ადრე!..

რამდენჯერ ჩაფიქრებია ამ კითხვას.

მაგრამ იყვნენ კი ანდროსთანა ადამიანები წინათ?

მაშინ რომ სწავლა-განათლების უფლება და შესაძლებლობა ჰქონოდა ხალხს, მაშინ რომ თავისუფალი ყოფილიყო შრომა, ხომ არც ისე გაჭირვებული იქნებოდნენ.

მართალი სთქვა ანდრომ.

— სიღარიბე ჯერ კიდევ არაა სირცხვილი, ის ძველი ქვეყნის ნაშთია, მაგრამ მალე სიღარიბე სირცხვილი იქნებაო.

ან რატომ უნდა იყოს ადამიანი ღარიბი ასეთ ქვეყანაში, როცა ყველა ერთისთვის და ერთი ყველასთვის მუშაობს.

ბევრი რამ გაიგო მურადმა ამ მოკლე ხნის განმავლობაში.

ბერი რამ შეისწავლა.

ეზარებოდა შრომა წინათ, არ მუშაობდა... სულერთია, მაინც არაფრის მქონე ვიქნებო, რატომ შევაწუხო სხეული. დადიოდა აღმა-დაღმა და კმაყოფილდებოდა იმით, რასაც აქმევდნენ. მარტო ნაილე ზრუნავდა ოჯახზე. ქალებს იხმარიებდა და ეხმარებოდა. თესავდა, თონხიდა, მკიდა და მოჭქონდა... ჯან-ლონე ერჩოდა და არ ზოგავდა. სანამ დედა ცოცხალი იყო, უფრო მსუბუქად მოდიოდა ლუკმა. მერმე გაძნელდა, მაგრამ მაინც არ გატეხილა, არ გაუგდია თონხი. ვაჟკაცის ძალა ჰქონდა და რკინის გული.

მურად ახლა აფასებს დის ღვაწლს. რატომ ამდენხანს არ დაფიქრებულა ამაზე!

— საწყალი გოგო!—სთქვა თავის გულში მან. გახსნა ყუთი და ნივთები ამოალაგა—აწი დავეხმარები. სრულიად არ ვამუშავებ ისეთ მძიმე სამუშაოზე. მასწავლებელს რომ ტანსაცმელი აქვს, ისეთს შეეუყერავ, ჩადრს აქ ჩავეცმევ. ჩადრი!.. ისიც ჩვენს დასაბეჩავებლად მოუგონიათ.

მრავალნაირი ფიქრი უტრიალებს თავში მურადს. ის უკვე მოსამსახურეა. ჯამაგირს მისცემენ. საკუთარ ნაშრომს შეიტანს ოჯახში. უპირველეს ყოვლისა, ნაილეს უნდა უყიდოს კარგი ტანსაცმელი. მაგრამ არა, ჯერ უფრო სხვა საქმე აქვს. მაგიდა უნდა გააკეთებინოს ისეთი, როგორც ანდრომ გააკეთებინა, სკამები საჭირო... არა, ჯერ არც ამისათვის დახარჯავს ფულს. ვალი უწინ უნდა გადაიხადოს. ანდროს ვალი აქვს გადასახდელი. უსათუოდ მისცემს ამ ჯამაგირზე. ნეტავი რამდენი ექნება ჯამაგირი? მაზრაში ასეთი ნოქრები ორმოც მანეთს ღებულობენ, მაგრამ ისინი სწავლულებია. მურადს ვინ მისცემს იმდენს. სულერთია, რასაც მისცემენ, უკლებლად მისცემს ანდროს. დაწარჩენს მეორე თვეში გადაიხდოს. მერმე კი...

სრულ ჯამაგირს მოახმარს ოჯახს. სირცხვილია რომ ღარიბად ცხოვრობდეს კაცი!—იმეორებს ამ სიტყვებს. შეიძლება სიღარიბიდან გამოსვლა და რატომ არ იმეცადინოს? დღედაღამ იმუშავებს. ერთ წუთს არ გააძდენს. არ კმარა, რაც იზარბაცა? აქაც იმსახურებს, წაგნებსაც იკითხავს, ანგარიშსაც ისწავლის. ანგარიშიც დიდი რამე ყოფილა. თუ ანგარიში იცი კაცმა, საქმეს კარგად წაიყვან.

რამდენი რამეა გასაკეთებელი და შესასწავლი...

სრულიად ახალი ქვეყანა გადაეშალა თვალწინ. ახალი ცხოვრება, ახალი სამყარო.

—უნდა გაიზარდოს, უნდა გახდეს ნამდვილი ბოლშევიკი.

ბოლშევიკი!.. რა კარგი სახელია, საამაყო სახელი! როცა ან-

დროს უცქერს და იცის ის ბოლშევიკია, გული სიაშით უტოკავს. ბოლშევიკურ სიტყვას გაძლეო—იტყვის... მერე და რა ძლიერია ეს სიტყვები. მისი არც გატეხა შეიძლება, არც გადათქმა, არც უარყოფა. სთქვა სიტყვა ბოლშევიკმა და მოჩა... ნეტავ როდის ექნება უფლება მურადს სთქვას—ბოლშევიკურ სიტყვას გაძლეო. ძალიან უნდა მალე გახდეს იმ პარტიის ღირსეული წევრი, რომლის წევრიც ანდროა, იცოდეს იმდენი, რამდენიც იცია ნამდვილმა ბოლშევიკებმა. დიად ნამდვილმა... ზოგიერთების ბოლშევიკობა, მაგალითად, დურსუნის ბოლშევიკობა არ სწამს. თუმცა ისიც ხშირად ამბობს—ბოლშევიკურ ფიცს ვდებო, მაგრამ „ვალაი და ბილლაი“ უფრო ხშირად წასცდება.

დაალაგა მურადმა ყველაფერა მშვენიერი სავაქრო გამოვიდა ნაწისქვილარი. კობტად გამოიყურება საქონელი თაროებიდან. მურადს, მოსწონს ნამუშევარი. დილით აღჩინად უნდა მოიყვანოს ანდრო. აჩვენოს იმასაც, თორემ ისე ვაჭრობის დაწყება არ ივარგებს. ვინ იცის, რა ცვლილებებს შეიტანს ანდრო. იქნებ არც მოეწონოს, ხელახლა დაალაგებინოს, უფრო სხვანაირად, უფრო ლამაზად.

ნეტავ სად უსწავლია ამ კაცს ყველაფერი!

გზის გაყვანა რომ დაიწყეს, იწინებთან იდგა, მათ აძლევდა მითითებებს. ქვის მტეხავებს მუდამ ასწავლიდა, სად გაეზურათ და როგორ გაეტენათ ნაღმის დენთი...

ყველაფერში გამოწაფულა და ყველა დარგი შეუსწავლია.

ნეტავ როგორ მოასწრო? ოცდახუთი წლის ვარა. ოცდასამი წლის მურადიც მალე შეიქნება. რატომ არ იცის ანდროს ნახევარი?

კარგად დაათვალიერა მურადმა ნაწისქვილარი. კედლები, ქერი, იატაკი. არ იყოს სადმე დაზიანებული, არაეინ შემოძვრესო და როცა ყველაფერი რიგზე გამოდგა, გამოვიდა და დიდი ბოქლომით დაკეტა. ზემოდან მავთული შემოახვია ბოქლომს, რომ უფრო საიმედო ყოფილიყო.

ცა ვარსკვლავებით იყო მოქედილი. ნამგალივით მოხრილი. მთვარე ქურდულად ამოპარულიყო მთის გადაღმიდან და ახლა მთის წვერზე მალალ ხეების ტოტებში გახლართულიყო.

ახლო იყო განთიადი. თანდათან მტრედისფერი სილურჯით იფერებოდა აღმოსავლეთი. დასავლეთიდან კი გრილი ნიავი მოდიოდა.

მურადი სახლისაკენ წავიდა. შუკაში აიარა, სკოლის გვერდით გადავიდა ლობეზე და დაბლობში ჩავიდა. აქ უფრო ბნელოდა.

შეჩვეული ფეხები თავისთავად ირკვევდნენ გზას, მაგრამ თვალეპსაც არ დაეკარგათ მხედველობა... ბნელაში ხედავდნენ ვაშლისა და შიხლის ხეებს და იმათ ძირში უდროოდ ჩამოცვენალ ხილს. წინადლის ქარს ბლომად ჩამოებერტყა ხეხილი.

მურადმა ფრთხილად ჩაიარა ფერდობი, ცოტალა უკლდა გზაზე გასვლას, რომ რალაც ლანდი შენიშნა და შეჩერდა. შიშს არ იყო ჩვეული და მის გულსაც არ დასტყობია ზედმეტი ატოკება, მაგრამ ძალიან გაუკვირდა, როცა ამ ლანდთან ერთად მეორე ლანდიც გამოჩნდა და ორივე სწრაფად მოეფარა ფერდობის პირას ამოზრდილ ბუჩქებს...

— ნადირი არაა.—გაიფიქრა მან. ფერდობისაკენ წავიდა, მაგრამ უეცრად ეს ლანდები გამოცვივდნენ ბუჩქებიდან, ხეცე დაეშენენ და მალე სიბნელეში ჩაინთქნენ.

— აი თქვენი რჯული მოისპო.—ჩაილაპარაკა.—ციდევ დაწოწილებენ.—უნდოდა გამოდევნებოდა, აეტეხნა განგაში, მაგრამ იცოდა ამით ბევრს ვერას გახდებოდა, ტყვია აშლიდა სოფელს, კონტრაბანდისტებს მაინც არავინ გამოუდგებოდა—ზოგი შიშით, ზოგი ნაცრობების ხათრით. იცოდნენ, რომ კონტრაბანდისტები საყვარელი სტუმრებია ხოჯა-მამუდის, იუსუფ-ალასი და არც თავმჯდომარეს სწყინს მათი სტუმრობა. ინგლისური ინდიგო ან ლორიჯანის პუდრი, სურნელოვანი წყლები, ჩულქები და ხელთათმანები, კოვერკოტი და... ვინ ჩამოთვლის კიდევ რამდენი რა არ მოყვება კონტრაბანდისტის სტუმრობას.

მურადმა კონტრაბანდისტებად მიიღო დანახული პირები. კარგახან ადევნა თვალი მათს ნაგზურს, იქნებ გამოჩნდნენ ისევ რომელიმე მხრიდანო, მაგრამ როცა არაფერი გამოჩნდა, მიბრუნდა და ჩქარი ნაბიჯით სახლისაკენ წავიდა.

ნაილეს ფრთხილად ეძინა. ძმის ხმაზე ის სწრაფად წამოდგა და კარი გააღო.

მურადი მოექანცა მთელი ღამის მუშაობას, მაგრამ ის არაჩვეულებრივ კარგ ხასიათზე იყო. მქადი და ყველი ჭამა, ცივი წყალი დააყოლა და ტანგაუხდელი მიწვა.

— ერთი საათით დავიძინებ—უთხრა მან ნაილეს.—თუ არ გამომეღვიძოს—გამაღვიძე. მზის ამოსვლამდე უნდა გავალო სავაქრო. ანდროც უნდა წავიყვანო. შენც მოდი, ნახე როგორი კოოპერატივი გვაქვს. შენობა არ გვივარჯა, მაგრამ არაფერია. მალე კარგს ავაგებთ. თვალეები დახუჭა. მოინდომა დაძინება, მაგრამ არ დაეძინა. სიხარული არ ასვენებდა მას. შემდეგ რალაც. შიში იგრძნო.

ის ორი ლანდი მოაგონდა... კარგად დაფიქრდა და ისევ გაახილა თვალები.

— იქნებ კონტრაპანდისტებზე უარესები იყვნენ.—გაიფიქრა. დაკეტილი სავაქრო გაახსენდა. ხომ შეიძლება, რომ...—წამოიწია. რამდენი მტერი ჰყავს კაცს. ყველას სხვადასხვანაირად შეუძლია ზიანის მიყენება. ხომ შეუძლიათ, რომ... არა. მურადი ვერ დაიძინებს. დიალ, ვერ დაიძინებს; როცა ლანდები მოძრაობენ და ფხიზლობენ. ლანდები ბოროტი ადამიანებია. ბოროტი ადამიანები კი კეთილი საქმის მტრებია. კოოპერატივი კეთილი საქმეა. მურადმა ის უნდა დაიცვას. დიალ, უნდა დაიცვას... სწრაფად წამოხტა, გაისწორა თავზე ჩამოფხატული ქუდი და კარები გააღო.

— სად მიდიხარ?—გაეხმაურა ნაილე ძმას.

— კოოპერატივში—უპასუხა მურადმა.—მაინც არ შეძინება და იქ კი საქმეები მაქვს. გათენდება—მოვალ.—კარები გაიხურა და წავიდა.

ნაწისქვილარი ისე დაუხვდა მურადს, როგორც დატოვა. ბოქლომიც მთელი იყო და მავთულიც ისევე ჰქონდა შემოხვეული. მურადი იქვე ახლოს ჩამოჯდა.

განთიადი თანდათან ახლოვდებოდა და ნამგალა მთვარე ზე-ვითა და ზევით მისცურავდა. სოფელს ეძინა. მამლები ეგებებოდნენ განთიადს, უფრო უზშირებდნენ ყვირის. აქა-იქ ძაღლებიც შეიყუფებდნენ და ერთმანეთს გაეხმაურებოდნენ.

მურადი წამოდგა. მასში დილის ნიაემი სიხარულის ნაკადი ააჩქევდა. ახალი ენერჯია შემატა. მიმოავლო თვალი ირგვლივ და შემდეგ გაღმა სერზე გადაიტანა მხედველობა. ტყიდან გამოდიოდა ბილიკი. ვიწრო ძაფივით გაბმული ბილიკი. ამ ბილიკით მოჰქონდათ სოფლებს მთიდან შეშა, ყავარი, ფიცარი, თივა და ზამთრობით ხის კვირტები საქონლისათვის.

მურადმა დაინახა, ტყიდან ორი კაცი ჩამოყვა ამ ბილიკს და სოფლისაკენ დაეშვა. ისინი ჩქარა მოდიოდნენ და თან ზვერავენენ მიდამოს. მურადი მოფარებულ ადგილას გაჩერდა. მან უკვე მოისაზრა ყველაფერი. სწორედ ამ ბილიკს მოყვებოდნენ ისინი...

ის ორი ლანდი, ორი საათის წინ რომ შეხვდა მურადს.

არ გასულა დიდი ხანი, რომ მგზავრები დაუახლოვდნენ სოფელს და შუქაში მოემწყვდნენ. მურადმა უკვე იცნო მოლა ნური. მეორე უცნობი იყო.

— ესენია!—ჩაილაპარაკა.—რალაც ბოროტი განზრახვა აქვთ. კარგი, საქმისათვის არ ჩამოვიდოდა მოლა სოფელში. წელანც ესენი იყვნენ...

იგრძნო მურადმა, რომ საქმე პირადად მას შეეხებოდა. მოლა ნური არ აპატიებდა იმ გარტყმას, რომელიც ამასწინათ არგო მას მურადმა, და სამაგიეროს გადასახდელად მოემზადებოდა.

ნური ჯერ კიდევ არ ითვლებოდა მოლად, ის ახლა სწავლობდა ღორჯომის სჯულის სასწავლებელში, სადაც სამასამდე მასავით მომწიფებულ ვაჟაკს მოეყარა თავი. აქედან ევლინებოდნენ აპარას „სწავლელები“, აქ ასწავლიდნენ მათ წერა-კითხვას, ყურანს, ნუსხიხა და ჯადოს დაწერას. ამ სასწავლებლის დასრულების შემდეგ გადიოდნენ ხალხში ახალგაზრდა მოლები და მოხერხებულად აბნევდნენ სოფლებში თავიანთ აზრებს, აბრუებდნენ და აბრმავებდნენ მშრომელ მოსახლეობას.

ნური იშვიათად ჩამოდიოდა სოფელში. როცა მოვიდოდა, მაშინ ყველას ყურადღებას იპყრობდა. ახალგაზრდა კაცს, საერთოდ, ნაკლები მოწონება აქვს აქეთ, მის სიტყვებს არავინ აქცევს ყურადღებას. ღრმად მოხუცებულების სიტყვებია კანონი. მაგრამ მოლა ნური განსაკუთრებული ყურადღებით სარგებლობდა. ეს უფრო იმიტომ იყო, რომ ხოჯა მამუდი კარგი თვალთ უყურებდა ახალგაზრდა მოლას და ამიტომ ხალხშიაც აფასებდნენ.

ამ ბოლო ეჟამს, ცოტა არ იყოს, შეირყა ამ პატივისცემის საფუძველი. საბჭოთა ხელისუფლება ვერ გამოდგა ასეთი ხალხისათვის სახეირო და მათი გულისწყრომაც დაიმსახურა. მაგრამ რას იზამდნენ! „ძალა აღმართს ხნავსო“, და საბჭოთა ხელისუფლებაზე ძლიერი ძალა ჯერ არც ენახათ...

ყველაფერი ხელს უწყობდა ფანატიკოსების პრესტიჟის დაცემას. თითქო ბუნებაც გაკერპდა: წინათ თუ ხოჯა ილოცებდა, წვიმა მოვიდოდა, ახლა წინააღმდეგ ხდებოდა. ნუსხა ან ჯადო მოქმედებდა, ახლა ჩალასავით გამოფიტულა. არც აღარავის არჩენს.

მურადმა რომ ახალგაზრდა მოლას სილა გააწნა და ღმერთმა მურადი დაუსჯელი დატოვა, ეს ზომ სულ უცნაურობაა. წინათ ასეთი საქციელისათვის შემდეგი სასჯელი იყო ალლახისაგან დაწესებული: გადელება და ამ დელობით სიკვდილი. ქაჯთან შეხვედრა და კლდეზე გადაჩეხვა. საშინელი უკურნებელი სენით დაავადება, უშვილობა, საქონლის ამოწყვეტა, მუდმივი ციებ-ცხელება და წირნახულის მოუსაველობა.

ყველას აშინებდა ეს სასჯელი. ან როგორ არ შეაშინებდათ, როცა თავისი თვალთ უნახავთ და ყურით სმენიათ, რომ ხოჯას მიერ დაწყევლილი გლეხი გადარეულა, კლდეზე გადაჩეხილა, ქაჯები შეხვედრია, რამდენი რა ახსოვთ. ისევ ხოჯა თუ აპატიებდა, ნუსხას დაუწერდა, განკურნავდა, ქაჯებსა და ეშმაკებს მოაცილებდა, თორემ სხვა ვინ იყო დამცველი ხოჯა კი ამ დროს თა-

ვის ინტერესებს არ ლაღატობდა, და თუ რამეზე გულნაკლული იყო, ერთიათად აზღვევინებდა თავის მსხვეპლს.

ჰო და, ამ ბოლო დროს წაუვიდათ ხელი. ალლახი თუ გაწყრა, თორემ სხვა რა უნდა იყოს. გაწყრომის საბაბი კი არ ჰქონია იმ კურთხეულს. თუ ხოჯა მამულს დანაშაულად ჩაუთვალა ის, რომ ხანდახან ჩადრს ჩაიცვამს, ქალივით მოირთვება და სოფელში ქალებს აცდენს, ეს არც ისე დიდი ცოდვაა. ყურანიც არ კრძალავს მრავალცოლიანობას. მოციქულებს შეუძლიათ ინებიერონ ქალებში და იყოლიონ რამდენიც უნდათ, ხოლო უბრალო მომაკედაუს ეკრძალება ხელი შეუშალოს მოციქულს ასეთი სიამოვნების დროს. როცა მოციქული ქალებთან ალერსშია, მოერიდონ უნდა, რადგან მათ უფლება აქვთ მიიღონ განუსაზღვრელი სიამოვნება. ასე ამბობს ყურანი და ის ხომ ცუდს არაფერს ამბობს!

სხვა რა ცოდვა ჩაუდენია. ქრისტიანის ვალი არ შეირჩინო —ასწავლის კიდევ სჯული. ხოჯა მამულს არც ეს ცოდვა ჩაუდენია. წართმევა ხომ შერჩენას არ ნიშნავს. ერთ გიაურ ვაქარს დასტყუა ერთხელ ასი თუმანი. ნიგვზის ხეებს მოგცემო და მერე უარი უთხრა. მაგრამ ეს ხომ ცოდვა არაა!

მაშ რატომ არ უმართლებს ბედი? რატომ არ სჭრის ნუსხა ან ჯადო?

ჰაი, ჰაი, რომ იცის მიზეზი ხოჯამ, მაგრამ ვის უთხრას და შესჩივლოს.

ამიტომ დაიანლოვა ახალგაზრდა მოლა. ვინ იცის, იქნებ შეიცვალა ნუსხის დაწერის წესი. ან ჯადოს უნდა სხვანაირად მომზადდება. ან ქაჯების გამოძახებაა საჭირო სხვა ხმით. წინათ გაჯავრდებოდა ვინმეზე. დაწყევლიდა, დასწერდა ჯადოს და ჩაუთქვამდა, ქაჯები გადაელობოს გზაზე, ან ეშმაკები შეხედესო. მორჩა და გათავდა. უსათუოდ ახდებოდა. ქაჯები მიბეგვავდნენ ალლახის ურჩს.

მოლამ მართლაც ასწავლა ხოჯას. მიზეზიც აუხსნა.

მართლაც შეიცვალა თურმე ნუსხის წერის წესები. არც ჯადო კეთდება ძველებურად. ამის მიზეზი კი... საიდუმლოდ უთხრა ყურში. ხალხმა შეიგნო და აღარ სჯერავსო. და ურწმუნოს ალლახიც ვერაფერს აკლებს. ურწმუნო იგივე ეშმაკი, იგივე ქაჯია და რა შეუძლია ღმერთს მათ წინააღმდეგო.

— მაშ დავლუბულვართ და ისაა! — მუხლებზე დაირტყა ხელი ხოჯამ. თუ ურწმუნოს ვერაფერს დავაკლებთ, თუ ჩვენს ურჩებს ღმერთი არ დასჯის, რა უნდა ვქნათ, ვალჰაი და ბილლაჰი, ყველა გაგიაურდება! — წვერებზე ხელი დაისვა მან და უიმედოდ შეხედა მოლას.

მოლამ აუხსნა, — აადრეცია სასოწარკვეთილებათ.

თურმე, ნუ იტყვი, ყველაფერი ისე იცვლება, როგორც პირობები. მდგომარეობას ეგუება რჯულის კანონებიც. ყურანიც იცვლება მდგომარეობას მიხედვით. რასაც ათი-ოცი წლის წინ გამობდა, დღეს აღიდებს, რასაც კიცხავდა, იმას აქებს და ეს ყველაფერი იმიტომ ხდება, რომ...

კიდევე ჩემად ჩასჩურჩულა მოლამ.

— რომ გავიხანგრძლივოთ და შევინარჩუნოთ ტკბილი ცხოვრება, რომ ერთბაშად არ შეგვაქციონ ზურგი.

ხოჯას გააჟრჟოლა. არ მოელოდა ამას. მართალია, იცოდა ის, რომ რასაც ქადაგებდა და სხვას ასწავლიდა, ყველაფერი მოჭორილი ამბავი იყო, მაგრამ ცოტა რწმენა მაინც ჰქონდა ზეცის... ახლა კი... ყველაფერი ტყუილი ყოფილა და ამ ტყუილს მიტომ ასაღებს მართლად, მიტომ არწმუნებს სხვას უხილავი ღვთაების არსებობაში, რომ ასეა საჭირო მისთვის. ასე საჭიროა იმათთვის, ვინც უმუშევრად ფიქრობს თავის შენახვას. მაგრამ ტყუილს ხომ მოკლე ფეხები აქვს.

ასე ყოფილა დასაბამიდან, მაგრამ რატომღაც ახლა ეცლება ნიადაგი.

რალა მაინცდამაინც ამ დროს ხდება ყველაფერი ეს. რატომ ასე, ორასი წლით ადრე ან გვიან არ მოხდა! ბედნიერი იყვნენ წინათ ხოჯები. რა აკლდათ! რაზე შეწუხდებოდნენ.

ისევე მოლა ნურიმ ანუგეშა.

— ჯერ კიდევე ადრეა. სანამ სარწმუნოება დაკარგავდეს თავის მნიშვნელობას, რამდენიმე ათეული წელი გავა... და მოუყვა ყველაფერს.

კომუნისტები ყველაზე საშინელი მტრები არიან სარწმუნოების. არც მაჰმადიანობა სწამთ, არც ქრისტიანობა, არც ბუდიზმი, არც ერთ წინასწარმეტყველს არ სცემენ თაყვანს. ღმერთსაც უარყოფენ. ძველი წესების აღმოფხვრა სურთ, მაგრამ... მაგრამ ის, რომ კომუნისტებსაც უამრავი მტერი ჰყავს.

უფრო დაბალი ხმით ეუბნება მოლა:

— ღორჯომში ხოჯები დარაზმულია. ხალხიც უქერს მხარს. რუსის ხელმწიფის მომხრე კაცებიც შეერთებულან. ქართველების მღვდლებიც ჩვენს უარეს დღეში არიან და დროს ელოდებიან: კომუნისტებს ვერ ითმენს ვერავინ. მარტო ბეჩები, ლატაკები და არაფრის მქონე მაწანწალები ემხრობიან. მალე, სულ მალე ამოწყვეტენ კომუნისტებს. მაგრამ სისულელე იქნება იმაზე ფიქრი, თითქოს საჭირო არ იყოს ბრძოლა, ხელის შეშლა, თითო-ორიოლა კომუნისტის გაქრობა.

— აი, ახლა სკრიდეს ჯადო!—ინატრა ხოჯამ — ყველას გა-
ვადლებდი, ქაჯებს დავატაკებდი, ჭინკებს მივუსევდი.

მოლამ აქაც მონახა საშუალება.

•ჯადო ახლაც იმუშავებს, ახლაც გასკრის ნუსხა. მაგრამ
საჭიროა ახალი მეთოდით მისი გამოყენება.. და ეს მეთოდი კი
ერთი ღამეს დაამუშავეს ორივემ...

მოლა ნურის დელი მურადის ჯავრი სჭირდა. მუდამ ფიქ-
რობდა სამაგიეროს გადახდაზე, ეძებდა დროსა და საშუალებას.
ხშირად მოდიოდა სოფელში და საექვოდ დაიპარებოდა აქეთ-
იქით, მაგრამ მურადი ამას არაფრად აგდებდა. მასეთი მტერი ათი
მყავდესო—იძახდა ის. ახლა აღარ იყო ყველასგან ათვალწუნებული
დელი მურადი. მას ჰყავდა საკმაოდ კარგი ამხანაგები, რომლებიც
იყო საჭირო იქნებოდა, თავს დასდებდნენ მისთვის. არც ძველებუ-
რად გამოუცდელი და შეუგნებელი იყო. დღეს დელს აღარავინ
ეჭახდა. კრებებზე და თათბირებზე მის ლაპარაკს ანგარიშს უწევდ-
ნენ და ამიტომ ახლა დელი მურადათან ბრძოლა არც 'ისე ადვი-
ლი იყო. ეს კარგად იცოდა მოლამაც.

მურადი შორიახლო მიჰყავა შუქაში ფრთხილად მიმავალ
მოლასა და მის მხლებელს. უნდოდა ის მეორეც ეცნო, მაგრამ
ვერ იცნო. ისინი მიდიოდნენ ჩუმად. ასე აიარეს სერი და ხოჯა
მამუდის ეზოში შევიდნენ.

მურადი გამობრუნდა. გადმოიარა მეზობლების ეზოში და
პირდაპირ შინ მივიდა.

თენდებოდა... ქათმები კაკანით მოფართხალებდნენ ქანდარე-
ბიდან. ფრინველებს ჟრიაშული აეტეხნათ.

სოფელი იღვიძებდა.

II

გლებობის უმეტესი ნაწილი სინარულით შეხვდა კოოპერა-
ტივის გახსნას. გათენებიდანვე მოიყარეს თავი ნაწისქვილართან.
შედიოდნენ, ნახულობდნენ სავაჭროს. სინჯავდნენ საქონელს, ყი-
დულობდნენ შაქარს, ჩაის, ტკბილეულობას, ნავთსა და მარილს.
ზოგს ფული მოჰქონდა, ზოგს კვერცხი, ვრბო და კარაქი. ზოგიერ-
თები ისე მოსულიყვნენ, დასათვალიერებლად...:

მურადი გამოცდილ ნოქარივით ტრიალებდა. აწოდებდა
ერთსა და მეორეს საქონელს, უხსნიდა მათი მოხმარის წესებს, მათ
ხარისხსა და გამძლეობას.

რამდენიმე ქალიც მოვიდა. შორიდან შემოიჭვრიტეს, ფრთხი-

ლად დაზვერეს და როცა დრო იხელთეს, შემოვიდნენ და რაღაცები შეიძინეს.

ანდრომ დარიგება მისცა მურადს. გაათრთხილა, ზედმეტი არავის გადაახდევინოს, წონაში არ დააკლოს, ხურდაში არავინ მოატყუოს, არც თვითონ მოტყუედეს, გაუფრთხილდეს საქონელს თვალის ჩინივით.

თავმჯდომარემც გაიმეორა ანდროს თქმული. ნაძალადევად შეაქო მურადი და შეპირდა დაწინაურება.

გაჩაღდა ვაქრობა. მეტი და მეტი მუშტარი მოაწვა სავაქროს. სხვა სოფლებიდანაც იწყეს სიარული და მალე ნაწისქვილარი სოფლის ცენტრად გადაიქცა. ახლა აღარ კმაროდა ასე ვიწრო სავაქრო. საკირო იყო მისი გაფართოება, უგზობის გამო საქონლის გადმოზიდვა ქირდა.

გზა კიდევ არ იყო გაყვანილი. მართალია, რამდენიმე კილომეტრით გაეჭრა ის, მაგრამ ჯერ ბევრი უკლდა. გლეხები არ იყვნენ მოწადინებული. ზოგი აღმაცერადაც კი უცქერდა გზის გაყვანას. შიშობდნენ... მთავრობა ივლის ხშირად, მეტი გადასახადები იქნებაო. ამ აზრის გავრცელება ბნელი ძალებიდან გამოდიოდა.

— მთავრობას რომ თავის სასარგებლო საქმის გაკეთება არ უნდოდეს, მას რომ საკუთარი მიზანი არ ჰქონდეს, რატომ დახარჯავს იმდენ ფულს, რატომ გამოგზავნის ინჟინრებსა და ტექნიკებს, რატომ მოგვცემს იმდენ იარაღს და ასაფეთქებელ წამალს?— ჩაუგდებდა ლაპარაკში იუსუფ-ალა გლეხებს და სულსა და გულს მოუწამლავდა.

— მართლაც, რატომ ირჯება ასე მთავრობა?—ეკითხებოდნენ ზოგიერთები თავის თავს—რომელი მთავრობა ირჯებოდა ასე? სამი მთავრობა ახსოვდათ.

რუსეთის მეფის... თურქების... მენშევიკების...

ერთმანეთზე უარესები იყვნენ. მძარცველებივით შემოიჭრებოდნენ. ქურდულად დაესხმოდნენ თავს, ააფორიაჩებდნენ, ააწრობდნენ, მოხვეტდნენ, მოკრებდნენ, დაიტვირთებოდნენ და წაეიდოდნენ. კიდევ კარგი, რომ გზა არ ჰქონდათ და იშვიათად ამოივლიდნენ, თორემ სულ გამოსცლიდნენ სოფლებს.

ასე იცის საერთოდ მთავრობამ და ჯერ თუ არ დაუწყია ახალ მთავრობას, ეზარებათ მოსვლა, ცუდი გზაა და ამიტომ. მაგრამ ნახეთ, გამოიყვანონ გზა. ყოველდღე ამოვლენ გადასახადებისათვის.

ბევრი იზიარებდა ამ აზრს. ხოჯა ამზობს, ალლახის კაცი, — ტყუილი ხომ არ იქნებაო.

ამიტომ იყო, რომ ორქოფად ლაპარაკობდნენ კრებაზე, რომელზედაც გზის გაყვანის საკითხი იყო დასმული.

დროებით გადავდეთ ეს საკითხიო—ამბობდნენ ზოგიერთები. ჯერჯერობით რაც გვაქვს, იმას დავჯერდეთო.

თავმჯდომარეც მერყეობდა. მაგრამ ანდრომ გაიტანა. ახალგაზრდებმა დაუჭირეს მხარი. ნური ბერიძე გამოვიდა პირველად ანდროს მხარის დამჭერად. მურადი იმ დროს კიდევ ვერ გამოდიოდა კრებებზე.

ნურის სხვებიც აპყენენ.

— გზა გვინდა!

— განათლება გვინდა!

— ცხოვრება გვინდა!

ახმაურდნენ და შიიმხრეს უმეტესობა.

დაადგინეს, გასულიყვენენ სამუშაოდ უკლებლივ და თუ ვინმე უმიზეზოდ არ გავიდოდა, დაეჯარმებინათ.

მაინც ბევრი არ გავიდა. მარტო ახალგაზრდები და ხუთამდე ხნიერი გლეხი გამოვიდნენ დანიშნულ დღეს. ამათში ერთი მოხუცი მუჰამედ შეინდაძე. ის მეტად კმაყოფილი იყო ანდროსი მას შემდეგ, რაც ანდრომ დახმარება გაუწია. ექვსი ობოლი შეიღვიღვილი გადაუჩინა სიყვდილს. ლუკმა გაუჩინა და არსებობის საშუალება მისცა. ძროხაც აყიდივინა. საბჭოს დაადგენია, დახმარებოდა საქონლის ჰირისაგან დაზარალებულ გლეხს. შემდეგ მოხუცს მოელაპარაკა და ერთი უფროსი შეიღვიღვილი ბათუმს გაგზავნა შოფერობის შესასწავლად. ორი ადგილობრივ სკოლაში მიიბარებინა და დანარჩენებს ყოველთვიურად ეხმარებოდა. რომ ასეთი დახმარება არა, დაწყდებოდნენ უბედურები. აბა რა გააჩნდა საწყალ მოხუცს. ერთი შეიღვიღვილი ექვსი ობოლი დარჩა. ერთმანეთის წამოყენება არ შეეძლოთ. ექვსივე ვაჟები, ერთმანეთზე უკეთესები: მაგრამ ვინ არჩევს ასეთ დროს უკეთეს-უარესს!

— ბედზე მომისწრო მაგ ოჯახს შენებულმა—ამბობდა მოხუცი. უკეთესი არავინ ყავდა ქვეყანაზე, მის ქება-დიდებაში იყო.

— რომელ მთავრობასაც ასეთი ადამიანები ჰყავს, რომელი მთავრობაც ასე ზრუნავს ადამიანებზე, იმას როგორ ვეტყვი უარს რამეზე! წამიყვანოს, მამუშაოს, გადამახდევინოს, გამაკეთებინოს. ყველაფერზე თანახმა ვარ—ეუბნებოდა ის ყველას, ვინც რაიმე აუგს იტყოდა მთავრობაზე, ან ანდროზე, რომელიც ზოგიერთებისათვის არ იყო მაინცადამაინც მოსაწონი.

მუჰამედს მევლუდა კოვზაძე და თევრად ბალაძეც თანაუგრძნობდნენ სხვა გლეხებს გარდა. ამათი გულიც პირველი დღიდანვე მოეგო ანდროსს. მას შემდეგ, რაც ხოჯასა და მათ შო-

რის წყალის თაობაზე ატეხილი დავა სამართლიანად გადაწყვიტა და გლეხებს წყალი მიაკუთვნა.

— ეტყობა, მართლა მუშებისა და გლეხების ყოფილა ჩვენი მთავრობა.—ამბობდა მეველუდა კოეზაძე.

— თავიდან ეტყობოდა ანდროს. ხომ ნახე ვინ აიჩრია. ყველაზე ლატაკისას დასახლდა. მურადისას არავენ იკადრებდა ლამის გათევას. მაგან კი თვითონ აიჩრია.

— კაცი გახადა, ჩემო ძმაო, მურადი, მეტი რა გინდა! თურმე არ იყო დასაგლახებელი მაგ ბიჭი, ძალად ადელელებდნენ.

— ეს სულ იმ ხოჯის ბრალი იყო.

— კიდევ კარგი, მართლაც რომ არ გადელდა, ხომ იცი, ხოჯა ვისზედაც იტყოდა დელიაო, მართლაც დელდებოდა.

— ეჰ, ჩემო ძმაო, ხოჯას არც გადელება შეუძლია და არც მორჩენა.

ასეთი ლაპარაკი ხშირად ჰქონდათ სოფელში. ხშირად ახსენებდნენ ანდროს სახელს და ზოგიერთს ის მხსნელად ყავდა მიჩნეული.

ჰო, ახალგაზრდები და ის ხუთიოდე გლეხი გავიდნენ გზაზე სამუშაოდ. დანარჩენები მიიმალ-მოიმალნენ. ზოგმა ავადმყოფობა მოიგონა, ზოგმა ხელმარტობა. ანდრომ შეატყო, რომ ასე არაფერი გამოვიდოდა. საჭირო იყო ახლა სხვა ღონისძიებების მიღება და ნაბიჯიც გადადგა.

მოილაპარაკა ახალგაზრდებთან, საბჭოს ზოგიერთ წევრთან; ცოტა უსაყვედურა საბჭოს თავმჯდომარეს, მოაწვევინა ჯერ საბჭოს სხდომა, შემდეგ საერთო კრება და ახლა სულ სხვანაირად ალაპარაკდა.

— მართლა და ნურავინ იფიქრებს, რომ მთავრობა მზამზარეულად ჩაუდებს ყველას ლუქმას პირში. ნურც იმას იფიქრებს ვინმე, რომ მთავრობა მშრომელთა ინტერესების შელახვისათვის ვინმეს არ დასჯის. ყველაფერი, რაც შენდება და კეთდება, ჩვენი ხელებით უნდა გაკეთდეს. მთავრობა საჭიროდ სცნობს გზის გაყვანას, არხის გაჭრას, ხიდის გაკეთებას. ყველაფერი ეს კი მშრომელთა ინტერესებს ემსახურება. მამ ყველა უნდა გამოვიდეს სამუშაოდ. დიად ყველა. ვინც არ გამოვა, ვინც ჩვენი დადგენილების წინააღმდეგ წავა...—ანდრომ მოიხსენია ღონისძიებები.

არავის დავეროდებითო. ძალას მიემართავთო.

ჯარიმაც იქნება. იძულებითაც გაგიყვანთ. სხვა საშუალებებიც გვაქვს ხელისშემშლელებისა და მავნებლებისათვის.

ჩეკაც არ გამოჩენია.

მავნებლებსა და ხელისშემშლელებს იქ მოვარჯულებთ.

ახლა აღარ ლაპარაკობდა ანდრო ისე, როგორც პირველ კრებაზე, როცა გზის საკითხი პირველად დაისვა. ახლა ის ყველაშაგან კატეგორიულად მოითხოვდა სამუშაოდ გამოსვლას. ისინი, რომლებიც ვერ გამოვლენ, ხოჯა-მოლა ან კიდევ სხვები, გადაიხდინან ფულს მათი შრომის მაგივრად.

ყველას გაუკვირდა.

ასე თამამად ვინ გაბედავდა აღას წინააღმდეგ ხმის ამოღებას. ჩანს ძალას გრძნობს ზურგს უკან, თორემ...

ჩუმად ელიმებოდა ზოგიერთს. ერთმანეთს გადახედავდნენ...

იუსუფ-ალაც იყო ამ კრებაზე. მოშორებით ჩამომჯდარი უვლდება ყურს და გულში იგროვებდა შხამსა და ნაღველს. მას ვერ მოეწონებინა ანდროს არსებობა ამ სოფელში. ახლა ისე იყურებოდა მისკენ, როგორც მეტად საზიზღარ არსებისაკენ. უღვაშებს იცნებდა და მალიმალ ისწორებდა ყაბალახს თავზე. უნდოდა ვინმე შეეცდინა, თვალს უშვებოდა ხან ერთს, ხან მეორეს—გამოდით თქვით რამეო, მაგრამ ვერაინ ბედავდა საწინააღმდეგოდ გამოსვლას. ან რა სინდისით გამოსულიყვნენ. ესეც არ იყოს, რომ მართლაც მიმართოს ძალას ანდრომ!.. ბოლშევიკებმა ასეთ დროს ხუმრობა როდი იციან.

ისევ გაჩუმება სჯობია.

ასე ფიქრობდნენ ზოგიერთები. თავს იქნევდნენ თანხმობის ნიშნად.

გადაწყვეტილება მიიღეს. ყველა უნდა გასულიყო სამუშაოდ. ვინც არ გავიდოდა, ფულს გადაახდევინებდნენ და ამ ფულით მუშახელს დაიჭირებდნენ.

ახლა ბევრს აეწვა კული. მათ შორის იუსუფ-ალაც ვერ დააყენა კარგ ხასიათზე ამ გადაწყვეტილებამ. კიდევ მოიკენიტა უღვაშები და დაღონებული წავიდა სახლში.

გზის გაყვანა მაინც ვერ მოახერხეს. ბევრი დაბრკოლება გადაეღობა. მაზრამაც არ გაუწია შეპირებული დახმარება და ხალხსაც აუტრუვდა გული. ორი თვე იმუშავეს მხოლოდ და შემდეგ მიანებეს თავი.

ეს სწორედ მაშინ, როცა საგზაო მშენებლობის ნამდვილი სეზონი იყო.

კიდევ მოიწვია ანდრომ კრება. ჯერ ფრაქციის, შემდეგ ახლდაარსებულ კომკავშირის უჯრედის, მოელაპარაკა საბჭოს წევრებს და ბოლოს ისევ საერთო კრებაზე დააყენა საკითხი.

ისევ დაიწყეს კამათი, ისევ ილაპარაკეს, მაგრამ ახლა უფრო მეტი მომხრეები გამოჩნდნენ. ყოვპერატივის საკითხით დაინ-

ტერესებული გლეხები გზის გაყვანას სიამოვნებით უჭერდნენ მხარს, რადგან ესმოდათ, რომ კოოპერატივი უგზობის გამო ვერაფერს მოიტანდა და ამრიგად ისევ ჩარჩებისა და სპეკულანტიზის ხელში ჩაცვივდებოდნენ.

ამ საკითხმა ყველა დააინტერესა და მესამედ გადაწყვიტეს გზის მშენებლობის გაგრძელება. გამოყვეს ხელმძღვანელები, აირჩიეს მეთაურები. ანდროს ისევ მთავრობასთან მოლაპარაკება და დანხარების გამოთხოვნა დაავალეს.

მუშაობა ისევ გაჩაღდა. ანდრო პირადათ წავიდა საოლქო კომიტეტში, იქ მოელაპარაკა ხელმძღვანელ ამხანაგებს, მიიღო რაც საჭირო იყო და მალე დაბრუნდა. ახლა ადგილობრივ მცხოვრებლებს გარდა მოყვანილი მუშებიც მუშაობდნენ: სპეციალისტები, ქვის მბურღავები, გამოცდილი მენაღმეები, დურგლები და ზეინკლები. მოსულებს ახალი იერი მოეტანათ, მუშური სული და გული. მუშაობის შემდეგ ისინი პართავდნენ ცეკვა-თამაშს, მღეროდნენ, უკრავდნენ ჩონგურსა და გარმონს, ხუმრობდნენ, იცინოდნენ და ახმაურებდნენ საუკუნეების განმავლობაში მძინარე ხეობებს.

— ახლაც აღარ დაიჯერებთ, რომ მთავრობას ეს ფაზა მისთვის, თავის ხალხისათვის, გააურებისათვის უნდა?—ჩაულაპარაკა იუსუფ-ალამ ერთ დღეს მის მეზობლად მდგომ გლეხს, რომელმაც გზის მშენებლობის მდგომარეობის შესახებ უკანასკნელი ცნობები მოახსენა.

— ელბეთ მასეა, იუსუფ-ალა, მეც მასე მგონია. ჯუსები და ქართველებიც მოუყვანიათ.

— გვაბეჩებენ, ზექერიავ, გვაბეჩებენ. — და ცოტა ხნის შემდეგ მისკენ გადაიხარა.—ჩვენ კიდევ იმათ ვეხმარებთ. თვალდახუჭული ვართ. ხმას არ ვიღებთ.

— ჩვენ რა შეგვიძლია იუსუფ-ალა! მეთაურები არაფერს ამბობთ, ჩვენ თქვენ გიჯერებდით ყოველთვის.

— მაგრამ ახლა აღარ გვიჯერებთ!—საყვედურით შეხედა ალამ.

— რატომ არ გვიჯერებთ! თუ კი რამეს გვეტყვი, ვალლაი და ბილლაი, დაგიჯერებთ!

ალამ მხარზე დაჰკრა ხელი და ჩუმად უთხრა:

— კიდევ გყავს ვინმე?

ზექერიამ მიიხედ-მოიხედა.

— ყველა შენთან იქნება, თუ კი გვიბრძანებ!—და რამდენიმე სახელი ჩუმად ჩასჩურჩულა.

— საჭიროა მაგ გაიურის მოცილება თავიდან. შემდეგ ყველაფერი რიგზე იქნება. გესმის? ანდროს მოცილებაა საჭირო.

— არავის არ უყვარს, მაგრამ ყველას იმორჩილებს.— გულ-
დაწყვეტით ჩაილაპარაკა ზექერიამ.

— ჯადო აქვს, ჯადო! თურმე ქალებს აჯადოებს, რამდენი
ქალი გაუტყუენია! დელი მურადასას იმიტომ დასახლდა, რომ ნაო-
ლე მოსწონებია.

— მერე ვინ იცის, იქნებ კიდევაც...— არ დაასრულა სიტყვა
ზექერიამ.

— მაშ, მაშ... შეუცდენია. იმიტომ დანიშნა დუქანში მურა-
და, თორემ დელი მურადას ვინ ენდობა... !

— ჰაი, ჰაი, ჰაი, რამდენი ბოროტება ხდება მოფარებულში!
— სთქვა ზექერიამ და აღას შეხედა.

იმ საღამოს ხოჯა მამულისას კიდევ მოილაპარაკეს რალა-
ცებზე და გეგმები შეადგინეს. ამ მოლაპარაკებას მოლა ნური
ესწრებოდა და მასთან ერთი უცნობიც.

III

კომკავშირის კრება თავის ბინაზე მოიწვია ანდრომ. შეიდი
ახალგაზრდა გამოცხადდა. ეს იყო მთელი შემადგენლობა. ჯერ
არც ერთ მათგანს მანდატი არ ჰქონდა, მაგრამ ანდროს მითითე-
ბით ყოველგვარ დავალებებს ასრულებდნენ.

მასწავლებელი სერგო ლომაძე ასწავლიდა ამათ წერა-კით-
ხვას, ანგარიშს, პოლიტიკურ წიგნებსაც უკითხავდა და ხშირად
საუბრობდა მათთან ყოფა-ცხოვრების საკითხებზე. პირადათ მისცა
ანდრომ ლომაძეს ეს დავალება. არდადეგებზედაც არ გაუშვია
შვებულებაში. გასამრჯელოს ანაზღაურება შეპირდა და მთელი
ზაფხული თან იყოლია.

ამ ღონისძიებებმა კარგი შედეგი გამოიღო: ბიჭებმა ისწავლეს
წერა-კითხვა, გაიცნეს ავკარგი და დღეს ანდროს გვერდით რამდენ-
იმე მომზადებული ახალგაზრდა იდგა.

კრებებიც ცოცხლად ტარდებოდა. თათბირებიც წესიერად.
მოწონებაც იცოდნენ, დაწუნებაც... დღითიდღე იზრდებოდა ახა-
ლი თაობა და ცოდნა-გამოცდილებით ივსებოდა.

მღივიანმა გახსნა კრება. ის საკმაოდ გამოწაფულიყო უკვე.
დღის წესრიგი გააცნო ამხანაგებს და მოხსენებისთვის ანდროს
ნისცა სიტყვა.

მომავალ სასწავლო წლის მზადების საკითხი იდგა და ამ
საგანზე ილაპარაკა ანდრომ; მაგრამ შივადანშიგ ჩაურთო ამბები

ყოფაცხოვრებიდან. აღნიშნა, რომ კომკავშირმა უნდა ებრძოლოს ყველა ისეთ მოვლენას, რომელიც ხელს უშლის ცხოვრების წესიერად და კულტურულად მოწყობის საქმეს.

მოიყვანა მაგალითები: პატარა ქვესერის უღროოდ გათხოვება, რომელსაც ბავშვის გაქცევა მოჰყვა და შემდეგ კიდევ რამდენიმე აურზაური. სანამ ექიმი არ მოიწვია ანდრომ და არ დაამტკიცა, რომ ბავშვი სქესობრივად მომწიფებული არ იყო, მანამ ბავშვის მშობლები და ქმარიც დაჟინებით მოითხოვდნენ ბავშვის ქმართან დაბრუნებას. ბოლოს, როცა ექიმსაც არ უჯერებდნენ, ანდრომ წინადადება მისცა საბჭოს თავმჯდომარეს დაეპატიმრებინა როგორც ქმარი, ისე ბავშვის მშობლები და გადაეგზავნა მაზრაში. ასეც მოხდებოდა, მაგრამ შემდეგ ჩაღვნენ შუაქაცები, სთხოვეს ანდროს დათმობა.

ხელწერილი ჩამოართვა საბჭომ ორივე მხარეს, რომ ბავშვი სანამ სქესობრივად არ დასრულდებოდა, ქმრისათვის არ გაეტანებინათ, ხოლო თუ ბავშვი გაზრდის შემდეგ უარს იტყვოდა იმ საქმროზე, რომელსაც ის მიაკუთვნეს მისმა მშობლებმა, წინააღმდეგობა არ გაეწიათ.

მეორე მაგალითი. ენვერის ამბავი. თორმეტი წლის ბავშვი დაცოლიანდა! ეს ბავშვი ანდროსთან მოვიდა შველისათვის. ამ საქმეზედაც ატყდა ამბავი. ბავშვის მამა თავისას გაიძახოდა. არ უნდოდა დაეშალა ეს საქმე, მაგრამ აქაც საბჭოთა კანონები იქნა გამოყენებული და როცა საქმემ სერიოზული სახე მიიღო, ენვერის მამაც მოტყდა და პატიება ითხოვა.

— კიდევ არის, ამხანაგებო, მაგალითები, მაგრამ ჯერ აქ არ გავაშხელ, შეიძლება ისედაც მოგვარდეს — თქვა ანდრომ და ნური ბერაძისაკენ გაიხედა.

ნურის ყურები აეწვა. მიხვდა, რომ ამ უცხო კაცს არამც თუ მომხდარი ფაქტები გაუგია, არამედ განზრახული ამბებიც სცოდნია.

— კი მაგრამ, მანქაკლისა და მშობლების ჩაურეულებად როგორ უნდა დაოჯახდეს კაცი? — იკითხა ერთმა ახალგაზრდამ და ამხანაგებს გადახედა.

ყველამ ერთად შეხედა ანდროს.

გაუჭირდა ანდროს პასუხის გაცემა. მართლაც, ერთი დარტყმით ხომ არ შეიძლებოდა ძველი ზნე-ჩვეულების აღმოფხვრა, ქალებისა და მამაკაცების ერთად გამოყვანა. ამას მომზადება სჭიროდა, სწავლა-განათლების შემოტანა, ახსნა-განმარტებითი მუშაობის ჩატარება. ამისთვის კი დრო იყო საჭირო და არც ისე პატარა დრო.

ახალგაზრდები კი ახლავე მოითხოვდნენ პასუხს. პირში მის-
ჩერებოდნენ მომხსენებელს.

— მართალია, ძნელი გადასაქრელია, ამხანაგებო, ეს საკით-
ხი,—დაიწყო ანდრომ,—მაგრამ არც ისე, რომ ჩვენ ვერ შევძლოთ
მისი გადაჭრა. ჩვენ წარმოვადგენთ ამ სოფლის მოწინავე ადამიან-
ებს და ჩვენ უნდა მივცეთ მაგალითი. მოვიყვანოთ ჩვენს რიგებ-
ში ქალები, ქალიშვილები, ჩავაბათ მუშაობაში და თანდათანობით
ყველაფერი შეიცვლება.

— ჩვენი ქალები ჯიუტებია—ჩაილაპარაკა ერთმა.

კაცებთან კრებაზე როგორ მოვლენ ჩვენი ქალიშვილები!—
დაუმატა მეორემ.

— რატომ არ უნდა მოვიდეს—გაკვირვებით იკითხა მურად-
მა.— თუ ვეტყვით, კიდევაც მოვლენ — მიიხედავიან და თანდათან,
შემდეგ ანდროს შეხედა და წამოდგა.

— შეიძლება გარეშე დაესწროს ჩვენს კრებას?—კითხა მან.

— ვისზე ლაპარაკობ?—იქ მყოფთ გადახედა ანდრომ.

— ნაილეს თუ აქვს უფლება დაესწროს მეთქი?—იკითხა
მურადმა.

— ნაილე... თუ სურვილი აქვს...—კიდევ უნდოდა რაღაც
ეთქვა ანდროს, მაგრამ მურადი უკვე გასულიყო.

ახალგაზრდებმა ერთმანეთს გადახედეს ვერ წარმოედგინათ,
როგორ შემოვიდოდა ნაილე კრებაზე, სადაც მხოლოდ მამაკაცები
იყვნენ. რას იტყოდა, ან როგორ მოიქცეოდა. მოუთმენლად ელოდ-
ნენ კარების გაღებას და ნაილეს გამოჩენას. და როდესაც ახალ-
გაზრდა ქალის მომღიმარი სახე დაინახეს, თვალები გაუშტერდათ.

— გამარჯობათ!—და ნაილე მოშორებით ჩამოჯდა ტახტზე.

პასუხის გაცემა ვერაინ მოახერხა.

— გაიცანი ნაილე ამხანაგები!—მიმართა ანდრომ, ვინაიდან
შეატყო, რომ მურადს ასე სურდა.

ნაილემ გაიღიმა.

— ყველას ვიცნობ, უცხოები ხომ არ არიან... ბოხრიკებს
ვამოვებდი მაგათთან—წამოდგა, ჩამოიარა და სათითაოდ ჩამოარ-
თვა ხელი.

ამ მოქმედებამ სავსებით შესცვალა განწყობილება ახალ-
გაზრდებში. თითქოს რამდენიმე წუთი დასკირდათ, რომ გაერკვი-
ათ მდგომარეობა. ნაილეს ყველა მათგანი იცნობდა ბავშვობისას,
ლამაზი იყო, ეშხიანი და ცქრილა, მაგრამ აგერ ოთხი წელია მისი
სახე არავის დაუნახავს. ნათესავი ქალებიდან ესმოდათ ამ ჭოგოს
ქება, მისი ეშხი და სიღარბაისლე. ბევრჯერ გაუეღიათ გულში

მისი სახის დანახვა, რამდენჯერ დადარაჯებიან მოსახვევეში, იქნებ პირახდილმა ჩამოიაროსო, მაგრამ თვალი ვერ მოუქრავთ.

ახლა კი ასე თავისუფლად შემოსვლა, ხელის ჩამორთმევა, დალაპარაკება და მათთან ერთად დაჯდომა, ხომ მთელი ბედნიერება იყო!

— განვაგრძოთ, ამხანაგებო, კრება—და ანდრომ ნაილეს შეხედა.—დღეიდან ჩვენთან ამხანაგი ნაილეც იქნება. ჩვენ კიდევ უნდა მოვიზიდოთ ასეთი ამხანაგები და ჩვენი მუშაობაც უფრო გავამრავალფეროვანოთ.

— ვის უნდა, ამხანაგებო, აზრი გამოსთქვას მოხსენების გარშემო.—ახალგაზრდა თავმჯდომარემ გადახედა ამხანაგებს.

ნურიმ დაიწყო პირველად. ის ყველაფერში ეთანხმებოდა მომხსენებელს; რალაცა უნდოდა თავის თავზედაც ეთქვა, მაგრამ გაუბედობა ემჩნეოდა. ხშირად გაიხედავდა ნაილესაკენ. ის ჟღერე მიმხედარი იყო საიდუმლოებას. ანდროს ნაილე ეტყოდა ყველაფერსო—ამბობდა თვის გულში. ცეცხლი ედებოდა. ენანებოდა ბავშვობისას მისი სურვილის გარეშე დანიშნულის დაკარგვა. მალე დაამთავრა სიტყვა, დაჯდა და თავის ფიქრებს დაუბრუნდა. ისევ ნაზიმე დადგა მის თვალწინ... უყვარს ნაზიმე! უყვარს სულითა და გულით და რადგან ამ სიყვარულს საფუძვლად უძევს ადრინდელი სიტყვა, რომელიც მშობლებს დაუდევიათ ერთმანეთს შორის, რატომ უნდა გატყდეს ის სიტყვა ან ეს სიყვარული!—ასე უნდოდა ეთქვა ანდროსათვის, მაგრამ ვერ გაბედა.

ანდრომ თავმჯდომარეს გადაუჩურჩულა და ნაილესაკენ გაიხედა. ახალგაზრდა თავმჯდომარე უხერხულ მდგომარეობაში ჩავარდა. რამდენჯერ მიაბრუნ-მოაბრუნა ენა პირში, ვერაფერი თქვა.

ისევ ანდროს წაართვა წუთით მოვალეობა და იქ მყოფთ მიმართა:

— ახლა ამხანაგებო, ნაილე გვეტყვის თავის აზრს და მოვეუსმინოთ—გადახედა ნაილეს.

ახალგაზრდებს საბაბი მიეცათ. რამდენიმე თვალი მიაჩერდა ქალიშვილს.

ნაილემ დაიმორცხვა პირველად, ხელები გადაიტანა ერთი ადგილიდან მეორეზე, თავი ჩალუნა და წუთით თავის მდგომარეობას ჩაუქვირდა.

— სიტყვა ამხანაგ ნაილეს ეკუთვნის—გაბედა ახლა თავმჯდომარემ და ნაილეზე მეტი სიმორცხვე დაეტყო.

— რა უნდა ეთქვა—თავისთვის ჩაილაპარაკა ნაილემ. შემდეგ წამოდგა და იქ მყოფთ გადახედა.

— რაც აქ თქვეს, ყველაფერი მართალია, — დაიწყო მან, — ძალიან ბევრ ქალს ათხოვებენ ჩვენში მისი სურვილის გარეშე, ძალად ატანენ ქმარს. ქალიშვილები რომ ისე თავისუფალი იყვნენ ჩვენშიაც, როგორც სხვაგან არის, — კარგია.

ველარ მოახერხა სიტყვის გაგრძელება, აღელდა. ცოტა შეისვენა. რამდენჯერმე მოისუნთქა ღონივრად და ოდნავ შეიკავა მღელვარებაც.

— მეტი რა უნდა ვთქვა — თვალეზზე აიფარა ხელები და დაჯდა. ანდრომ რამდენიმე შეკითხვა მისცა ნაილეს.

ეს შეკითხვა ეხებოდა მის დამოკიდებულებას ახალდაარსებულ კომკავშირის ორგანიზაციასთან. ჰქონდა თუ არა სურვილი ემუშაენა ამ ამხანაგებთან ერთად და შეასრულებდა თუ არა ყველამ დავალებებს, რომლებსაც მას ორგანიზაცია დააკისრებდა.

ნაილემ დადებითად უპასუხა. უფრო მეტიც: ორ გოგონას კიდევ მოვიყვანო, სახელები მოიხსენია — ნაზიმე და ფიქრიე.

— ორივეს სურვილი აქვს ჩვენთან მუშაობის. მე ველაპარაკე მათ. თუ კი მიიღებთ... — გადახედა ნურის, რომელიც თავჩალუნული იჯდა.

ახალგაზრდებმა გაკვირვებით გადახედეს ერთმანეთს. ნურიმ უფრო დასწია თავი დაბლა და ყაბალახის სწორება დაიწყო.

— სიამოვნებით მივიღებთ. რას იტყვით ამხანაგებო თქვენ? — მიმართა ახალგაზრდებს ანდრომ.

წუთით ყველა გაილურსა.

— თუ სხვაც მოიყვანს თავის დას... — ჩაილაპარაკა ნურიმ.

ანდრო ახლა მიხვდა, რომ დასახელებულ ქალიშვილთაგან ერთი ნურის და იყო. და ეს ერთი უსათუოდ ფიქრიე იქნებოდა, ვინაიდან ნაზიმესა და ნურის შესახებ ყველაფერი უკვე იცოდა მან. ნაზიმეს პირადადაც იცნობდა. ნაილემ გააცნო ერთხელ ჩუმად. არა, ჩუმად კი არა, მურადიც იქ იყო, მაგრამ ნაზიმეს შინაურებმა არ იცოდნენ ეს ამბავი; ისე მოუწყო ეს შეხვედრა ნაილემ ამხანაგს, რომ როცა ის უცხო კაცს წარუდგინა, ნაზიმეს სახეზე ჩამოფარებისა და გაქცევის საშუალებაც არ შესწევდა. ის დაეთანხმა ნაილეს, წუთით დაივიწყა, რომ სარწმუნოება მამაკაცთან შეხვედრას უკრძალავს, დაავიწყდა ხოჯის სიტყვებიც, ჰავშეობისას მედრესეში განაგონი და გაზეპირებული, და ამ თავდავიწყების დროს ანდროსა და მურადს ხელი ჩამოართვა.

დაირღვა, რაც დასარღვევი იყო. „ცოდვაც“ მოხდა უკვე; სჯულიც შეირყა, ადათიც და აწი უკან დახევა უნაყოფო იყო. ისევ ბოლომდე უნდა ეელო ამ გზით. მეტი გამოსავალი აღარ იყო. ამ გზას უნდა ეხსნა ან დაეღუპა. და ნაზიმემაც ეს გზა აირჩია.

მოუყვა ყველაფერი. დაწვრილებით უამბო მშობლების დამოკიდებულება სასიძოსა და მის ოჯახთან. ისიც უთხრა, თუ როგორ მძუჭებოდა მამა უარის თქმისათვის.

არაფერი დაუმალავს;

— მასზე მითხოვებას სიკვდილი მირჩევნია—აქვითინდა და ნაილეს ჩაეკრა მკერდში.

ანდრო მას შეპირდა დახმარება. სიტყვა მისცა, რომ სურვილის გარეშე წაყვანის ნებას არავის მიწცემდა. მით უმეტეს ნური ბერაძეს, რომელიც კომკავშირის რიგებში დგება, სწავლას ეტანება და ახალი ცხოვრებისაკენ მიილტვის.

კრებაზედაც ამ საკითხისაკენ იყო მიქცეული მთავარი ყურადღება. თეატრის, საავადმყოფოსა და კიდევ მრავალი კულტურული დაწესებულების დაარსებისა და გახსნის გარდა, საჭიროა ყოფაცხოვრების გარდაქმნა-მოწესრიგება.

ეს აზრი გაატარა ანდრომ. ამის გარშემო ილაპარაკეს სხვებმაც. გამოსული ახალგაზრდებიც ბევრ კარგ აზრს გამოსთქვამდნენ, მშვენიერ სურვილებს. ქალისა და კაცის თანასწორობას აღიარებდნენ. თანასწორ მონაწილეობის მიღებას ავალებდნენ ქალებსაც ყოველგვარ საქმეში, მაგრამ როცა საკითხი პირადად და ცალკე მათ შეეხო, ერთმანეთს გადახედეს.

— ჯერ სხვამ მოიყვანოს თავისი და—ჩაილაპარაკა ნურიმ თავისთვის.

— ზეჟიაც ჩაეწერება, რა უშავს!—ყაისაძეს გადახედა ნაილემ.

ყაისაძემ მიიხედ-მოიხედა, უხერხულობა იგრძნო. უნდოდა ეთქვა, შენი საქმე არაა ჩემი დის შესახებ ლაპარაკიო, მაგრამ ეს ზედმეტი იქნებოდა. ვერ გაბედა ხმის ამოღება და ისევ გაჩუმება არჩია.

— კარგი, ამხანაგებო,—გამოიყვანა უხერხულობიდან ანდრომ შემკრთალი ახალგაზრდები,—ჯერჯერობით ნაილე მივიღოთ, ვასწავლოთ, აღვზარდოთ, დავაწინაუროთ და შემდეგ სხვები თავისით მოვლენ. ვინც ღირსია მივიღებთ, ქალები იქნებიან ისინი თუ ვაჟები, ჩვენთვის სულერთია. ძალას არავის დავატანთ, არც კარებს ჩავუკეტავთ ვინმეს, მხოლოდ...

და ანდრომ კიდევ მოაგონა ამხანაგებს დისციპლინა, რომელიც კომუნისტურ პარტიას და კომკავშირს აქვთ; სიფხიზლე, გამბედაობა, ცოდნა; თავაზიანობა, პატიოსნება და თავმდაბლობა, რომელიც ყველა ბოლშევიკს უნდა ჰქონდეს და ახასიათებდეს.

ახალგაზრდებმა თავისუფლად ამოისუნთქეს, თითქოს ვეებერთელა ტვირთი მოაცილა მათ ანდროს სიტყვებმა.

თორემ...

შეიძლება მეორეთ აღარც მოსულიყვნენ ასეთ კრებაზე; როგორ შეიძლება გასათხოვარი და მოიყვანო აქ და ალაპარაკო უცხო კაცებში, ვინ დაანებებს. თვითონაც ძლივს ახეწხებენ სახლიდან გამოპარვას. სათანაირ მიზეზს იგონებენ, კრებაზე წასვლა რომ უნდათ. ვინ იცის რა მოხდება რომ გაიგონ, „გიაურები“ უნდა გახდნენ მათი შეილები. ღმერთი არ იწამონ, ჯამეში არ იარონ, არ ილოცონ და მარხვა არ შეინახონ.

ქვეყანას შესძრავენ. ძილში გამოლადრავენ შეილებს ყელს. რედს გაუკეთებენ, დასწყევლიან და მოიშორებენ თავიდან.

მართლა ცუდი ამბავი მოყვება ამას, მაგრამ...

მაგრამ რალაც რომ მაინც მიმზიდველია აქ! თითქო გიხარია, რომ ასე აკრიტიკებენ, მიწასთან ასწორებენ სარწმუნოებას, სჯულს, ყურანს, ღმერთსაც... გელიმება, რომ ასე უსუსური ყოფილა ყველაფერი ის, რაც ყველაფერზე ძლიერი გეგონა. გწყინს და გიხარია. გწყინს—რად ყოფილხარ ასე უგუნური ამდენხანს. გიხარია, რომ ქეშმარიტება გაიგე.

ახალგაზრდები ებრძვიან თავიანთ ორეულს.

რასაც ანდრო ამბობს,—სწორია. რასაც ის აკეთებს,—სწორია, მაგრამ... კარგი იქნებოდა, ყველა რომ ანდროს აზრისა იყოს.

კიდევ კარგი, რომ სავალდებულო არ გახდა ქალების ჩაწერაც, თორემ... ზოგიერთებს დიდი სურვილი აქვთ ამ მუჰაობას, მაგრამ თავს მიანებებდნენ... ყველას ხომ არ შეუძლია მურადივით გამოიყვანოს საკუთარი და, პირზე ახადოს და კაცებთან ალაპარაკოს.

ფუ!

მაგრამ რა ლამაზია ის გოგო. როგორ უხდებოდა ლაპარაკი, რა შეენოდა ახალმოდანზე შეკერილი ტანსაცმელი!

დას ვინ გამოიყვანს ასე! სირცხვილია, უნამუსობაა.

მაგრამ... რა კარგია, როცა ქალიც არის კრებაზე. ნეტავ ყველას ყავდეს ასეთი და, ყველა პირახდილი დადიოდეს.

ორი ერთიმეორის საწინააღმდეგო აზრი იბრძვის თვითეულის თავში. თითქო ახლა იწყება მათი გადახარშვის პროცესი. ტვინში რალაცა დულს. შიგ აწყვია ყველაფერი, რაც ადამიანს გა-

აჩნია. ერთმანეთშია არეული ძველი და ახალი. დუღილის დროს ებრძვიან ერთმანეთს, ეჯახებიან, იმტერევიან, მთელდებიან. ხელ-ახლა იმტერევიან და ამ ბრძოლასა და დუღილში თანდათან ყალიბდებიან.

კრება გვიან დაიხურა...

ბევრი საკითხი გაარჩიეს კიდევ. კოოპერატივზეც ილაპარაკეს და ზოგი რამ მურადსაც დაუწუნეს. ცოტა გაქვს საქონელიო, უსაყვედურეს. თუმცა მურადი აქ არაფერ შუაში იყო. ის კოოპერატივის გამგეობის ღირებულებებს ასრულებდა, მაგრამ მაინც უკბინა ამხანაგების შენიშენებმა.

უპასუხა ფრთხილად და ზომიერად, გულში კი გაიფიქრა, უმადურები არიან, არაფერს დაგიფასებენო.

როცა ყველანი წავიდ-წამოვიდნენ და ანდრო მარტო დარჩა, მურადი შემოვიდა და უთხრა, რომ მასთან მოლაპარაკება სურს ნური ბერაძეს.

— შემოვიდეს.—უთხრა ანდრომ.

ცოტა ხანს შემდეგ ნური შემოვიდა. მას მღელვარება ემჩნეოდა. ეტყობოდა, რომ რაღაც ნაღველი მოსწოლოდა მის გულს. კრებაზე ის უფრო თამამად და გაბედულად იყო, ვინემ ახლა. ყაბალახი თვალებამდე ჩამოეხურა.

— დაჯექი, ამხანაგო ნური.—ხელი მოკიდა მკლავში ანდრომ და ტახტზე დააჯინა—კარგი კრება ჩავატარეთ, რას იტყვი?

— კარგი იყო.

— თანდათან გავიზრდებით, ამხანაგო ნური, ვისწავლით. გამოვიწაფებით. ჩვენს თვალწინ სანეტარო ქვეყანაა გადაშლილი, ბედნიერი ქვეყანა. ჩვენი ახალგაზრდობა უბედნიერესი თაობაა დედამიწის ზურგზე... უცებ შესცვალა ლაპარაკის კილო.

— რას იტყვი ნური, რომ გაგიშვათ, არ წახვალ სასწავლებელში?

ნურიმ გაკვირვებით შეხედა და ყაბალახიც აიწია თვალებიდან.

— მე?

— ჰო, სწავლის სურვილი თუ გაქვს?

— სურვილი... სურვილი ვის არ აქვს, მაგრამ...

— რა გიშლს ხელს?—ანდრომ პაპიროსი ამოიღო, ნურისაც მიაწოდა და თვითონაც მოუკიდა.

— ოჯახი, მოხუცი მშობლები მყავს. ჩემს მეტი შვილი არა ყავთ. ვინ უნდა იმუშაოს.—ნაღველიანად უპასუხა ნურიმ.

— მაგას ჩვენ მოვავგარებთ. შენ ის მითხარი, სურვილი თუ

გაქვს ისწავლო?.. ხომ ხედავ, ჩვენში ყველა სწავლისაკენ მიილტვის.

ნური რამდენიმე წუთით დაფიქრდა, მაგრამ ეს ფიქრი ანდრომ არ დააცალა.

— დაოჯახებული ხომ არ ხარ? ცოლი თუ გყავს, ან დანიშნული? ან ახლო ხანში თუ ეპირები დაოჯახებხარ?—გამოცდილი თვალებით დააქვერდა ის.

თითქო ამ შეკითხვას ელოდებოდა ნური, წამოდგა, თავზე მეთათვეჯერ გაისწორა ყაბალახი და ანდროს შეხედა.

— ცოლიანი არ ვარ, მაგრამ...

— დანიშნული ხარ?

ნურის შერცხვა. ხელებზე დაიხედა და თითები აათამაშა.

— ყველაფერი იცი... ჩემზე კარგად გაქვს გაგებული და მითხარი. მითხარი როგორ მოვიქცე. შენ ხომ ჩვენი მასწავლებელი ხარ...

ანდრომ საათს დახედა.

— დაჯექი,—მკლავზე მოკიდა ხელი, თავად დაჯდა და ნურიც გვერდით მოისვა.

— გაგებული მაქვს, მაგრამ კარგად არ ვიცი, მგონია, შენს მშობლებს ძუძუმწოვარა ბავშვი დაუნიშნაეთ შენთვის. ასეა?

— კი.—უპასუხა ნურიმ.

— ახლა კი...—სახეზე დაუკვირდა ნურის, ვერ უთხრა პირდაპირ, რაც უნდოდა ეთქვა... პაპიროსი გააბოლა და ამით მოიგო რამდენიმე წამი.

— გოგო ამბობს უარს...—ანდროს სათქმელი თვით ნურიმ სთქვა. კედელს მოაველო თვალები და ერთ ადგილს რალაც წერტილს მიაჩერდა.

— ესეც მითხრეს... შენ როგორ ფიქრობ მოიქცე?

— მე...—კარგახანს ეძება საპასუხო სიტყვა ნურიმ.

— გინდა შეირთო?—ალარ ადროვა მოფიქრება ანდრომ.

— მე... მე მიყვარს. ბავშვობიდანვე მიყვარდა. ჯერ კიდევ ათი წლის არ იყო, რომ შემეყვარდა. მერე გავიგე, რომ ჩემს სახელზე ყოფილა დანიშნული. მოსვენება დამეკარგა. მინდოდა მალე გასულიყვნენ დღეები, მალე გაზრდილიყო...—და ნურიმ ყველაფერი დაწვრილებით მოყვა.

ადრე მჭიდვდება ქალი აქეთ. თორმეტი წლისას ათხოვებენ. ვაჟები უფრო გვიან გამოდიან ცხოვრებაში. ცოლის შერთვა როდი ეადვილება ყველას. ამისათვის ქონებაა საჭირო. ქალის მშობლებსაც სჭირდებათ მისატანი. ისე ვინ მოგცემს წაღს. ეს მი-

სატანი კი ყველას არა აქვს. ღარიბი უცოლოდ მოხუცდება ან ვინმეს მახინჯს მოიყვანს.

თუ ბავშვობაში არ იცნობ, თუ ადრე არ დაიბეკებ, მერმე გვიან იქნება. ამიტომაა, სანამ ჩადრს ჩააცმევენ გოგონებს, საცოლო ყმაწვილები სამწყესურში ხვდებიან და ათვალეირებენ მათ, ელაპარაკებიან, საჩუქრებს აძლევენ. თუ მოეწონათ, თყალს დაადგამენ და მშობლებს დაუწყებენ მოციქულების გზავნას.

შემდეგ შეიქნება ვაქრობა და ამ ვაქრობის დროს საპატარძლოსაც გამოიწვევენ სამწყესურიდან, მოაცილებენ თავისუფალ ცხოვრებას, ამხანაგებს, შემოსავენ ჩადრით და დაუმალავენ სახეს. შემდეგ დიდი ცდაა საქირო, რომ სახე დაინახო, ან გაელაპარაკო

ნური კი ერთხელ შეხვდა პირისპირ ნაზიმეს, დაელაპარაკა. შემომხედდო უთხრა, მაგრამ ნაზიმემ უფრო დაიფარა სახე, უფრო აუჩქარა ნაბიჯს და მის შემდეგ სულ სხვა შეხედულებისაა მასზე. როგორც ჩანს, არ მოეწონა ნურის საქციელი.

იქნებ სხვა მიზეზებიც იყოს, მაგრამ ნურიმ არაფერი იცის.

ანდრომ მოუსმინა. დარიგება მისცა, ურჩია, როგორ მოქცეულიყო. დახმარებაც შეპირდა.

ისე კი ყველაფერს აჯობებს, თუ ნური სასწავლებელში წავა. ისწავლის, გადახედავს ქვეყანას, გაიგებს ცხოვრებას და შემდეგ დაოჯახდება. ვინ იცის, იქნებ ნაზიმესაც გამოეცვალოს ხასიათი, ანდა, გამოჩნდეს უკეთესი ქალი, რომელიც შეუყვარდება... ჯერ მთელი წლებია წინ... სწავლა კი საქიროა ახლაც დაიწყოს. ნასწავლი ადამიანები ყველაზე საქირონი არიან ჩვენთვის...

ანდროს სიტყვებმა თანდათან მოინადირეს ნურის გული. ის ახლა აღარ ღელავდა ისე. უფროდაუფრო ურიგდებოდა იმ აზრს, რომ ნაზიმე მისი არ გახდება, მაგრამ ეს არც ისე დიდი უბედურებაა, შესაძლებელია უკეთესი ქალიც შეირთოს, მართლაც, მომავალი წინაა და როგორც ანდრო ამბობს, სახელოვანი კაციც გამოვიდეს შეიძლება.

ცოტა ხანს სდუმდა ნური, ემზადებოდა გადაწყვეტილების გამოსატანად. თავის გულში აკეთებდა დასკვნებს, ბოლოს, თითქოს დიდი ტვირთი მოიშორაო, მაგრამ ამოითქვა სული და ანდროს შეხედა.

— ვისწავლი. — გადაქრით სთქვა მან. — ვისწავლი, თუ კი ჩემს ოჯახს რამე დახმარებას გაუწევენ. ვინ გამგზავნის სასწავლებელში?

— საბჭო. ხვალ დილით შემოიარე, დაგიწერო ქალაქს,

ბათუმში წახვალ, იმ ქალაქს წარადგენ და მოგაწყობენ. მაშ ასე, ყოჩაღად იყავი.—კიდევ დახედა საათს.—კარგა ხანი გასულა. ნახვამდის.—ხელი გაუწოდა და კარებამდე მიაცილა.

ნური სწრაფად გავიდა, ჩქარი ნაბიჯით გაიარა ეზო და შუკაში მიიმალა.

— წავიდა?—ფრთხილად იკითხა მურადმა, როცა ანდრო მარტო დაინახა.

— წავიდა.—მიუგო ანდრომ.—შენ კიდევ არ გძინავს?

— რა დამაძინებს... მინდოდა გამეგო, რას იტყოდა ნური იმის შესახებ.

— ვის შესახებ?—ვითომც არ მიმხვდარა ანდრო.

— იმ გოგოზე... ძალიან კი უყვარს. რომ არ წამომყვეს, მოვიტაცებო, ან თავს მოვიკლავო. სულელია. ქალისათვის თავს როგორ მოიკლავს კაცი! თუ ქალს არ უნდოვარ, არც მე ვინდომებ.

— მართალია. თუ ორივეს თანხმობა არაა, ისე არ ღირს შეერთება. ნური კი დათანხმდა წავიდეს სასწავლებელში. მე ვურჩიე. ეს ამბავიც გადაავიწყდება და ზწავლასაც შეიძენს. რას იტყვი?

კარგია, კარგი... მაგრამ...

— მაგრამ?

— მეც მინდოდა წავსულიყავი. კოოპერატივში მუშაობას სწავლა მირჩევნია.—და ღიმილით შეხედა ანდროს.

— მართლა?—გაიცინა ანდრომ.—ჯერ ვერსად ვერ გაგიშვებთ, ამხანაგო მურად. ჯერ აქ ხარ საჭირო და ისე კი, რასაკვირველია, უსწავლელს არ დაგტოვებთ.—მხარზე დაქკრა ხელი და ალერსიანი ღიმილით გაისტუმრა.



ტავი მეოთხე

I

ერთი კვირა წვიმდა განუწყვეტლივ. მთის წვეროები თოვლით დაიფარა და ნაადრევი სიცივე ჩამოდგა. ყანები აულებელნიყო. სანახევროდ უმწიფარი სიმინდი დამწვარივით გაიტრუსა. ქარმა და სიცივემ შემოაცალა ფოთლები ხეებს და ჩამობერტყა ხეხილი.

ხოჯა ამბობდა, დიდმა ცოდვამ დიდი უბედურება იცისო. იმ დიდ ცოდვას კი არ ასახელებდა, თუმცა ყველა ხედებოდა რომელ ცოდვებზე იყო ლაპარაკი.

ხალხი გაირყვნა, ზოგიერთებმა ლოცვასაც მიანებეს თავი. არც მარხულობენ. ქალები პირზე ახდას აპირებენ. ახალგაზრდები დელი მურადის გზას დაადგნენ. ზოგიერთებმა რუსული ქუდი დაიხურეს. „შაფხა“ ქუდის დახურვა მუსლიმანისთვის კი ცოდვაზე უფრო ცოდვაა.

მუსლიმანი ქალი თავშიშველი გამოდის მამაკატთან და ლაპარაკობს. კოოპერატივში ყიდიან ისეთ იაშპებს, რომლებზედაც ვენახის ფოთლებია გამოხატული. ვენახი ყურძენს ისხამს და ყურძნით გააურები ღვინოს აკეთებენ.

ამაზე უარესი: ბავშვებს წიგნები დაურიგეს, იმ წიგნებში მრავალი სურათია და ზღაპრები. ისეთი ზღაპრები, რომლებიც აკრძალულია მუსლიმანებისათვის. მართალია, ოჯახებში ყველგან არ შეაქვთ ეს წიგნები ბავშვებს, სკოლიდან რომ ბრუნდებიან, საბძელში ან ხეზე ჩამოკიდებენ წიგნებიან ჩანთას, მაგრამ მაინც სულერთია, ცოდვაა ყოველივე იმის გაკეთება, რაც ყურანში არ სწერია. ყურანს კი ზურგი შეაქციეს ზოგიერთებმა.

„უფრო უარესია მოსალოდნელი!“ ამბობს ხოჯა.

დელი მურადა ეშმაკის კაცია. გაიჩინა ამხანაგები. მრავლდებიან ისინი და დღეს თუ ხვალ შეიძლება სულ ჩაიძიროს აქაურობა.

ვის არ გაუგონია სოფელ ვერნების ამბავი. ამიტომ დაარქვეს მას ვერნები, რომ ის გავერანდა ერთ დროს. დაიქცა, დაშავდა. ერთი კაცის ჩადენილმა ცოდვამ ვერნები დააქცია. იმ კაცს რომ თავისი მოზვერისათვის რკინის რქა არ გაეკეთებინა, არც ეს ამბავი მოხდებოდა.

კარგი სოფელი იყო, ახლა რომ სოფელი ვერნებია, იქ. მიდი-
დარი სოფელი. სოფლის ზევით მთაზე ტბა იყო, საკმაოდ მოზრ-
დილი. ამ ტბაში წითელი მოზვერი ცხოვრობდა. ადამიანს არ ენა-
ხებოდა ის. ღმერთიდან იყო გამოგზავნილი. ერთ გლესს იმ სოფე-
ლში ჰყავდა წითელი მოზვერი. ამ მოზვერმა ერთხელ ტბის მოზვე-
რი გაიცნო. გაიცნო კი არა, შეტაკება მოუხდა მასთან. მაგრამ გლე-
ხის მოზვერი რას დააკლებდა ღმერთის გამოგზავნილ მოზვერს.
სულ გაუსისხლიანა თავპირი და ისე გაისტუმრა.

გლესს გაუკვირდა, გასისხლიანებული მოზვერი რომ მოვიდა
შინ. მეორე დღეს კიდევ უარესად დაუბრუნდა.

— ასე არ უნდა — სთქვა მან. — იმ ღამესვე გადაკეთა რკი
ნის რქები, ჩამოაცვა თავის მოზვერს და გაუშვა. ახლა თვითონაც
გაპყვა და მოზვერების ჭიდაობას დაესწრო. ჭიდაობა ტბის მოზვერის
დამარცხებით დამთავრდა. ის მოკვდა, მაგრამ სამაგიეროდ დატ-
რიალდა ცოდვა, აღელდა ტბა, გაღმოლახა ნაპირი, დაეშვა ქვევით
მეწყერი და მთელი სოფელი წალეკა.

მაშ, როგორ გგონიათ! ხშირადერთის მიერ ჩადენილი ცო-
დვა მთელ სოფელს გადახდება. ამიტომ იძახდა თავის დროზე ხო-
ჯა, დელი მურადა და მისი კახა დაი გადაეასახლოთო, ანდა...

ერთ ოჯახს ყველაფერს მოუხერხებს სოფელი. ვერსვინ ვერ
გაიგებს, ისე მოეწყობა საქმე. ორი გასროლა და...

იბნეოდა ასეთი „მარგალიტები“. ჩუმად ხოჯას პირიდან და
მას მოხერხებულად ავრცელებდა ახალგაზრდა მოლა და იუსუფ-აღა.
არც პატივცემული ემინე იდგა შორს. საბჭოს თავმჯდომარის
მეუღლეს უფრო ავტორიტეტი ჰქონდა ქალებში და ამიტომ ასეთი
თესლის მოზნევა მოსჯან უფრო მოსახერხებელი იყო.

ქალების საშუალებით შედიოდა გლესების ოჯახებში. შინამა-
ნი სიტყვები და სწამლავდა ყველას.

ანდროს ყურამდე მიდიოდა ცნობები. კომკავშირელები დაწე-
რილებით ეუბნებოდნენ მას ყველაფერს. აფრთხილებდნენ მასაც,
თვითონაც ფრთხილობდნენ. რაღაცას ანდროც ამჩნევდა, მაგრამ
ჯერ ჩუმად იყო, ენახოთ საიდან დაიწყებენ, ან როგორ ხერხს
მიმართავენო. არიგებდა ახალგაზრდებს როგორ მოქცეულიყვნენ.
თვითონაც ღებულობდა ზომებს. რამდენჯერ დასვა საკითხი მაზ-
რაში საბჭოს თავმჯდომარის მოხსნის შესახებ, მაგრამ ვერას გახდა.
ვილაცა მფარველობდა ამ კაცს. და ამ ვილაცის პოვნა გერჯერობით
ძნელი ხდებოდა.

სოფლის გზა ამ დროს თითქმის გაყვანილი იყო. კიდევ რამ-

დენამე კვირის მუშაობა და დამთავრდებოდა მაგრამ გლეხები ზედ
გავლას უფროთხოვნენ.

ავი სულელები, ეშმაკები და ქაჯები ეპატრონებიან აქაურობას.

ზოგიერთები ამტკიცებდნენ, რომ მათ მართლაც დაუხვდათ
ეშმაკი. ზოგიერთს ქაჯიც ენახა ხილთან ჩამომჯდარი. ერთი ვლე-
ხი თავისი ცხენით კლდეზე გადაჩეხილი იპოვეს. ესეც ქაჯის სა-
ქმე იყო.

ასე სჯეროდა ბევრს. ხოჯას აწერინებდნენ ეშმაკისაგან
თავდასაცავ ნუსხას. ლოცვებს იზეპირებდნენ და ღამით სახლებში
იკეტებოდნენ.

ზოგიერთი კომკავშირელიც იქვიანობდა. ვინ იცის, იქნებ... და
შიში ვითარდებოდა გულში.

ერთ საღამოს ერთ კომკავშირელსაც შეხვდა ქაჯი. ძლივს
გამოექცა. ბანჯგვლიანი იყო, ვარსკვლავივით თვალები ჰქონდა.

— არ გჯერათ?—ცხარობდა შაქირი.

ყველაფერს იფიცებს. გამოვიდა თუ არა მოსახვევში, აი.
იქ, სადაც ერთხელ დიდი ქვა ააფეთქეს, რალაც ბანჯგვლიანი.
ამოიმართა ტყიდან... პირდაპირ წამოვიდა და, გამოიქცა, თორემ
უსათუოდ დაიქერდა. აღამიანივით გამოუღდა და სოფლამდე მოს-
დია. სახელს ეძახდა. შემდეგ, რომ ვერ დაეწია, საშინელი ხმით
ზეპკიყლა, მერე გადიხარხარა და ხევში დაეშვა.

კიდევ არ გჯერათ?

ანდროჟ არწმუნებდა შეშინებულ კომკავშირელს, რომ ეს
ცრუმორწმუნეობის გავლენითაა, რომ მას მოეჩვენა ყველაფერი.
მაგრამ ახალგაზრდა ფიცულოზდა, ირწმუნებოდა, რომ მას არ მოსჩ-
ვენებია, რომ ყველაფერი ეს თავისი თვალით ნახა.

— ერთი მე შემხედებოდეს ის ქაჯი!—ამბობდა მურადი და
დასცინოდა მშიშარა ამხანაგებს.

— სირცხვილია, ხის კუნძი ქაჯად გეჩვენებოდეთ, ჩირგვი—ეშ-
მაკად, და საკუთარ ლანდს გაუბროდეთ. აბა, რატომ ერთხელ არ
შემეყარა მე. აი დედასა, რა დღეს წავკიდებდი! ხუმრობთ. ჩემ-
დენი არავის უვლია ღამე ტყესა და ღრეში, მაგრამ ის თქვენი
ქაჯი არსად მინახავს. გულმაგრად უნდა იყო და არავითარი ქაჯი
არ მოგვეკარებათ.

ქაჯების მნახველები ვერაფრით ამტკიცებდნენ თავიანთ სი-
მართლეს. ერთ ღამეს მზევრაკებიც გაგზავნეს. მთელი ღამე და-
დიოდნენ ტყეში, ღრეებში. იმ ადგილებშიც, სადაც, გადმოცემით,
ქაჯებისა და ავსტულების ბინა იყო, მაგრამ მსგავსი რამ არ აღ-
მოუჩინიათ. ორი მგელი მოკლეს მხოლოდ და ერთი ფოცხვერი.

მეორე ღამეს ცი თოფუზა სარაბიძემ მოირბინა ფერწასულ-
მა და გაფიჭრებულმა ანდროსთან. იმ დროს იქ რამდენიმე კომ-
კავშირელი იყო.

— შემხვდა, შემხვდა...—იქახდა თოფუზა და სულს ვერ
იბრუნებდა

— შემხვდა. შემხვდა ქაჯი. ქაჯის ქალი შემხვდა. აქვე მდი-
ნარესთან. გამოსასვლელთან...

ცხენით მოდიოდა. როცა მდინარეს მიუახლოვდა, დაინახა,
რომ ნაპირას. ქვის ძირში მიმჯდარა ქაჯის ქალი, გადმოუშვია
ოქროსფერი თმები და ივარცხნის. დაინახა თუ არა ცხენმა ეს,
შესტა. თოფუზამ თოფი მოიმარჯვა, უნდა ესროლნა, მაგრამ წა-
მოვარდა ქაჯის ქალი, წაავლო თოფში ხელი, წაართვა და გადა-
უჯღო. შემდეგ დაიწყო ხვეწნა: თოფუზ, ჩემო თოფუზ, დარჩი
ჩემთანაო. მაგრამ ისევე ცხენმა იძალა, გაარღვია მდინარე და გა-
მოვარდა. ამრიგად მშვენიერი სანადირო თოფი დაკარგა თოფუზამ.

ახალგაზრდებს ფერმა გადაჰკრა. თოფუზი არ იყო არც ცრუ-
მორწმუნე, არც მშიშარა და არც ტყუილი იცოდა. რალაც უსა-
თუოდ იყო, თორემ ასე არ შეშინდებოდა ის.

— მაშ თოფი წაგართვაო, ამბობ, არა?—შეეკითხა სეროო-
ზულად მურადი და ანდროს შეხედა.

— აბა ტყუილს ვამბობ?—იწყინა თოფუზმა.

— შეიძლება მოგეჩვენა?

— არასოდეს არათფერი მომჩვენებია.—იუკადრისა თოფუზმა.

— მოდი წავიდეთ ბიჭებო. თქვენც წამოდით.—მიმართა მუ-
რადმა ჯერ ამხანაგებს და შემდეგ ანდროს.

— წავიდეთ!—წამოაცვივდნენ ბიჭები.

შუალამე ყო. ნაწვიმარზე აღიდებული მდინარე გრილით
მიაგორებდა ქვებს და ღრიალით მიდიოდა. იქ, სადაც უფრო გაშ-
ლილი ფონი იყო, ხიდის ასაგები მასალა მოეგროვებინათ, რად-
გან მოკლე ხანში მშენებლობა უნდა დაეწყოთ. ღამით აქ შეიძ-
ლებოდა მშიშარა კაცს მართლა მოსჩვენებოდა რამე. ამდენი
კუნძებიდან, ქვებიდან და მორებიდან მიელო ფანტაზიით წარმოდ-
გენილ ქაჯის ან ეშმაკის სახე, მაგრამ ახლა, როცა ყველაფერი
გარკვევით მოჩანდა და თან ამდენი კაცი ერთად მიდიოდა, შიშის
მომგვრელს ვერავინ ვერაფერს დაინახავდა.

მიუახლოვდნენ მდინარეს იქ, სადაც თოფუზა უჩვენებდა,
ქაჯის ქალი ბანაობდა. მდორე წყალი ტრიალებდა. ზემოდან
თეთრი ქაფი მოეყენებინა და ერთი შეხედვით თითქო დაექცდნენ.

რომ აქ შეიძლება სიზნელეში სხვანაირად მოეჩვენოს ადამიანსო. მაგრამ თოფუზამ იწყინა.

— გეუზნებით, რომ ბანაობდა, სწორედ ამ თეთრად აქაფებულ წყალში იჯდა. დიახ აქ!—თითით ანიშნებდა ის ყველას ქაჯის ქალის ნამყოფს.—აქ იჯდა. აი ზურგიტ აქეთ, აღმოსავლეთით იცქირებოდა—და უცებ გაეყინა ენა ხახაში, რალაცას გახედა სიბნელეში და შემდეგ იქითკენ გაიშვირა ხელი.

— შეხედეთ, შეხედეთ-მეთქი!—და ნაბიჯით უკან დაიხია. ხევიდან მდინარე გამოდიოდა. ერთ ადგილას კლდე იყო ჩამოწოლილი და იქ ოდნავ შეტბორებულ წყალში მართლაც რალაც მოძრაობდა.

ყველამ დაუკვირდა. ხევში სიბნელე იყო, და ის მოძრავი საგანი თეთრად მოჩანდა. ერთი შეხედვით, ის მოძრაობა მართლაც წყალში ჩამუჯდარი ქალის მოძრაობას მოაგონებდა კაცს... იმ ქალის, რომელსაც მხოლოდ ტანის ქვედა ნაწილი აქვს დაფარული და გულმკერდი წყალს ზევით მოუტოვებია.

— ხედავთ?—თოფუზამ გადახედა ამხანაგებს.

— ვხედავთ.—უპასუხა მურადმა და თოფი გადმოიღო.

— დაიცა—შეაჩერა ანდრომ—მივიდეთ უფრო ახლო.

— მიიპარება, მიიპარება—ჩუმად დაიძახა ვილაცამ და მართლაც ყველამ შენიშნა, რომ ნელნელა წყლის დინების წინსაღმდეგ მიყვება ეს თეთრი არსება და ბნელაში შესამჩნევი ხდებოდა მდორე წყლის ზედაპირზე გავლენებული ხაზი.

რამდენიმე ნაბიჯით წაიწიეს წინ. მურადმა ვერ მოითმინა და როცა შენიშნა, რომ ის საცაა დაიფარება თვალიდან, გაუმიზნა თოფი და ესროლა.

— ვა, ვა, ვა,—შესძახა რალაცამ და თითქო მდინარიდან ზეწარში გახვეული ქალი ამოეარდაო, ისე აიწია ზევით, შემდეგ წყლის ზედაპირზე დაადვა თავი და მდინარის დინებას გამოყვა.

მიცვივდნენ მდინარის პირას ისე, რომ თვალი არ მოუცილებიათ თეთრად შემოსილ ქაჯის ქალის სხეულისათვის. ის მოყვებოდა მდინარეს და თანდათან უახლოვდებოდა ნაპირს.

ზოგიერთებს შიშით უკრთოდათ გული. მართლაც ქაჯის ქალი არ იყოს, ყველანი არ ამოგეწყვიტოსო — ფიქრობდნენ, მაგრამ, აი მოახლოვდა, სულ ახლოს მოატურა წყალმა და ნათელი გახდა ყველაფერი.

— აი თქვენი ქაჯი!—დაითრია მურადმა მკედარი ფრინველი და ანდროს ფეხებთან გააგდო.

— ფუ! —ჩააფურთხა თოფუზმა და ხელი ჩაიქნა.

— ეს არის შენი ქაჯი?!. როგორ იყო თოფი რომ აგართვა

— მურადმა ბატს დააელო ხელი და თოფუხს უჩვენა.

— როგორ წაგართვა თოფი თოფუხზე ამან? — აუხიროდნენ ამხანაგები.

თოფუხს გული მოუვიდა. შერცხვა. უნდოდა რაღაც ეთქვა თავის გასამართლებელი, მაგრამ ვერაფერი მოიგონა. — ეს ოხერი ბატი მაინც არ გამოჩენილიყო, ან გაფრენილიყო. — ფიქრობდა ის. აწი სად გაახილოს თვალი. როგორ აიტანოს ამდენი დაცინვა?

— აჰა, თოფუხზე, შენი თოფი! — დაიძახა ერთმა ახალგაზრდამ და ორპირიანი სანადირო თოფი ამოათრია იქვე ბუჩქებიდან.

— დაუტოვებია ბიჭო, დაუტოვებია! — უფრო აუხიროდნენ ამხანაგები თოფუხს, რომელიც ვერ ახერხებდა სიტყვის თქმას.

— მომეცი თქვე. — ჭლივს თქვა მან. გამოართვა თოფი ამხანაგს, ილიაში ამოიდვა და საჩქაროდ წავიდა.

ბატი მურადმა წამოიღო. ერთ კვირაზე მეტია, რაც ანდრომ იყიდა ის ერთი გლეხიდან, დასაკლავად უნდოდა, მაგრამ ფრინველმა თითქოს იგრძნო მოსალოდნელი უბედურება და სწორედ იმ დროს გაიპარა, როცა მურადი დანას ეძებდა.

— ჩვენი კერძი ყოფილა და არ დაგვეყარა! — ხუმრობდა გზაზე მურადი და ყვებოდა ამბავს, თუ როგორ მოეჩვენებოდა თოფუხს მობანავე ქალად, როგორ დაუძახებდა და მიიწვევდა თავისთან საბანაოდ.

— შენ ის თქვი, თოფს როგორ წაართმევდა!

— ჰო, მართლა. ეს მთავარია. რომ წაველებდა ნისკარტს თოფს და დაითრევედა...

იცინოდნენ და ისე მოდიოდნენ სოფელში.

— გეყოფათ ბიჭებო. ამის შემდეგ ამ საგანზე ნუ ილაპარაკებთ, ეწყინა თოფუხს. — უთხრა ანდრომ ახალგაზრდებს.

— მოსჩვენებია, რა ვუყოთ მერე! არ მოეჩვენებოდა იმას, ვინც დარწმუნებულია, რომ არაფერი მაგის მსგავსი არ არსებობს.

— მე მაინც ვერ დაგიჯერებთ, ამხანაგო ანდრო. მე ნამდვილად ვნახე საკუთარი თვალებით. ყველაფერს გეფიცები, რომ ვნახე ნამდვილი ქაჯი.

— რაო, ქაჯი ნახე? — შეუტია ამხანაგს მურადმა.

— მე ხომ არ ვამბობ ნამდვილად ქაჯი იყო ან ეშმაკი! — წყენით სთქვა ახალგაზრდამ. — მე ვნახე ისეთი ცხოველი, რომელიც ორ ფეხზე დადიოდა ადამიანივით, რომელიც დასაჭერად გამომიდგა და რომელმაც სახელი მიძახა. შემდეგ იდამიანივით გადაიხარხარა.

— ვერ დაგიჯერებ, ენვერ, ვერა! — უთხრა ისევ მურადმა.

სხვებს ხმა არ ამოუღიათ.

მარტოდ იჯდა ანდრო ოთახში. ამ საღამოს თათბირი ჩაატარა კომკავშირელებთან და დიდი ხანი არაა, რაც დაბრუნდა. გარეთ წვიმდა. ახლახან დანთებული ცეცხლი თანდათან ძლიერდებოდა. ფიჭვის შეშას ტკაცა-ტკუცი გაჰქონდა და ნაპერწკლებს ისროდა.

ახალმიღებული ჟურნალ-გაზეთები ელაგა. მაგიდაზე. ანდრო გულდასმით ათვალერებდა მათ და ზოგიერთ ადგილს ფანქრით ინიშნავდა.

არავინ იყო. ნაილე მასწავლებელ ქალთან დადიოდა ყოველ საღამოს და შინ მოგვიანებით ბრუნდებოდა. ხუთიოდე ქალი სწავლობდა წერა-კითხვასა და კრა-კერვას. ამ ორი სახის სკოლას ერთი მასწავლებელი ქალი უძღვებოდა. დღე კრა-კერვას, საღამოებით წერა-კითხვას ასწავლიდა ის და ზოგიერთ წიგნსაც უკითხავდა. ნაილესა და ნაზიმეს გარდა აქ სულ ქმარიანი ქალები იყვნენ, ლარიბებისა და ამდენხანს დაბეჩავებული გლეხების ცოლები. ამათ წარსული ცხოვრებიდან ერთი ბეწო არაფერი ახსოვდათ სასიკეთო, მათთვის არასდროს არ მოუცია რამე ღმერთს, არც ხოჯას. არც ლოცვა რგებდათ და არც მთავრობას მიუქცევია ყურადღება. ყოველი დღე ოფლიანი და ცრემლიანი იყო. ესენი გაებოროტებინა ცხოვრებას. ზურგი შეექციათ ყველაფრისათვის. რაც გამოსცადეს, მისი განმეორება აღარ უნდოდათ. ვისიც წინათ სჯეროდათ და სწამდათ,—მათი დანახვაც ეჯავრებოდათ და რახან ღმერთი არ ზრუნავდა მათზე, ახლა სიამოვნებით ეშმაკს დაუშემგობრდებოდნენ. თუ მათს მდგომარეობას შეცვლიდა.

— უარესი არაფერი მოგვივა.

— გამწარებულ სიცოცხლეს სიკვდილი გვირჩევენია.

— ლოცვას, სჯულს, ყურანს, ხოჯას რა მოუცია ჩვენთვის!

— გაგვალატაკა.

— დაგვაბრმავა.

— დაგვამონავა.

— ჯანდაბას, მოხდეს, რაც მოხდება!

— არ გვინდა არც ლოცვა, არც ვედრება, არც ხოჯა, არც წინასწარმეტყველი, არც ღმერთი და არც...

ჩადრი მოიხსნეს და გადააგდეს... არა, კი არ გადაუგდიათ, რომ არ ჰქონდათ, რას გადააგდებდნენ. იაზმა შემოიხსნეს და ისე დაიწყეს სიარული. მასწავლებელი ქალი მიუგზავნეს ანდროს და სთხოვეს ესაუბრა მათთან. მიეღო ისინი პარტიაში, ესწავლებინა, როგორ უნდა ცხოვრება.

დაძაბული ყურადღებით უსმენდნენ ანდროს კრებაზე. ასე არასოდეს არ მოხვედრია მათ გულს სიტყვები. სიტყვები კი არა, მარგალიტებია. არც ყურანში სწერია ასე, არც ხოჯას უთქვამს რამე ამის მსგავსი.

რა ყოფილა, სად იყვნენ ამდენხანს ! ყველაფერი ეს, რასაც ხედავს ადამიანი, ტუნებას შეუქმნია. ადამიანმა კი უნდა გამოიყენოს ის. მშრომელი კაცი მშვიერი არ უნდა იყოს. ალას რად უნდა ჰქონდეს მეტი ჭონება. უსწავლელი რად უნდა იყო! გლეხი. რად არ უნდა ჰქონდეს 'სოფელს კარგი გზა, წყალი, სკოლა და კოოპერატივი?

გაკვირვებულია ქალები.

— ნუთუ მართალია?

— ჭეშმარიტებაა!

ახალ ქვეყანაში ყველაფერი მშრომელს ეკუთვნის, მუშა და გლეხია ქვეყნის პატრონი, სასწავლებლებში—პირველ რიგში მშრომელთა შვილები, დახმარება—მშრომელებს, მთავრობაში—მშრომელები. ჩვენში არ უნდა იყოს არც მჩაგვრელი, არც ჩაგრული. არც უსწავლელი, არც ღატაკი.

ვინ დასწერა ასეთი კანონი?

ვინ სთქვა ასეთი სიტყვები?

ვინ აკეთებს ამ საქმეს?

ქალები დაინტერესდნენ, უნდათ გაიგონ, ვინ მოეწვინა მხსნელად ქვეყანას.

ანდროს პასუხის ძებნა არ სჭირია.

პატარა ოქტომბრელმაც იცის, რომ:

ასეთი კანონი დასწერა მარქსმა, ენგელსმა, ლენინმა, სტალინმა.

ბოლშევიკურმა პარტიამ დასწერა ეს კანონი.

ასეთი სიტყვები თქვეს მარქსმა, ენგელსმა, ლენინმა სტალინმა.

ასე ამბობენ ბოლშევიკები.

ასეთ საქმეს აკეთებს ლენინ-სტალინის პარტია.

მარქსი, ენგელსი, ლენინი, სტალინი, კომუნისტური პარტია—განიმეორეს ქალებმა რამდენჯერმე.

მეორე დღეს გაზეთიდან ამოკრილი ბელადთა სურათები დაურიგა ნილემ ქალებს.

ქვარტლით გამურულ ცედლებზე პირველად გაიკრა პატარა სურათები ოქტომბრის რევოლუციის ხელმძღვანელებისა და საზღვრების.

მურადი არ მოსულიყო ჯერ. მან დღეს ახალი წყება სა-
ჭინელი ნიღო და ჩვეულებრივ ღამე შუშაობდა მის ამოლაგება-
ჩალაგებაზე. ის ახლა უკვე ნამდვილი საპკოთა ვაჭარი გახდა. ისე
დააყენა საქმე, რომ გამოცდილ ვაჭარსაც შეშურდებოდა. სამჯერ
დაათვალიერებს ღამეში ნაწისქვილარს. უფრთხილდება, არავინ
გაუბედოს სახალხო ქონებას უდიერად მოპყრობა.

წვიმის წვეთებმა მოაშხაპუნეს სახლის კედლებზე და ქუ-
ქრუტანიდან შემოპრიღმა ქარმა ღამპას აუთამაშა შუქი.

თერთმეტი საათი სრულდებოდა.

ანდრო დასაწოლად მოემზადა, მაგრამ კარების ქრიალი მო-
ესმა და ნახევრად გახდილი ხალათი ისევ ჩაიცვა.

მურადი უსათუოდ შემოვიდოდა ანდროსთან რაც არ უნდა
გვიან მოსულიყო და ანდრომაც დაუცადა, მაგრამ ახლა არავინ ვა-
მოჩენილა.

— ნაილეა—გაიფიქრა ანდრომ, ყური დაუგდო და დარწმუნ-
და, რომ არ სტყუედებოდა. სამზარეულო ოთახის ქარები გაიღო.
და შევიდა კილაცა. ფეხის ხმაზე იცნო ნაილე. მიბრუნდა, ოთახის
კარები ჩაკეტა, ტანზე გაიხადა და ლოგინში ჩაწვა.

ძილი არ ეკიდებოდა. ისევ წიგნი აიღო და კითხვას შეუდგა.
კარგა ხანს კითხულობდა. ზოლოს მოექანცა თვალეზი, წიგნი
მაგიდაზე დასდო და ჩასთვლიმა.

ჯერ კიდევ არ ეძინა კარგად. ყურებს ისევ ესმოდათ წვიმის
წვეთების შხაპუნი და ქარის მოქროლვაზე სახლის გვერდით
მდგარ ცაკლის ხის ტოტების რხევა.

კიდევ წუთი და დაიძინებდა, მაგრამ უეცრად რაღაც ისე
ძლიერად დაეტაკა სახლის წინა კედელს, რომ ქერი შეინძრა.

ანდრო თავისდაუნებურად წამოვარდა ლოგინიდან, მაგრამ
მალე დამშვიდდა. ხის მორი დაგორდებოდა, ან რომელიმე პირუტ-
ყვი დაეჯახებოდა კედელსო—გაიფიქრა და ისევ დაწვა. მაგრამ ახ-
ლა საშინელი ღმუილი გაისმა და მას ქალის შეკვივლებაც მოჰყვა.

ანდრომ სწრაფად ჩაიცვა შარვალი, პალტო მოისხა, ხელში
რევოლვერი აიღო და გარეთ გამოვარდა.

სახლის წინა კარებთან ორი ლანდი ეპრძოდა ერთმანეთს.

ანდრო მივარდა, ფეხზე შეყენებული რევოლვერი მალდა
ასწია, მაგრამ ისევ დაუშვა და ჯიბეში ჩაიღო.

ნაილეს მურადისათვის მოეკიდნა ხელი და სახლისაკენ
ეწეოდა, მაგრამ მურადი ძალაზე იდგა, იქნევდა ხელებს აქეთ-იქით,
იგრინებოდა, იმანკებოდა. საშინლად და რაღაც საზარელი ხმით
ღმუოდა

— მიშველეთ! მომეხმარეთ!—კიოდა ნაილე—ძმა მოძიკლეს. მომიჯადოვეს. დამილუბეს—იხოკდა სახეს, იწეწდა თმებზე და მუქის ოდენა ცრემლებს ღვრიდა.

ანდრომ ძლივს შეიძლო მურადის შემოთრევა. უნდოდა როგორმე დაეწვინა, მაგრამ ვერ დაამშვიდა. ჯერ იფიქრა, იქნებ არაყი ან ღვინო დალია, დაითროს, მაგრამ ამის ნიშანი არ ემჩნეოდა. სულ გაფითრებული ჰქონდა სახე, თმები აბურძგვნილი, ხელში რევოლვერი ეჭირა და აქეთ-იქით იშვევდა. ძლივს შესძლო იარაღის ართმევა.

საქირო იყო სასწრაფო დახმარება. გამოცდილი პირების მოყვანა, მაგრამ ვის უნდა მიეღო ზომები.

მოშორებით მცხოვრებ მეზობლებს ნაილეს კივილი და ტირილი არ ესმოდათ. რამდენიმე დაძახებამ, უნაყოფოდ ჩაიარა. წვიმა და ქარი უშლიდა ხელს. თან გვიანიც იყო, კარგახანი გადაცილებოდა შუალამეს.

მურადი იზრძოდა. იგრიხებოდა, იმანქებოდა და ნადირივით ღმუროდა. არ ხერხდებოდა მისი დამშვიდება. ვერც დააწვინეს. შემოიხია ტანზე ყველაფერი. დაიკაწრა სახე. დაიკბინა თითები. ანდრო იძულებული გახდა თოკით შეეკრა ხელები. ნაილე თავს იკლავდა. დასტიროდა ცოცხლად დაღუპულ ძმას.

— რა მეშველება, რა დამემართა—იძახდა ის. წყევლიდა ცასა და ქვეყანას.

ანდრო ცდილობდა მის დამშვიდებას. არაფერია, მოვარჩინო, ნუ შეგეშინდებათო, მაგრამ ნაილე უიმედოდ იქნევდა თავს.

— ვისაც ასე მოუვიდა, ერთიც არ გადარჩენილა. ყველამ საშინელი ტანჯვით დალია სული. ვაიმე, რა მეშველება. — ცრემლები უსველებდა ღაწვებს. დაავიწყდა თავისთავი, არც მორიდება და კრძალვა უცხო ახალგაზრდა კაცისადმი, არც ხათრი. ყველაფერი დაავიწყა ძმის უბედურებამ.

ანდრომ ხელფეხშეკრული მურადი ტახტზე დასდო. ნაილე წინააღმდეგ იყო, ჩემს ძმას თოკით ვერ შეეკრავ, მის სხეულს აღარ ვაწამებო, მაგრამ რომ შეატყო, მურადის გაჩერება ისე არ შეიძლებოდა და უფრო მეტ ზიანსაც მიაყენებდა თავისთავს, დათანხმდა. მიეხმარა ანდროს ძმის შეკოქვაში.

შეკრული მურადი ოდნავ დამშვიდდა. მოქანცულმა სხეულმა კდევე გაბრძოლება ვეღარ შესძლო და მოისვენა. თვალები დახუჭა და ძილმა დაიმორჩილა სხეული.

ანდროსაც მიეტა იმედი.

— ძილი დაამშვიდებს;—უთხრა მან ნაილეს,—გამოღვიძების შემდეგ ისევ კარგად იქნება. გეყოფათ, ნუ სტირით. მე წაველ

და მეზობლებს შევატყობინებ.—წამოდგა, მაგრამ ნაილემ მაჯაში წააელო ხელი.

— არა, ნუ წახვალ, მე ვერ დავრჩები მარტო. დარჩით, ჩემთან დარჩით დილამდე. ჩემი ძამიკო, ჩემი ნუგეში და პატრონი— ისეე გაიხედა მძინარე ძმისაკენ და აქვითინდა.

ანდრო ახლო დაუჯდა მძინარეს. დასცქეროდა და თან გულს უდღულებდა ვაჟკაცის ასე დაცემა და მისი დის სიბრალოლი.

ეძებდა მიზეზს. ფიქრობდა, რას უნდა მოეხდინა ასეთი გავლენა ახალგაზრდა და თან ასეთ უშიშარ ადამიანზე. იქნებ შთამომავლობით მოსდევს სიგიჟე, ან მართლაც იყო ნაწილობრივ შერყეული და ახლა გაუხსენაო, მაგრამ ნაილემ აუხსნა:

— არასოდეს არ ყოფილა მურადი დელი. ის განგებ მოუგონა ხოჯამ, მედრესედან რომ გამოექცა, ლოცვებს რომ არ სწავლობდა, მარხვებს რომ არ ინახავდა. დიად, ამისთვის უწოდა დელი.

მშობლები, არც წინაპრები არ ჰყოლია დელი...

წინათ ასეთი შემთხვევები ხშირად იყო. ნაილესაც ახსოვს სამამდე შემთხვევა. სწორედ ამგვარად. უცებ გადელდებოდა ვაჟი და შემდეგ წევლობდა. ზოგი ორ-სამ წელიწადსაც ცხოვრობდა. ზოგი ერთი კვირის შემდეგ კედებოდა.

არავინ იცის რა იყო ამის მიზეზი.

სოფლელები ამბობდნენ ხოჯის დანაწყევლიაო. ალლახის ურჩია და დაისაჯაო.

ვინ იცის რომელია სიმართლე!

ხოჯა მუდამ წყევლიდა მურადს, მაგრამ ვითომ შეუძლია წყველას რამე?!

ანდრომ უბასუხა.

წყველა ადამიანს ვერაფერს დააკლებს, მაგრამ...

ხოჯა რაღაც იქვებს ბადებდა მის გულში თანდათან!

მაგიდაზე ეგდო მურადის რევოლვერი. ის სულ ტალახში იყო მოსვრილი. ანდრომ აიღო, ტალახი მოაცილა, გაასუფთავა და დახედა.

ყველაფერი რიგზე იყო. შვიდი ტყვია იცქირებოდა ზარბაზნიდან. ისეთ ვაჟკაცს და მსროლელს, როგორც მურადი იყო, ასეთი იარაღით ხუთი კაცის დამარცხება შეეძლო. ნუთუ მან ვერ გამოიყენა ეს იარაღი!

გამოყარა ვაზნები და ფისტონზე დახედა. შვიდივე ფისტონი გატეხილი იყო. ნემსას სწვეტანა ყველას დასცემოდა, მაგრამ ტყვია არ გავარდნილიყო.

ანდრო უკვე მიხვდა, რომ მურადს ვილაციისათვის სროლა მოუნდომებია, მაგრამ რევოლვერი არ გავარდნილა. ჩანს, ვილაც

დახვდა მას. ვილაცამ შეაშინა.

— აქ რალაც საიდუმლოებაა.—გაიფიქრა, ვაზნები სათითაოდ გახსნა. ტყვია მოხადა და, წარმოიდგინეთ, არც ერთში დენთი არ აღმოჩნდა. ფისტონი აფეთქებულა, მაგრამ რახან დენთი არ ყოფილა შიგ, გავარდნაც არ მოხდებოდა.

გაუკვირდა. ვის უნდა ამოეცალა სრულიად სალი ვაზნებიდან დენთი! ეს ვაზნები თვითონ ანდრომ ამოიტანა ბათუმიდან. კომკავშირელებს დაურჩია და ერთი წყება თავისთვისაც დაიტოვა.

თავისი რევოლვერი ამოიღო. ვაზნები ამოალაგა, სათითაოდ დახსნა, მაგრამ ყველაფერი რიგზე იყო. არაფითარი ნაკლი მათ არ ჰქონდათ.

სად ინახავდა მურადი ამ რევოლვერს? — შეეკითხა ის ნაილეს.

— მუდამ წელზე ეკიდა. დაწოლისას თავქვეშ ედო.

— საკვირველია.—ჩაილაპარაკა ანდრომ—მაშ ვის უნდა ამოეცალა წამალი ვაზნიდან?

— წამალი?—გაიკვირვა ნაილემ.

— არც ერთ ვაზნაში წამალი არაა. სხვა კი ყველაფერი რიგზეა. როგორც ჩანს ვილაცას უმუშაენია ამ საქმეზე.

ნაილე გაფითრდა.

— ჩვენსას არავინ ყოფილა... ვის უნდა ჩაედინა ასეთი ღალატით?—გააჟრჟოლა და კანკალი აუვარდა.

— ეშმაკი არსებობს?—ცახცახით შეეკითხა ის ანდროს.

— არა.

— ქაჯი?

— არც ქაჯი.

— კუდიანები?

— არც მასეთები.

— ჯადო მოქმედობს?

— არა.

— ტყუილია. ჯადო კი მოქმედობს—სთქვა ნაილემ მტკიცედ.—ჩვენში აკეთებენ ჯადოს. ჰკუას აურევენ ადამიანს. საღაც სურთ, იქით წაიყვანენ, რაც სურთ იმას აკეთებინებენ. აძინებენ, აღვიძებენ, ალაპარაკებენ ყველაფერს, რაც სურთ. ჯადო არის. ეს სიმართლეა.

ანდრო ჩაფიქრდა. მოაგონდა ჰიპნოტიზიორები. თითქმის სასწაულებს ახდენენ. ხშირად სნეულსაც ჰკურნავენ. ხშირად ასნეულებენ კიდევაც, მაგრამ ეს ხომ მეცნიერებაა და აქ, ამ მივარდნილ კუთხეში ვის შეუძლია მოახდინოს ჰიპნოზური ცდები. ან ვინაა ისეთი ნასწაელი.

სათითაროდ მოიგონა ამ სოფლის ყველა მცხოვრებთაგანი, მაგრამ საექვო არავინ აღმოჩნდა.

— ჯადო კი არა, მაგრამ არის ერთგვარი მეცნიერება, ჰიპნოზად წოდებული, იმის საშუალებით ზოგიერთ რამეებს აკეთებენ... მაგრამ ეს ძალიან რთული საქმეა. ჩვენში, საერთოდ, ნაკლებად მოიძებნებიან ისეთი ადამიანები, რომლებიც ისე კარგად სარგებლობდნენ ჰიპნოზით.—აუხსნა ანდრომ ნაილეს, მაგრამ უკანასკნელი მაინც თავისას ამბობდა.

როგორც იყო დაადგა საშველი გათენებას. დილის ციაცმა შემოანათა ფანჯარაში. თოვლი მოსულიყო. ჯერ კიდევ მოუკრეწავი მხლისა და ვაშლის ტოტებს თოვლის სიმძიმეც მომატებოდა. ბევრს ჩამოტეხოდა ტოტები, აუღებელი სიმინდის ყანები გადაბურულიყო თეთრად, ხოლო აქა-იქ მოჩანდა თოვლდაუწყარავი ადგილები, უფრო დაბლობებში და ქვემოთ.

მურადს ისევ ეძინა. არ ემჩნეოდა, რომ ნორმალური ძილი ჰქონდა. ხშირად შეკრთებოდა, ამოიღმუვლებდა, სახეს დამანქავდა, მაგრამ მაინც ეძინა.

ნაილემ მხოლოდ გათენების შემდეგ მისცა გარეთ გამოსვლის ნება ანდროს. თვითონ მძინარე ძმას დაადგა თავზე და მგლოვიარესავით დაიკრიფა გულხელი.

ანდრო გამოვიდა სოფელში. საბჭოში მივიდა, მაგრამ ჯერ იქ არავინ დაუხედა და თავმჯდომარის სახლისაკენ წავადა.

იწვა ღურსუნნი, მაგრამ ანდროს მისვლა რომ აცნობეს, მაშინვე წამოვარდა, ტანზე ჩაიცვა და გამოეგება.

— მობრძანდით!— შეიპატიეთა სახლში. რაღაც უგულო იყო ეს შეპატიებება. ასე არასასურველ სტუმარს შეიპატიებენ ხოლმე ანდრომ. შენიშნა ეს, მაგრამ მაინც შევიდა.

— ძალიან დამნაშავე ვარ შენთან— დაიწყო ღურსუნმა, როცა სტუმარი შეჰყავდა.— ამდენი ხანია ჩვენში ხართ და ერთხელაც არ მოგიწვიეთ ოჯახში, თუმცა მე დაუპატიებლად მესტუმრებოდით მეგონა... დაბრძანდით.— უნდოდა შეეკითხა, რა ამბავია, რაზე შეწყუბებულხართო, მაგრამ ვერ გაბედა. თანაც ეშინოდა, რამე ცუდი არ მითხრასო.

ანდრო ტახტზე ჩამოჯდა.

ღურსუნის ოჯახი, მართალია, მდიდარ მოსახლის ელფერს იძლეოდა— ბალებით, ფარდაგებით, ფაოჩის ლოგინებით და სპილენძის და ვერცხლეთულობის ჭურჭლებით იყო სავსე, მაგრამ კულტურული სახე შაიხც არ ჰქონდა. ვახიერ ტახტთან იდგა მხოლოდ ერთი ტაბურეტი, რომელზედაც გამურულშუშიანი პატარა ლამპა იდგა და პორტსიგარით თუთუნნი. შუა კედელზე ბუნხარი

იყო ამოყვანილი და აქეთ-იქით დაბალი სკამები.

დურსუნის გარდა თითქო არავინ ცხოვრობდა ამ ოჯახში. ყველანი მიმალოლ-მომალოლიყვნენ. კედლიდან გამოდიოდა ბაჭ-შეის ტირილის ხმა და ჭლის ფრთხილი ჩურჩული.

ანდროს არ მოეწონა აქაურობა. ყველაფერი ცივი და მიუ-
კარებელი იყო.

— ცუდი ამბავი შეგვემთხვა, ამხანაგო დურსუნ—თქვა და სკამზე დადებული პორტსიგარი აიღო.

თავმჯდომარეს სისხლი გაეყინა წუთით. ანდროს მიაჩერდა და სმენა გაამახვილა.

— წუხელ მურადი გაგვიხდა ცუდად...

— მურადი?—თითქოს ძალიან ეწყინა დურსუნს,—რა მოუ-
ვიდა?—თვითონაც დასწვდა სათუთუნეს.

— რაღაც უცნაური რამ შეემთხვა. მართალი გითხრა, მე არც შემიძლია წარმოვიდგინო, რა დაემართა ამ კაცს.

თავმჯდომარე დამშვიდდა, თუთუნი შეახვია, ცეცხლი მოუ-
კიდა, გააბოლა და შემდეგ ამოიღო ხმა.

— გადაირეოდა.—ისე თქვა მან, თითქოს არაფერიო, — ხომ პირველი არაა მაგისგან.

— როგორ?

— აკი გეუბნებოდი, ამხანაგო ანდრო, ხანდახან უკლის, მაგრამ ხან იოლად, ხან უფრო ძლიერად. წუხელის როგორ მო-
უარა?

ანდრომ დაწერილებით უამბო.

— დაიღუპა კაცი!—დაასკვნა თავმჯდომარემ.—მაშ, აღარ გადარჩება.—მაგრად მოსწია თამბაქო და დაგრეხილი ბოლი ამოუშვა.

— უნდა გადავეზავნოთ როგორმე ბათუმში.

— ფიქრობ, უშველიან რამეს?

ანდრომ თავი ჩაიქნია.

— ჩვენი მოვალეობა მოვიხადოთ. ეჭიმები გასინჯავენ. ვინ იცის, იქნებ იხსნან... ცოდვაა ახალგაზრდა კაცის დაღუპვა. მე-
ტადრე მისი და მებრალება.

„იმის და ებრალება“—გულში ჩაიციინა დურსუნმა.

— გავაგზავნოთ, თუ ფიქრობთ, აჯობებს. არაფერი მაქვს საწინააღმდეგო.—წამოდგა, მეორე ოთახში გავიდა და ისევ მალე დაბრუნდა.—გავაგზავნოთ, მაგრამ რით? ცხენზე ჯდომას შესწლებს?

— არა მგონია. თუ ოდნავ არ გაუმჯობესდა მისი მდგომარეობა, ცხენით ვერ გავაგზავნით.

თავმჯდომარე ჩაფიქრდა.

— უბედური!—ჩაილაპარაკა მან ბოლოს.—ამ ბოლო დროს თითქოს უკეთესობა ეტყობოდა... სამაგიერო კაცის მონახვა დაგე-
ქირდება ახლა. მერე არც ვინმე გეყავს შიშაფერი.—კიდევ და-
ფიქრდა, რამდენჯერმე გააპოლა თამბაქო და შემდეგ განაგრძო.—
კოოპერატივის დაკეთვაც არ შეიძლება,—ანდროს შეხედა—რას იტ-
ყვით, თოფუზა რომ დაენიშნოთ. მგონია, კოპკაეშირელიც უნდა
იყოს. მართალია, გამოცდილება არა აქვს მძლენი, მაგრამ უკე-
თესი არ მეგულება.

— საწინააღმდეგო არაფერი მაქვს, თუმცა ჯერ მურადზე
უნდა ვიზრუნოთ. ცოდვია ადამიანის ასე დაღუბვა.

— ძალიან მებრალება, მართალი გითხრათ... რაც შეგვიძ-
ლია, დავეხმარებით. თქვენი აზრით, თუ გაგზავნაა საჭირო, გაგვ-
ზავნოთ, კაცები გავაყოლოთ. ცხენზე გავრულ საკაცეზე დავა-
კრათ... სხვა რა გაეწყობა.—ცოტა სიჩუმის შემდეგ დაუმატა—
თქვენ! სად ისურვებთ დაზინავებას?

— მე ბინის გამოცემა არ მიფიქრია.—უპასუხა ანდრომ,
თუმცა შემდეგ დაუფიქრდა, რომ თუ მურადი წავიდოდა ოჯახი-
დან, მას მურადისას აღარ ეცხოვრებოდა, რადგან ოჯახში მარტო
ნაილე რჩებოდა.

— მოვნახვებ ბინას.—ცოტა ფიქრის შემდეგ დაუმატა ანდრომ.

— გნებავს ამ ოთახს დაგიტოვებ. ცოტა მოშორებით კი
ეცხოვრობ, მაგრამ არა უშავს. თუ არა და ჩემი სამამრი დავიფი-
ქრობ. მართალია, ხოჯაა, მაგრამ, როგორც ხედავ, არც ისეთი კა-
ცია, რომ მისას არ ეცხოვრებოდეს.

— გმადლობთ—უპასუხა ანდრომ.—ბინის საკითხს როგორ-
მე მოვაგვარებ. ჯერ კი, სანამ მურადი არ გაგვიგზავნია, იქვე
უნდა დავრჩე.

— თქვენი ნებაა.—უთხრა თავმჯდომარემ.—მე თქვენი შე-
წუხება არ მინდა, თორემ... ბოდიში.—ისევ გავიდა ოთახიდან და
ცოტახნის შემდეგ თეფშები შემოიტანა.

— ცოტა ვისაუზნოთ, ქალებს ვერ მოუწწრიათ შესაფერი
საუზნის გაკეთება...—აღარ დაუცადა ანდროს პასუხს, უცებ გა-
ვიდა, სქელი მკადი შემოიტანა, მოხარშული კვერცხები, კარაქი,
მაწონი და თუნგიც წყალი.

ანდროს არაფრის ქამა არ უნდოდა. მთელი ღამის უძილოს
მოსვენება და ძილი უფრო ესაჭიროებოდა, თუმცა ამ პირობებში
მას არცერთისათვის არ ეცალა...

— მობრძანდით, ვისაუზნოთ,—პატარა, მრგვალ და დაბალ
მაგიდაზე დაწყობილ საუზნეებთან მიიპატიჟა სტუმარი და თვითო-
ნაც დაბალ სკამზე დაჯდა.

— გმადლობთ, არაფერი მინდა — უთხრა ანდრომ. თან უხერხულობაც იგრძნო.

— მობრძანდით, მობრძანდით, გასინჯეთ როგორი ყველია. აი, კაიმალი ნახეთ. იშვიათად, ასეთი კარგი კაიმალი გააკეთოს ვინმემ აქეთ.—კოვზით აიღო და მოსვა.

ანდრო ჩამოჯდა დაბალ სკამზე. უნდოდა ძალა დაეტანებინა თავოსთვის, ექამა რამე, მაგრამ თითქოს პირი შეეკრა. ერთი ლუკმა ჩაიდვა, წყალი დააყოლა და ისევ თამბაქო ამოიღო.

არც ღურსუნს უქამია ბევრი, წამოდგა, პალტო ჩაიკვა და ანდროს წამოჰყვა.

მურადისას მეზობლებს მოეყარათ თავი. მურადი ისევ შეკრული იდო. მას ახლა აღარ ეძინა. ცართოდ გაღებულ თვალებს უაზროდ ატრიალებდა. ისევ იგროხებოდა, იღმიკებოდა და ღმუროდა. აქეთ-იქით ჩამდგარი გლეხები სიპრალულით დაყურებდნენ. მათი სასუბები მწუხარებით იყო მოცული. თვალცრემლიანი ნაილე თავზე უსვამდა ძმას ხელს და ხუჭუქა გრუზა თმას უსწორებდა. მისი დამწუხრებული სახე უფრო აძლიერებდა იქ მყოფთა გულში სევდასა და ნალევლს.

თავმჯდომარე ახლოს მივიდა მწოლარესთან, თავზე დაადგა და თვალებში ჩახედა.

— როგორ ხარ, მურად? ა, მურად?—ჩასძახა მან, მაგრამ მურადს არაფერი ესმოდა. ის ისევ ატრიალებდა თვალებს და ისევ უაზროდ ლულულულებდა.

— ცოდებმა გვიქნა, ცოდებმა—უჩუროხულებდნენ გლეხები ერთმანეთს. ზოგიერთები ზიზლით გამოიხედავდნენ ანდროსაკენ და წარბებს ისე შეხრიდნენ, თითქოს ანდრო ყოფილიყოს მურადის გაუბედურების მიზეზი.

ახალგაზრდებიც აქ იყვნენ. მათ დამარცხებულის პოზა მიეღოთ და ჩუმად იდგნენ. ანდროს შეხედავდნენ ხშირად. ამ კაციდან მოელოდნენ საიმედო სიტყვების გაგონებას.

ახალგაზრდებს შორის ყველაზე მეტი აღელვება თოფუზას ეტყობოდა. ის ხშირად ჩახედავდა თვალებში მურადს. ერთ ადგილას ვერ დგებოდა, გადიოდა, შემოდებოდა და მოუსვენრობდა. იჩენდა.

— მოვიყვანოთ ხოჯა, ნუსხა დავაწერიანოთ—დაარღვია ერთმა გლეხმა მყუდროება და სხვებს გადახედა.

— ეთხოვოთ, ძალიან კარგი იქნება—დაუმატა მეორემ.

— ჩუმად!—შეუტია თავმჯდომარემ გლეხებს—კიდევ არ ივიწყებთ თქვენ ნუსხასა და ჯადოს? ისე მოვიქცეთ, ამხანაგო ან-

დრო, თქვენ რომ თქვით: გაეაგზავნოთ ბათუმში.—მიუბრუნდა ის ანდროს.

— უსათუოდ!—დაემოწმა ანდრო და ნაილეს გადახედა.— მოიშაღე, ამხანაგო ნაილე, მურადს გაყვები! ალი, ენვერ, რეჯებ — შეხედა ახალგაზრდებს—თქვენც გაყვებით. დურასუნ, ორი ცხენია საჭირო. ერთი საკაცეც გაეაქეთებინოთ.

თაემჯდომარეს სიტყვა არ შეუბრუნებია. მიტრიალდა და დაეალები შესასრულებლად წავიდა.

გამოიღარა. ღრუბლები მიმოიფანტნენ და მზემ გამოიხედა. ნაადრევი თოვლი სწრაფად დადნა და მიწამაც იწყო გაშრობა.

ნაილემ მოამზადა რაც საჭირო იყო, საგზალი, ტანსაცმელი, მურადს დუქმორეული პირი მობანა, თმა გადაუვარცხნა და სამგზავროდ მოამზადა.

ორი ცხენიც მოიყვანეს. საკაცე იყო გაბმული. მურადი და აწვინეს, მაგრად შეუკრეს ხელფეხი და საკაცეზე დააკრეს. სამი ახალგაზრდაც მზად იყო. ანდრომ მიმართვები დასწერა—საოლქო, კომიტეტს, ცაკს, ჯანსახკომს, ყველას თხოვდა დახმარება აღმოეჩინათ მურადისათვის და სიცოცხლე შეენარჩუნებინათ.

ნაილე ცრემლებით გამოეთხოვა ოჯახს. გულში რაღაც უხილავს, მაგრამ ყოვლისშემძლე განგებას შესთხოვა, მშვიდობით დამაბრუნე ჩემს ოჯახში, მომიჩინე ჩემი ძმაო. ოჯახი მეზობლებს გადააბარა, გამოემშვიდობა ყველას და გზას გაუდგა.

ახალგაზრდებმა ნაღვლიანი თვალებით გააცილეს წასულები და როცა ისინი მოსახვევს მიეფარნენ, პირი იბრუნეს და მათ წინ გაჩერებულ ანდროს შეხედეს.

— მოარჩენენ ვითომ?—ფრთხილად იკითხა ერთმა ახალგაზრდამ და ამხანაგებს გადაავლო თვალი.

ამხანაგებმა არაფერი უპასუხეს და ასეთივე შეკითხვიანი თვალები ანდროს მიაპყრეს.

— მოარჩენენ, ამხანაგებო. საბჭოთა მედიცინა მაგასაც შესძლებს.—უპასუხა ანდრომ მათ და ამ სიტყვებმა ახალგაზრდებთან ერთად მასაც იმედი მისცა.

III

მუხლმორთხმული იჯდა ხალიჩაგადაგებულ ტახტზე იუსუფ-ალა. ხელები აქეთ-იქით შემოედგა თავზე და ბუტბუტებდა. ხან ისე დახრიდა თავს, რომ შუბლით ხალიჩას შეეხებოდა. ხან ასწევდა და ჰერს მიუშვევდა თვალებს, ხან კი წამოდებოდა და ორივე ხელს გულზე დაიკრევდა.

ლოცულობდა. ბუტყუტით იმეორებდა არაბულ სიტყვებს და უფრო და უფრო ეხსნებოდა მოლუქული სახე.

თითქო ლოცვა მალამოდ ედებოდა მის ნაოხარ გულს. მის გარდა იქ არავინ იყო. ჩამავალ მზეს სხივები შემოეპარებინა ვიწრო ფანჯარაში და ოქროსფერად მოექარჯნა მეორე მხარეს კედელზე ჩამოკიდებულ თოფი.

მამისეული იყო ეს თოფი და იუსუფ-ალა შვილივით უვლიდა მას. დაუანგულ ჩანმასს ქონით წმენდდა და საიზლეში მუდამ უცვლიდა წამალს.

თითქმის ნახევარი საათი მოანდომა იუსუფმა ლოცვას. მასაც გაუყვირდა, რომ ამდენი დრო დაკარგა უქმად, მაგრამ მაინც კმაყოფილი დარჩა, რომ დიდა ხნით განზე გამდგარმა, ბოლოს მაინც მოიგონა ალლანი და ილოცა.

ალბათ მოსუცებულოზის ბრალია, თორემ იუსუფი არადროს არ ყოფილა ლოცვის მოყვარული. ხანდახან, სხვის დასანახავად აიღებდა აბდესს და შეასრულებდა ლოცვის წესებს, თორემ ისე არაფერი სწამდა.

ხალხში კი მორწმუნის სახელი ჰქონდა. ღეთის მოშიში და წინასწარმეტყველის მიმდევარი უკეთესი არავის ეგონა.

ხოჯასაც უყვარდა. სახალხოდ აქებდა, პატივისცემით იხსენიებდა და თუ ვინმეს რჩევა-დარიგება დასჭირდებოდა, იმასთან მიასწავლიდა.

ამ საქმეში დაუზარელი იყო იუსუფი. რჩევა-დარიგებას არავის დაამადლიდა და თუ მისი რჩევით ვინმეს საქმე მოუგვარდებოდა, სასყიდელსაც არ იუქადრისებდა.

— ჭკუა ხომ უფასოდ არ რიგდება, ჩემო ემიავ!—ეტყოდა ის თავის მსხვერპლს და... ყველაფერი ისე მოგვარდებოდა, როგორც იუსუფის სურვილი იყო. გასამრჯელოს ის არ ითხოვდა, მაგრამ ორი-სამი დღით ყანაში მოხმარებას ადვილად დაავალებდა კლიენტს.

ერთი შვილი ყავდა, სულ რაღაც ორი-სამი წლის, თორემ მის ბარაზე მეტი არავინ იყო. კიდევ კარგი, რომ ბედმა გაულიმა და მესამე ცოლისაგან ოჯახის მემკვიდრე გაუჩნდა და გვარის გამაგრძელებელი შეეძინა, თორემ უნდა გადასულიყო. სხეებს უნდა დაენაწილებინათ მისი ნაკვდავი... კიდევ კარგი რომ მოიყვანა მესამე ცოლი. კინალამ დაუჯერა ეჭიმებს, ისეთ ავადმყოფობის შემდეგ შვილი არ გეყოლებოდა რომ უთხრეს.

არაფერი არ იციან ეჭიმებმა. თუ ჭალთან ალერსი შეუძლია, ძალა და ღონე ერჩის, შვილი რატომ არ უნდა შეეძინოს. რა ვუყოთ მერმე, ახალგაზრდობისას, ბათუმში ყოფნისას ჭალთან ჰქონდა კავშირი. ავადმყოფობა ძნელი იყო, მაგრამ სოფლის წამლობამ

მოარჩინა. მას შემდეგ თავი არ წამოტყენია. არა, თვითონ არაფერ შუაში იყო, ცოლები იყვნენ დაძნალებენი. გამოვა ქალი უნაყოფო. ასე რომ არ იყოს, მესამე ცოლს არ აყვებოდა ბავშვი. საერთოდ ქალსაც უნდა შერჩევა. თავის დროზე რომ დაეჯერებინა და ისე მოქცეულიყო, როგორც ხოჯა ურჩევდა და ის ქალი შეერთო, რომელზედაც ხოჯამ მიუთითა, ახლა ოცი წლის ვაჟი ეყოლებოდა, მაგრამ... არ ღირს იმაზე ფიქრი. ახალგაზრდა იყო, გამოუცდელი და ქვეყნის ხმას აჰყვამ. ცუდს ამბობდნენ იმ გოგოზე, თითქოს ახალგაზრდა ხოჯას რაღაც... მაგრამ განა შეუძლია ვინმეს ხალხის ენას ბოქლომი დაადოს? ვიღაც ერთი ამოიყრანტალებს და გადამდებ სენივით მოედება ქვეყანას.

იუსუფ-ალას მესამე ცოლის შერთვის ამბავი მოაგონდა.

ამ დროსაც ისე დაყარეს ხმა, ჩურჩულებდნენ, კიდეც ხოჯა მამულზე ავრცელებდნენ კორს. კიდეც კარგი, რომ არ დაიჯერა. ან როგორ დაიჯერებდა. განგებ შეთხზეს ეს ქორი იუსუფ-ალას ცოლებმა. აღარ უნდოდათ მესამე გაჩენოდათ ოჯახში. ძლივს შეეჩვივნენ და შეეგუენ ერთმანეთს. საერთო ენა მონახეს. ჭირ-ვარამი გაინაწილეს. საზიარო ქმართან ცხოვრებაც მოითმინეს და ახლა მესამე ქალის შემოსვლა ოჯახში ძალიან ძნელი იყო. იმას უნდა დაესაკუთრებინა საზიარო ქმრის ლოგინი და ესენი კი...

ალას გული მოუვიდა ცოლებზე. გაუტანელი არიან, ერთმანეთისათვის შეშურთ ბედნიერებაო, გაიფიქრა. მოაგონდა პირველი ცოლის ცრემლები. მუხლებზე ეხვეოდა, ეხვეწებოდა, მომკალი ჯერ, დამასაფლავე და მერმე მოიყვანე მეორე ცოლიო. ვერ ურჩევდებოდა იმ აზრს, რომ მისი ქმარი მეორე ცოლთან ინებივრებდა იმ დროს, როცა პირველი ცოლი იმავე სახლში იქნებოდა.

— სულელებია ქალები—ღიმილმა გაუპო ზაგე ალას.—რა ატირებდა, რად იკლავდა თავს? სულერთია, ქალი ყველა ქალია, ყველა ერთნაირია და ერთი ჯიშის. მრავალი ცოლი კი ხალისია და სიხარული. ცხოვრებას არ მოგაწყენს. ახალი სურნელება შემოდის ოჯახში ახალი ცოლის შემოსვლით. თითქოს ცხოვრებას თავიდან იწყებ. ძველი ცოლები რომ ადვილად ურჩევდებოდნენ ამ ამბავს, იუსუფი ახლაც მოიყვანდა მეოთხეს. თუმცა, რაღაც ძალიან წახდა ცხოვრება. ამ კომუნისტებმა უცნაური ამბავი მოიტანეს. იუსუფ-ალას არ ეგონა თუ ასე იქნებოდა. თავიანთ მოტანილ ამბავს თვითონვე წაიღებენო, ფიქრობდა. მაგრამ ახლა ატყობს, რომ ისინი წასასვლელად როდი მოსულან. რას ჰქვიან „მოსულან“? მოსულან კი არა, აქვე ყოფილან, აქ დაბადებულან და აღზრდილან. აი მაგათი რჯულისც კი...

და მაგრად შეუკუროთხა მან.

ქარები ფრთხილად გაილა და შიგ შემკრთალი ორჯ თვალა გამოჩნდა გიშრის მძიეებივით.

—ყავა მოგართუა?—და თვალებთან ერთად ფერმკრთალი ქალის სახეც გამოჩნდა.

— მოიტანე—მკეახედ მიუგო ალამ, მიბრუნდა და ფანჯარაში გაიჭვრიტა.

ფერმკრთალი ქალი ისევე შემოვიდა. ყავა შემოიტანა. ფინჯანით ცივი წყალი მოაყოლა და დადგა ტანტზე, სადაც იუსუფ-ალა ფეხმორთხმული იჯდა.

— ხოშნეთი ისევე ავადაა?—ახედა ალამ ქალს და ისე შეეკითხა.

— გონჯადაა—მიუგო ქალმა და სათქმელად მოფიქრებულნი სიტყვა ჩაყლაპა.

— განწირულს არაფერი ეშველება. ნუსხამ რომ არ უშველა, არაფერი არგებს. ილოცოს, ალლახს ვევედროს, რომ ჯოჯოხეთში არ მოხვდეს. რას დგებხარ. წადი და ასე უთხარი—წარბშეკრულმა შეხედა ქალს.

ქალმა მხოლოდ თვალეები მოარიდა ალას მრისხანე სახეს. თითქო რაღაც გადასაწყვეტი აქვსო, ისე ჩაფიქრდა და მალე ისევ ალაპარაკდა.

— იქნებ მორჩეს, იუსუფ-ალა, დაეხმაროთ რამე. ცოდნაა ქალი.—ცრემლები აუბრწყინდა თვალეებში.

— ახლა გეპრალება?—თავი ჩაიქნია ალამ.—დასაწყვეტი ხარო ქალეები. აქი როცა მის მოყვანას ვაპირებდი, ძალიან სწუხდი. სახლში არ შემოვეუშეებ, თავს მოვიკლავე, მოვწამლავე, იძახდი. ხა-ხა-ხა, სასაცილო ხასიათი გაქვეთ—ფინჯანი აილა და ცივი წყალი მოსვა.

— მაშინ... მაშინ სულ სხვა იყო, იუსუფ—ცრემლები მოიწმინდა ქალმა.—მაშინ მე ის მძაგდა. მძაგდა იმიტომ, რომ შენ მიყვარდი. მე მეგონა ჩემი სიყვარული შენშია ცოლად გადამხმარებდას. მეგონა მეც გიყვარდი, მაგრამ რახან ყველაფერი სულ სხვა გზით წავიდა, ვინემ მე ვფიქრობდი, რახან ჩემი ქმრის სარეცელი სხვისი საზიარო შეიქნა, რახან ბედმა მე ცრემლები და...—აქვითინდა და თვალეებზე აიფარა იაზმა.

— გეყოფა!—შეუტრა იუსუფ-ალამ და ფინჯანი ტანტზე დადგა... უნაყოფო ხეს მოსჭრიან, უჯიშო ქაკს თავიდან იცილებენ, ქალი კი უფრო მეტის ღირსია. მქადს გაქმევთ, გინახავთ, მეტი რა გინდათ? მითხარო, რა გინდათ მეტი?—წამოდგა და პირისპირ დაუდგა ქალს.

ქალმა ჯერ მორჩილებით დახარა თავი, შემდეგ, თითქოს ზედმეტი დამცირება იგრძნო, თავმოყვარეობამ დასძლია და თვლებში ცეცხლის ალი ანათდა.

— მკადის ქამა არაა სიცოცხლე, იუსუფ!—მრისხანედ სთქვა მან. მკადს ძალსაც მიუგდებენ, ადამიანს ადამიანური სიცოცხლე უნდა, მოვლა და პატრონობა, ალერსი და სიყვარული, გავლა და გამოვლა, ჩვენ კი...—ვერ გაბედა ეთქვა ყველაფერი, რაც გულზე ჰქონდა მოწოლილი.

იუსუფ-ალამ ანთებული თვალები მიუშვირა ქალს. ხელები აუცახცახდა და ტუჩები აუთრთოლდა.

— თქვი, თქვი ბარემ რაც გინდა!—დამუჭა ხელი და ჰაერში ასწია—თქვი და გაგაქრო ბარემ, თქვი, თქვი-მეთქი!

ქალმა დასძლია ყოველგვარი შიში, კრძალვა და მორიდება, რომელიც მთელი სიცოცხლის განმავლობაში მძიმედ აწვა მას და პირუტყვივით ამუნჯებდა. ამოივსო მოთმინების ფიალა, ამოვიდა ბოლმა მკერდიდან და საცაა უნდა გადმოიღვაროს.

ყველა ადამიანს აქვს ზოდმისა და ნაღვლისათვის ჭურჭელი გულში. ზოგს—ძალიან პატარა მოკულობის—მალე აივსება, მალე გადმოხეთქს, მაგრამ ზოგიერთს—ხშირად სიკვდილამდე ყოფნის მთელი განვლილი დღეების სიმწარეს ინახავს და აგროვებს შიგ. აგროვებს და ითმენს... ითმენს, ითმენს, მაგრამ ხანდახან ისეთ მძიმე დაწოლას შეხვდება, რომ ვეღარ გაუძლებს.

ასეთ დღეში იყო ახლა იუსუფ-ალას პირველი ცოლი ლუთბიე. უენო, თავმდაბალი, ხათრიანი, მორჩილი ქალი საესებით შეცვლილიყო. ამოცლოდა მკერდიდან საკუთარი გული და მის მაგივრად ახალი, უფრო გამბედავი და გმირული გული გასჩენოდა.

ქალის მიმქრალი სახე მის სწეულებას ადასტურებდა. ტუჩები გათხელებოდა, ცხვირი სანთელივით ჩამოქზოდა, სახე ჩამოგრძელებოდა და თავლისფერი თვალები უფრო ღრმად ჩამოჯდარიყვნენ ბუდეში...

მომაკვდავი ადამიანი გაიბრძოლებს უკანასკნელად. შეებრძოლება სიკვდილს. შეებრძოლება ყველაფერს და ყველას, ვინც გზაზე გაეხილება და სულის მოთქმის საშუალებას არ მისცემს.

ასეთ გაბრძოლებას გავდა ლუთბიეს გაბრძოლება, მაგრამ ეს გაბრძოლება როდი იყო საკუთარი თავის, საკუთარი სიცოცხლის შესანარჩუნებლად. თავი დიდი ხანია დავიწყებოდა მას. დღე, დღე ხანია მას შემდეგ, რაც იუსუფ-ალას ხელში ჩაეგარდა, რაც გაუსრუვდა იმედი, გაუქრა ის მშვენიერი ოცნება ქმარსა და

ოჯახზე, რომელიც ყველა ქალს ცამეტი-თოთხმეტი წლის ასაკიდან დაფარვატებს თავზე და ილუზიების ქვეყანაში დააჭოლებს.

თექვსმეტი წლის ლუთბიე ციდან მოწყვეტილ ვარსკვლავს ჰგავდა. მთელ იმ ყუთხეში არ დადიოდა მისი შესადაქი. ბავშვობიდანვე სხვაზე იყო დანიშნული და კანონით სხვისი უნდა გამსდარიყო, მაგრამ ფულს ყველაფერი შეუძლია. ჩვიდმეტი წლის ვაჟი ხეზე ჩამოჰკიდეს და ჩამოახრჩვეს... ლუთბიე მაშინ ათითერთმეტი წლის იყო, მაგრამ მაინც ღრმა სიმწარე იგრძნო მისმა გულმა. მას არ უყვარდა საქმრო, ან რა იცოდა ნორჩმა გულმა სიყვარული, მაგრამ მაინც ეწყინა. ტიროდა მთელი დღე.

— ბედი ჰქონია მაგ გომბიოს. — იძახდნენ მეზობლებში, როცა იუსუფ-ალამ დანიშნა პატარა ლუთბიე. — ვინ ღირსა აღას ცოლობას. ბედნიერი იქნება მთელ თავისს სიცოცხლეში.

ასე ეგონა ლუთბიესაც. თანდათან იკრებოდა ნორჩ გულში საქმროს სიყვარული და როდესაც მათი შეუღლება კანონიერი გზით ფაქტი გახდა, ლუთბიეს სიხარულს საზღვარი არ ჰქონდა.

შევიდა ახალ ოჯახში და შეიტანა მოლიმარი სახე, ცქრიალა თვალები, ჯანსაღი სხეული, ახოვანი ტანი, მოღერილი ყელი, — ყველაფერი ის, რაც ქალს ამშვენებს, ალამაზებს, აღიდებს და მიმზიდველს ხდის.

ბედნიერი იყო მაშინ.

ღოვლათით სავსე ოჯახი ღულდა და გადმოღულდა.

ახალგაზრდა ქმარი თავზე ადგა და დედამთილიც მზრუნველობით ეპყრობოდა.

ოცდახუთი წელია მას შემდეგ. ოცდახუთი წელი!.. კიდევ როგორ გაუძლო ლუთბიემ, როგორ მოიტანა სული აქამდე!.. თუმცა რა, მარტო სული მოიტანა... დანარჩენი რა მოყვა გარდა სანთელივით გაყვითლებული სახისა და ჩონჩხისა, რომელსაც ჯერ კიდევ არ დაუკარგავს მოძრაობის უნარი და შესაძლებლობა!.. ორმოცი წელი შეასრულა, მაგრამ თითქოს ოთხმოცი წელი ეკიდოს ზურგზე.

ქონებას როდი შესძლებია გაბედნიერება. ცივი ლუკმა იყის და ტკბილი ცხოვრება. აი, ისეთი, მის მშობლებს რომ ჰქონდათ.

ერთმანეთს უნაწილებდნენ ლუკმას, თვალეში შესცქეროდნენ. არაფერი ჰქონდათ, მაგრამ მაძლარი იყვნენ. სიყვარულით კვებავდნენ ერთმანეთს.

კარგია სიყვარულზე დამყარებული ოჯახი.

ვინ იცის, შვილი რომ მისცემოდა, იქნებ იუსუფსაც ჰყვარებოდა. მეორე ცოლი რომ არ მოეყვანა... თუმცა რატომ არ მოიყვანდა, როცა შესაძლებლობა ჰქონდა, ოჯახი და პირობები ხელს უწ-

ყობდა. ბევრი ცოლის ყოლა ხომ სახელი იყო. რატომ არ გაითვალისწინა ეს თავის დროზე ლუთბიემ. არ არჩინა—ღარიბს, ლატაკს გაპყლოდა და ამდენი ტანჯვა არ განეცადა?! ბარემც რომ ერჩინა, მაგრამ მას არავინ აძლევდა არჩევის უფლებას. ალაზე უკეთეს სასიძოს სად იპოვნიდნენ. თუ მეორე ცოლს მოიყვანს, რა უშავს, პირველი ცოლი ეყოლება მაინც პატივში. ვის არ მოუყვანია მეორე ცოლი, თუ ოჯახი უწყობდა ხელს.

გვიანდა არის, თორემ ახლა კი იცის ლუთბიემ, ვისაც მისთხოვდებოდა. ვინ იცის, ახლა რამდენი შვილი: ეყოლებოდა. როგორ დიდრონები, ოცი წლის, ან ცოტათი ნაკლების. მერმე როგორ საყვარელია შვილი!.. დედა-შვილის გული შეერთებულად ძგერს. რამდენი სიამოვნებაა, როცა პატარა ხელებით დედის გულ-მკერდში დაიწყებს ცაცუნს საყვარელი ბავშვი.

ქალმა, რომელსაც ეს არ გამოუცდია, რა იცის სიცოცხლისა და სიტკბოების. ყველა ალერსზე ძვირფასია პაწიას მოალერსება. უმანკო შემოტიტინება და ზოგჯერ გულუბრყვილო ცრემლების გადმოღვრა.

მერმე როგორ უნდოდა ლუთბიეს დედა გამხდარიყო, შვილები ეშობა, ალერსა და მათი ცქერით დამტკბარიყო. რატომ უნდა წართმეოდა მას გრძნობა შედინიერი დედისა!..

რა სჭირდა საამისო. ჯანმრთელობა არ აკლდა და სხვა რამ. რომ ის რაღაც სენი არა... რამდენიმე შვილის დედა გახდებოდა. ის სენი კი ადამიანის გამაუბედურებელი ყოფილა. შეუღლებიდან ერთი კვირის შემდეგ გამოაჩნდა. დასცა, დააგდო, გამოაცალა ძალა და ღონე, ძარღვებიდან ამოსწოვა სისხლი. საიდან გაჩნდა, სად იფარავდა თავს ის წყეული. თვითონ იუსუფს არაფერი ეტყობოდა ავადმყოფობის. გარეგნულად მეტად ჯანმრთელის შეხედულება ჰქონდა... თურმე ბათუმში შეეყარა. რამდენიმე ხანს ატარა საიდუმლოდ, შემდეგ შეუდგა წამლობას, სოფლის წამლები იხმარა, ექიმის წამლებიც აურია. ამით თითქოს მოკლა, მიაძინა სენი, მაგრამ...

კიდევ უნდოდა საიდუმლოდ შეენახა იუსუფს ეს ამბავი. ნუსხას აწერიებდა ხოჯას, წყალში გალესავდა და ასმევდა, მაგრამ წყალში გალესილი წამალი წყალისებრ მკურნალობდა.

გვიან, ძალიან გვიან მიმართა ექიმს დახმარებისათვის, მაგრამ ლუთბიე როდღი გაასინჯა, ისე გამოაწერიონა წამალი. მაინც იმოქ-

მედა წამალმა, მიაძინა სენი და სხეულში შედენა...

ლუთბიეს ბრალი დარჩა უშვილოა. უნაყოფო გამოდგა და აღას გვარი გადაშენდება თუ...

და იუსუფი მეორე ცოლის ძებნას შეუდგა.

კარგი, ახალგაზრდა და ჯანსაღი. ასეთი იყო მისი მოთხოვნილება. ლუთბიეს ჩამოშორდა. ცალკე გაიწყო ლოგინი და ახალი ცოლის ძებნა განაგრძო.

ვერაინ აღწერს ლუთბიეს ნაღველს, სევდას და განცდებს მაშინდელს. ცრემლები ასველებდა ბალიშს, როცა ლოგინში ჩწვა და სტიროდა.

ბევრი ეხვეწა, მომკალი, მერმე მოიყვანე ცოლიო, მაგრამ თითქოს სიკვდილზე მეტი სასჯელი უნდოდა მისთვის ქმარს, უარს ეუბნებოდა. არ ემეტებოდა სასიკვდილოდ. ეშხი და სილამაზე ჯერ კიდევ იმდენი შერჩენოდა, რომ ბევრ ქალს ჩრდილავდა. ლერწამივით ტანი თითქოს მეტი მიმზიდველი გამხდარიყო. და არ უნდოდა გაეშვა. როგორ შეიძლება გაშვება. მკადი არ აქვს თუ?

რატომ უნდა გაუშვას. მის ძველებს ხუთი-ექვსი ცოლი ჰყოლია, მას ორი ყავდეს. შვილი რომ არ ეყოლა, თორემ შეიძლება არც ეფიქრნა მეორე ცოლზე.

ამით იმართლებს თავს იუსუფ-ალა. თუმცა არაეინ სდებს ბრალს. წესია მრავალცოლიანობა. ყურანიც არ უკრძალავს.

— იუსუფ, ცოდვაში დგები, გეყოს ჩემი წახდენა, ნუ მოსტაცებ სხვასაც დედობის უფლებას. ნუ ზოუწამლავ სხეულს კიდევ სხვა ვინმეს—შეევედრა ლუთბიე, როცა შეატყო, რომ იუსუფი თავისას არ იშლიდა.

— ჩემად, მაშ გინდა გადაშენდეს ჩემი გვარი?—უყვირა იუსუფმა და შეიძლება დაერთყა, რომ ლუთბიეს თავი არ დაეხარა და არ გასულიყო.

დადუმდა, ჩაიხრჩო გულში ნაღველი, ამოსწვა მწარე დარდები.

მოიყვანა მეორე ცოლი იუსუფმა. მეხუთე წლისთავზე მოხდა მეორე ქორწინება და პირველ ქორწილზე მეტი ლხინი გადაიხადა აღამ. ყველა შეკრიბა და ნიიპატიყა. განიახლა სიყმაწვილე და მოიგონა პირველი ღამე. განუსაზღვრელ ბედნიერებას განიცდიდა ახლა. ნეტარებით იყო სავსე მისი გული.

ჩადრში გახვეული ქალწული, 15 წლის ხოშნეთი, შიშით თრთოდა ამ დროს ოთახში შემწყვედელი. ჩიტყვით ფართქალებდა მისი გული. შიში გამჯდარიყო მის ორგანიზმში. თუმცა ქალები აიმედებდნენ და ანუგეშებდნენ. მარტოდ დარჩენილმა კი ცრემლებით გაიწურა. როგორ მოეპყრობოდა მას ის კაცი, რომელიც

მისი ქმარი გახდა და მისი პატრონი შეიქნა. მერმე როგორ ეშინოდა ამ კაცის ხოშნეთს. ბავშვობისას, როცა იუსუფ-ალას დაინახავდა, გარბოდა. როგორ წარმოედგინა, რომ ამ კაცის ცოლი გახდებოდა, მასთან ერთად ერთ ოთახში დარჩებოდა, მასთან დაწკებოდა... ერთ ლოგინში... ალლაჰ!..

გააჟრჟოლა. შიშმა აიტანა, ააკანკალა და ერთი ისეთი შეპკივლა, რომ მეორე ოთახში ცრემლების ტბაში მჯდომარე ლუთბიეც კი წამოვარდა.

უნდოდა შესულიყო, ენახა რა ხდებოდა იქ, სადაც პატარა ძალია დატოვებული, მაგრამ ვერ შეპბედა. შეეშინდა, ვაი თუ იუსუფ-ალამ მომისწროსო, კედელს აეკრა და სულის თქმაც შეაჩერა.

საკუთარი თვალით თავისი საფლავის დანახვას, თავისი გასვენების დასწრებას, რომ ეს მოსახერხებელი იყოს, უფრო აიტანდა ლუთბიე, ვინემ იმდამინდელ განცდებს.

უნდოდა დავიწყებოდა ყველაფერი, შერიგებოდა ბედს, მაგრამ ვერ შესძლო. ამოვარდა მკერდიდან გული. გაშრა სისხლი ძარღვებში. არ უნდა გაიგონოს და დაინახოს, რაც მის გარშემო ხდება. მაგრამ თითქოს ჯინაზე ხედავს და უყურებს. ხედავს, რომ დაადგეს გულზე ფენი, საშინელი ფენი. გადათელეს და წაბილწეს მისი თავმოყვარეობა. ესმის საკუთარი გულის კვნესა და გლოვა.

უცნაური ამბავია. ნუთუ მართლაც ასე ჭებელია ამ ამბვის ატანა!

უსინდისო, გაიძვერა. როგორ მხიარულად შედის ახალ ცოლთან. როგორ მიუახლოვდა, მოხადა თავზე, უმანკო თვალებში ჩახედა და...

არა, აღარ შეუძლია ლუთბიეს მოითმინოს ეს. ახლავე შევარდება, დაავლებს ხელს გამყიდველ, მოღალატე ქმარს და... ან შეაკვდება, ან ყელს გამოლრდნის. საკუთარი კბილებით გამოლრდნის ყელს... მაგრამ სადაა ამის გამბედაობა! სადაა ამდენი ძალღონე!

ჩაემხო. მაგრად ჩარგო ბალიშში თავი, ყურებიც დაიცო, რომ არ გაიგონოს რა ხდება კედელს იქით, სადაც წყეული ქმარი ახალ ცოლს ეალერსება.

არაფერი შევლის, მაინც ესმის, ესმის კი არა, ხედავს ყველაფერს. თითქო კედელი გამჭვირვალე გახდა.

რა საზიზღარი სურათია. როგორ შევლის ნუკრივით კრთის იუსუფ-ალას მკერდზე მიკრული ხოშნეთი. როგორ არიდებს სახეს მის ტუჩებს, რომელიც ლოშნის მას, არიდებს, მაგრამ სანამდე. ან როგორ დააღწივს თავს ვაჟკაცის ხელებს ნორჩი და სუსტი ქალი.

ან რა უფლება აქვს თავის დაღწევისათვის იბრძოლოს. ის ხომ იუსუფის საკუთრებას შეადგენს აშლამიდან და ხოშნეთს რა უფლება აქვს საკუთარი ნიეთის სარგებლობა აუკრძალოს ადამიანს. ჩათრევას ჩაყოლა სჯობია.

და ხოშნეთი მორჩილებით ჰხრის თავს.

ცეცხლი თანდათან მატულობს ლუთბიეს გულში. ცეცხლი საშინელი შურისძიების... ზიზლის. საშინელი ზიზლის.

მხოლოდ იუსუფ-ალაა ბედნიერი და კმაყოფილი. პირველი ცოლის ცრემლები მალამოდ ეცხება გულზე და მეორე ცოლის კენესა მუსიკაა, დამატკობელი მუსიკა...

კიდევ ცოტა და...

კედელს იქით-აქეთა მხარედან ერთნაირი კენესა აღმოხდა სხვადასხვა ტანჯვით გამოწვეული.

ამ ღამემ ლუთბიეს გულში გასწყვიტა უკანასკნელი ძარღვი, რომელიც ჯერ კიდევ სასიცოცხლო სისხლს აწვდიდა სხეულს.

ამის შემდეგ მას არც გრძნობა გააჩნია, აღარც სიცოცხლე. გამოფიტულია და გამომშრალი.

რა ტრალეღიაა, როცა ადამიანი დაინახავს, რომ მომავალი გაქრა.

როცა გუშინდელი დღე ბეუტავს იმედის შუქის ნაცვლად და ხვალინდელს დასცინის.

რატომ უნდა იცხოვროს ასეთმა ადამიანმა.

თვითმკვლელობასაც ნებისყოფა უნდა, ნებისყოფა კი იმას აქვს, ვისაც გული აქვს. ლუთბიეს არაფრის უნარი აღარ დარჩენია.

როგორ ურიგდებოდნენ ქალები ასეთ ამბავს. ლუთბიე პირადად იცნობს ისეთ ცოლებს, რომლებიც შეგუებიან ასეთ მდგომარეობას და ორივე ცოლი ტკბილად ცხოვრობს ერთ ოჯახში. ხან ერთი ხდება ქმრის ალერსის ღირსი, ხან მეორე...

რატომღაც ერთხელაც არ უკითხავს ლუთბიეს ასეთი ცოლებისათვის, როგორ აიტანეს ასეთი ცხოვრება. არ ეგონა, იოუ მასაც არგუნებდა ცხოვრება იმათ მეს.

არა. ლუთბიეს არ შეუძლია შეურიგდეს იმ მდგომარეობას, რომ მისი ქმრის საწოლი საზიარო იყოს.

სისულელეა. რაღა დროს შერიგებაზეა ლაპარაკი, როცა უკვე შეურიგდა. უკვე გახდა საზიარო, საზიარო კი არა, ჟუკვე წაართვეს ქმარი.

მეორე დღეს გვიან წამოდგა იუსუფი. კმაყოფილი და მხიარული იყო ის. უბრწყინავდა თვალები და უღიმოდა ტუჩები.

ხოშნეთი ამდგარიყო. მოკრძალებით იჯდა ტახტზე და საკუთარ ხელებს დასჩერებოდა.

იუსუფმა ლუთბიე მოიხზო და ხოშნეთი ჩააბარა.

— ეპატრონე და მოუარე. — შემდეგ გაიღიმა და ორივეს ამაყად გადახედა.

ლუთბიეს თვალებზე ცრემლები ისევ კიბაფობდნენ, მაგრამ თავს ძალა დაატანა. მივიდა ხოშნეთთან, ორივე ხელი გაშალა და მეტოქე გულში ჩაიკრა.

არ ეგონა თუ გულში გრძნობის ნატამალი ექნებოდა. გამშრალ ხედ წარმოიდგინა თავისი თავი, მაგრამ იგრძნო თუ არა მის მკერდზე მიყრდნობილი ახალგაზრდა ქალის თავი, მოესმა თუ არა ამ ქალის გულამოსკვნილი ქვითინი, თვითონაც აუთოთოლდა გული და ატირდა.

ეს ტირილი შვების მომგვრელი და გულის დამაამებელი იყო ორივესათვის.

იუსუფმა კიდევ ღიმილით გადახედა ცოლებს და ოთახიდან გავიდა.

უფროს-უმცროსი ცოლები პირველი დღიდანვე დამეგობრდნენ. დედაშვილივით შეუყვარდათ ერთმანეთი.

ბავშვი იყო, მაგრამ უფრო ბავშვური გული ჰქონდა ხოშნეთს. ობლად აღზრდილი ბავშვი ყველას შიშით შეჰყურებდა თვალებში.

შეეთვისნენ, შეეგუენ ერთმანეთს. მოიტირეს თავიანთი ბედი ერთმანეთის მკერდზე და შემდეგ დამშვიდდნენ.

— ნეტავ ამას მაინც გაუჩნდებოდეს შვილი! — ნატრობდა ლუთბიე, მაგრამ წლები მიდიოდნენ და არაფერი სჩანდა.

უფრო სუსტი გამოდგა მეორე ცოლი. ისიც შეიპყრო მალულმა სენმა და ლოგინად ჩააგდო.

— თქვენ გინდათ მოკვდეს უშვილოდ იუსუფ-აღა? — ბრაზით წამოიძახა ერთ დღეს იუსუფმა და მესამის მოყვანა გადაწყვიტა.

ეს უფრო ჩქარა და უმტკივნეულოდ ჩატარდა.

ხოჯამ ურჩია. მიუთითა საცოლეზე და იუსუფმაც მაშინვე გადასწყვიტა. ორმოც წელზე გადაცილებული იყო და კიდევ ახალგაზრდა ქალი მოიყვანა. თუმცა ეს ქალი გაცილებით მომწიფებული და დასრულებული იყო, ვინემ წინა ცოლები.

მესამე ქალის შემოსვლას არ მოუხდენია არავითარი გავლენა ქალებზე. ხოშნეთი ავადმყოფი იწვა ამ დროს, ლუთბიე უვლიდა და პატრონობდა მას და ოჯახსაც.

მესამე არ გამოდგა ისეთი, როგორსაც მოელოდნენ. მეორე დღიდანვე შეუდგა ოჯახის მართვას და დაუფლებას.

ყველა კუნჭული დაათვალიერა და ყველა უჯრა გასინჯა. მალე ასწია თავი და ისე გადმოხედა წინანდელ ცოლებს.

არ მოეწონათ ერთმანეთი.

ლუბიმე და ხოშნეთიმ ერთმანეთს მიუტირეს. მესამემ კი ორივე მიაწყევლა.

— ოჯახი დაგიქვევიათ, საწყალი კაცი დაგივსიათ, დაგვესოთ თვალები!—გაცნობისთანავე ასე მიმართა მან დამხდურ ქალებს. შემდეგ იუსუფ-ალას მოელაპარაკა. ბერწი ქალები რად გინდა სახლშიო, უთხრა. ურჩია მათი თავიდან მოცილება, მაგრამ აქ იუსუფ-ალას თავმოყვარეობამ გაიმარჯვა.

ზოგი რამ მაინც დაათმობინა გულიზარმა.

ერთ ოთახში მოათავსებინა ორივე ცოლი და თვითონ ყველაზე კარგი ბინა აირჩია.

არც ახლა გამართლდა იუსუფ-ალას იმედი. ორი წელი გავიდა და შვილი არ ჩანდა.

ხოჯამ შეპირდა დახმარება. ისეთ ექიმს გამოგიგზავნი, რომ შვილი აყოლოსო,—უთხრა და მართლაც არ დაუგვიანა.

ერთმა მოხუცმა ქალმა იწყო სიარული გულიზართან. დღითაც დადიოდა, საღამოობითაც. რამდენიმე ოქრო აართვა იუსუფ-ალას და ერთ საღამოს მეორე მოხუცი ქალი მოიყვანა.

ორივე მარტოდ დარჩნენ იმ ღამეს გულიზართან და წამალი გაუტყდეს. იმ ღამიდან ერთი კვირის განმავლობაში ყოველდღე უკეთებდნენ წამალს და დილაადრიან მიდიოდნენ.

ერთი კვირის შემდეგ უთხრა ხოჯამ, რომ ალლახს უნებებია შვილი შეძინოს იუსუფ-ალას და ნება მისცა ცოლთან დარჩენის.

სასწაული ბართლაც მოხდა და გულიზარს შვილი შეეძინა.

ვაჟი! ეს ნანატრი იყო და ნატვრაც აუსრულდა. ახლა უფრო გაამაყდა გულიზარი. დაიმორჩილა და მუქში მოიმწყვდია უფროსი ცოლები და გაბატონდა ქმარზედაც.

დაჰკარგეს მოწონება წინა ცოლებმა. ოჯახის მძიმე უღელი უფრო დააწვა მათ კისერზე. აუტანელი გახდა მათი ცხოვრება.

იუსუფ-ალამ მიუშვა თავის ნებაზე გულიზარი. გახადა სრული მბრძანებელი და დაუმორჩილა მთელი ოჯახი, თუმცა წესის მიხედვით ოჯახის უფროსობა პირველ ცოლს ეკუთვნოდა.

რაც სურდა, იმას აკეთებდა გულიზარი. როგორც უნდოდა ისე ატრიალებდა ყველას და თვით იუსუფ-ალასაც თავის ნებაზე ათამაშებდა.

ექიმი დედაბერი დიდი საჩუქრით დაჯილდოვდა. ყველაზე

დიდი მოკეთე გახდა ამ ოჯახის და თავისებური უფლებები მოიპოვა. როცა სურდა, მამინ მოვიდოდა. კიდევ საჭიროა წამლობაო, მოჰყავდა დამხმარე ქალი და მთელ ღამეებს ატარებდა გულიზარის ექიმბაშობაში.

ქალებს მეტი სიფხიზლე აქვთ. ხშირად ჰემზარიტ ამბავს მიიღებენ საექვოდ, თორემ თუ ოდნავ ჩაექვოა, მამინ ხომ სულ გაქეჰვენ.

და ერთხელ მოხუცი „ექიმი“ ქალის საქციელზედაც დაექვდნენ.

იუსუფ—ალა ბათუმში იყო წასული. საჩუქრები უნდა მიერთ-მია ვაჟის დედისათვის. გულიზარმა გაუშვა ის ამ დავალებებით.

სწორედ იმ საღამოს მოვიდა „ექიმი“ დედაბერი. წინასწარ გააფრთხილა ქალები. გულიზარს უთხრა, რომ კიდევ არის საჭირო ექიმობაო და თავისებური დავალებები მისცა.

როცა დაღამდა და ქალები დაწოლას აპირებდნენ, დედაბერს მხლებელი ქალი მოყვა და ორივენი გულიზართან შევიდნენ.

— რატომ იფარავს ის ქალი ჩვენთან სახეს?—გულუბრყვი-ლოდ შეეკითხა ხოშნეთი ლუთბიეს.

ლუთბიე დიდი ხანია ფიქრობდა ამაზე. თვით იმ ქალის ჩაცმულობაც საექვოდ მიაჩნდა და ახლა უფრო გაუძლიერდა ექვი.

— არ ვიცი.—უპასუხა, მაგრამ შემდეგ საიდუმლოდ ყველა-ფერი გაუმხილა.

ღამე მიდიოდა, მაგრამ ქალებს არ ეძინათ. ოთახში კი სა-მარისებური სიჩუმე იდგა. სმენად იყვნენ გადაქცეული და სუნთ-ქვაც შეეჩერებინათ.

— დაეყუროთ. კარებიდან შევიქვრიტოთ—ჩუმად უთხრა ხოშნეთიმ ბედის მოზიარეს და ორივენი ფრთხილად წამოდგნენ. თითქო უსხეულო არსებად იქცნენ. დაჰკარგეს სიმძიმე და ბუმ-ბულის ფეხები გამოისხეს.

მკიდროდ იყო შეკრული კარები, მაგრამ ოდნავ მოდიოდა შუქი კედელში. დააყურადეს. ჩუმი ლაპარაკი ისმოდა. მკრთალად მოსჩანდა დედაბრის სახე. ტანტზე წამოწოლილიყო, რაღაცას ბუტ-ბუტებდა თავისთვის. იმ მხარეზე კი, სადაც გულიზარის ლოგინი იყო გაშლილი, უფრო ბნელოდა.

ქალებმა ძლივს დაინახეს ლოგინზე დამჯდარი გულიზარი. ის საღამურ ტანსაცმელში იყო. მის გვერდით კიდევ იჯდა ვილაცა და ეს ვილაცა სრულიად არ ჰგავდა ქალს, თუმცა ჩადრმოსხმული იყო. ის აფათურებდა ხელს გულიზარის მკერდზე და თანდათან ახლო იწვედა მისკენ.

აკვანში მძინარე ბავშვი ხანდახან ამოიზურტყულებდა.

ქალები ერთმანეთს შეერთებოდნენ და ისე იჭვრიტებოდნენ ვიწრო და შეუმჩნევე ქუჩურუტანიდან.

მალე ყველაფერი გასაგები გახდა: ხოჯა მამული ადვილად იცნენ ქალის ტანსაცმელში, და ყველაფერი დაინახეს.

— ფუ!—ქალები ფეხაკრეფით მოსცილდნენ ქუჩურუტანას. ამის შემდეგ უფრო გაღრმავდა სიძულვილი და მტრობა... გული-ზარი უფრო შესძაგდა ქალებს... |

მაინც ჩუმად იყვნენ. კრინტს არ სძრავდნენ საზიარო ქმართან და თავინთ ბოლმას იკლავდნენ გულში. მაგრამ ახლა... ახლა, როდესაც აივსო მოთმინების ფიალა, როცა ხოშნეთი სულთმობრძავე წევს, როცა გულიზარი ზეიმობს გამარჯვებას და, როდესაც იუსუფ-ალა ლუთბიეს ზიზლით უყურებს და კიდევ ერთხელ ცდილობს გაქელოს მისი ღირსება, ყველაფერი ჰკარგავს საზღვარსა და წონასწორობას.

— რა გითხრა, რა!—შეტევაზე გადავიდა ლუთბიე. — განა შენ არ იცი, რომ ჩვენ აღდამიანები ვართ. ჩვენც გული და გრძნობები გვაქვს. აბა ჩაუფიქრდი. როგორ შეიწირე შენ ჩემი სიცოცხლე! როგორ მოწამლე საწყალი ხოშნეთი. იუსუფ! თუ სადმე არსებობს ცოდვა-მადლის გარჩევა და ცოდვისათვის ჯოჯოხეთს აკუთვნებენ, შენთვის ის ცოტა იქნება. შენს ცოდვებს ჯოჯოხეთი ვერ ჩაიტევს, იქაც ნეტარება იქნება შენთვის. გესმის? ისე მძიმეა შენი ცოდვები, ისე საშინელი და საზიზლარი!—ცოტათი შეისვენა.—კიდევ გინდა გითხრა?!

იუსუფ-ალას სიბრაზე თვალებში ცეცხლად მოაწვა.

— არ დადუმდები?—იყვირა მან და წყლით სავსე ფინჯანი ისე მაგრად დაანარცხა იატაკზე, რომ სულ ნამტვრევებად აქცია.

ლუთბიე ერთხანს გაშეშებული იდგა. მას თითქო გული მოფხანა ამ ამბავმა, მალამოდ მოეცხო იუსუფის გაბრაზება. ნეტავ კიდევ შეეძლოს მისი უფრო აღელვება. ნეტავ ასწავლა ისეთი სიტყვები, რომლებიც ლურსმანივით ჩაეკდობა გულში საზიარო ქმარს და დაჩხვლეთს. ისე დაადენს სისხლს, როგორც ამდენი ხანია სდის ლუთბიეს გულსა და თვალებს.

და, უცებ მოაგონდა. მოაგონდა ის სურათი, ერთხელ რომ ქუჩურუტანიდან დაინახა. აუძგერდა გული, აუცანცანდა სხეული, მაგრამ თავი შეიკავა. ვერ გაბედა თქმა. მართლაც ლურსმანზე ძლიერად გაჩხვლეთდა ეს სიტყვა იუსუფის გულს, მაგრამ...

აქ ისევ ქალის გული და გრძნობა გამოჩნდა.

შეებრალა სამი ცოლის ქმარი, ქმარი მოტყუებული და

შერცხვენილი.

— დაე, ჯერ კიდევ იყოს კმაყოფილი თავისი ბედით, კიდევ უხაროდეს შვილის შეძენა—გაიფიქრა ლუთბიემ. სხვა დროისათვის შეინახა საწამლავზე ძლიერი სიტყვა და უხმოდ გამოვიდა ოთახიდან.

იუსუფ-ალამ ბრახიანი თვალები გამოაყოლა მას და როცა ქალი გავიდა, უწმაწური გინებით მოიხსენია ლუთბიე და მისი მშობლები.

სიბრაზემ მაინც არ მოასვენა. ფეხზე ჩაიცვა, პალტო მოისხა, გამოვიდა და ხოჯა მამულისაკენ გასწია.

ასე იცოდა მან. სპრაზით გატენილი გული იქ მიქონდა დასაფერთხად. იქ პოულობდა შეებას. და ამიტომ ყოველთვის იქითკენ გარბოდა.

IV

მხარ-თეძოზე წამოწოლილი ხოჯა წამოდგა და მიეგება სტუმარს.

— ბუირომ ალა—უთხრა და მიიწვია.

იუსუფ-ალას გაუარა სიბრაზე, რომელიც სახლიდან აქამდე კიდევ მოყოლოდა. ხოჯის დანახვამ თითქო გული გაუხსნა, მოაგონა თავისი ვაჟი, რომელიც ხოჯის წყალობით ჰყავს. კი უნდოდა კიდევ მისცემოდა მეორე ვაჟიც, მაგრამ არ მიეცა. ქალი შეეძინა, და ქალი ხომ ჩასათვალი არაა მისთვის.

რამდენჯერ უთქვამს მოხუც „ექიმ“ დედაბრისათვის, ხოჯისთვისაც დაუვალუბია, როგორმე ისე უწამლონ გულიზარს, რომ ბიჭი გაუჩნდესო, მაგრამ ეს თხოვნა ვერ შეუსრულეს.

ჩვენი საქმე ბავშვის გასაკეთებელი წამალის მიცემაა, დანარჩენი ქალის საქმეა. უნდა ბიჭს შობს, უნდა ქალსო. კინალამ გულიზარზედაც აუტრუეს გული.

— როგორ ბრძანდები, იუსუფ-ალა?—მოიცითხა ხოჯამ—ბაღვები რას ექცევიან? ავადმყოფი თუ მორჩა?

ავადმყოფის გახსენებამ ისევ აუმღვრია გული ალას. კრიალლხანი ამოიღო, რამდენიმე მარცვალი ჩამოყარა და შემდეგ უბასუხა:

— ბაღვები კარგადაა... ავადმყოფი, ჯანდაბას, არც მორჩა, არც მოკვდა.—ხმას აუწია.—თითქო ყველაფერში მე ვიყო დამნაშავე. არა, როგორ გრწამს შენ, ხოჯავ, ეს? რაში ვარ მე დამნაშავე, რა ჩამიდენია ისეთი, რომ ჯოჯოხეთში ჩამაგდონ. მითხარი,

მითხარი, თუ მაქვს რამე ისეთი დანაშაული.—მიაჩერდა თვალებში.

— ალლახის წინაშე უცოდველი არავინაა—მშვიდად და ეშმაკურად უთხრა ხოჯამ—ჯოჯოხეთში ბევრს მოუწევს ყოფნა, მაგრამ ჩვენ რა გვაქვს საჯოჯოხეთო. ლოცვები ყველაფერს გამოიყიდის. შენ კი ახალგაზრდობისას არ გიყვარდა ლოცვა, მაგრამ არაფერია, შენი ხოჯა ლოცულობდა შენთვის. ასე რომ არ ყოფილიყო...

და ხოჯამ ისევ ვაჟი უხსენა, რომელზედაც მზე ამოსდიოდა იუსუფ-ალას.

— ჩემს სიცოცხლეში არ დაგივიწყებ პატივისცემას—უთხრა მან ხოჯას და კიდევ რამდენიმე მარცვალი ჩამოაგდო კრიალოსნიდან.

საუბარი მალე სხვა საგანზე გადაიტანეს, ისევ საბჭოთა ხელაუფლება ახსენეს და მტრულად ალაპარაკდნენ.

— ვითომ მოარჩინენ მურადს?—იკითხა იუსუფ-ალამ ცოტა სიჩუმის შემდეგ.

ხოჯამ ხელი ჩაიქნია.

— ამბობენ კარგი ექიმები ყავთო. უნდა გეთქვა ღურსუნი-სათვის, არ გაეშვა. ვინ იცის, იქნებ მართლა მოარჩინონ და მაშინ...

— მაგის დარდი ნუ გაქვს.—შეაწყვეტინა სიტყვა ხოჯამ.— ვინ მისცა მაგათ ისეთი ექიმები.—ხმას დაუწია და ჩუმად უთხრა—ემ გიაურსაც რომ მოვიცილებდეთ, მერე არა გვიშავს,—ანდრო კოიხსენია და წყველა-კრულვა გაუგზავნა.

იუსუფ-ალამ თავი გაიქნია.

— ძნელია, ყველას ჯადო გაუკეთა. ამბობენ, ქალებთანაც მართავენ ცრებებსო. ახალგაზრდობა სულ მის მხარეზეა... ალლაჰ, რა დღეში ჩავცვივდით!

კარები ფრთხილად გაიღო და ახალგაზრდა მოლამ შემოიხედა.

— შემოდი, ნური, შემოდი.—დაუძახა ხოჯამ—ყოჩალი ბიჭია, —მიუბრუნდა იუსუფ-ალას.

ნური წებოვიდა, ალას მიესალმა და ხოჯის გვერდით მოაგვსდა ტახტზე.

— ბევრი კარგი ბიჭი გყოლიათ ლორჯომში. კარგია, ძალიან კარგი. ახალგაზრდებმა უნდა ეცადოთ თორემ...—უთხრა იუსუფ-ალამ ნურის და პირდაპირ შეხედა.

— ალლახის წყალობით ბევრნი. სამასამდე ვართ ახალგაზრდ მოლები. ყველა კუთხიდან და ყველა სოფლიდან. ერთი დამახლა და ყველაფერი ჩვენს ხელში იქნება.

— დამძახებელიც თქვენ უნდა დარჩეთ და შემსრულებელიც — ჩაუროთ ხოჯამ.—სხვა ვინღაა. მთელი გლებობა მაგათ გადაიბირეს.

— ევე—გააგრძელა მოლამ.—ტყუილია, ჩვენი ხალხი მაგათ არ გაჰყვება. ახლა თუ თითო-ოროლა მისდევს, ეს შიშით, ან ქრთამის საშუალებით. ძალიან ბევრს ატყუებენ ფულით.

იუსუფ—ალა ჩაფიქრდა.

— ფული არც ჩვენ უნდა დავზოგოთ—სთქვა მან.—ჯერ მივცეთ და მერმე ერთიანად ავართავთ.—შემდეგ საიდუმლო ხმით დაუმატა.—დურსუნნი რომ ამბობდა, ვილაც უცხო კაცი გვაპირდება დახმარებასო?—მიიხედ-მოიხედა.

— ჩუმაღ!—შეუტია ხოჯამ.—ის ფული თავის დროზე იქნება... დღეს კი ჩვენს ძალას უნდა დავემყაროთ. ჩვენი ჯიბეები გავიქეჩოთ და...

იუსუფმა თავის უნებურად მოისვა ჯიბეზე ხელი.

— რალა დამრჩენია.—სთქვა მან.—ალარ ვარ ძველებურად, ეროი სამასი ოქრო მქონდა შამონახული და...

— სამასიც საქმეს გააკეთებს—არ დააცალა სიტყვის დამთავრება ნურამ.—ამჟამად სამასი ოქრო სამას კაცს ააღებინებს ხელში იარაღს.

იუსუფ—ალამ მწყურალად გადახედა.

— მარტო მე ვარ აქარაში თუ?!—ბრაზით თქვა მან.

— სხვებიც არ დაიზარებენ.—უთხრა ხოჯამ.—სხვათა შორის შენ ჯერ ერთი შაურიც არ გაგიღია, სხვებმა კი...

— რამდენი საქმე გავაკეთეთ. უხარჯოდ რა გაკეთდება?—დაეხმარა ხოჯას ახალგაზრდა მოლა.

— რამდენი საქმე გავაკეთეთ.—გაიმეორა ხოჯამ ნურის სიტყვები.

— არა, მე ფული არ მაქვს.—დინჯად სთქვა იუსუფ—ალამ.—სამასი ოქრო მქონდა, მაგრამ... ახლა აღარ მაქვს... აღარ მაქვს.—ცოტა იყუჩა—სამასი ოქრო რა ფულია. ცოლშვილი მყავს, ოჯახი მაქვს... ფული თუ არ გვექნება, რამ უნდა გავარჩინოს.

მოლამ სულ სხვა საგანზე გადაიტანა ლაპარაკი და რახან ფულის საკითხს მოეხსნა, იუსუფ—ალასაც მოეშვა გულზე.

— საშინელი კანონები გამოუშვიათ—დაიწყო მოლამ—არა მგონია ადამიანი შეეგუოს. თუ ის კანონები ცხოვრებაში გაატარეს, ყველაფერი მოჩრჩა. მიწა-მამულს ართმევენ ყველას, ჭლაქებში სახლებიც ჩამოართვეს. პირუტყვზე გადასახადი შემოიღეს ნაშრომი დაბეგრეს, ახლა ამბობენ ოქრო-ვერცხლიც უნდა მოაგ

როგონო. თვითეულ მოსახლისას ჩეკისტებს ჩაასახლებენო. ვინც გადალიანდება, დაიჭერენ და ცივ ქვეყანაში გაგზავნიანო...

— ალლაპ, — შესძახა ხოჯამ და რაღაც არაბულ ენაზე გაიმეორა.

— ალლაპ, — აყვა მას იუსუფიც და ხელები ალაპყრო.

მოლამ უფრო შეუკეთა.

— ბეგები დახოცეს, ბევრი კი გადაასახლეს. ახლა ადები და ქონებიანი მოსახლეები უნდა დაიჭირონო. გუშინ ხულოში ორმოცამდე კაცი ჩამოიყვანეს დაპატიმრებული. ან ყველაფერი მოგვეცი, ჩვენი რჯული მიიღე; ან სიკვდილი აიჩრჩიე, ან კიდევ გადასახლებაო. არ ვიცი, ასეთი დრო ჯერ არ ჰქონია ჩვენს ქვეყანას, ასეთი მთავრობა არ მოსწრია არავის. ყურანიც ამბობს: დადგება ისეთი დრო, როცა მამა შეიღს არ დაინდობს, შეილი — მამასო, მაგრამ თუ ხალხი რჯულსა და სარწმუნოებას არ დაივიწყებს, თუ შეერთდება და შეკავშირდება, თუ არაფერს არ დაზოგავს ქვეყნისა და სარწმუნოების ხსნისათვის, ქვეყანა გადარჩება და ბედნიერება და მშვიდობიანობა დამყარდებაო. დიდო სახელი მუჰამედისა. დიდ არს სასწაული ალლაპისა. — მოლამ ხელები მალა ალაპყრო და იქ მყოფთ გადახედა.

ხოჯა თავდახრილი იჯდა. თითებს ათამაშებდა და ხანდახან გახედავდა იუსუფ-ალას, რომელსაც ფერი თანდათან ეკარგებოდა და გულში საშინელი შიში უზინავდებოდა.

კარგა ხანს სდუმდნენ სამთავენი. თავიანთ გულში ესაუბრებოდნენ თავისთავს და თავიანთ დარდებს ებრძოდნენ.

ბოლოს ისევ იუსუფ-ალამ ამოიღო ხმა.

— ვინ დაზოგავს თავს რჯულისა და ადათის დასაცავად. — ჩაილაპარაკა მან. — გავაკეთოთ რაც საჭიროა და...

ასი ოქროს გაღებაზე დათანხმდა ჯერჯერობით.

— ყველამ რომ ამდენი გაიღოს, ქვეყანას ავაფეთქებთ. ეპ. სად არის ძველი შეძლება, თორემ... — ხოჯას შეხედა.

ერთხელ სამასი ოქრო ერთ ლამეს წააგო კარტში ალამ და წარბიც არ შეუხრია.

მაგრამ ახლა. მხოლოდ გასავალი იზრდება. შემოსავალი არსაიდან არის. კონტრაბანდაც ვეღარ გამოაქვთ ისე ბლომად.

აწუწუნდნენ სამივენი ერთად.

— მაგ ვიაურსაც თუ მოგვაცილებენ, ათ ოქროსაც დაეუმეტებ — ცოტა არ იყოს გაბედულად სთქვა ალამ და კიდევ წყევლითა და გინებით მოიხსენია ანდრო.

— დიდი დრო აღარ აქვს. — დააიმედა ხოჯამ და ნურის შეხედა.

— ამ ერთ კვირაში მურადს გამოუდგება. ხა, ხა, ხა,—ჩაიხითხითა მოლამ.—როგორ ზოხრიკვით უხტოდა... ანია მასზე. ამბობენ ბათუმის ექიმებს უარი უთქვამთ აქიმობაზე. ჩვენი საქმე არააო. ტიფლის ქალაქში გაგზავნეთ საგიჟეშიო. იქიდან კი უკან აღარ ბრუნდებიან...

— მართლა?—აღტაცებით შესძახა ხოჯამ.

— სიმართლეა. რახან კაცი გადელდება და საგიჟეში მოამწყვდევენ, შემდეგ წასულია მისი საქმე.

— რომ უფრო მეტი ქაჯები გვყავდეს!—ინატრა იუსუფ-ალამ.

— ფული ქაჯებსაც მოიყვანს—ულვაშებში ჩაიცინა ხოჯამ და მოლას თვალი ჩაუკრა.

— სახლკარს გავყიდი, რომ ვიცოდე ძველი დრო დაბრუნდება. დაე იყოს რუსის მთავრობა, მაგრამ ხელმწიფე იყოს, ხელმწიფე. ის ჩვენ არაფერში არ გვიშლიდა ხელს.

— არა, იუსუფ-ალავ,—შეაჩერა მოლამ იუსუფი.—ჩვენი რჯულისა და ადათისათვის კიდევ თურქები სჯობია. მაშინ უფრო პატივში ვიქნებით.

— არა, არა, არა. მაგის თანახმა არ ვარ. თურქები ჩვენც გაიურს, გურჯს გვეძახიან... რას გვიშლის რუსის ხელმწიფე. უფრო პატივს გვცემდნენ... ჩვენი რჯულის არ არიან და მორიდება უნდაო ამბობდნენ. მთავრობაში რომ მივიდოდო, მობრძანდი იუსუფ-ალავ, დაბრძანდიო. რაზე შეწუხებულხარო. თურქებმა კი მათრახი კინალამ დამკრეს, გაიურებუი ხართო, გურჯები ხართო. აბა რატომ არ ებრძოდით გურჯებსა და ურუსებსო?.. რა მქონდა საბრძოლველი? რა მაკლდა. რა მინდოდა? ჩავიდოდი ხულოში ხიმშიაშვილთან და რასაც ვეტყვოდი, იმას გამიკეთებდა. ზეგანის ტყე მაჩუქა მთლიანად. თვითონ სთხოვა მთავრობას. ღარიბი ალა მყავს და მიეცით რამეო. ღუბერნატორს თავისი ხელით წაეწერა,—აირჩიოსო. მეც ავირჩიე. ძალიან შემოსავლიანი იყო ის დალოცვილი. ეჰ, იმას რომ ისევ ჩავიგდებდე ხელში... სამასი მორი გამქონდა ყოველ გაზაფხულზე...—ნაღვლიანად ჩაიქნია თავი და კრიალოსანი უფრო მარდად ჩამომარცვლა.

კარგა ხანს ილაპარაკეს... ანუგეშეს ერთმანეთი. ზოლოს როცა ოთახში სიბნელე ჩამოდგა, ხოჯას ღამემშვიდობისა უსურვეს და გამოვიდნენ.

ნისლი ჩამოწოლილიყო მთაში და ბნელი ღამე უფრო დაებნელებინა. ოღნავ მოსველებულ მიწაზე ფეხი უცურდებოდათ და ამიტომ ერთმანეთს ჰკიდებდნენ ხელს.

ნურიმ შინამდე მიაცილა იუსუფ-ალა. აქ კიდევ მოაგონა შე-

პირველი ოქრო და მოკითხვის ვადა დაუნიშნა.

იქიდან წამოსული მოლა ისევ ხოჯასთან მივიდა. მას იქ დურსუნი დაუხვდა. ის მაგიდას მიჯდომოდა სიმამრთან ერთად. ხელში რაღაც ქალღი ეჭირა და სანათის მკრთალ შუქზე ჩურჩულით კითხულობდა. ხოჯას მარჯვენა ხელი ყურთან მიეტანა და დაძაბული ყურადღებით უსმენდა.

კარები ჩაკეტილი იყო, მაგრამ გამოსაცნობ დაკაკუნებაზე გააღეს და მოლა შეუშვეს.

— დაჯექი და მოუსმინე;—ჩურჩულით უთხრა ხოჯამ მოლას და ანიშნა სად დამჯდარიყო.—საზღვარგარეთიდან მოსული წერილია,—დაუმატა მანვე და დურსუნს მიუბრუნდა—განაგრძე!—ისევ მოიშველა ხელი ყურზე და სმენად იქცა.

ნახევრად გაცრეცილი იყო ის ქალღი, რომელსაც დურსუნი კითხულობდა. ემჩნეოდა რომ ბევრ ხელში გამოეველო მას და ვინ იცის კიდევ რამდენი ხელი შეეხებოდა.

მაინცა და მაინც საინტერესო არაფერი იყო. ვიღაც „დიდი კაცი“, რომელიღაც დიდი სახელმწიფო, საღაღაც „უზარმაზარი“ ორგანიზაცია აპირებდა კომუნისტების მოსპობას. პირდებოდა დიდ საჩუქრებსა და პატივს ყველა იმას, ვინც იბრძოლებდა კომუნისტების წინააღმდეგ, ვინც დაღვრიდა სისხლს, ვინც ხელს შეუშლიდა მათს საქმეს და ასე დაუსრულებლივ...

იყო მუქარა, შეპირებები, ყველაფერი, ყველაფერი იყო ამ გაცრეცილ ქალღი, გარდა მისი ავტორის სახელისა და გვარისა. თითქო დაკმაყოფილდნენ, მოიფხანეს გული, მაგრამ ბოლოს ისევ ჩაფიქრდნენ.

— ეს ყველაფერი კარგი, მაგრამ...—ეჭვით თქვა ნურიმ.

— მაგრამ რა?—იწყინა დურსუნმა.

— ის, რომ ქალღი საქმეს ვერ გააკეთებს.

— ვინ ამბობს მაგას?—წამოიძახა ხოჯამ.

— საქმე ჩვენს უნდა გავაკეთოთ. ხედავ?—რაღაც ქალღი შებვეული დაანახა მოლას დურსუნმა.

— ამაღამ?—გაკვირვებით კითხა ნურიმ.

— დაცდა რა საჭიროა!

— კი, მაგრამ... მიიხედ-მოიხედა მოღამ.

— მოვა.—ჩუმად უთხრა დურსუნმა.

— თვითონ?

— გამოივლის. მხოლოდ დაცდა დასჭირდება.

— ეგ არაფერია.—ჩაილაპარაკა ნურიმ და გაიღიანა.

აქაიქ ყიოდნენ მამლები. შუალამეზე გადასული იყო და სოფელს ღრმა ძილით ეძინა.

სოფლის სკოლიდან კი ახლა გამოვიდნენ ახალგაზრდები და წავიდ-წამოვიდნენ.

ბნელოდა. შავი ღრუბელი ძაძასავით გადაფარებოდა სოფელს. კრებიდან მომავალი ახალგაზრდები ეხმარებოდნენ ერთმანეთს და ასანთით ინათებდნენ გზას. მათ ხმაურზე ძაღლების ყუფა გაისმა, მაგრამ მალე ისიც შეწყდა და სამარისებური მყუდროება ჩამოვარდა. დიდხანს გასტანა კრებამ ამაღამ. ბევრი საკითხი გაარჩიეს. ბევრი იღავეს და იკამათეს.

ახლა არ გავდნენ წინანდელ ადამიანებს. არც ძველებურად უჭირდათ სიტყვის თქმა. საკითხის დაყენება, შედავება და კამათი. შეჩვეოდნენ დისციპლინასაც. უსაქმოდ არ ლაყბობდნენ და უსამართლოდ არავის ესხმოდნენ თავს.

იცოდნენ თავდაპირა და ზომიერება.

ანდრო კმაყოფილი იყო ახალგაზრდებით, ყოველ საკითხში გვერდით ედგნენ, ყველა საქმეში ეხმარებოდნენ.

ერთადერთი სამწუხარო ის იყო, რომ მურადი გამოაკლდა ამ წრეს და დროებით ნაილეც მოწყდა მუშაობას.

— ნეტავ მორჩებოდეს და...—ამბობდნენ ამხანაგები. ყოველ შეხვედრისას ჰკითხავდნენ ანდროს, ხომ არაფერი იციო, ცნობა ხომ არ მიგიღიაო. ანდროც ელაპარაკებოდა ტელეფონით ბათუმს, ამზავს კითხულობდა, მაგრამ საიმედო არაფერი ისმოდა.

თბილისში უნდა გადავაგზავნოთო. იქნება იქ მოუხერხონ რა-მე, თუ არა და, საგიჟეში მოვათავსებთო, ეუბნებოდნენ ბათუმიდან.

ორი დღით ადრე ნაილე მოიხმო ტელეფონთან. ძლივს იღებდა ზმას საწყალი ქალი. ანდროს ხმა რომ გაიგონა, ცოტათი გამხნევედა, მაგრამ კრემლები მაინც ვერ შეიკავა..

— საგიჟეში ვერ დავტოვებ. მოკვდეს ჩემს ხელში. სიკვდილამდე ვუცქერი მაინც, ვინ მყავს მაგის მეტი.—ამბობდა გულამოძგდარი ნაილე.

საშინლად დაეწვა გული ანდროს. გადაწყვიტა ბათუმში წასვლა, ადგილობრივად დახმარება, მაგრამ მეორე დღეს აცნობეს, გუშინ ღამის მატარებლით გავგზავნეთ თბილისშიო.

ძალიან აწუხებდა მურადის წახდენა. თუ მას რაიმე გაუჭირდებოდა, უსათუოდ ნაილეზედაც იმოქმედებდა ეს და შეიძლება ძმის დარდს ისიც გადაყოლოდა.

კრებიდან ანდრო ყველაზე ბოლოს გამოვიდა. მასწავლებლებს ელაპარაკებოდა და ჩამორჩა.

ბნელში ძლიერს იკვლევდა გზას, გრძელი ჯოხი ეჭირა და ისე მიაბიჯებდა.

მაინც ძალიან ჩამოზნელება იცის მთებს შუა. ჯიბეში ასანთი არ აღმოაჩნდა, რომ ხანდახან გაენათებინა. როგორც იყო, გადავიდა დიდ გზაზე. იქიდან შუკაში შევიდა და ფერდობს ჩაყვა.

მიუახლოვდა სახლს, იცოდა დაკეტილი დახვდებოდა და ჯიბისაკენ წაიღო ხელი გასაღების ამოსაღებად.

კიდევ ორიოდ ნაბიჯი გადადგა და უეცრად შესდგა.

ჩირგვებთან ორი ცეცხლოვანი თვალი ანათებდა და იმას მიაჩერდა.

— რა უნდა იყოს?—გაიფიქრა და ახლოს მივიდა.

მკვდარი კატა ეგდო. დიდი შავი კატა. ანდრომ ფეხი ჰქრა და კატა ქვევით ბუჩქებში გადავარდა.

სწორედ იმ ადგილას, სადაც კატა დაეცა, რაღაცა ამოიშართა, მაღალი, ადამიანის მსგავსი, გრძელი ყურები და ვეებერთელა თვალები ჰქონდა. ხელფეხი და ტანი ბეწვებით დაფარული. არც ადამიანს ჰგავდა, არც ნადირს. ზღაზვნით აიწია, წელში გაიმართა და ნელი ნაბიჯით ანდროსაკენ წამოვიდა.

ანდროს ჯერ ეგონა მომეჩვენაო, მაგრამ მალე დარწმუნდა, რომ ეს მოჩვენება არ იყო და ჯიბიდან ნელნელა ნაგანი ამოაცოცა.

ადამიანივით ორი ფეხით მოდიოდა ლანდი, უფრო და უფრო ახლოვდებოდა და ანდრომ გარკვევით დაინახა ორი გრძელი კბილი, რომელიც გამოშვერილი ჰქონდა წინ.

ანდრო ადგილზე დაესო. უნდოდა კარგად გაერჩია რა იყო ეს, მაგრამ გული საშინლად აუთრთოლდა, ვერ შესძლო დაეცადა ახლოს მოსვლამდე, რევოლვერი მიუშვირა და თან უჩვეულო ხმით შესძახა:

— ნუ ხუმრობ, თორემ ძვირად დაგიჯდება!—ჩახმახი ფეხზე შეაყენა, მაგრამ ამ დროს ლანდი უფრო მოახლოვდა და ანდროც მიხვდა, რომ საქმე სახუმრო აღარ იყო.

დაეცა ჩახმახი, მოადინა ტყაცანი იზალმა და ლანდმა უცნაურად გადინახარა...

ანდროს შიშმა დაუარა ტანში, არ ახსოვს, რომ მისთვის ოდესმე რევოლვერს ემტყუნებინოს. ზედიზედ დაუკრა შვიდჯერ, მაგრამ შვიდი ტყაცანი და შვიდჯერ უცნაური ხარხარის მეტი არაფერი მოყოლია ამას. ამ ამბავმა მოჰკვეთა მუხლები ანდროს და შეიძლება ჩაეცილიყო იქვე, რომ საკუთარი ძალის იმედი არ ჰქონოდა. რევოლვერი ჩაიგდო ჯიბეში და ხელდახელ შესაბამელად

მოემზადა, მაგრამ ამ დროს ჩირგვეტიდან ასეთივე მეორე ლანდი ამოიმართა და უფრო ჩქარი ნაბიჯით წამოვიდა წინ.

ახლა კი იგრძნო შიში ანდრომ და ინსტიქტურად პალტოს ჯიბეში ჩაიღო მეორე ხელი. აქ მას პატარა რევოლვერი აღმოაჩნდა, ბრაუნინგის სისტემის. ერთმა კომკავშირელმა გამოატანა სწორედ ამ საღამოს გასაწმენდად..

როდესაც ჯიბიდან ისევ რევოლვერიანი ხელი ამოიღო და გაიშვირა, ერთად გადიხარხარეს, მაგრამ რევოლვერმა იქექა და ცეცხლის მახვილმა გაჰკვეთა ღამე.

ამას კი აღარ მოყოლია ხარხარი, არამედ ორივე ლანდი უეცრად მოწყდა ადგილიდან და ხრიალითა და ლაწალუწით დაეშვნენ ხეგში.

ცეცხლის ენები გამოედევნა გაქცეულებს და პატარა რევოლვერმა საშინელი გრიალი დააყენა სიბნელეში.

სოფელში ძაღლები აყეფდნენ, აღმუფლდნენ, აწკმუტუნდნენ, მაგრამ მცხოვრებთაგან არავინ გამოხმაურებია სროლას.

ანდრო დიდხანს იყო ფერღობზე გადამდგარი. ორი ტყვია კიდევ დარჩენოდა რევოლვერში და უნდოდა ბარემ ისიც ვამოყენებინა.

დიდხანს იტყირებოდა სიბნელეში, იქნებ კიდევ მოვკრა თვალი საღმეო, მაგრამ არაფერი სჩანდა.

შევიდა სახლში. რალაც სიცივე იგრძნო უადამიანო ბინაში გული შეუღონდა. თითქო რალაც სიბნელე ჩამოწვაო თავში.

სამის ნახევარი იყო. ცეცხლი შეანთო, ფენსაცმელები გაიხადა და ბუხართან ჩამოჯდა.

არ ეძინებოდა. ძალიან აფიქრებდა ამაღამდელი შემთხვევა. ახლა უკვე ნათელი გახდა მისთვის მურადის გადარევის მიზეზი. უთუოდ იმასაც ასე დაესხნენ თავს. როდესაც იარაღმა აღარ იმოქმედა, მურადი შეშინდა. ალბათ შეებრძოლნენ მას და ამით ადამიანი ჭკუაზე შეაცდინეს...!

ანდრომ ნაგანი ამოიღო. ყველა იზალი ჩაქეჭვილი იყო, თუმცა ტყვიები თავის ადგილასაა. მოხსნა ერთი ტყვია და ნახა, რომ მასრაში წამალი არ არის. გასინჯა მეორე, მესამე... ყველა... მაგრამ სულ ცარიელი აღმოჩნდა.

მოაგონდა მურადის ამბავი. იმის ვაზნებიც ასე იყო დაცარიელებული. მაგრამ ვის უნდა ექნა ეს? ანდრომ როცა მურადის ვაზნები ნახა, თავისიც გასინჯა, მაგრამ მაშინ ყველაფერი როგორც ჰქონდა. მას შემდეგ ვის შეეძლო ამოეცალა ვაზნებიდან წამალი? ბევრი იფიქრა. არასოდეს და არასად ანდროს თავისი რე-

ვოლვერი არ ამოულია, არც ვისმესთვის გადაუცია, არც სადმე სტუმრად ყოფილა. მაშ როგორ, რა საშუალებით მოახერხეს ეს.

ექვიც ვერავისზე მიიტანა...

კიდევ კარგი, რომ მეორე რევოლვერი აღმოაჩნდა, თორემ შეიძლება მურადის დღეში ჩავარდნილიყო. ან უარესიც დამართოდა. ყველაფერი შესაძლებელია.

მთელი ღამე არ დაუძინია. იჯდა ბუხართან და სულ ამ შემთხვევაზე ფიქრობდა. ეძებდა ამ ჩნელი ამბის გმირებს, მაგრამ ვერ პოულობდა.

— უთუოდ მართალი იყვნენ ზოგიერთები, როცა ირწმუნებოდნენ, ქაჯი ენახეთო — სთქვა ანდრომ თავისთვის. მოაგონა და კომკავშირელი შაქირი, რომელიც ყველაფერს იფიქვებდა, ენახე ბანჯგვლიანი ქაჯიო. მართალი ყოფილა შაქირი. მას მართლაც უნახავს რალაცა. ნაილემც ხომ უამბო ანდროს, რომ ჩვენში რამდენიმე კაცი გაადელეს, გააგიეთეს ქაჯებმაო. არც ნაილეს სწამდა ქაჯის არსებობა, მაგრამ ფაქტებს სად გაექცეოდა. მეორე რევოლვერი რომ არ აღმოჩენოდა ანდროს, მაშინ კიდევ დიდხანს დარჩებოდა საილუმლოდ „ქაჯების“ საქმიანობის ამბავი.

ბევრი რამე მოიგონა. ბავშვობისას მასაც გაუგონია კუდიანების, ქაჯების, ეშმაკებისა და ჭინკების შესახებ. ბევრჯერ შეშინებია, როცა ღამით გზაზე ან გზის პირას გაგდებული ხის კუნძი დაუნახავს, ან წყლის პირას ბუჩქებს შუა ჩამჯდარი თეთრი ქვა, რომელიც მართლაც შიშველ ქალს ჰგავდა. ბევრი შიში უნახავს, მაგრამ შემდეგ, როცა წამოიზარდა და ყველაფერს გაეცნო, შიშიც გაქრა. ის პირდაპირ მიდიოდა იმ საგანთან, რომელიც მას შორიდან საშიშ საგნად ეჩვენებოდა. მივიდოდა და როცა ნახავდა ხის კუნძს, ან ქვას, ან გადმოსრჩილ ბუჩქს, დამშვიდდებოდა და შიშიც გაუვლიდა.

ასე შეებოდა მუდამ და არასოდეს არ შეყრია ასეთ შემთხვევას.

გაახსენდა: ერთხელ მის სოფელში შეაშინეს ბავშვებმა ბავშვი, რომელსაც შიშზე ენა გამოუვარდა გარეთ. ველარც სქამდა, ვერც სვამდა, ვერც ლაპარაკობდა. პირობა და ენაგადმოვადებული დადიოდა.

მოარჩინეს ის ბავშვი ექიმებმა.

ისევ შეშინებით მოარჩინეს: მარტოდ დატოვეს თურმე ერთ ოთახში და შემდეგ მასთან დათვი, შეუშვეს კბილდაკრეკილი.

როცა ბავშვმა დათვი დაინახა მისკენ მიმავალს, ვაიო, შესძახა და გადმოვარდნილი ენა პირში მოემწყვდოდა.

დათვის ტყავში შემოსილი ექიმი მაშინვე გამოვიდა და მის მაგივრად ბავშვის მშობლები შევიდნენ.

— იქნებ მურადიც მოარჩინოს შიშმა.— თქვა ანდრომ თავისთვის.

დაფიქრდა.

მართლაც შეიძლება მისი მორჩენა. წავიდეს უნდა თბილისში. უსათუოდ უნდა წავიდეს. მივიდეს, უამბოს ექიმებს მურადის შესწლის მიზეზი, უამბოს მის მიერ ნახულის შესახებ და იქნებ გაუადვილდეს ექიმებს წამლობა.

გადაწყვიტა და ოდნავ დამშვიდდა.

კარგად გათენებული არ იყო, რომ წამოდგა, ჩაიცვა, პალტო მოისხა და გამოვიდა. წავიდა წუხანდელი შემთხვევის ადგილას, რომ ენახა, ემჩნეოდა თუ არა რამე იქაურობას.

მივიდა იმ ბუჩქთან, სადაც პირველად მკვდარი კატა ეგდო. დახედა. სველ მიწას შავი ბეწვები მიკვროდა. რამდენიმე ბეწვი აიღო ხელში. შემდეგ გადაიხედა იქეთ, საითაც კატა გადააგდო, მაგრამ იქ ვერაფერი ნახა. მიწას ცხენის ფეხის კვალის მსგავსი კვალი აჩნდა. ერთი უფრო განიერი, მეორე უფრო ვიწრო. კარგად დააცქვრდა, ეს ადამიანის ფეხის კვალს არ ჰგავდა, ძალიან გაუკვირდა. ცოტა ქვევით, ქვიშაზე, სისხლი ნახა და ესიამოვნა.

— სჩანს ნაყოფი გამოუღია გასროლას— თქვა და გაჰყვა სისხლის კვალს, რომელმაც ხევში მდინარეზე ჩაიყვანა და შემდეგ დაიკარგა.

ანდრომ თავი ჩაიქნია. ამოვიდა ხევიდან და საბჭოსაკენ წავიდა. თუმცა ჯერ კიდევ ადრე იყო და იცოდა, იქ არავინ დაუხედებოდა.

თ ა ვ ი მ ე ხ უ თ ე

I

ნაილე. ყურადღებას არ აქცევდა ახმაურებული ქალაქის მოძრაობას. თითქო რამდენჯერმე უნახავს აქაურობა, თითქო ისიც ამ ქალაქის შვილია და მისი აღზრდილი. არც მატარებლით მგზავრობას მოუხდენია შთაბეჭდილება. ერთხელაც არ გაუხედავს ფანჯარაში. გამყოლთან ერთად ეჯდა ძმას გვერდით და ხშირად უწმენდდა პირზე მომდგარ ღუეს. უსწორებდა ტანსაცმელს და აწოდებდა წყალს.

მურადი აღარ იბრძოდა. ამდენი ხნის ბრძოლას არაქათი გამოეცალა მისი ორგანიზმისათვის. ერთი კვირის უქმელოვას ეს ჯანღონით საცხე ადამიანი ჩეაროვით გაეხადნა. თვალები ჩასცვენოდა, სახე ვასცრეცოდა და მუხლები მოჰკვეთოდა. ის ხანდახან აღშფოთდებოდა, საკუთარ ხელებს შეებრძოლებოდა, ტანსაცმლის შემოხვევას დაიწყებდა, მაგრამ საკმაო იყო ოდნავ წინააღმდეგობის გაწევა, რაჲ დასუსტებული ხელები ისევ მუხლზე დაეწყო და სხვის ბრძანებას დამორჩილებოდა.

ნაილე შეჩვეოდა ამ მდგომარეობას. ახლა აღარ აშინებდა ძმის თვალები, აღშფოთება და პირუტყვეული ზმუილი.

ახალგაზრდა ფერშალი, რომელიც მას ბათუმიდან თბილისში მიაცილებდა, ძლიერ უწყობდა ხელს, მუდამ გვერდით ეჯდა. ავადმყოფს და თავს დასტრიალებდა.

თბილისის სადგურზე არ დარჩენილან დიდხანს. გამცილებელმა ეტლი დაიჭირა და სულის ავადმყოფთა სამკურნალოსაკენ წაიყვანა.

დილა იყო. არაჩვეულებრივი საავადმყოფო არაჩვეულებრივი ავადმყოფებით იყო სავსე. აქაური რეჟიმი სრულიად განსხვავდებოდა იმ რეჟიმისა და წესებისაგან, რომელიც ნაილემ ბათუმის საავადმყოფოში გაიცნო.

ექიმებიც სხვანაირი მოეჩვენა, მოსამსახურეებიც. თვით მორთულობაც სხვანაირი იყო. საავადმყოფოს დიდ ეზოში ავადმყოფები დასეირნობდნენ. ისინი ძალიან განირჩეოდნენ თავიანთი საქციელით ერთი მეორისაგან. დადიოდნენ თავთავისთვის, ელაპარა-

კებოდნენ თავისთვის, ზოგიერთი სკამზე ჩამომჯდარი წალაცას ბუტბუტებდა. აგერ ერთი შეზენიულ სილას მისდგომოდა და მოს-
თქვამდა. აღვარღვარებდა ცრემლებს და თავში იცემდა ხელს. „ჩე-
მო ბიჭუნია. ჩემო მშვენიერო, რა გინდა ამ სილაში, ამოდი ზევით“. ამბობდა ის. შემდეგ გადაიხარხარებდა. სილაში თევზებია, ჩემი
შვილი კი ჩემს ბაღში დახტისო, ხითხითებდა და კრეკლა კბილებს.
შვილო, ჩემო ბიჭუნიაო, შეიძახებდა შემდეგ და ისევ დაემხოზოდა
მიწაზე.

მეორეს ვედრო დაეჭირა ხელში, ონკანთან იდგა, ავსებდა
წყლით ვედროს და ასხამდა უფსკერო კასრში. უკვირდა, რომ
კასრი არ ივსებოდა. ამ მუშაობას ის ძალიან ბეჯითად ასრულებდა
და საშინლად ჯავრობდა, თუ ვინმე მის ხელის შეშლას მოისურ-
ვებდა.

ერთი ავადმყოფი, მიმჯდარი ხის ძირში, ვეებერთელა წიგნს
ჩასჩერებოდა, იმეორებდა და იმეორებდა ერთსა და იმავე სიტყვას
და თუ ვინმე ახლო გაუვლიდა, შეაჩერებდა და კამათს დაუწყებდა.
ელაპარაკებოდა ფარშავანგების ცხოვრებაზე, ლომებთან ბრძოლა-
ზე. შემდეგ რაღაც სხვა საგანზე გადავიდოდა და ყველაფერს ერთ-
მანეთში აურევდა.

მალალი ტანის ახალგაზრდა ჩქარი ნაბიჯით დადიოდა. ხან-
დახან აძუნძულდებოდა, ირზენდა კარგახანს, შემდეგ შეჩერდებო-
და და ქადაგებას მოყვებოდა.

— მილალატა. მილალატა მაგრამ—ამბობდა ის,—მერე რა?
ვინ იტყვის, რომ მე მოლალატე ცოლი მყავს? თალიკოს თავს არა-
ვის დავანებებ. თალიკო, თალიკო!—გასძახებდა ვილაცას. — თალი-
კო კი არა, მღვდელი ყოფილა... ა ხუცესო, სეფის კვერჩხ, თუ ამი-
სთვის გეწვის... ხა, ხა, ხა. — დიაკონი ყოფილა.—ჩაიკუზებოდა და
ოთხზე დადებოდა. შემდეგ მოზვერივით აზმუილდებოდა.

ნაილემ მალლიდან გადახედა მათ. ძალიან შეებრალა ისინი.
გული აუჩუყდა. წარმოიდგინა თავისი ძმა იმათ შორის. ცეცხლი
შემოენთო გულზე. თვალებიდან ცრემლები გადმოცვივდნენ და ლა-
მაზი სახე დაუღარეს.

ექიმებმა მურადი გასინჯეს, ჩაწერეს, მიიღეს და ნაილეს უთ-
ხრეს, რომ შეუძლია წავიდეს. მურადის ამბებს შემოგითვლითო.
შეპირდნენ.

ნაილემ ვერაფერი უთხრა ექიმს.

ერთმა მსახურმა ხელი მოჰკიდა მურადს და მეორე ოთახში
გაიყვანა. მურადი უსიტყვოდ დაემორჩილა მას. თავისი დიდრონი
თვალები ნაილესაკენ, მოატრიალა და ისე დაუწყუო კქერა, თითქო

ევდრებოდა: ნუ დამტოვებ მარტოდ ამათ ხელშიო. სწორედ ეს ამოჯიბდა ნაილემ ძმის თვალებში და როცა ის თვალები კარებს იქეთ მიეფარა, ნაილემ ველარ მოითმინა, ყველაფერი დაავიწყდა და თავშეუკავებელი ქვითინი მორთო.

შემოეხეივნენ აქეთ-იქედან. დაუწყეს დამშვიდება. აიმედებდნენ, არაფერი უპირს მურადს აქ, მალე განიკურნებაო, მაგრამ ნაილეს დამშვიდება მაინც ვერ შესძლეს. ძმის თვალები ახლაც წინ ედგა და საშინელი საყვედურებით მისჩერებოდა, თითქო ეუბნებოდა, რად მომიყვანე აქ, რად მომიძულე, ნუთუ ასეთი სიყვარული გქონდა ჩემიო; ვერ დაიმშვიდა დიდხანს გული. ბოლოს ექიმებს დაუვარდა ფეხქვეშ.

შეიბრალონ საწყალი ობოლი ქალი! ერთი ძმის მეტი არაფერი ჰყავდა. თუ ამ ძმას დაკარგავს, სჯობს სიცოცხლე დაკარგოს. მისცენ ნება დარჩეს აქ, საავადმყოფოში. თვითონ მოუვლის თავის ძმას, სხვებსაც მოუვლის. ოღონდ მისცენ აქ ცხოვრების ნება. ემსახურება ყველას, გააკეთებს ყველაფერს. ნუ დაიზარებენ მისთვის ლუკმა პურს. გადაიხდის ნაილე ყველაფერს. სახლი აქვს სოფელში, ძროხა ჰყავს, ქონება აქვს, ყველაფერს გაყიდის და აქ მოიტანს.

ყველას გული დასწყვა ნაილეს სიტყვებმა. მომვლელი და პრაქტიკანტი ქალები ააცრემლა.

ერთი საშუალო ტანის, ლამაზი სახის, თეთრხალათიანი ქალიშვილი მივიდა ნაილესთან, ხელი მოჰკიდა, ააყენა და იქით გაიყვანა.

— ნუ გეშინია ქალო,—უთხრა მან,—აქ ადამიანებს კი არ ჰკლავენ, არამედ ჰკურნავენ. ვინ იცის, შენი ძმა შეიძლება მალე მორჩეს. ბევრია ასეთი შემთხვევა.—თავზე გადაუსვა ხელი და ჩამოშლილი თმები გაუსწორა.

ნაილემ ცრემლიანი თვალები შეანათა კეთილ ადამიანს. ასეთი ადამიანების თანაგრძნობამ მასში ოდნავ იმედი გააღვიძა. ამ ქალიშვილის სიტყვებმა გაამხნევა, თან გულიც აუჩუყა და აქვითნდა. ქალიშვილმა ხელი მოხვია და მკერდზე მიიყრდნო ნაილეს თავი. მშობელივით მიუალერსა და ამ ალერსმა ენისგან გამოუთქმელი სიამოვნება და სიტკბო აგრძნობინა ნაილეს. ასეთი თბილი სიტყვა მისთვის ჯერ არავის ეთქვა. გაკვირვებული იყო, რატომ იჩენდნენ მისდამი ასეთ ყურადღებას. რა ევალება ვიღაც უცნობს, ასე მოეპყრას ვიღაც აქარელ გოგონას, რომელსაც არც იცნობს, არც რაიმე პატივისცემა ახსოვს მისგან.

სჩანს განწირული არ ყოფილა ნაილე. წამოსვლისას კი დააი-

მედა ანდრომ: ნუ გეშინია, ყველგან მოგხედავენ, მიგიღებენ, დაგეხმარებიანო. როგორ იფიქრებდა, თუ ამდენი პატივით მოეპყრობოდნენ.

რამდენიმე წუთს იდგა უხმოდ. არ იცოდა როგორ მოქცეულიყო, წაყოლოდა ისევ ბათუმში მხლებელს თუ...

სხვა გზას ვერც ხედავდა. ძმასთან ახლოს ყოფნა არ შეიძლებოდა, უთხრეს. არც ვინმე ყავდა ამ ქალაქში ნაცნობი.

— ჩემთან წაგიყვან. ერთად ვიცხოვროთ—შესთავაზა ახალგაცნობილმა ქალიშვილმა ნაილეს. ექიმს სთხოვა ნება მიეცა ნაილესათვის სამსახურის გათავებამდე დარჩენილიყო საავადმყოფოში.

ახლა ნაილე ჯერო დაუკვირდა აქაურ ცხოვრებას; ნახა გიჟი ქალები. ყველას სხვადასხვა შეშლილობა ახასიათებდა. იყვნენ ისეთებიც, როგორიც მურადი, ენაჩავარდნილნი, თვალებამღვრულნი, ზოგჯერ დამშვიდებულნი და ზოგჯერ გაშმაგებულნი.

ახლა ნაილე, უცქერდა ამ სურათს და განუწყვეტლივ ტირიდა. ებრალებოდა ძმა, რომელიც ასე საშინელი სენით გამოეთიშა და ზედის ანაბარა დასტოვა ისედაც ობოლი ნაილე.

ქალიშვილი ადრე განთავისუფლდა. გამოვიდა სადაც ნაილე იცდიდა, ხელი მოჰკიდა და გამოიყვანა.

ჭირისუფალი რომ საყვარელ არსებას დაასაფლავებს და გამობრუნდება, ისე გამოვიდა ნაილე საავადმყოფოდან. ცრემლებიანი თვალებით მოუხედა ვეებერთელა შენობას, რომელიც საკვს იყო განწირული ადამიანებით.

— ნუ იდარდებ ქალო, — მიმართა ქალიშვილმა ნაილეს. — გეყოფა ცრემლები. ექიმები ამბობენ, რომ მალე მოვარჩინთო. — იცრუა მან. — მეც ბევრი მინახავს, რომ მოარჩინეს. — შემდეგ დაწვრილებით გამოჰკითხა მიზეზი მურადის დაავადების.

მივიდნენ ზინაზე. მხოლოდ ამ მგზავრობის დროს შეამჩნია ნაილემ ქალაქი, მოძრაობა, ხმაურობა, ხალხი, მანქანები, მალალი და განიერი სახლები, ტრამვაის ვაგონები და ავტომობილების სრიალი. წუთით დაავიწყდა ყველაფერი და მთელი არსებით გაითქვიფა მოძრაობაში.

ნაილეს მასპინძელი ქალიშვილი მარტოდ ცხოვრობდა. პატარა და ვიწრო ბინა ჰქონდა მესამე სართულზე. ეტყობოდა, რომ ეს ბინა წინათ სამზარეულო ყოფილიყო, საცხოვრებლად შემდეგ გადაეკეთებინათ. მიუხედავად სივიწროვისა ლამაზად იყო მორთული, კედლებზე მრავალი სურათი ეკიდა. მაგიდაზე უამრავი წიგნები და ჟურნალ-გაზეთები.

— რა გქვია შენ? — ფრთხილად ჰკითხა ნაილემ ქალიშვილს,

როცა უკანასკნელმა სადილი, მოამზადა და პატარა მაგიდაზე დააწყო.

— თამარი.— მიუგო მასპინძელმა.

— თამარი. კარგი სახელია. თამარი მეფეც ყოფილა წინათ. მეც გამიგონია— და რაც იცოდა ჰველაფერი უამბო.

მეორე დღეს ადრე წავიდა თამარი. მორიგე ვარო. მალე დაებრუნდებო, შეპირდა. ნაილეს უნდოდა წაყოლოდა, გაეგო ძმის ამბავი, მაგრამ თამარმა უარი უთხრა.

— ამბავს თვითონ მოგიტან. დღეს დაისვენე, დამშვიდდი, ხვალ კი უსათუოდ წაგიყვან, ძმასაც გაჩვენებ, ექიმებსაც მოველაპარაკოთ,— უთხრა მან.

ახალდაქერილ ფრინველიყით გრძნობდა თავს ნაილე. მთელი დღე ტიროდა, ცრემლებმა დაუწითლა თვალები და დაულარა სახე.

თამარი მოგვიანებით დაბრუნდა. მოგონილი ამბავი მოუტანა ძმის შესახებ. ექიმებმა იმედი მომცესო, მალე მორჩებაო, მაგრამ სიმართლე კი შემდეგ გაუმხილა. რომ იცოდნენ დაავადების მიზეზი, მაშინ შეიძლება მორჩენაო, ისე კი... უსარგებლოა ყველაფერიო.

მოწყდა უკანასკნელ იმედის ძაფზე დაკიდებული გული ნაილეს და ჩავარდა. ჩავარდა სადღაც უფსკრულში. აქვითინდა, მაგრამ ცრემლები აღარ აღმოაჩნდა. ამომშრალიყო თვალის უბეები.

მანაც ანუგეშა თამარმა.

— ეცდებიან ექიმები, სხვადასხვანაირად მიუდგებიან და შეიძლება გასკრას. ადამიანზე ახლა ისე ზრუნავენ, რომ არ დალუპავენ. ტირილი და ცრემლები არავის არგებს. რას იზამ, უნდა შეეგუო და შეურიგდე მდგომარეობას.

ნაილე ქვითინებდა და ისე უსმენდა.

— ერთი ძმის მეტი რა გამაჩნია.— სადღაც კუნჭულში ჩარჩენილი ცრემლები კიდევ ამოსწურა ნაილემ და ამ სიტყვებს ამოაყოლა.

ახლა თამარსაც მოაგონდა სკუთარი ძმა.

— მართლა, ხვალ ჩემი ძმა მოდის. დეპეშა მივიღე.— უთხრა ნაილეს მან და ოთახში მიიხედ-მოიხედა— მაგრამ არა უშავს. ჩვენ ერთად დავწვებით, ის კი იატაკზე მოვათავსოთ, ორი დღე დარჩება— წამოდგა და სუფრა გააწყო.

მთელი დღე არაფერი ეჭამათ. თუმცა ნაილეს არაფერი უნდოდა. როგორც იყო, ორიოდღე ლუკმა მანაც შეჭამა და ცივი წყა-

ლი დააყოლა.

სალამოს თამარი მაგიდას მიუჯდა. უცნაური და საშინელ წიგნები ელაგა ამ მაგიდაზე.

ხაილე შორიდან ხედავდა და უცვირდა, როცა ასეთი ქალიშვილი, რომელიც ანგელოზს უფრო ჰგავდა, ვინემ ჩვეულებრივ ქალს, კითხულობდა ისეთ წიგნებს, რომელშიაც მხოლოდ შიშველი ადამიანები იყო დახატული. სრულიად შიშველი—ნაილეს ასეთი სურათები თავის დღეში არ ენახა. აი, აგერ მამაკაცის სურათი. შიშველი მამაკაცი. მეორე ადგილას კი დედაკაცის სურათია, სხვადასხვა პოზაში, ზოგს მუცელი გამობერვია, ზოგი... ნაილეს შერცხვა, გაწითლდა და პირი იბრუნა.

— რატომ კითხულობს ასე გულმოდგინედ თამარი ამ წიგნს. — გაიფიქრა მან. ეწყინა, რომ ასეთი კეთილი ქალიშვილი ასეთ წიგნებში ყოფილა გართული. ამას არ სჯობია იკითხოს ისეთი წიგნები, ქეთო მასწავლებელი რომ კითხულობდა?— „ვეფხისტყაოსანი“, ან „თამარიანი“, ან კიდევ სხვა... უფრო ახლო რომ იცნობდეს თამარს და კარგად იცოდეს მისი ხასიათი, ამ წიგნებს დაუხევედა. რა ქალის საქმეა ასეთი წიგნები. გარყვნილი კაცებიც არ იკადრებენ იმათ წაკითხვას.

დააკვირდა თამარს და დიდხანს უცქერდა.

მერმე, როგორ დაბეჯითებით კითხულობს. თვითველ სურათს რამდენიმე წუთით აცქერდება. შემდეგ რალაცას იწერს ქალღღზე და კიდევ სურათს უცქერს.

— ფუ!— გვერდზე გააფურთხა ნაილემ.

შუალამემდე თვალი არ მოუშორებია თამარს წიგნისათვის და, როცა ქალაქის საათმა თორმეტი დარეკა, მაშინ წამოდგა.

— ზოდიში,— უთხრა მან ნაილეს:— სრულიად დამავეწყდა, რომ თქვენ მოსვენება გინდათ. დაწეკით, დაწეკით შემოგველე,— მივიდა და თავზე გადაუსვა ხელი.

ნაილეს უფრო დაეწვა გული.

— აფსუს, რა კეთილი ხასიათისაა და...— წიგნები და სურათები მოაგონდა. უნდოდა ეთქვა, ნუ კითხულობს მასეთ წიგნებს, არ შეშვენის შენისთანა მშვენიერ ქალიშვილს მასეთი წიგნების კითხვით, მაგრამ გადაიფიქრა, იქნებ ეწყინოს და ამან ჩემს საქმეს ავნოსო.

დილით, გერ კიდევ კარგად არ გათენებულყო და, კარებზე კაკუნნი მოისმა.

— ჩემი ძმა, მისიჭირიმე!— ალტაცებით შესძახა თამარმა, წა-

მობტა, კაბა გადაიცვა და კარი ვაალო.

ნაილეს ყურში ჩაწვდა თამარის სიტყვები. კედლისაკენ გადაბრუნდა და თავზე საბანი წაიფარა.

ღამა სიხარულით მოეხვივნენ ერთმანეთს. გადაკოცნეს და მიუღალერსეს.

— როგორ ხარ დაცო? როგორ მიდის შენი სწავლის საქმე? — ჰკითხა ძმამ და პალტო მოიხადა.

— კარგად ვარ. ერთი თვით პრაქტიკაზე დაედივარ. არ მოგელოდი. ხომ არაფერი გიქირს? ჩემი ძამიე—და თამარმა კიდევ აკოცა ძმას.

— სასწრაფოდ წამოვედი, ძალიან დიდი საქმე მაქვს.—უთხრა ძმამ. პალტო მიაკიდა და დაჯდა.

— ნაილეს მოეჩვენა, რომ ამ კაცის ხმა მისთვის ძალიან ნაცნობი იყო. ფრთხილად გადმობრუნდა, უნდოდა გამოეკვირებინა, მაგრამ ცოტა კიდევ დაიცადა.

— ერთი ავადმყოფი გადმოგზავნეთ რაიონიდან და იმას მოვაკითხე. სულით ავადმყოფია. საავადმყოფოში იქნება. შენ გეცოდინება სადაა ის-საავადმყოფო. უნდა წამყვე.

— მეც იქ დავდივარ პრაქტიკაზე. წაგიყვან.—შემდეგ გაიხედა ლოგინისაკენ, რომელზედაც ნაილე იწევა.—სტუმარი ქალიშვილი მყავს.—ჩუმად უთხრა ძმას და ანიშნა საწოლისაკენ.

— სტუმარი?—ჩუმად შეეკითხა ძმა.

ნაილემ ჩუმად ასწია საბნის ყური და გამოიკვირებოდა. მკრთალ შუქზე მან ნაცნობი სახე დაინახა, და გული საშინლად აუძგერდა.

— ანდრო!—წამოიძახა და ლოგინიდან მოუბრუნებლად წამოყო თავი.

— ნაილე!..

თამარი სახტად დარჩა. ხან ძმას შეხედავდა, ხან ნაილეს და გაკვირვებული აცეცებდა თვალუხს.

მალე ყველაფერი გასაგები გახდა თამარისთვისაც.

ანდრო იმავე დღესვე წამოსულიყო და რომ გაეგო თბილისში გაგზავნეს მურადიო, დეპეშა გამოეგზავნა დისთვის, მოედივარო.

ნაილეს თითქო მხსნელი გამოეცხადა. იმედი მიეცა. აღარ გრძნობდა თავს უპატრონოდ. იცოდა, რომ რახან ანდრო ამოვიდა, მას არ დატოვებს უყურადღებოდ. აღარც თამარია ახლა მისთვის უცხო. არ მოერიდება. არც თავისი მდგომარეობის გამხელა გაუჭირდება, არც მასთან დარჩენა დაეხატება. ამათი ოჯახი ერთია ახლა. ანდრო მისი ძმაც არის. ასე რომ არ იყოს, უცხო კაცს როგორ მოეხვეოდა, უცხო კაცთან როგორ გაბედავდა ლოგინიდან

წამოდგომას. თამარი ახლა ნაილეს დაც არის. თამარი... რა კეთილი გულის ადამიანია! ანდროსავეით დაკვირვებული და მოხერხებული. რატომ ამდენხანს ვერ იცრო მან ეს ქალიშვილი. ანდროს ხომ უთქვამს მიათვის, შენოდენა დაი მყავსო. ან სახით როგორ ვერ ამსგავსა. თამარი ხომ ძმის ასლია. სულ მას ჰგავს. ისეთი პირაახე, ისეთივე თვალები. ახლა რომ უცქერს ორივეს ერთად, უკვირს, რატომ ამდენხანს ვერ მოისაზრა გვარის კითხვა. ან ძმის სახელი რატომ არ ათქმევინა.

თამართან მივიდა. მოეხვია, გულზე მიიკრა და ქვითინით ალულლულდა.

— თუ მიკადრებ, ჩემი დაი იქნები თამარ, თქვენს მეტი არავინ მყავს ქვეყანაზე.— ისევ იპოვა ცრემლები ამომშრალ თვალებში, ისევ ატირდა.

ანდრომ დაამშვიდა, დააიმედა ნაილე, თამარს კი ცალკე უამბო ყველაფერი, რაც იცოდა და გადახდა მას სოფელში.

— ამბობენ, დაავადების მიზეზი რომ ვიცოდეთ, ადვილად მოვარჩინთო, ყველას ძალიან ეპრალება საცოდავი. უჭმელობასა და ბრძოლას ძალიან დაუსუსტებია. თუ დროზე არ უშველეს, შეიძლება კიდევაც მოკვდეს.

ამ სიტყვებს თამარი რუსულად ელაპარაკებოდა ძმას, რაც ნაილესათვის გაუგებარი იყო, მაგრამ ის სახეზე ატყობდა ორივეს, რომ არასასიამოვნო ამბავს უამბობდნენ ერთმანეთს და ეს ამბავი მურადს შეეხებოდა.

— ეს ქალი უფრო მეცოდება, — უთხრა დას ანდრომ — არავინ ყავს. — შემდეგ მოუყვა თუ როგორი ხასიათის, ენერგიისა და ნიჭის პატრონია ნაილე.

როცა ანდრო ნაილეზე ლაპარაკობდა, თამარი ნაილეს უცქერდა. მისი დიდრონი შავი თვალები, ოდნავ მაღალი ცხვირი; მოხდენილი სახე, თანდათან უფრო და უფრო ლამაზი და მოხდენილი ეჩვენებოდა. ფიქრობდა, სხვა მოსაზრება ხომ არ აქვს ჩემი ძმას ამ ქალიშვილზეო. ანდროსაც ახედ-დახედავდა. თითქო ადარებდა, შეეფერებოდა თუ არა ერთმანეთსო.

კარგა ხანს ლაპარაკობდნენ. თამარმა ჩაი მოამზადა და სუფრა გააწყო. ისაუზმეს. საუზმის შემდეგ ანდრო და თამარი საავადმყოფოში წასასვლელად მოემზადნენ, ნაილეს ურჩიეს დარჩენილიყო, თვითონ მოუტანდნენ. ამბავს, მაგრამ რადგან ნაილემ სთხოვა წაეყვანათ, არც ანდროს უთქვამს უარი.

ტრამევი სავსე იყო ხალხით. ძლივს მოახერხეს შესვლა ერთ ევგონში. ჩამობმულ ღვედებზე რამდენიმე კაცის ხელი ებლაუქე

ბოდა, ერთმანეთს აწვებოდნენ; ჩამოსვლისას ძლივს გამოდიოდნენ კარებში და ქუჩებში იბნეოდნენ.

თამარი და ნაილე ერთად იდგნენ, ანდრო უფრო წინ გაჩერებულიყო, ფანჯარაში იცქირებოდა, რომ დანიშნულ ვაჩერებასთან ენიშნებინა მხლებლებისათვის. ის ხშირად მოუხედავდა მის უკან გაჩერებულ ნაილეს, არ გამებნესო, ფიქრობდა, მაგრამ რატომღაც ყველაფერი შეიცვალა. ხალხი ერთმანეთში აირდაირია. ზოგი ჩამოვიდა, ზოგი ამოვიდა და ნაილე უკანასკნელ გაჩერებასთან სრულიად მარტო ჩამოვიდა ძირს.

მიიხედ-მოიხედა, არავინ ნაცნობი... მიტრიალდ-მოტრიალდა. ხან ერთს შეხედა, ხან მეორეს, მაგრამ ვერაფერი გაარკვია. ერთი ნაცნობი სახეც ვერ იპოვა.

წამოვიდა ფეხით. პირდაპირ გამოყვა ტრამვაის ლიანდაგს, მაგრამ შემდეგ ხალხის ზღვაში მოხვდა და თავბრუ დაესხა.

ახლა შეშინდა. სიმარტოვე იგრძნო. თვალეზზე ცრემლები მოადგა, მაგრამ გული გაიმაგრა და ცრემლებიც შეიკავა.

— ამდენ ხალხში ადამიანი რაღა დაიკარგება. ვიკითხავ, მისასწავლიან—გაიფიქრა და ერთ სქელ ღიბიან კაცს შეეკითხა.

— ვა, აბა რა ვიცი, რამდენი საავადმყოფოა ამ ქალაქში. შენ მიხაილოვცკი გინდა თუ არამიანცკი?—უთხრა ღიბიანმა და გაეცალა.

მეორემ რაღაც რუსულად დაელაპარაკა და როცა ნაილემ ვერაფერი გააგებინა, უცნობმა თავისი გზა განაგრძო.

— ჩემი შვილიც საავადმყოფოშია ქა.—უთხრა ერთმა მოხუცმა ქალმა და გაიყოლია. მიიყვანა იმ საავადმყოფოში, მაგრამ ეს სულ სხვა საავადმყოფო იყო და იქ სულ სხვა ხალხი დახვდა ნაილეს.

მთელი დღე იხეტიალა, რამდენჯერ კინაღამ მოყვა ტრამვაის, ავტომანქანას, რამდენჯერ ეტლი კინაღამ დაეჯახა. გამწარდა. გააცეცხლდა. ოფლად გაიღვარა. თითქო მის ეინაზე გამრავლდა ხალხი და აირია ერთმანეთში. ისევ გაიჩინა, რამდენიმე მანძილი. გადავიდა ერთი ქუჩიდან მეორეზე, მეორიდან მესამეზე და ბოლოს ერთ თავისუფალ მივარდნილ ქუჩას მოხვდა. აქ იშვიათად მიდი-მოდიოდნენ. არც ტრამვაის ხაზი იყო, არც მანქანები ჩანდა. ესიამოვნა ასეთი მყუდრო ადგილის აღმოჩენა და ოდნავ დამშვიდდა.

გაჩერდა, დაფიქრა. ამდენხანს ფიქრის საშუალებაც არ ჰქონდა, ისე იყლა მოგუზგუზე ხალხის ტალღაში ჩაღეჭილი.

რა მოუვიდა ეს? როგორ დასცილდნენ? როგორ დაებნენ? ვაი თუ განგებ ჩაიდინეს! იქნებ იმიტომ, რომ არ უნდოდათ ნაილეს წაყვანა! აკი უთხრეს დარჩიო. რაღაც რუსულადაც ელაპარაკ-

ნენ ერთმანეთს. ვინ იცის, რაზე ლაპარაკობდნენ. ნეტავ არ წამო-
ყოლოდა, დარჩენილიყო შინ, დაეცადა სანამ დაბრუნდებოდნენ.

ახლა კი... ნაილემ თვალი გადაავლო ქალაქს, რომელიც
აქედან უფრო კარგად მოსჩანდა.

ზღვა ხალხი და ზღვა სახლები. ვის იპოვის აქ კაცი. ერთ-
მანეთსაც არ იცნობენ, რამდენ კაცს კითხა ანდროსა და მისი დის
თამარის შესახებ.

ვერავენ უპასუხა. ზოგიერთებმა სასაცილოდ აიღეს. ათასი ან-
დრო და ათი ათასი თამარი იქნება ამ ქალაქშიო, უთხრეს.

გაუყვირა.

ნუთუ ანდროს არ უნდა იცნობდნენ. სოფელში ყველა ანდ-
როზე ლაპარაკობს. ბათუმში ანდროს მიერ დაწერილ ქალაქში
სადაც მივიდა, ყველგან პატივით მიიღეს და დახმარება აღმოუჩი-
ნეს. აქ კი...

მუხლები მოკვეთოდა.. მოშიებოდა და თან სწყუროდა. ოფ-
ლისაგან სულ დასველებულიყო და ახლა ცივი ქარი რომ უბე-
რაედა, საშინლად აკანკალებდა.

ლამდებოდა. ქალაქში თანდათან მეტი და მეტი ელნათურე-
ბი ჩნდებოდნენ. ბოლოს ვარსკვლავებით მოქედნილ ცას დაემსგავ-
სა იჭაურობა. შორიდან ორკესტრის ხმა მოისმოდა. ეს ხმა უფრო
უსვედიანებდა და ულონებდა გულს. ის ახლა განწირულ ადამიან-
ის პოზაში იდგა და ისე უცქერდა ამ სიცოცხლით სავსე ქალაქს,
თითქოს მასში საშინელებას ხედავდა.

ფიქრი ვერ უშველიდა. ერთ ადგილას გაჩერებით არაფერი
გამოვიდოდა და ისევ უკან გამოპარუნდა. წამოვიდა იქითკენ, საი-
დანაც უფრო მეტი ელნათურები მოსჩანდა.

მოდოდა ჩქარა, მაგრამ ხანდახან გაჩერდებოდა და დაფე-
თებულ თვალებს მიმოავლავდა იჭაურობას.

ჭურჭები ერთმანეთს გვიანდნენ, სახლებიც ეთნაირი იყო, ხალ-
ხიც ერთმანეთის მსგავსი. ყველგან სხვადასხვანაირ ენაზე ლაპა-
რაკობდნენ. ისმოდა ქართული, რუსული, სომხური, კიდევ რაღაც
სხვა ენები. ნაილე მხოლოდ ქართულს ხედებოდა მათში.

ისევ აირია ჭურჭები, ხალხი, მანქანები, ჭალები, ელნათურები,
სახლები, ისევ გაუცნაურდა ყველაფერი და აკრულდა.

ამდენ ხალხში არავინ გამოჩნდა ისეთი, ნაილესთვის რომ ყურად-
ღება მიექცა, გამოეკითხნა, გზა ესწავლებინა. ყველა მოკლე პასუხს
აძლევდა, თითოთ უჩვენებდა, აქეთ წადით, იმას ჰკითხეთო.

ისევ მოიქანცა, ისევ დასველდა ოფლით ტანსაცმელი. ისევ
მოეკვეთა მუხლები და ერთ მოფარებულ ადგილას გაჩერდა.

აჭეთინდა. ლაპალუპით წამოვიდა ცრემლები თვალებიდან. მოაგონდა მურადი. მოაგონდა თავისი სოფელი, ამხანაგები, მეზობლები. თურმე იქ ყოფილა პედნიერი, იქ, სადაც ყოველი ხე და ბუჩქი ნაცნობია მისთვის, სადაც ბნელ ღამეშიც გამოიცნობს შინისაკენ მიმავალ ბილიკს.

რა კარგია ახლა იქ იყოს! მურადი კარგად ყავდეს! არაფერს არ ინატრებდა, არაფერი არ უნდოდა ამის მეტო. ნეტავ რით გათავდება ეს ამბავი? პოლო ხომ აქვს ყველაფერს. გაჭირვებაც ხომ არაა განუსაზღვრელი. ისიც ხომ უნდა დამთავრდეს, თუნდაც სიკვდილით. ნეტავ რით უნდა დამთავრდეს ეს ტანჯვა?

ნაილემ ვილატა შენიშნა ვგერდით და მოუხედა.

— ვის ელოდები ქალო,—მიმართა უცნობმა რუსულად.

— რა ბრძანეთ?—შეეკითხა ნაილე უცნობს.

— ქართველი ხართ?—და უცნობი უფრო ახლო მივიდა.

— კი.—მოკლედ მიუგო ნაილემ.

— ელოდებით ვინმეს?—თვლებში ჩახედა და მოკლე უღვაშები აიგრიხა უცნობმა. ნაილემ მოკლედ უამბო თავგადასავალი.

— წამობრძანდით. ტყვილა გივლიათ ამდენი. მართალია, ცოტა მოშორებითაა ის საავადმყოფო, მაგრამ წაგყვებით. როგორ შეგშინებიათ...

ნაილეს სახე გაუნათლდა. იმედი მიეცა და უფრო გაბედულად ელაპარაკდა. სთხოვა როგორმე ანდროსას მიიყვანოს. ხომ იცნობს ანდროს? კარგი ლაპარაკი რომ იცის, ახალგაზრდაა. მისი და იქ მსახურობს საავადმყოფოში. მესამე საართულში ცხოვრობს. ბევრი წიგნი უწყევია სახლში.

უცნობი უღვაშებს იგრეხს და იღიმება.

როგორ არა. ანდროს ის კარგად იცნობს, მისი ძველი მეგობარია. მის დასაც იცნობს. როგორ არა, მგონია, მისი სახელი...

— თამარი ჰქვია.—ასწრებს ნაილე.

— დიად, თამარი.—თამარს ძალიან კარგად იცნობს. ლამაზი ქალიშვილია, ოდნავ მაღალი.

— არა, საშუალო ტანისაა...

— დიად, საშუალო ტანისაა, მხოლოდ დაბალზე უფრო მაღალია.

სცოდნია. მაშ ნაილეს აღარაფერი უქირს. მიყვება უცნობს და ახლა იმას ცდილობს, როგორმე ეს კაცი არ გაებნეს ამ ზღვა ხალხში. სცხვენია, თორემ ხელს მოკიდებდა და ისე წაყვებოდა. თუმცა რა დროს სირცხვილია ასეთ დროს.

უცნობმა თვითონ მოჰკიდა ხელი. იდლიაში გაუყარა მკლავი.

ისე როგორც სხვებს აქეთ, ალბათ ისინიც იმიტომ არიან ერთმანეთზე გადაბმული მკლავებით, რომ ეშინიათ, არ დაიბნენო, ფიქრობს ნაილე.

გაიარეს ერთი ქუჩა, მეორე, მესამე და ბნელ მოსახვევში შეუხვიეს. ალბათ აქეთაა გზა. თუმცა აქ ყველგან გზაა, მაგრამ ყველა საავადმყოფომდე კი არ მიდის, არც თამარის ბინამდე.

— ანდროსას მივდივართ?— ცოტა ხნის შემდეგ კითხა ნაილემ უცნობს.

— დიად, ანდროსას.— და უცნობი უფრო მიეკრძა ნაილეს.

— მაღალ სახლში ცხოვრობს თამარი. აქეთ არის ის სახლი? — დაეჭვდა ნაილე.

— აქეთ არის. აი, ცოტა ზევით— თანდათან მიეკრა, მოულოდნელად ორივე ხელი მოხვია და ლოყაზე აკოცა.

ნაილეს სისხლი აუვარდა თავში. მთელი ძალა მოიკრძა; და ისე მაგრად კრა ხელი უცნობს, რომ რამდენიმე ნაბიჯით გააგდო იქით.

უცნობი ამას არ შეუშინებია. მან ისევ სცადა ნაილესთან მისვლა, მაგრამ ქალმა ახლა უარესად შეუტია.

უცნობი, თითქოს აქ არაფერი იყო, ისევ მივარდა ნაილესთან, მოეხვია და პირზე დააფარა ხელი.

— წამოდი ჩემთან, ნუ გეშინია, ხვალ წაგიყვან ანდროსთან. ძმასაც გიჩვენებ.— თრთოლვით ეუბნებოდა ის და უფრო მაგრად აჭერდა პირზე ხელს, რომ ხმა ვერ ამოეღო.

ბნელი ქუჩა ხელს არ შეუშლიდა უცნობს თუ მოინდომებდა თავისი მხეცური განზრახვა სისრულეში მოეყვანა. ის ბრძოლით მიათრევდა ნაილეს და თანდათან მიიწევდა დაუსახლებელი ადგილისაკენ.

ნაილე თავგამოდებით იბრძოდა, ცდილობდა როგორმე გაენთავისუფლებინა თავი, მოეცილებინა გამხეცებული ადამიანის ხელი პირიდან, მაგრამ ვერ ახერხებდა.

ბოლოს, როგორც იქნა, მოახერხა, წუთით მოაცილა ხელი პირიდან და მთელი ძალღონით რამდენჯერმე შეჰკივლა.

თითქოს ეს კივილიც დაიკარგა ქალაქის ხმაურში. არსაიდან მშველელი არ ჩანდა და ამან უფრო გაათამამა უცნობი. ბატკანით მოიგდო ზურგზე ქალი და გააქანა იქეთ, საითაც უფრო მივარდნილი ადგილი იყო.

ახლა განწირულად ჩასთვალა ნაილემ თავი. მას მეტი აღარაფერი დარჩენოდა გარდა სიკვდილისა და გადაწყვეტა ეს სიკვდილი არ ყოფილიყო შერცხვენილი.

კიდევ მოიკრიბა უკანასკნელი ძალღონე. წვედა ყელში და ისე მაგრად წაუჭირა, რომ უცნობს ცრემლები წამოსცვივდა თვალთაგან. ზურგზე მოგდებული ქალი მიწაზე დააგდო და მხეცივით დაეტაკა.

სიბნელისა და მყუდროებისაგან გათამამებული უცნობი უკვე განარჯვებულად გრძნობდა თავს და არაქათგამოლეულ ქალს ეანდთან იმორჩილებდა, საცა იყო სურვილსაც აისრულებდა, რომ უეცრად ორი ლანდი დადგა მათ წინ.

ნაილემ კიდევ ამოიყვია გაცვეთილი ხმით და მუხლებზე დაეკა.

— ვინა ხართ?—მრისხანედ შესძახეს მოსულებმა და ჯიბის ფანარი გაანათეს.

— მე ვარ.—დაიღრიჯა უშნოდ უცნობი, ნაილეს მოშორდა და განზე გაჩერდა.

— ვინა ხარ მეთქი!—უფრო უყვირა ერთმა მოსულთაგანმა და რევოლვერი პირთან მიუტანა.

— ვინ უნდა ვიყო, ამხანაგებო? კაცი ვარ.—ისევ დაიღრიჯა უცნობი.

— ეგ ქალი ვინაა?

— ეგ ჩემი... როგორ გითხრათ. ახალგაზრდები ხართ. ნაშაა, რალა, ნაშა...

— რა გინდათ აქ?—უფრო მრისხანედ იკითხა მეორემ და ფანარი ნაილეს მიანათა.

— რა გინდა, რა საკითხავია?—გაიკვირვა უცნობმა.—ახალგაზრდები არა ხართ? განა თქვენ კი...—და ნაილეზე მიუთითა.—გამიკერპდა რალა, თითქო პირველად იყოს. ვა, სიყრმეს გეფიცები: ძალიან ავარა ვინმეა.

ნაილე ხმას ველარ იღებდა. სრულიად არაფერი გაეგებოდა უცნობის სიტყვებისა. თითქო მართალი ყოფილიყოს, რასაც ის ამბობდა.

— თქვენ ვინა ხართ, —ახლა ნაილეს მიუბრუნდა ახალგაზრდა

— მე, მე.—ნაილეს ცრემლები მოერია და აქვითინდა.

— ფასონსა ჰყიდის რალა.—გაღრეკით სთქვა უცნობმა და შემდეგ დაუმატა, —გაამოთ ზიკებო—და წასვლა დააპირა, მაგრამ..

— შესდექ, —მეორე ახალგაზრდამ მიუშვირა რევოლვერი და გააჩერა.

— უცნობი აიბუძვა.

— ეა, მე რა დამიშავებია. გაამოთ მეთქი, სხვა რაღა გინდათ. კარგი ნაჭერია რალა, ისიამოვნეთ.

— გაჩუმდი მეთქი;—კვლავ შეუტია ახალგაზრდამ და შემდეგ ამხანაგს მიუბრუნდა:—თვალი ადევნე, არსად გაიპაროს.

— ვინა ხარ, ქალო, არ იტყვი? რის გეშინია! ნუ სტირი, მხეცებთან ხომ არ ხარ! სადაური ხარ?

— აქარელი.—ძლივს ამოიღულლულა ნაილემ და ხელები სახეზე აიფარა.

— აქარელი?!—გაკვირვებით შესძახეს ალახგაზრდებმა.

— ჰო, ბათუმს იქითაა ჩემი სოფელი.

— რაზე ჩამოსულხარ? როგორ მოხვდი აქ?

ნაილემ სული ამოითქვა. ტანსაცმელი გაისწორა და შერე უპასუხა:

— ძმა ჩამოვიყვანე, ავადმყოფი ძმა და...—ქეთინით უამბოთავგადა! ავალ..

— მაშ თქვენ ბრძანდებით ასეთი კეთილი ადამიანი, რომ გზას ასწავლით უმწურო ადამიანებს?!—მიუბრუნდა ერთი ახალგაზრდა უცნობს და მუშტი ცხვირთან მიუტანა.—წამობრძანდით!—უთხრა შემდეგ ნაილეს. ჩვენთან ნურაფრის გეშინია. კომკავშირელები ვართ. იცით რაა კომკავშირი?

— ვიცი. მეც კომკავშირელი ვარ. ჩვენს უჯრედში ორი ქალი ვართ კომკავშირელი.—იმედი მიეცა ნაილეს. ახლა მოაგონდა, რომ კომკავშირელია, რომ ქალაქში კომკავშირის ორგანიზაციებია, აქვეა ცეკაც. აქვეა მთავრობა. რატომ არ მოისაზრა ეკითხნა კომკავშირის ცეკა? მისულიყო, ან მთავრობისთვის მიემართნა? რა სისულელე ჩაიდინა, რომ ასე იხეტიალა ქუჩებში. ახლა ნანობს, მაგრამ უკვე გვიანაა. ამდენხანს მოეფიქრებია! ვერ ვყოფილვარ კარგი კომკავშირელიო,—გაიფიქრა... უსაყვედურა თავს.

წამოვიდნენ ქალაქის ცენტრისაკენ. ნაილე ძლივს მოადგამდა ფეხს. ძალიან დასუსტებულყო. მთელი დღე დადიოდა აღმადამა. მშვიერი, მწყურვალი, თუმცა ვის ახსოვდა ქამა-სმა. ახლა კი ყველაფერმა უწია. დაღლილობაცა და შიმშილიც ერთად იგრძნო.

ნაილე ოდნავ დამშვიდებული იყო. თავისთავს აღარ დასტიროდა, მაგრამ ახლა თამარისა და ანდროს შეწუხება აფიქრებდა. ვინ იცის, რას იფიქრებდნენო, როგორ შესძრავდნენო ყველაფერს. სწუხდა, ნანობდა და სთხოვდა ახალგაზრდებს, როგორმე წაეყვანათ ანდროსას.

ძნელი იყო ასე მიგნება, არც ქუჩის სახელი იცოდა ნაილემ, არც ანდროს გვარი ახსოვდა.

ხვალ დილით მიგიყვანთ საავადმყოფოში და იქედან ყველაფერს გავიგებთ. ამაღამ კი წამოდით. ჩვენ ქალიშვილებთან მოგა-

თავსებთ საერთო საცხოვრებელში,—ურჩიეს ახალგაზრდებმა, მაგრამ ნაილე უარზე იდგა.

როგორ შეუძლია გაყვეს უცხო ახალგაზრდებს, ვინ იცის, იქნებ ესენი იმაზე უარესები. ახედ-დახედა ორივეს და უარი უთხრა.

— მაშ ქუჩაში ხომ არ უნდა დარჩეთ?—ცოტა არ იყოს სასტიკი ხმით უთხრა ერთმა,—კომკავშირელი ქალი ყოფილხართ. სირცხვილია ასე მოქცევა. წამოდით, წამოდით, ამხანაგო, ნუ გეშინია, დაგეხმარებით, რაიკომში მიგიყვანთ, ცეკაში. ჩვენს ქვეყანაში ადამიანს რა დალუბავს.—საჩაიესაკენ შეუხვიეს.—მოშიებული იქნები, ჩაი დაელით, ნუ გერიდებათ, აქ დასაძრახი არაფერია,—მაჯაზე მოჰკიდა ერთმა ხელი და ისე წაიყვანა.

— ვაი, სირცხვილო—ამბობდა ნაილე გულში და ფეხს ითრევდა, არ უნდოდა შეყოლოდა საჩაიეში, რომელშიაც უამრავი ქალი და კაცი ირეოდა.

— შემოდი, შემოდი. ეს ჩენი საჩაიეა. ჩენი სტუდენტები არიან აქ ყოველ საღამოობით, ქალიშვილებს გაგაცნობთ. როგორ შეიძლება ასე დამორცხვება?—და როგორც იქნა შეიყვანეს.

საჩაიე სავსე იყო ახალგაზრდებით. ქალები და ვაჟები ერთმანეთში ირეოდნენ. მაგიდებს მისხდომოდნენ, ერთად სკამდნენ, სვამდნენ და მხიარულად საუბრობდნენ.

ნაილე დაიწვა სირცხვილით. მას ეგონა ყველა მას უცქეროდა. სულ ჩამოიფარა სახე და კუთხეში მაგიდასთან ჩამოჯდა.

ახალგაზრდებმა თავიანთი ხელით მოიტანეს ჩაი, შაქარი, პური და თხლად დაჭრილი ყველი. ასე მოჰქონდა ყველას თავისი კერძი. ნაილეს ძალიან შიოდა, მაგრამ მოკრძალებული იყო. ძლივს აიღო ერთი ნაჭერი პური და ყველი, მაგრამ ერთი ლუკმაც ვერ შექამა.

ახალგაზრდები ეხვეწებოდნენ ექამა, ჩაი დაელია, მაგრამ ნაილე თავს არ იღებდა ზევით.

საჩაიეში ჟრიაშული იყო. ისმოდა სიცილ-კისკისი, ხუმრობა, ლაპარაკი, ჭიჭების და კოვზების წკრიალი და ჩხაკუნი.

— არ მოდიხართ, ყმაწვილებო?—და ორი ქალიშვილი მიუახლოვდა იმ მაგიდას, რომელთანაც ნაილე და მისი მხლებლები ისხდნენ.

— მოვდივართ, მოვდივართ.—უპასუხა ერთმა ყმაწვილმა და შემდეგ ნაილეზე მიუთითა.

— გაიცანით, ქალიშვილებო, აჭარელი ქალია, კომკავშირელი, ამაღამ იქვენთან დარჩება.

— აჭარელი ქალი?!—გაიკვირვეს ქალიშვილებმა და ექვის

თვალით გადახედეს სახედაფარულსა და თავდახრილ ნაილეს.

— სიდაური ხართ, ქალიშვილო?— შეეკითხა ერთი ქალიშვილი, ახლო მივიდა, ზემოდან დახედა.

— აჭარიდან.— ძლივს უპასუხა ნაილემ და უფრო დახარა თავი.

— რომელი სოფლიდან?— შეეკითხა ახლა მეორე ქალიშვილი.

— წყაენარიდან.— ცრემლები აუთამაშდა თვალეებზე ნაილეს თავისი სოფლის მოგონებაზე.

— წყაენარიდან?!

— კი;— მიუგო ნაილემ მოკლედ და ბრაზი მოუვიდა, როდის მოეღება ბოლო ამდენ დაკითხვებსა და გაცნობებსო.

— საკვირველია, — ჩაილაპარაკა ქალიშვილმა, — წყაენარიდან ქალიშვილი აქ, თბილისში. სოფელ წყაენარიდან! მართალს ამბობ? წყაენარიდან ხარ? აი, იქიდან ორ მთას შუა რომ სოფელია გაშენებული?! ანკარა მდინარე რომ ჩამოუდის წინ. რა მშვენიერია! რა ლამაზია იქაურობა! რა გვარი ხარ?

ნაილემ ოდნავ ასწია თავი. ვინ უნდა იყოს ასე რომ იცნობს ჩემს სოფელსო, გაიფიქრა. როგორი ტყუილი სცოდნიათ ამ ქალაქში, წელან კიდევ იმ კაცმა მოატყუა, თამარს ვიცნობო, ანდრო ჩემი ამხანაგიაო, და თურმე ბოროტი განზრახვა კი ქჷონდა. მოაგონდა ის შემთხვევა და გააჟრჟოლა.

— თუ წყაენარიდან ხარ, მე კი უნდა მიცნობდე, — უთხრა ქალიშვილმა და მხარზე დაადო ხელი.

ნაილემ ნელ-ნელა ასწია თავი. პირდაპირ ახედა უცნობს და წამოიწია.

— არ გინახივარ თქვენს სოფელში? — ჰკითხა ქალიშვილმა და ორი წყვილი თვალეები მიაჩერდნენ ერთმანეთს.

ნაილე თითქო ახლა მოვიდა გონსო! ხელეები გაშალა და ქალიშვილისაკენ გაეჭანა.

— მასწავლებლო! ქეთო! — შესძახა მან და ქალიშვილს ყელზე მოეხვია.

II

მთელი ქალაქი შამოიარეს. სხვადასხვა მიმართულებით დადიოდა დაძმა. ტელეფონით შესძრეს ყველაფერი, მაგრამ ნაილეს აღმოჩენა არ მოხერხდა. მილიციაშიც განაცხადეს. ტრამვაის კონდუქტორებიც გააფრთხილეს. ყველასთან და ყველგან მოიკითხეს, მაგრამ ვერას გახდნენ.

შუალამეზე გადასული იყო, ბინაზე რომ დაბრუნდნენ. ძალიან დაღონებული იყვნენ. თამარი თავს აბრალებდა ნაილეს დაბნევას.

უფრო მეტი ყურადღება უნდა მიგვექციათ, ამბობდა ის ვინ იცის, რა მოუვიდა საწყალ გოგოს. ვის შეხვდა, ვის გადაეყარა. რამდენნაირი ადამიანებია ქალაქშიო. წუხდა და ნაღვლობდა.

მოქანცული იყვნენ და თან მთელი დღე უჭმელ-უსმელი, მაგრამ ამას ვინ გრძნობდა. კიდევ ივლიან, განაგრძობენ ძებნას, რომ რაიმე შედეგს მიაღწევენ.

ორი დაჰკრა ქალაქის საათმა. მოძრაობა შეწყდა ქუჩებში. უკანასკნელმა ტრამვაიმ გაიარა კრიალითა და რაწყა-რუწყით და მალე მისი ხმაც შეწყდა.

— რა გაეწყობა. ჩვენ საცდელს ნუ დაეაკლებთ და რსუ მოხდება ჩვენი რა ბრალია. უთხრა სანუგეშოდ დას ანდრომ.— ადამიანი როგორ დაიკარგება ჩვენში.

— მეტი ყურადღება უნდა მიგვექცია.—ნაღვლიანად სთქვა თამარმა და თავისთავთან ერთად ძმასაც უსაყვედურა.

მეორე დღეს ძალიან ადრე წამოდგნენ. ჯერ კიდევ არ იყო მოძრაობა ქუჩებში, რომ ნაიღეს საძებრად წავიდნენ. ყველას ეკითხებოდნენ: მილიციელს, მეეზოვეს, დარაჯებს. რამდენჯერმე აიარ-ჩაიარეს ის ქუჩა, რომელზედაც გუშინ ტრამვაით გაიარეს, იქნებ სადმე ჩამოვიდაო, მაგრამ ვერ იპოვეს და ისევ საავადმყოფოსაკენ წავიდნენ.

საავადმყოფო ჯერ კიდევ დაკეტილი იყო. ახლო-მახლო ქუჩებში გაიარ-გამოიარეს და სანამ კარები გაიღებოდა, ნაღვეც გამოჩნდა. ის ქეთოს მოყვებოდა. შორიდან იცნო თამარი და სიბილით წამოვიდა. მივარდა, ყელზე მოეხვია და აქვითინდა.

საყვედური ან ბოდიში ზედმეტი იყო. სიხარულმა დაავიწყა ყველაფერი, თუმცა ნაიღეს გულს რას დააჩენდა ასეთი სიხარული. ძმი დაძლი ყოველ დროს თან დაყვებოდა. მძიმე ლოდივით აწვა გულზე და გულს უხუთავდა!

საავადმყოფოში ძმა არ უჩვენეს. ნახვა უარესიაო, უთხრეს. ჩაიწერეს ყველაფერი მომენტები, დაახატვინეს იმ მოჩვენების სრული სურათი, აჩვენეს მრავალნაირი ბეწვებიანი ტანსაცმელები და ბოლოს მასთან ერთად გააკეთეს ისეთი საფრთხობელა, რომლის მსგავსი იმ ღამეს ანდრომ ნახა.

საფრთხობელას ხელ-ფეხი გაუკეთეს, აამოძრავეს და რამდენჯერმე შეამოწმეს.

მთელი დღე მოანდომეს ამ საქმეს და ანდრო გაანთავისუფლეს.

რამდენიმე დღის შემდეგ მოვახდენთ ცდასო, ჯერ კიდევ

საჭიროა ავადმყოფს ჯან-ლონე შეემატოთ, რომ შესძლოს საფრთხობელებთან შებრძოლება, მისი დამარცხება და შემდეგ შეიძლება ცდამ შედეგი მოგვეცესო, უთხრეს ექიმებმა.

შეთანხმდნენ. ანდრო იმავ საღამოს გამოემგზავრა ბათუმისაკენ. ნაილე დას ჩააბარა და დაავალა განსაკუთრებული ყურადღება მიექცია, თუმცა ეს დავალება არ იყო საჭირო თამარისათვის.

III

გავიდა ერთი კვირა. ნაილე ყოველდღე დაჰყევბოდა თამარს საავადმყოფოში, ეხვეწებოდა ყველას, მაგრამ ძმის ნახვა ვერ მოახერხა. მურადი ჩაკეტილი ყავდათ. გაძლიერებულ საკვებს აძლევდნენ და ბევრს აძინებდნენ.

ოთახში, სადაც ის იყო მოთავსებული, გარდა ლოგინისა არავითარი ნივთი არ ჰქონდა ქიქა, თევზი ან სხვა ქურქველი, რომელიც აუცილებელი იყო მისთვის, რეზინისა იჭო, რბილი, რომ ზიანი არ მიეყენებინა სხეულისათვის.

მურადი ერთი კვირის განმავლობაში საკმაოდ მოღონიერდა. ახლა თითქმის მასთან შესვლასაც ვეღარ ბედავდნენ მომვლელები.

ექიმები გარედან ადევნებდნენ თვალს და დროს ელოდნენ. ერთხელ? როცა მურადს ეძინა, მის ოთახში ჩუმად შეიპარა ექიმი, ნაგანის სისტემის რევოლვერი შეიტანა და იქვე იატაკზე დადო, ფანჯრებზე ფარდა ჩამოაფარა, გამოვიდა და გარედან დაუწყო თვალყურის დევნება.

ცოტა ხნის შემდეგ გაეღვიძა მურადს. ერთი ამოიღრინა და ნადირივით წამობობლდა.. მიაგლ-მოავლო თვალი იქაურობას და სიბნელე რომ შეამჩნია, არ მოეწონა. ელნათური ძლივს ბუტბუტავდა. განგებ დაებნელებინათ ასე და თანდათან უფროდაუფრო ართმევდნენ ძალას.

მურადი ფეხზე წამოდგა, გაიზმორა და რაღაცას მიაჩერდა. შემდეგ ელვის სისწრაფით გაექანა და ქორივით დააფრინდა რაღაცას. ეს იყო რევოლვერი, რომელიც სწრაფად აიღო, გაიღიმა და გულში ჩაიკრა. ეს პირველი ღიმილი იყო, რომელიც მურადის სახეზე შეამჩნიეს ამ ხნის განმავლობაში.

უღის მოსახდენად მზად იყვნენ.

ელნათურმა თანდათან დაჰკარგა სინათლე, მიღულა თვალეზი და შეუძმნევლად გაქრა. ოთახში ჩამოდგა საშინელი სიბნელე, რომელშიაც მოემწყვდა მურადი. ის გაშეშდა ერთ ადგილას, გაიყინა, თითქო გააკვირვა ამ ჯოჯოხეთურმა სიბნელემ. რევოლვერი მაგრად დაიჭირა ხელში და თვალები გადააბრუნა. ამ დროს შე-

უმჩნევლად გაიღო კარები და შიგ ორი საფრთხობელა შევიდა.

მურადი უაქრად შეერთა, უკან დაიხია, მაგრამ შემდეგ შეუხტა, მხეცივით შეჰყვირა, რევოლვერი მოიმარჯვა და გაისროლა. ცეცხლის ენებმა გასერეს სიბნელე, საფრთხობელები მძლავრად დაეტაკნენ მურადს. რომელიც გაშმაგებით დარბოდა, და ბოლოს მასთან ერთად იატაკზე დაეშვნენ.

მურადმა მოიმწყვდია ისინი ხელში და ის იყო უნდა დაეხრჩო ორივე, რომ უეცრად, თითქო რაღაცა დაეცა თავში, უგრძობლად ჩაიკეცა.

წამსვე გაანათეს. აიყვანეს გრძობადაკარგული მურადი, თავისი ტანსაცმელი ჩააცვეს, სხვა ოთახში შეიყვანეს, მისცეს დასაძინებელი წამალი და დააწვიანეს. შემდეგ ნაილე მოიწვიეს, საწოლთან მიუჯინეს და შედეგს ელოდნენ. ნაილე დააროგეს, თუ ვინიცობაა აზრიანად გამოიღვიძოს და რამე მოითხოვოს ან იკითხოს, არ გაიკვიროვო, ჩვეულებრივ ამბვად მიიღე და უსიტყვოდ აუსრულე ყველაფერი.

ნაილე ხედავდა მძინარე ძმას და საშინლად ღელავდა. უხაროდა, თან ეშინოდა. ხშირად გაიხედავდა იქეთ, სადაც ექიმები ისხდნენ. თამარი სულ ახლოს ეჯდა ნაილეს. მოფარებული იყო, რომ ვალვიძებისას მურადს არ შეემჩნია.

კარგა ხანს ელოდნენ.

მურადს ეძინა. ექიმები ხშირად სინჯავდნენ მას და თანდათან გამარჯვების იმედები ემატებოდათ. სუნთქვა, მაჯისცემა, გულის მუშაობა ნორმალურ კალაპოტში დგებოდა.

გამთენია მოატანა. თითქო ერთი წუთი გასულიყოს, ისე გაიარა ამდენმა დრომ. არავინ მოუქანცავს ღამის გრძელ საათებს. მურადის ვალვიძების მოლოდინში სწრაფად გასულიყო დრო.

დიდხანს ეძინა მურადს. შემდეგ ძალიან მოქანცულად შეინძრა და თვალების ქუთუთოები შეათამაშა.

ყველა გაინაშა. ნაილეს გული აღარ იცდიდა საბუდარში და ამოვარდნას ლამობდა. ახლა უნდა გადაწყვეტილიყო მურადისა და ნაილეს შიგ. ახლა, ამ წამს უნდა ეთქვა ყველაფერი. განიკურნა თუ...

თრთოდა ნაილეს გული. ათასნაირი ფიქრები ირეოდნენ ერთმანეთში.

— არა. არ შეიძლება, რომ ასეთი ავადმყოფი განიკურნოს...

— რატომ არ შეიძლება? რაა შეუძლებელი ქვეყანაზე?

— შეუძლებელი ბევრი რამ არის და მათში მურადის მოჩვენაც შეუძლებელია.

— არაა შეუძლებელი

-- აი ენახოთ:

— ენახოთ!

— ანდრო ხომ ამბობს: ჩვენთვის, ბოლშევიკებისათვის, შეუძლებელი არაფერიაო...

— მერე, ვინაა შენი ანდრო ასეთი?

-- მარტო ანდრო ხომ არ ამბობს ასე. ეს სიტყვები ბელადების სიტყვებია:

— სიცრუეა.

— აი ნახავ, თუ სიცრუეა.. — გააჟროლა ნაილეს ტანში. ვილაც ორი კამათობდა მის გულში და ნაილეს მათი ხმა ესმოდა. ორი ერთიმეორის მოწინააღმდეგე არსება დაუფლებოდა ნაილეს გონებას და ერთიმეორის საწინააღმდეგო აზრებს გამოსთქვამდნენ.

— რა საძაგელია ის ერთი. მარცხნივ ზის მგონია... მაგრამ დაიცა, მარჯვნივ უნდა იყოს. ნეტავ არ იქნებოდეს მარჯვნივ. ამბობენ მარჯვენა გული მართალს ამბობსო. არა. ეს უთუოდ მარცხენაა. არ მორჩებაო შიტომ იძახის. წყეული!—მკერდზე იკიდებს ნაილე ხელს. უნდა გამოარკვიოს, რომელი მხრიდან არის ის, არ მორჩებაო რომ იძახის.

რატომ არ უნდა მორჩეს? განა ამის მეტი არ შეუძლია მედი ცინას? სულელები ხომ არ არიან ეს ექიმები? რამდენი უსწავლნიათ, რამდენი წიგნი წაუკითხავთ?

მურადმა თვალები გაახილა და ძლივს შემოაბრუნა ის ნაილესაკენ. ცოტა ხანს უცქირა დას და შემდეგ ტუჩები ააცმაოქუნა.

შეიკუმშა ნაილეს გული. კიდევ ცოტა და გასკდებოდა, მაგრამ ძალა დაატანა თავს.

— მურად, გინდა რამე? — ჩვეულებრივი ხმით უთხრა მან ძმას და თვითონაც გაუკვირდა თუ სად იშოვა ამ დროს ასე მშვიდი და აუღელვებელი ხმა.

— წყალი მომიტანე, ნაილე! — ძლიერ მისუსტებული ხმით წარმოსთქვა მურადმა და ბალიშზე ძლივძლივობით შეარხია თავი.

ნაილეს მოეკვთა მუხლები. ველარ შეიმაგრა თავი და იქვე მუხლებზე ჩაიჩოქა, მაგრამ ამ დროს უკანიდან თამარმა ჩუმად მიადახა და ნაილემაც შეიმაგრა თვი.

— მიაწოდე წყალი! — ჩუმად ჩასძახა მას თამარმა და კიკით წყალი მიაწოდა ისე, რომ მურადს არ შეუმჩნევია. — გამაგრდო, ნუ გეშინია! — დაატანა თან და მოეფერა.

ნაილემ ღონე მოიკრიფა. კიკით წყალი ტუჩებთან მიუტანა ძმას და თვალეში ჩახედა.

მურადმა მოსვა წყალი. ენით ტუჩები მოიწმინდა და დას ახედა.

— ანდრო არ მოსულა წუხელის?—...კითხა მან ნაილეს და გადაბრუნება სცადა, მაგრამ ვერ გადაბრუნდა.—ვაი, ვაი, ვაი, როგორ საშინლად მტკივა გვერდები.

— ნუ გეშინია ძამო, არა გიშავს.—ძლივს უთხრა ნაილემ— ანდრო წუხელისაც იყო, დღესაც მოვა... როგორ ხარ, გეყურებანე? —ტრემლები გადმოცვივდა, მაგრამ ჩუმად აქეთ-იქიდან შეუტიეს და გადმოღვრილი ტრემლები თვალებზედვე შეაშრა.

— დამტკრეული ვარ, თორემ არაფერი მიშავს.—ამოილაპარაკა მურადმა და გაიხედ-გამოიხედა.—ნაილე, სადა ვართ ახლა? —შეეკითხა ის, როცა მიხვდა, რომ მისთვის უცნობ ადგილას იწვა.

— ჩვენ?—გაიღიმა ნაძალადევად ნაილემ. — ჩვენ სტუმრად ვართ... დიახ, სტუმრად. აი, ნახე. ანდროსაც ვართ. ეს მისი დაა. აბა შეხედე, როგორ ჰგავს ძმას,—იპოვა გამოსავალი ნაილემ. თამარს მოჰკიდა ხელი და მურადთან მიიყვანა.

მურადმა ახედა თამარს და გაუღიმა.

— ანდროც კარგი ვაჟია და დაც კარგი ყოლია. — შემდეგ ნაილეს შეხედა—საქმელი არაფერი გაქვს?

ნაილემ ეჭიმებს მოუხედა და როცა იმათგან საქმელის მიცემის თანხმობა მიიღო, გაღიმებული სახით მიუბრუნდა.

— საქმელის მეტი რაა, მურად. რა მოგიტანო?

— რაც გინდა იყოს.

თამარმა იმავე წუთში შეუტანა საქმელი მურადს და წინ დაუდგა.

მურადმა მოინდომა წამოჯდომა, მაგრამ ვერ შესძლო და ისე მწოლარემ დაიწყო ჰამა. რამდენიმე ლუკმა ძლივს შექამა, ცოტა წყალი დააყოლა და გაიღიმა.

— მეგონა სულ შეეჭამდი—თქვა მან.—ახლა კი თუ დამაძინებთ, ძალიან კარგი იქნება, მეძინება. თუ საბანსაც გადამიმატებთ უკეთესი იქნება... მტკივა კიდევ.

დავალემა მაშინვე შეასრულეს.

— მეტი არაფერი მინდა. ახლა წადით და დაიძინეთ თქვენც.—უთხრა მურადმა ქალიშვილებს, მაშინვე დახუჭა თვალები და დაიძინა.

— მოგვილოცავს, მოგვილოცავს. — შემოიხევივნენ ნაილეს იქ მყოფნი.

ნაილე იმდენად იყო აღელვებული სიხარულისაგან, რომ ყარგა ხანს არ იცოდა რა ეთქვა. ბოლოს, როგორც იყო, გამოერკვა, შეიგრძნო ყველაფერი და ეჭიმებს მოხვია. ზოგს ყელზე ეხვეოდა, ზოგს ხელებს უკოცნიდა... ტირიდა, იცინოდა, ქვითი-
ნებდა. თვითონაც არ იცოდა, რას სჩადიოდა.

— ბედი გქონიათ, ქალო, ბედი. — ეუბნებოდნენ ექიმები და თვითონაც გახარებული იყვნენ ასეთი გამარჯვებით.

— მალე შესძლეს ჩემი ძმა სიარულს?— შეეკითხა ცოტა ხნის შემდეგ ნაილე ექიმს.

— მალე, ძალიან მალე. ერთ კვირაში ერთად გაისეირნებთ ქუჩებში—ლიმილით უპასუხა მოხუცმა ექიმმა და კმაყოფილი სახით გაუღიმა.

I

ჩვეულებრივში ადრე მოვიდა თოვლი. მოსახლეობა ჯერ კიდევ არ მომზადებულიყო საზამთროდ. თივა და ჩალაც კი არ ჰქონდათ მომარაგებული პირუტყვისათვის. გზა დაიკეტა. მაზრასთან კავშირი გაწყდა და ამან ძალიან შეაწუხა ყველა.

ველარც გაზეთები მოჰქონდათ, ველარც წერილები: არც ვინმე მოდიოდა, რომ ახალი ამბავი მოეტანა.

ანდროს ყველაზე უფრო მურადის ამბვის გაგება აინტერესებდა. ერთ კვირაზე მეტია, არაფერი იცოდა. ერთი კვირის წინ კი მიიღო დისგან წერილი, მაგრამ მასში საიმედო არაფერი იყო. თამარი უთუოდ კიდევ გამოგზავნიდა წერილს, მაგრამ უგზობის გამო ვერ მოაღწევდა.

ანდრო შეეცადა მაზრასთან კავშირის აღდგენას. გამოიყვანა გლეხობა და შეუდგა გზის გაწმენდას. გაწმინდა კიდევაც რამდენიმე კილომეტრის მანძილზე, მაგრამ ერთ დღეს განაწმენდი გზა მეორე დღეს ისევ გასაწმენდი გახდა.

ჩაიკეტა სოფელი. ჩამობნელდა ცა. დაიბურა მთები თოვლით და დაიტვირთა ხეები. სოფელი თოვლის საბანში შემჭრა და გაილურსა. იშვიათად გამოიხედავდნენ გარეთ. მთელი დღის განმავლობაში ისხდნენ ბუხართან და მასკლათობდნენ, თუმცა სამასლათოდ არ ჰქონდათ ამ დროს საქმე. თუ ასე გაგრძელდებოდა და მიმოსვლა არ იქნებოდა აღდგენილი, სოფელი მალე საფრთხეში ჩავარდებოდა. წელს მოსავალი ძალიან მცირე მოვიდა და იმ პირნახულით თავის გატანა ასეთ ზამთარში ძალიან გაჭირდებოდა. კარგ მოსავლიან წელიწადშიც არ ყოფნიდათ საკუთარი მოსავალი. მუდამ სხვადასხვა ადგილებიდან ეზიდებოდნენ სიმინდსა და ხორბალს. წელს კი ხომ სულ გარედან შემოტანილით უნდა ეცხოვრნათ, ჯერ კიდევ ნოემბერი არ დალეულიყო და იმოდენა თოვლი დასდო. აწი ხომ უფრო მეტი იყო მოსალოდნელი.

ანდრომ თავის დროზე დააყენა საკითხი საბჭოს სხდომაზე. მახლობელ სოფლების საბჭოებსაც მიმართა: დაეხმარათ ერთმანეთს, გზა გაეწმინდოთ, მიმოსვლა აღუადგინოთ, მაზრასთან კავშირი ნუ გაგვიწყდებაო, მაგრამ ვერაფერს გახდა. მხოლოდ ზოგიერთებმა დაუპირეს მხარი. ახალგაზრდობა და ზოგიერთი ღარიბი

გლები გამოვიდა გზის გასაწმენდად. დანარჩენები განზე იხედებოდნენ. ზამთარმა თოვლი იციხსო, იძახდნენ, თოვლი კი ალღახის ნება-სურვილით მოდისო და რა უფლება გვაქვს ვიბრძოლოთ განგების წინააღმდეგო. გავიჭირებთ, მოვითმენთ და ზამთარიც გაივლისო. ასეთების ოჯახში ჯერ კიდევ იყო რამდენიმე დღეს საყოფი კირნახული და სხვებზე აღარ დარდობდნენ. არც ხვალინდელ დღეზე ფიქრით იწუხებდნენ თავს.

კოოპერატივის საქმეც ვერ იყო კარგად. თოფუზა კაცადმე ვერ გამოიჩინა უნარი და საქმისადმი სიყვარული. მურადის შემდეგ ის დანიშნეს სავაჭროში, მას ჩააპარეს ყველაფერი, მაგრამ რაღაც ძალიან უგულოდ მოეკიდა საქმეს. მაინც, ძალიან გამოიცვალა ის იმ დამის შემდეგ. მუდამ გაბლვერილი დადიოდა გან-განზე. კომკავშირის კრებებსაც იშვიათად ესწრებოდა. ლაპარაკს სულ დაანება თავი. ორ სიტყვასაც არ იტყოდა ამხანაგებში.

ანდრო ცდილობდა შეექმნა მისთვის უფრო კარგი პირობები, ხელი შეეწყო, დახმარებოდა. ერთხელ მოელაპარაკა კიდევაც. გამოკითხა ასე გამოცვლის მიზეზი, მაგრამ ვერაფერს მიაღწია. როცა მურადის მაგივრად კოოპერატივში დანიშნა, ეგონა, ხასიათს გამოიცვლისო... ან რა ისეთი დიდი ამბავი ის იყო, რომ ამდენხანს ჩარჩენოდა გულში. ბატმა შეგაშინაო, ეხუმრნენ ამხანაგებმა და ის ეწყინა. ანდროსაც გაეცინა. იმ დროს და ამან უფრო იმოქმედა მასზე ალბათ. ის იყო და ის, იმის შემდეგ დაფრთხა და შორი-შორს დადიოდა.

პირველი ორი დღის განმავლობაში, სულა ცოდვილო, კარგად მუშაობდა კოოპერატივში. გამოცდილი ნოქარივით ვაჭრობდა, მაგრამ შემდეგ ისევ გამოიცვალა. სამი დღე არ გაუღია სავაჭრო ანდროს თბილისში ყოფნის დროს. მეოთხე დღეს გამოცხადებულა საბჭოს თავჯდომარესთან, მაგრამ ფეხის ტკივილი მოუგონებია და კოოპერატივში მუშაობაზე უარი უთქვამს. იმავე საღამოს კოოპერატივი გაუტეხნიათ და ყველაფერი გაუტანიათ.

სულ არეულ-ღარეული დაუხვდა ანდროს ყველაფერი. დურსუნი ცოფს ჰყრიდა პირიდან. დახვერტით ემუქრებოდა ქურდებსა და თოფუზას.

— განგებ იტკივებს ფეხს... ღორისშვილი, მოლაღატე, მოეკლა უნდა. ჩემი ხელით გამოვღადრო ყელი!—იძახდა ის და მთელ სოფელს აწრიალებდა.

— მომეცით ქურდი. მომეცით ხალხის ქონების მტაცებელი. მომეცით მეთქი, თორემ...—ანდროს გადახედავდა, ხომ არ სწყინს ჩემი სისასტიკეო.

ერთხელ თოფუზას დაპატიმრებაც გადაწყვიტა. მოაყვანინა

ფეხშიშველი ახალგაზრდა. უყვარა, შავი ღლე დაუთენა, მაზრა-ში გადაგზავნა დაუპირა, მაგრამ ანდრომ არ დაანება.

ვინ იცის, იქნებ არაფერ შუაშია. დავიჯდომოთ, შევანერც-მოდოთ, შევისწავლოთ და დაპატიმრებას შემდეგაც მოვესწრებით.— უთხრა მან თავმჯდომარეს და ამით თითქო ოდნავ დაამშვიდა ზედმეტად აღელვებული ხელმძღვანელი.

— ძალიან შემბრალებ და ხათრიანი კაცი ხარ, ამხანაგო ან-დრო.— უსაყვედურა ღურსუნმა ანდროს.— ჩემის აზრით, საჭიროა მაგის დაპატიმრება ახლავე. არის თუ არა ქურდობის ჩამდენი, მა-ინც დასაქერია. სად იყო? რას უვლიდა? ავადმყოფი მურადა თუ იცავდა ხალხის ქონებას, მაგას რა მოუვიდა!— თანდათან უმატა ხმას და შეშინებულ თოფუზას ცხვირთან მუშტი აუთამაშა. შემდეგ ისევ ანდროს მიუბრუნდა.— მაგი კოოპერატივში დავაყენეთ ჩვენ, თუ სხვების ეზოში ხეებზე სახოკილოდ? რა შუაში ვართ ჩვენ, მაგან ხიდან ჩამოვარდეს და ფეხი მოიტეხოს?.. იქ, იქ უნდა მოე-ტება ფეხი, სადაც ხალხის ქონება იყო. იქ, ქურდებისათვის უნდა შეეკლა თავი და ხალხის ქონების გატაცების ნება არ მიეცა. გა-მაშორეთ აქედან, არ დამანახოთ. შენი ბედი, რომ ამხანაგმა ან-დრომ მოგისწრო, თორემ კარგ ადგილას მეყოლებოდი ახლა!— ხელი ჰკრა მის წინ გაჩერებულ თოფუზას და იქით მიაგდო.

თოფუზა ორმა ძლივს წაიყვანა სახლში.

— იქნებ სეროიზულად აქვს ფეხი ნატყენი, დახმარება ესა-ჭიროება?— უთხრა ანდრომ ღურსუნს, როცა თოფუზი წაიყვანეს.

— მომკვდარიყოს მაგ ფეხის ტყივილით!— გაბრაზებით სთქვა ღურსუნმა.— ვისი დავალებით დადიოდა სხვის ეზოში?.. შენთვის არ მითქვამს კიდევ მაგის ამბავი...— მიიხედ-მოიხედა ღურსუნმა, არავინ გვიყურებდესო და შემდეგ განაგრძო.— ჰიბრაიმა კორძაძის გოგოს გადაჰკიდებია, დაუწყია თვალყურის დევნება, მაგრამ რომ ვერსად დაუმარტოხელებია ისე, რომ სახე დაენახა, ეზოში შეპარ-ვია, ხეზე ასულა და ისე უდარაჯებდა თურმე. გოგო გარეთ არ გამოსულა და მაგ ტუტუცს მთელი დამე გაუტარებია ხეზე. რომ გაყინულა კარგად, ჩამოცოცებულა, მაგრამ დასცდენიჲ ხელი ტოტზე, გადმოვარდნილა და ფეხი მუხლში ამოუგდია. კიდევ კარგი, ჰიბრაიმას არ შეუტყვია, თორემ უჩვენებდა სეირს. გამ-თენია იყო, კარებზე რომ მომადგა და გამიცხადა, კოოპერატივში ველარ წავალო იცოცხლე, მე მას ღლე დავუთენე, მაგრამ რაღა დროსი იყო. მომეკლა მინდოდა, ისე ავღელდი... შემდეგ შეეკუხ-ვიეთ, რაღაც წამლებიც დავადეთ, და ახლა ურჩება მგონია, მაგ-რამ, რა გამოსადეგია მასეთი ადამიანი! სიკვდილი ათასწილად სჯობია! ვის რა ვუთხრა, მე ვარ დამნაშავე, მე წამოვავყენე. ვი-

ფიქრე, კაცი დადგება და კარგია მეთქი. ოპოლია. მოხუცი დედა ჰყავს სარჩენი. რა მეგონა ასე მოიქცეოდა. შემარცხვენდა.—ყბილები გააკრაქუნა და საშინლად გადააბრიალა თვალები თავ-მჯღომარემ.

მეორე დღეს ანდრომ ინახულა ავადმყოფი. გამოკითხა ჯან-მრთელობის შესახებ, შემდეგ დამარცხების მიზეზი მოაგონა.

თოფუზამ არაფერი უპასუხა.

— დამნაშავე ვარ... სასიკვდილო ვარ... გავბეჩდი... მოცტყუედი...—მეტის თქმა ვერ მოახერხა.

ანდრომ დაუწუნა საქციელი. კომკავშირელს არ შეშვენის მასეთი საქმეო, უთხრა, მაგრამ დახმარება მაინც შეპირდა.

— მადლობელი ვარ, ამხანაგო ანდრო, არავითარი დახმარება არ მპირდება. სანახევროდ მორჩენილი მაქვს ფეხი, საცაა ადგომასაც შევძლებ და თუ კიდევ მენდობით და დამავალბებ რამეს, თავს გადავდებ და ჩადენილ დანაშაულსაც გამოვისყიდო.—თვალები ცრემლებით ამოვესო.—უფრო დამშვიდებული ვიქნებოდი, რომ დაგეპატიმრებინეთ, მძიმე სასჯელი დაგედოთ. უფრო ამეტანა იქნება იმ დანაშაულის სიმძიმე, რომელიც მე მიმიძღვის.— აქვითინდა და ცრემლები დაბა-ლუპით წამოვიდა თვალიდან.

ანდროს შეებრალა სიცოცხლით სავსე ახალგაზრდა. ამ ოჯახის სიცალიერემ უფრო დაუწვა გული. დაკეცილი საბანი ეხურა ავადმყოფს. თავზე ძველი ჩვარი ჰქონდა წაყრული. იწვა ბნელ ოთახში და სიცივისაგან კანკალებდა. მოხუცი დედა ადგა თავზე, მაგრამ უბედურს რა გააჩნდა, რომ ავადმყოფისათვის დახმარება აღმოეჩინა. წყალს მიაწოდებდა ხანდახან, ცივ მჭაღსა და ყველის ნატეხს მიუტანდა და საღამოობით ხოჯასთან დადიოდა. იქიდან ნუსხა მოჰქონდა ქალაქზე დაწერილი... ამ ქალაქს წყალში გაძრავდა და დაწოლისას სამჯერ დააღეინებდა. დილობით კი ადრინადად კითხავდა ფეხის ამბავს. პასუხი მუდამ ერთი და იგივე იყო. გუშინდელთან შედარებით დღეს უარესად მაქვსო, ეუზნებოდა თოფუზი და ისედაც გულმოკლულ დედას უფრო უკლავდა გულს.

ანდრომ გაიგო, რომ რამდენიმე დღეა ავადმყოფს ფბილი: საქმელი არ უქამია. ფქვილი არა გვაქვს, დამფრქვევი არავინ გვყავსო, უთხრა თოფუზმა.

ანდრომ მიიღო ზომები. ერთი კომკავშირელი მიამაგრა თოფუზას ოჯახზე და დაავალა დახმარება. თვითონ კი რამდენიმე კვერცხი, ერბო, შაქარი და ჩაი გაუზნავნა კოოპერატივიდან.

როცა მეორეხელ ინახულა ანდრომ თოფუზა, უარესად დაუხვდა. წელს ქვემოთ სულ გასიებული იყო. განძრევაც არ შეეძლო. ფეხი რუმბივით გადაქცეოდა, გაშეშებოდა და სახეზე მკედრის

ფერი დასდებოდა.

— როგორ ხარ, თოფუზ?—შესვლისთანავე შეეკითხა ანდროს და დახედა.

— კვედები—ძლივს ამოიღო ხმა ავადმყოფმა.

— ნუ გეშინია. რა გკირს სასიკვდილო. მე ახლავე ვავაგზავნი კაცს. და ექიმს მოვიყვან. შენი ბრალია, თორემ აძენხანსაც მოვიყვანდი. ბევრადაც აჯობებდა. მაშინ რომ ექიმი მოგვეწვია, ახლა უკვე კარგად იქნებოდი.—მაჯახე მოჰკიდა ხელი და თვალებში ჩაბნედა.

— არა, ანდრო, არა. მე სასიკვდილო ვარ და ტყვილა რაზე უნდა მომარჩინო. ძალად მოვიკალი თავი და შენ რაზე შეგაწუხო. არა, ექიმი არ მინდა... ნუ გამოიბარებ. სულ ერთია ასეთ თოვლში ხულოდან ვერ მოვა და თქვენ კი შეწუხდებით... რომც მოვიდეს... მე მაინც ვერაფერს მიშველის... არც მინდა მიშველოს... არა, არ ვარ ამდენი ყურადღების ღირსი... ანდრო, მურადის ამბავი მითხარი რა იცი?—თავისი ამბავი მურადზე გადაიტანა.

— რა ეს თოვლი დაიღო, ცნობა არ მიმიღია. ისე კი თბილისშია, საავადმყოფოში წევს.

— როგორ ფიქრობთ, მორჩება ვითომ?

— შეიძლება მორჩესო, ექიმები ამბობენ.

— შეიძლება მორჩესო ნეტავ მორჩებოდეს! საცოდავი ბიჭი... ნაილე უფრო მეცოდება... მაშ ექიმებმა თქვეს, შეიძლება მორჩესო, არა?

— კი. ასე თქვეს თუმცა გადაქრით კის თქმაც არ შეიძლება. ასეთ შემთხვევაში თუ დაავადების მიზეზი გაიგეს ექიმებმა, მაშინ ოდნავ შესაძლებელი ხდება მორჩენის რმედი ვიქონიოთ.

— დაავადების მიზეზი?!—გაკვირვებით იკითხა თოფუზმა.

— დიახ. საერთოდ ექიმობა უფრო ადვილია, რაცა დაავადების გამომწვევი მიზეზი გაგებულნი და შესწავლილია.—უპასუხა ანდროს.

— მაშ მურადი მორჩენილია!—წამოიძახა ამედიანად თოფუზმა. და თანაც ნაღვლიანად ამოიოხრა. ერთხანს რყუა, შემდეგ ანდროს ხელს მოავლო ხელი და გულთან მიიტანა.—მითხარი, მითხარი, ანდრო, ხომ გადარჩენილია მურადი? ხომ განკურნებულია? მითხარი!—მაგრად მოუჭირა ხელი ანდროს ხელს და თვალებში ცრემლები აუთამაშდა.

ანდროს გაკვირვებით დააცქერდა თოფუზას ცრემლებით ამოვსებულ თვალებს, რომლებიც მიმარბოდნენ აქეთ-იქით და პირდაპირ შემოხედვას უფრთხოდნენ.

— შეიძლება გადაარჩინონ... იმედი მაქვს მოარჩენენ—უპასუხა

ანდრომ და უფრო დაუკვირდა ავადმყოფის ამღვრეულ თვალებს.

— შენ ყველას გადარჩენა შეგიძლია, ამხანაგო ანდრო, ყველაფრის ექიმი ხარ და ყველაფერიც იცი... ნეტავ მეც ისე ბედნიერი ვიყო, რომ...—დაება ენა და ხმის ამოღება ვერ მოახერხა.

— შენც ბედნიერი ხარ, თოფუზ. რა გიშავს, ხომ გეუბნები ექიმს გამოუეძახებ მეთქი... დამშვიდდი. გამაგრდი. ვაჟკაცი არა ხარ?!

— ვაჟკაცი.—გაიმეორა თოფუზმა.—მერე ვაჟკაცები ასე კვდებიან? ასე სასირცხვილოდ და საჯავად!

— კიდევ შენსას გაიძახი!—დაუწყო დამშვიდება ანდრომ.—რა გაქვს სასიკვდილო? მასეთებს არჩენენ ჩვენი ექიმები! ეგ რაა, სულ უბრალო ამბავია...

— არჩენენ თუ დაავადების მიზეზს გაიგებენო, და მე კი ათასჯერ სიკვდილი მირჩევენია... ეჰ, მურადის დაავადების მიზეზი გაიგეს და მურადი მორჩება... ჩემი დაავადების მიზეზს რომ გაიგებენ, თოფუზა უნდა მოკვდეს... ასე წერეზულა ჩემი ბედის წიგნაკში.—ისევ გაურჩა ენა პირში და სათქმელი სიტყვა ყელში გაეჩხირა ცოტა ხანს წვალობდა ასე. შემდეგ ძალა დაატანა თავს და ენა ამოძრავა.—მაგრამ... რა გაეწყობა... კარგი კო იყო ისე მოვმკვდარიყავი, ისე ჩავსულიყავი საფლავში, რომ ამხანაგების გინება და წყევლა არ ჩამეოლრდა, მაგრამ არ მოეწყო ასე და რა ვქნა... საწყალი დედა მეზრალება... ამბობენ, მამაჩემი მართალი კაცი ყოფილა. პირში თქმა უყვარდაო. ისე ჩასულა მიწაში, რომ არავინ მოუტყუებია. არც ვინმე გაუძარცვავს, არც ვინმესთვის წაურთმევია... იმიტომ ყოფილა ისე ღარიბი. მაშინდელ დროში სიმართლე სიღარიბის მომტანი იყო. პატიოსნებას გროშად არ აფასებდნენ. ახლა კი, როცა სიმართლეს, შრომას, პატიოსნებას—ღირსება, ფასი და მოწონება აქვს, მე შერცხვენილი უნდა მოგვკვდე, თუნდაც ვიცხოვრო...—ცოტა ხნის შესვენების შემდეგ ისევ ანდროს შეეკითხა:

— ჩემი წახდენის მიზეზიც უნდა გაიგონ ექიმებმა?

— რა საჭიროა?—ღიმილით მიუგო ანდრომ.—მაგის თუ გრცხვენია. არა, არ ვეტყვით. ექიმს შენი დამარცხების მიზეზს. ახალგაზრდა ხარ, გეპატიება მასეთი ცელქობა... არა უშავს; ამხანაგო თოფუზ, მოგიჩიება ფეხი და შემდეგ არ აედევნები გოგოებს.—გაუღიმა.—ნახვამდის, ახლავე გამოვიძახებ ექიმს. ყოველ ღონეს ვიხმარ, როგორმე სასწრაფოდ გადმოიყვანონ. მართალია, დიდი თოვლია, მაგრამ გავგზავნი ბიჭებს გზის გასაწმენდად... შენ მანამდე ყოჩაღად იყავი.—შუბლზე გადაუსვა ხელი.—მაშ ასე... ნახვამდის!—მოშორდა საწოლს და კარებისაკენ წაიქცა, მაგრამ თოფუზმა მოაბრუნა.

— ანდრო, დარჩი კიდევ ცოტა ხანს.—ვედრებით უთხრა მან

ანდროს.

— რა გინდა თოფუზ?—ისევე მიბრუნდა ანდრო საწოლთან.

— მაშ ექიმს უნდა გამოუძახო?...—კიდევ შეეკითხა თოფუზა

— კი. ვეცდები როგორმე ხეალ საღამომდე მოიყვანონ.

— ხეალ საღამომდი?

— დიახ.

— ამხანაგო ანდრო, ნუ მოგყავს ექიმი. არ მინდა მე ის. შეიძლება ისედაც მოვრჩე. უსათუოდ მოვრჩები. ექიმს ტყვილა შეაწუხებთ...

— კარგი, ამხანაგო თოფუზ, ნუ ბოდიშობ! ექიმის მოსვლით არაფერი დაშავდება. მოვიდეს, განახოს...

— კი, მაგრამ არ მინდა, რომ მნახოს... დიახ არ მინდა...— აღელვებით წარმოსთქვა ეს სიტყვები და ანდროს შეხედა პირდაპირ.— მომეცო ხელი. აი, ასე—ანდროს ხელს ხელი მოუჭირა.

— რა იყო თოფუზ? რამ აგაღელვა?—აღერსით შეეკითხა ანდრო.

— ანდრო, მამაშენი მუშა იყო?—შეეკითხა თოფუზი პასუხის ნაცვლად.

— კი. მუშა იყო.

— დიდი ხანია მოკვდა?

— ძლივს მახსოვს. პატარა ვიყავი.—მიუგო ანდრომ.

— რევოლუციონერი იყო?

— კი.

— ეპ.—ამოიხვნეშა თოფუზმა.—მოიყვანე ექიმი. მოიყვანე, მაგრამ ჩვენს მეტს ნურავის ეცოდინება... დიახ ნუ ეცოდინება, რომ...—კიდევ გაუჩერდა ენა.

— ხომ გეუბნები, არ გაგამხელ ექიმთან მეთქი. არ ვეტყვი როგორ დაგიზიანდა ფეხი, რადგან ასე გრცხვენია.

— არა. ექიმები ისედაც გაიგებენ.—ნაღვლიანად სთქვა თოფუზმა.—მურადის დაავადების მიზეზი თუ გაიგეს, ჩემსადაც გაიგებენ.

— გაიგეს?!—გაკვირვებით ჩააცქერდა ანდრო.

— დიახ, გაიგეს.

— როგორ?—უფრო გაკვირვებით შეეკითხა ანდრო.

— შენ მურადისათვის არაფერს დაიშურებდი.

— მე?

— ჰო, შენ გადაარჩინე მურადი და ეს მაღლი ადამიანს ათას ცოდვას მოაცილებს, თუმცა შენისთანა კაცს რა ცოდვები ექნება!

— არაფერი მესმის. რა გსურს მითხრა, თოფუზ. ამისხენი! თოფუზმა თავი გაიქნია.

— გახსოვს, რომ გვეუბნებოდით: ბოლშევიკები ყველაფერს შესძლებენო.

— მახსოვს.—მიუგო ანდრომ.

— მართალი ყოფილა... დავრწმუნდი. აი დედასა, კარგად ვიყო... მე ვიცი რასაც ვიზამდი მაშინ, მაგრამ...

— მალე გახდები კარგად. ნუ გეშინია.

— შენ გინდა მე მოვრჩე? ვაიარო ისე, როგორც დავდიოდი?

— უსათუოდ.

— მაშ, ექიმს ნუ მოაწვევ. თუ უეჭიმოდ მოვრჩი, მაშინ ყველაფერს გეტყვი, თუ არა და, სიკვდილის დროს მაინც მოგელაპარაკები.

— რას ამბობ თოფუზ! მაკვირვებს შენი სიტყვები. ბოლშევიკებმა პირდაპირი სიტყვა-პასუხი ვიციტ. მითხარი, მითხარი რა გტანჯავს, რა გაწუხებს. მითხარი აშკარად.—უფრო ახლო მიიწია ანდრო.

თოფუზმა წუთით თვალები მოასვენა და შემდეგ ისევ გაახილა.

— გინდა გაიგო, რა მაწუხებს?... კარგი... გეტყვი. ყველაფერს გეტყვი. გეტყვი, მაგრამ ჯერ შენ მითხარი, მურადის გადღლების ამბავი თუ უამბე ექიმებს?

ანდრო შეკრთა. გაუკვირდა... არა, საიდან? 'როგორ? ვინ გაიგო იმდამინდელი ამბავი, როცა ანდროს არავისთვის უთქვამს?

— არ მესმის!—უთხრა მან პასუხის მომლოდინე თოფუზას.

— თუ უამბე ექიმებს, მურადა რა მიზეზით და როგორი საშუალებით გადღდა მეთქი, გეკითხები?—საშინელი სიწითლე მოაწვა თვალებში ავადმყოფს.

— შენ გგონია მე ვიციდი?—შეეკითხა ანდრო და რალაც ექვებით დაისერა მისი გული.

თოფუზმა თავი დაიქნია.

— იციდი, იციდი და ვაჟაკურადაც მოიქეცი.

— როგორ?

— მურადზე ძლიერი და გაბედული გამოდექი... მე კი არ ვფიქრობდი...

— რას ამბობ, თოფუზ?—უკან დაიხია ანდრომ.

— სიმართლეს. ვაჟაკი ყოფილხარ. მე ბატმა შემაშინა, მურადი უბრალო საფრთხობელამ გაადღლა... შენ კი...

— თოფუზ!—შესძახა ანდრომ.

— გამიგე? არ მოელოდი განა? ახლა შეგიძლია ამრიღო რევოლვერი და გული გამიგმირო. მაშინ რომ მოგესწრო, უკეთესი იქნებოდა. აჰა—და თოფუზმა გულმკერდი მოიშეშლა.

— თოფუზ!

— გეხვეწები. შენი ტყვია ყველაზე კარგი ექიმი იქნება ჩემთვის და ნუ დამამადლი. მხოლოდ გევედრები, დედას არ გაუმხილო, რომ ისეთი საქმის ჩამდენი ვარ. ამხანაგებში სახელვატეხილს დედის ცრემლები მაინც ჩამყვეს საფლავში.—მწარედ გაიღიმა—რას იტყვი ანდრო? ახლაც მომიყვან ექიმს? აწიცი მიწამლებ? ხა. ხა. ხა. ხა.—დასცინა თავისთვის თოფუზმა და თვალები ჭერს მიუშვირა.—ხოჯას წამლებმა ვერ მომარჩინა, მაგრამ მისმა საწამლავმა კი ძალიან მაგრად იმოქმედა. ალლახის კაცს მორჩენაზე უფრო მოწამელა შესძლებია. ეჰ!...—თვალები დახუჭა და ენა ჩაიგდო. ანდრო რამდენიმე წუთი იდგა თოფუზას საწოლთან. უყურებდა ამ მოტყუებულსა და შეცდენილ მომაკვდავ ახალგაზრდას და მწუხარებას გამოსთქვამდა. ბოლოს ხმის ამოუღებლივ მობრუნდა და საჩქაროდ გამოვიდა.

— წავიდა. წავიდა იმიტომ, რომ შურის საძიებლად მოვიდეს!...—ჩაილაპარაკა თოფუზმა, როცა ანდროს წასვლა მშენიშნა. განწირულ ადამიანივით ამოიოხრა და ისევ დახუჭა თვალები.

II

მთელი დღე თოვდა. ისე დიდი თოვლი დაიდო, რომ სულ შეწყდა მოძრაობა. აღარავინ გამოდიოდა გარეთ. თოფუზას ბნელ ოთახი უფრო ჩამობნელდა. ავადმყოფის გულმა უფრო ძლიერად იგრძნო სიბნელე და მწუხარება. ნატყვიარი ფეხი უფრო გვასივდა და დამძიმდა. ტკივილებმა თანდათან აიწია და გულს მიუახლოვდა. სუნთქვა უჭირდა თოფუზას, პირი უშრებოდა. თვალებში სიმწრის ცრემლები ჩადგომოდა და ტუჩები ჩალურჯებოდა.

საწყალი დედა მთელი დღე ეჯდა საწოლთან. გარდა სიკვდილისა არაფერს აღარ მოელოდა მისი გული. მარტო იმაზე ფიქრობდა ერთადერთი შეილის დაკარგვის შემდეგ შესძლებდა თუ არა სიცოცხლეს ან ეღირებოდა თუ არა ეს სიცოცხლე რამედ. ტიროდა, ცხარე ცრემლები დანაოქებულ სახეზე ღვარად ჩამოდიოდა.

მიმჭრალ ბუნარში ერთი მუგუზალი ბოლაედა ობლად და შიშინებდა. სახლის სახურავი დატვირთულიყო თოვლით და კაეებს კრიკინი გაჰქონდათ, თითქო პატრონს აფრთხილებდნენ, თუ არ დათოვლე სახურავი, მეტი, აღარ შეგვიძლიაო. თოფუზი პირადმა იწვა. უკვე მეორე დღეა აღარ გადაბრუნებულა. ხანდახან ამოილაპარაკებდა. მაშინაც ძალას ატანდა თავს. ებმებოდა ენა და უშრებოდა ყელი.

— ვინაა შეილო, გუშინ რომ კაცი იყო შენთან?—ჰკითხა

დედამ. იქნებ ლაპარაკში ტკივილები დაუამდესო. მოიძრო მოსმული შალი და საბანს ზემოდ გადააფარა შვილს.

საწყალი დედა.

ნუთუ ასე უნდა დაეღუპოს შვილი. გამოზრდილი ვაჟკაცი. სხვა ვინ ჰყავს? ვინაა მისი შემხედავი. რამდენ ცეცხლში გაუვლია საცოდავ ქალს და რამდენი გაჭირვება აუტანია... ახლა კი...

ქარი მოაწვა სახლს და კედლებს კრიჭინი დააწყებინა.

— ის კაცი ბოლშევიკია. არ გაგიგონია ანდრო?—ძლივს უპასუხა დედას თოფუზმა.

— გამიგონია, შვილო, ერთხელ კიდევაც დამინახავს... აქებენ, კარგი კაციაო, გაჭირვებულს შეეღისო.

— მართალია, დედილო, გაჭირვებულებს შეეღის. ბოლშევიკები ყველანი მასეთებია...

— ღმერთმა უშველოს, შვილო. კიდევ აღარ მოვა?

თოფუზმა თავი გააქანა.

— არა, მეტს აღარ მოვა... მე ვუთხარი, რომ არ მოვიდეს.

— რათა შვილო?

— არ მინდა შეწუხდეს... ისედაც ზევრი საქმეები აქვს. რად უნდა დაკარგოს ტყვილა დრო... ვაი, ვაი, როგორ შემომიტია. დედილო, მიშველე!—შეწუხდა ავადმყოფი და ისე გაფითრდა, რომ საწყალმა მოხუცმა ლოყაზე ჩამოისვა ხელები.

— ვინმე მინც მოსულიყო.—გაიფიქრა.—წავალ, შვილო, მოვიყვან ვინმეს.—წამოღგა, მაგრამ თოფუზმა შეაჩერა.

— არა, არ მინდა არავის მოყვანა.

— მოლა ნურის მოვიყვან შვილო. შენ გიყვარდა მასთან ლაპარაკი. კარგი ყმაწვილია.

— ჯანდაბას... არ დამანახო!—ბრაზით წამოიძახა თოფუზმა და ბალიშში ღრმად ჩარგა თავი.

— კარებზე ვილაცამ დააკაკუნა და აივანზე რამდენიმე კაცის ფეხის ხმა გაისმა.

მოხუცმა პირსახე იაზმით ჩამოიბურა, კარებთან მივიდა და ფრთხილად გააღო. თვითონ კი სიბნელეში მიიმალა, რომ სტუმრებს არ სჩვენებოდა.

ოთახში ანდრო და ორი სამხედრო პირი შემოვიდნენ.

თოფუზამ მოსულებს შეხედა და უცებ დახუჭა თვალები.

— ჩანს შურისძიება სხვაგვარად გადაუწყვეტია ანდროს.— გაიფიქრა მან. მწარედ გაეღიმა.—დამიჭიროს უნდა... ეჰ, როგორ შემცდარა!—ნაღვლიანად თქვა თავის გულში და ერთხელ კიდევ გაახილა თვალები.

ანდრო ტახტთან მივიდა, თავი დახარა და ავადმყოფს ჩახედა.

— როგორ ხარ, თოფუზ? აბა გამოიხედე!—ჩასძახა მან.
თოფუზმა ძალად გაახილა თვალები.

— როგორ ხარ ა? აი, ექიმები მოგიყვანე. ჩვენდა პედად შევხვდი, ზასტავაში მიდიოდნენ. აბა შეხედე. სამხედრო ექიმებია. მაგათ ხელში ავადმყოფი არ მოკვდება.

— ექიმებია?—ოდნავ იმედიანი ხმით იკითხა თოფუზმა.— დედა, დედა მეთქი! გამოდი აქეთ. სტუმრებს შეხვედრა უნდა... დაბრძანდით.—მიაველ-მოაველო ცარიელ ოთახს თვალები.—არაფერი მახადია. ეჰ!

მოხუცი ფრთხილად გამოვიდა ბნელი კუთხიდან, მარტო თვალები უჩანდა, შორი-ახლო გაჩერდა და ისე ახედა მოსულებს.

— ეს არის, ამხანაგო ანდრო, დედაჩემი.. დედილო, ეს არის ანდრო, მე რომ გეუბნებოდი. ყველა გაჭირვებულის მშველელია და პატრონი.

— ღმერთმა სიკეთე მისცეს, შვილო.—დალოცა მოხუცმა და ანდროს შეხედა. მოსულებმა მიიხედ-მოიხედეს. ღარიბული სახლის კედლები დაათვალიერეს და მაზარები გაიხადეს.

თოფუზი ხან ერთს შეხედავდა, ხან მეორეს, უკვირდა სამხედრო ტანსაცმელიანი ექიმების ნახვა. ვერ წარმოედგინა, თუ ექიმში სამხედრო ტანსაცმელს ჩაიცვამდა. სულ იმათ დამსგავსებოდნენ, საზღვრებზე რომ დგანან, მაღალ-მაღალი, ვაჟკაცური გამომეტყველების ადამიანები.

არ მახებებდნენო, გაიფიქრა, მაგრამ აი, გადაიცივეს თეთრი ხალათები, წაიწიეს სახელოები და ნამდვილ ექიმს დაემსგავსნენ. ასეთი ექიმები უნახავს თოფუზს ხულოში. ერთხელ ბათუმშიც ნახა.

ყველაფერი თან ჰქონდათ... რა სახის მაკრატლები, დანები და მარწუხები ამოყარეს. ოთახში წამლების სუნი დადგა. ასეთი სუნი ერთხელ მოხვდა თოფუზს აფთიაქში შესვლისას.

— სინათლეა ცოტა.—უთხრა ერთმა ექიმმა ანდროს და ვიწრო ფანჯარაზე ჩამოფარებული ფარდაგის ნაქერი გადასწია, მაგრამ უმცნო ფანჯარაში ძლიერა ქარი შემოეარდა.

— სანათი არა გაქვს?—მიმართა ანდრომ იქვე მდგომ მოხუცს. მოხუცი უხმოდ მიბრუნდა და ხელფანარი გამოიტანა, სრულიად გამურული და ნახევრად დამტვერული.

— ახლავე ყველაფერი იქნება.—თქვა ანდრომ. სწრაფად გავიდა და რამდენიმე წუთის შემდეგ ორი კომკავშირელის თანხლებით მოვიდა. ორი დიდი ლამპა მოიტანა, რამდენიმე ცალი კარტოფილის სანთელი, ტაშტი, ვედრო და ერთი ტვირთი შეშა.

— აბა, ბიჭებო, დაანთეთ ცეცხლი!—მიმართა ანდრომ კომ-

კავშირელებს. თვითონ კი ლამპები აანთო და ტახტზე დადგა. შემდეგ ისევე ახალგაზრდებს მიმართა და სხვადასხვა დავალება მისცა.

— შენ ალი, ორი-სამი ამხანაგი მოიყვანე, სახლი უნდა დაითოვლოს, თორემ საფრთხილოა, შენ კი აქ დაგვეხმარები, მამულ. — გაუჩინა საქმე მეორესაც. — დედი, შენ კი უკეთესია თუ დაგვტოვებ.

მოხუცი უსიტყვოდ გავიდა ოთახიდან.

ყველაფერი მზად იყო. ექიმებმა ძონძებით შეხვეული ფეხი გახსნეს და გულდასმით გასინჯეს.

ნატყვიარი მუხლს ქვემოთ რბილ ნაწილში იყო, მაგრამ გამოურეცხავი და გამოუსუფთავებელი კრილობა გაშავებულიყო, დამპალიყო, სიმსივნეს მოემატებინა თანდათან და ახლა მთელ სხეულს სისხლის მოწამლვით ემუქრებოდა.

სერიოზული ოპერაცია იყო საჭირო. ახლა არა მარტო ნატყვიარი იყო გასაწმენდი და ამოსაჰრელი, არამედ სხვა ნაწილების ამოკვეთაც აუცილებელი იყო.

ავადმყოფის მაჯა და გული არ იძლეოდა უარყოფით ნიშანს და ექიმებიც სასწრაფოდ შეუდგნენ საქმეს. რამდენიმე ნემსი გაუკეთეს. თოფუზმა იგრძნო თითქო ამ ნემსების გაკეთების შემდეგ მთელი ქვედა ტანი უტკივნელად მოჰკვეთეს. ის ახლა არც ტკივილებს გრძნობდა, არც სისუსტეს. ყველაფრამდე კარგად იყო წელს ზევით, მაგრამ წელს ქვევით რა ხდებოდა არ იცოდა. ტანის ქვედა ნაწილს გაეწყვიტა კავშირი ზედა ნაწილთან.

უბრძანეს კედლისაკენ გადაბრუნება და თოფუზიც დაემორჩილა. მიატყერდა კედელს და უყურებს. თან ფიქროვს რას უზამენ ექიმები. გაუძლებს თუ არა კრილობის გაქრას, გამოორეცხვას. რად არ იწყებენ ამდენხანს ოპერაციას? მოცლილი ზომ არ არიან. ჯერ ერთი საათი ხელის ბანას მოანდომეს. გული უწუხდა თოფუზს, იმათ რომ უყურებდა, არც წყალი ენანებოდათ, არც საპონი, არც ანდროს უხდიდნენ ბოდის, თუნგი თყალს რომ უსხამდა.

ძლივს მორჩნენ. თავიანთ მოტანილ ხელსახოცებზე შეიმშრალეს ხელი. შემდეგ ის რაღაც ნემსები გაუკეთეს და ახლა რაღაცას ერთმანეთს თოფუზისათვის გაუგებარ ენაზე ელაპარაკებინა.

თოფუზი კი უცქერის კედელს. მოსწყინდა... გული სულ სხვანაირად ფეთქავს.

რას შევბიან ეს ოჯახქორები? მარტო გაპრიალებული იარაღების რაჩხუნი მოარჩენს კაცს? მარტო ეს რაჩხუნი და გაუგებარი გადალაპარაკება ესმის თოფუზს, სხვა—არაფერი.

გადმოაპრუნა თავი. უნდა შეხედოს—რას ელოდებიან, რატომ

არ იწყებენ ექიმობას, მაგრამ ვინ დააცალა თავის მობრუნება. სასტიკად აუკრძალა ექიმმა განძრევა.

— დამშვიდდი, თოფუზ, მალე მორჩებიან.—უთხრა ანდრომ.

რა კეთილი ხმა აქვს ამ კაცს. მალე მორჩებიან. დამცინის. ჯერ არც დაუწყიათ. როგორ უნდა მორჩნენ, მაგრამ... დაიცა... რაღაც ტკივილია. აჰა, დაიწყეს უკვე... არა არ შეუძლია გაუძლოს თოფუზმა მასეთ ოპერაციას. არ უნდა, დაანებონ თავი, დაეხსნან, თორემ...

საშინლად ჩამოხნელდა თვალებში. ლამპები ხომ არ ჩააქრეს? კედელზე თითქო შავი ზეწარი ჩამოაფარა და ის ქუჭურტანაც კი დაზნელდა, ამდებანს რომ დღის სინათლის შუქს უშვებდა და ცივი ქარი რომ მოდიოდა შიგ... დაბნელდა. ყველაფერი შავი ფერით შეიმოსა. ალბათ ასეთია სიკვდილი... დედა მაინც დაეყენებინათ სახლში. ეცქირა თავისი შვილის სიკვდილისათვის. საწყალი დედა. ხმა რომ ჰქონდეს იყვირებდა, მოიხმობდა საყვარელ მშობელს, მაგრამ აღარაფრის უნარი აღარ აქვს. ნეტავ რად მოჰკლეს ასე საშინლად. რა იქნებოდა სიკვდილის დროს ორი სიტყვა ეთქვა დედისათვის? მაინც რამ წაართვა ასე საშინლად ძალა? ხელებიც აღარ მოძრაობენ. ფეხზე კი რაღაც უმნიშვნელო წვას გრძნობს. ალბათ დაიწყეს. სიკვდილი აწი იქნება.

და თვალებიც დახუჭა. რა კარგი ყოფილა სიკვდილი. არავისი დარდი აღარ აქვს ახლა თოფუზს. უნდა ტკბილად დაიძინოს. იცის, რომ ეს დამინება სიკვდილია, მაგრამ იყოს სიკვდილი, ასე კარგი და ტკბილი თუ კია ის.

მაგრამ, რომ არ ანებებენ დაძინებას. რაღაც საშინელი სიმწვავეით შეიჭრა ცხვირში და დასაძინებლად გამზადილი სხეული გამოაფხიზლა. მკლავზეც უკბინა რაღაცამ, რა ხალხია... რას ვრჩიან? დაანებონ თავი, დაეხსნან. არ უნდოდა თვალი გაეხილა, მაგრამ ის რაღაც, რომ შეეარდა ცხვირში, დაუნდობელი ყოფილა. რაა ცედელზე ჩამოფარებული. გული თითქო სულ სხვანაირად ძგერს... და... რა კარგია სიცოცხლე! ვინ თქვა, რომ სიკვდილი უნდოდა თოფუზს. თოფუზი სუსტადაა, მუხლებში და მკლავებში ძალა არა აქვს, მაგრამ, თვალებში სინათლე ხომ აქვს. გული ხომ აღარ წუხს წელანდელურად.

ნეტავ დაიწყეს ექიმებმა ოპერაცია? არა! კიდევ ხელს იბანენ. ისევ ანდრო უსხამს წყალს. რაღაცას მხიარულად ლაპარაკობენ. თოფუზსაც უნდა მიიღოს იმათ მხიარულ ლაპარაკში მონაწილეობა. ახლა აღარ მოქმედებს მასზე ექიმების ხანგრძლივი ხელების

ბანა. იბანონ რამდენიც უნდათ. როგორ აქაფებენ საპონს. ნეტავ რა საქმეს მიკეთებდნენ, რომ ასე ბეჯითად იბანენ ხელებს?

რუსული რომ იცოდეს, აუცილებლივ ეტყოდა თოფუზი მათ, რომ ხელის ბანით ავადმყოფი არ მორჩება, დასცინებდა კიდევაც, მაგრამ არ იცის რუსული... მოდი და ნუ გაგეცინებ... კიდევ წაისვეს საპონი.

რა ხალხი ყოფილა!

და თოფუზს ღიმილმა გაუპო ბაგე.

— როგორ ხარ, შეილო?—და დედის ხელი თოფუზის შუბლზე დაესვენა.

— ეს დედაა?—თოფუზმა თვალებში შეხედა... მერე ვინ შემოუშვა ის აქ? აკი დაითხოვეს აქედან? აღარც თვითონ არის ახლა კედლისაკენ თავშებრუნებული. კი, მაგრამ როდის დართეს გადმობრუნების ნება. ან ეს ფეხი რომ... ნელა ჩააცოცა ხელი მტკივანა ფეხისაკენ. ეს რაა? როგორ მაგრად შეუკრავთ. სიმსივნეც რომ არა აქვს. მარტო ერთ ადგილას გრძნობს სუსტ წვეს. ანთი წვა თოფუზს პირის მოპარსვის შემდეგ უგრძნია სახეზე, სადაც გაუკაწრავს ხოლმე.

— შეილო, არაფერს მეტყვი?—და მოხუცის თვალებში ცრემლები აკიაფდნენ.—მითხარი გეყურბანე. როგორ ხარ?

თოფუზმა გაუღიმა დედას. ხმის ამოღება კი ვერ მოახერხა, თუ ვერ გაბედა.

დედის ხელი გადაცოცდა ხუჭუჭ თმაზე და მთელი მშობლიური ალერსის სითბო ჩაიტანა მკერდამდე.

— ვაშლი მოგიტანო, შეილო? შემწვარი ვაშლი? მითხარი, გეყურბანე, რამე.—დაიხარა მოხუცი და თავისი გულისცემა შეილის გულისცემას შეუერთა.

— ვაშლი?—ამოიღო ხმა თოფუზმა და ექიმებისაკენ გაიხედა. ისინი კიდევ იბანდნენ ხელებს.

— ექიმებმა თქვეს, შეილო, შემწვარი ვაშლი ექმევაო. შემდეგ კი ვახშამს გაგიშადადებ.—უთხრა ალერსით დედამ.

— მომიტანე, ექიმებმა თუ სთქვეს.—უფრო გაბედულად წარმოსთქვა თოფუზმა და რაღაც უფრო მეტი სიძლიერე იგრძნო მუხლებსა და მკლავებში.

— როგორ ხარ, ამხანაგო თოფუზ? ხედავ, გადაგარჩინეს! აი, ასეთია მეცნიერება! რას გიშვება ფეხი? ძალიან ბევრი ჩირქი და წამხდარი სისხლი ამოიღეს, მაგრამ ყველაფერი ადვილად ჩაიარა.

თოფუზმა მადლიერი თვალებით შეხედა ჯერ ექიმებს, შემდეგ ანდროს. მადლობის ნიშნად გაუღიმა, შემდეგ თვალები ძირს დაუშვა და გაწითლდა.

დალამდა. თოვლით დაბურული ხეები მღვებებივით იდგნენ. სახლების სახურავებიდან ჩამოყრილ თოვლს კედლები დაეფარა. ქარი ისევ უზერავდა და უხვად აყრიდა ხოშკაკალს. თოვლს თანდათან ემატებოდა და ახალდათოვლილი სახურავებიც ხელახლა დასათოვლავი ხდებოდა.

ბარში სახლები ასეთ თოვლს ვერასოდეს ვერ გაუჭლებენ, მაგრამ აქაური სახლებისათვის მაინცაღამაინც დიდ საფრთხეს არ წარმოადგენდა. მაინც ჩამოთოლეს იმ დღეს სახურავი, რომ უფრო დამშვიდებული ყოფილიყვნენ.

ახლა მოსჩანდა ბუხრებიდან ამოსული კვამლი, რომელიც ქარს აქეთ-იქით მიჰქონდა და თოვლის ნამქერს ატანდა სხვადასხვა მიმართულებით.

თოფუზის ლოგინთან მიმჯდარი დედა ტკბილად ესაუბრებოდა შვილს. მისი სახე გაბრწყინებული იყო. თვალებში სინარულის ცრემლები ჰქონდა. სულ რამდენიმე საათი გავიდა მას შეკდეგ, რაც თოფუზს ოპერაცია გაუკეთეს, და თითქო რამდენიმე დღე გასულიყოს. წუთობით უმჯობესდება ავადმყოფის მდგომარეობა. მართალია, სისუსტეს გრძნობს, მაგრამ ეს მას არ უშლის ხელს გამოვლასპარაკოს დედას და მისი ლაპარაკიც მოისმინოს. მისი სხეული მხოლოდ მოქანცული იყო, განძრევა არ შეეძლო, თორემ არავითარი ტკივილი აღარ აწუხებდა.

— აღარ გაწუხებს, თოფუზ, ფეხი?

— არა, დედი. მხოლოდ გაბეუებული მაქვს. ასე მგონია, სისხლი ამოლეულა შიგ.

— ვეყურებანე იმათ ხელებს. ღმერთს მოუვლენია ჩენდა სასხსნელად. ურუსები კი იყვნენ, მაგრამ..

— ადამიანი ყველა ერთია, დედი. ქართველი, რუსი, თურქი, სომეხი—ყველაში ურევია კარგი და ცუდი.

— ის ანდროც რომ ყოფილა...—ჩაილაპარაკა ისევ მოხუცმა.

— ანდრო?... ანდრო... ის სულ სხვა ადამიანია დედი...—თავი ჩაიჭნია და საშინელი შეწუხება დაეტყო სახეზე.

— რა იყო, თოფუზ, ხომ არაფერი გეტყინა, შვილო?

— გული მეტყინა დედი, გული—მკერდზე დაიდვა დასუსტებული ხელია.

— მოგიკვდეს დედა. ეს რაღა სატკივარია. წყალი დალიე,

შვილო.—ქიქით წყალი მიაწოდა, მაგრამ თოფუზმა უარი უთხრა.

— წყალი ვერ მოარჩენს ასეთნაირ გულის ტკივილს, დედა.

— ვაი შენს დედას, შვილო. ხოჯასთან წავალ, ნუსხას დავაწერინებ. გულისტკივილს მაინც მოუხდეს იქნება.

— ნუ იტყვი, დედი.—თვალეში ცეცხლი მოაწვა თოფუზს.—ხოჯის სახელი დღეიდან ჩვენს ოჯახში არ ახსენო. გესმის, დედი, არ ახსენო!

— რას ამბობ, შვილო! შენც ხომ არ გინდა მურადას დღეში ჩაგაგდოს ალლახმა? როგორ შეიძლება, ხოჯა არ ახსენო, ალლახი არ ილოცო. ხომ ნახე როგორ გაადელა ალლახმა მურადაი, საწყალი ბიჭი. ამბობენ ნაილეც გადელეებულაო.

— ტყუილია, მურადი მორჩა. დიად მორჩა. ის ღმერთმა კი არა, ხოჯამ გაადელა. ხოჯამ... მე გაეადელე ის, დედა.—თოფუზი აღელდა.

— რას ამბობ შვილო? შენ რა შუაში ხარ? ის მისმა ცოდვებმა გაადელა. ეშმაკს ეშმაკები გამოეცხადა დიდება ალლახს, შენი თავი გადამირჩინა, არ დამტანჯა უდანაშაულო ადამიანი.

ფერუზემ ხელები აღაპყრო და რალაც ლოცვები წარმოსთქვა.

— ჰმ,—ჩაიციხა მწარედ თოფუზმა.—ექიმებმა მომარჩინეს და ალლახს მადლობას ეუბნები, ძალიან უმადური ყოფილხარ, დედი!

— თუ ალლახის ნება არაა, ექიმები ისე ვერავის მოარჩენენ, შვილო. ნუ იტყვი მასე, გეყურებანოს დედა.—შუბლზე გადაუსვა ხელი და მკერდზე აკოცა.

— შენ არ გჯერა, დედი, რომ მურადი მორჩება?

— ალლახმაც ინებოს, შვილო, მაგრამ ხოჯა ამბობს არ მორჩებაო. ექიმები ვერაფერს გახდებიანო...

— ხოჯა ამბობს:—გაიმეორა თოფუზმა.—დიდი მოხერხება აქვს მაგ ხოჯას, მაგრამ... შენ იცი დედი ბოლშევიკები როგორი ხალხია? აი, ანდრო რომაა, ისეთებია ბოლშევიკები, ჰო და, იმათთვის დაუძლეველი არაფერია. ხოჯებს, აღიებს, მოლებს, ბეგიებს შეუძლიან ცოტა ხელი შეუშალონ, მაგრამ ბოლშევიკებს ვერას დააკლებენ... შენ იცი, რომ ჩვენს ტყეებში ქაჯი დადიოდა?

— ნუ ახსენებ, შვილო, მის სახელს. დასწყევლოს ღმერთმა მისი სახელი.—გააფურთხა მოხუცმა.

— არა, დედი, მე ქაჯის არ მეშინია. ისე გეკითხები, შენ თუ გაგიგონია, რომ ჩვენს ტყეებში ქაჯი და ეშმაკი დადიოდა.

— გამიგონია, შვილო, ხოჯამაც სთქვა იმ გზობაზე ვნახეო. მურადაიც იმან გაადელაო. ალლახის ურჩს ხვდებო და ადელეებსო. შენ კი ღმერთმა გაშროოს, შვილო, მისი შეხვედრა.

— ხა, ხა, ხა,—გადანიხარხარა თოფუშმა.—ის ქაჯი ანდრომ ნახა ერთ ღამეს და იცი რა უქნა?

— ღმერთო, დამიფარე!

— ფეხში ტყვია გაარტყა, დედი. შემდეგ დასაქერად გამო-
ეკიდა, მაგრამ ქაჯმა ტყეში შეასწრო.—კიდევ ჩაიქნია თავი.—
შეორე დღეს მოძებნა ფეხმოტეხილი ქაჯი და ფეხი მოუჩრჩინა.

— გეყოფა. შეილო, დაიძინე.—დაექვდა შეილის გონებაზე
ღედა.

— ტყუილი გგონია? მოუჩრჩინა ფეხი, მაგრამ რა გგონია
შენ? აწი ის ქაჯი იცი როგორი გახდება? ანდროსათვის თავს
არ დაზოგავს. ყველა ქაჯებს მოსპობს და ისე გაწმენდს ჩვენს
კუთხეს, რომ აი, ერთი მალე მოუჩრჩებოდეს ფეხი!—უძლური ბე-
ლები მოუქირა ერთმანეთს.

მოხუცს ფერი ეცვალა. ცუდი ნიშანია ასეთი ლაპარაკო,
გაიფიქრა. რომ დაიძინებდეს, ხოჯასთან წავიდოდა, ალოცვინებდა,
ძალიან უხდება გონების არევის ლოცვები.

მაგრამ ძალი ხსენებაზეაო..

ფრთხილად მოაკაკუნა. ვილაცამ კარებზე და ვიწროდ გაღე-
ბულ კარებში მოლა ნურიმ შემოიქვერიტა.

— მარტო ხარ, თოფუშ?—და შემოდგა ფეხი.

ფერუზე მოსცილდა შეილის საწოლს, იაზმა შემოიხვია და
მიბრუნდა ზურგით სტუმრისაკენ.

— კარგ დროს მობრძანდი, ნური, ხოჯასთან მინდოდა წა-
სვლა, ნუსხა უნდა დამეწერინებინა.—ისე ზურგშექცევით უთხრა
უკვე სახლში შემოსულ მოლას ფერუშემ.

მოლამ არაფერი უპასუხა, ერთი მიიხედ-მოიხედა ოთახში და
სხვა რომ ვერაინ დაინახა, თოფუშთან მივიდა.

— ეჭიმები იყვნენ?—ნახევარ ჩურჩულით ჰკითხა მან თოფუშს.
თოფუშმა პირი იბრუნა ბალიშზე.

ნური მოუბრუნდა ფერუშს

— მარტო დაგვტოვე, ფერუზე.—ბრძანების კილოთი უთხრა
მას და ისევ თოფუშას გადახედა.

— დედა, არ გაბვიდე!—კარებთან მისული ფერუზე შემოაბ-
რუნა თოფუშმა.

ფერუზე შესდგა. გააკვირვა შეილის ასეთმა კილომ.

— თქვენ ისაუბრეთ, შემოგველოს დედა. მე მალე შემოვალ.

— დარჩი მეთქი, დედი!—უფრო სასტყად უთხრა თოფუშმა
და მოხუცი მობრუნდა.

— აქ დამიჯექი,—მიუთითა ტახტზე.—შენ კი,—უთხრა ნუ-

რის,—ახლა ვერაფერს გეტყვი. არ შემძლია, თორემ... არაუშავს, ჩემს მაგივრად სხვები გეტყვიან.

— თოფუზ!—შესძახა შემკრიალმა ჩოლამ და ავადმყოფისაკენ წაიწია.

— იციან ყველაფერი... წადი, წადი მეთქი..

— თოფუზ, რა ჩაიღინე?!

— არაფერი ისეთი... ჯერ არ გიცნობენ. კიდეც შეგიძლია იარო თავისუფლად, მაგრამ...—თოფუზმა ხმას აუწია—მაგრამ მოურჩება ფეხი ქაჯს და... ოპ თქვენი...—კბილები გააკრაქუნა და თვალებიდან ცეცხლი გადმოყარა.

— ასე!?.—მუქარით ჩასძახა მოლამ.

— ასე... ქაჯის ფეხის მორჩენამდე ასე... შემდეგ კი... თქოთონ ქაჯი გაასწორებს თქვენთან ანგარიშებს.—მტკიცედ უპასუხა თოფუზმა

— მაშ, ქაჯი უნდა მოკედეს!—მრისხანედ სთქვა მოლამ, იძრო ბებუთი და ის იყო მწოლარისათვის უნდა ჩაცვა გულში, რომ უეცრად თითქოს მიწიდან ამოძვრნენო, ორი ახალგაზრდა შემოვარდა კარებში რევოლვერებით ხელში და მოლამ ხელის აწევაც ვერ მოასწრო, ისე გაკოქეს.

ფერუზემ შეიკივლა და შვილს გადაეფარა. თოფუზს, ამხანაგები რომ დაინახა, გული გაუმჯავრა. წამოვარდნა დააპირა, მაგრამ ვერ შესძლო და ისევ ლოგინში ჩავარდა.

— მიშველეთ ზიკებო! მიშველეთ! შეკოქეთ მაგი ბილწა. მაენე! გეყურბანეთ ამხანაგებო... მასე... მასე შეუკარით ხელები. იძახდა თოფუზი და ძლივს იქერდა თავს.

ახალგაზრდებმა სწრაფად გაიყვანეს მოლა და ფერუზეს დაუტარეს, რომ ფრთხილად ყოფილიყო... უცნობისათვის კარები არ გაეღო...

— ალლაჰ, ალლაჰ,—ამბობდა ფერუზე შვილის ლოგინთან ჩაჩოქებული და თავის პირმშოს მისჩერებოდა.

მოლას დაპატიმრებისა და წაყვანის შემდეგ თოფუზმა მოუყვა დედას ამბები, რომელიც მისსა და ქაჯების მოქმედებას შეეხებოდა.

— სიკვდილო ჩემი, სიკვდილი!—იძახდა საწყალი მოხუცი და ქვითინებდა..

ქარი შეწყდა. თეთრად დაბურულ მთებს შემოეცალა შავი ნისლი. ცა თანდათან მოიწმინდა. ვარსკვლავებმა გამოიკვერიტეს მალლიდან და გამოჩნდა დასავლეთისკენ გადაკიდებული, კიდე-ჩამოჭრილი მთვარე, რომელიც თითქო ძალიან ჩქარა მიეჭანებოდა

და სრიალით მიდიოდა ჯერ კიდევ აქა-იქ დარჩენილ თხელ ღრუბ-
ლებში.

მამლების ყივილი ყრუდ მოისმოდა.

ახლოვდებოდა დილა, რომელიც სიცოცხლის მომგვრელი
მზის ხსიევით მოქარავდა ქვეყანას.

თოფუხს ეძინა ტკბილად. ფერუხეს შვილის ხელი ჩაეკრა
გულში და სთვლემდა სიხარულით აღსავსე. გარეთ კი ორი ახალ-
გაზრდა დადიოდა რევოლვერებით ხელში და მძინარე ადამიანების
სიცოცხლეს სდარაჯობდნენ. ესენი კომკავშირელები იყვნენ, ორგა-
ნიზაციის დაეალებას ასრულებდნენ.

IV

მთელ სოფელს მოედო მოლა ნურის დაპატიმრების ამბავი.
ანდრო ჯერ კიდევ არ ამდგარიყო, რომ ღურსუნნი მიიქრა მასთან.
ის მეტად აღელვებული იყო. ლაპარაკს ძლივს ახერხებდა, ენა
ებმებოდა.

ანდრომ სთხოვა დამჯდარიყო, მაგრამ ვერ მოახერხა დაჯ-
დომა. შეურაცყოფილი ადამიანის გამომეტყველება ჰქონდა. გული
საშინლად უცემდა.

— ერთი მითხარი, ამხანაგო ანდრო, ვინაა ამ სოფლის ბა-
ტონ-პატრონი?..—ძლივს წარმოსთქვა მან და ანდროს მიაჩერდა.

ახალწამომდგარი იყო ანდრო, ხალათს იცვამდა ამ დროს,
მაგრამ უცებ შეჩერდა და გაკვირვებით მიაცქერდა აღელვებულ
თავმჯდომარეს.

— არაფერი მესმის.

— ვინ არის ამ თემის ბატონ-პატრონი მეთქი?—კიდევ გაი-
მეორა. შეკითხვა თავმჯდომარემ.

— საერთოდ, ბატონი არ ყავს ახლა ჩვენს სოფლებსა და
ქალაქებს და, რაც შეეხება პატრონს, ვინ უნდა იყოს? ჩვენ, ჩვენ
ვართ ჩვენი ქვეყნის პატრონი და თუ გნებავს, ბატონიც. რა გინდა
სთქვა მაგით?

— რა მინდა ვთქვა? ..—მაგრად ამოითქვა სული თავმჯდომარე-
რემ.—ვინ დააპატიმრა ნური?

— მოლა ნური?

— დიად, ვინ მიუხდა ხოჯას სახლში?

— არ ვიცი, — ცოტა არ იყოს ჩაფიქრდა ანდრო.

— მაშ მე ვიცი...—სკამზე ჩამოდგა ცალი ფეხი. მაუზერი წინ
მოიმწყვდია, ტარზე მარჯვენა ხელი დაადო და ამეტყველდა.—მაშ

მე ვიცი.—გაიმეორა ისევ.—შენ კი არ გეწყინოს და ერთ სამ-ოთხ კაცს აეუკრავ ბარჯს ამ სოფლიდან.—შიაჩერდა ანდროს.

— რაშია საქმე, ამხანაგო ღურსუნ? თუ ვინმე ბარჯასაკრავია, მათი აბარგება რატომ უნდა მეწყინოს! ჩემი მოვალეობაც ისაა, რომ დაგეხმარო ასეთ საქმეში.

— დახმარება სხვაა. მე ვიცი შენ დაიცავ მათ, კომკავშირელები, ახალგაზრდები და გადამელობები წინ, მაგრამ, იცოდე ამხანაგო ანდრო, ძალიან მიყვარხარ და მენათრება შენი, მაგრამ საკოთხს კი უმალლეს ორგანოში დავსვამ თუ...

ანდრომ გადაიკვა ხალათი და ქამარი შემოირტყა.

— სჩანს ცუდად მიტნობ, ამხანაგო ღურსუნ. დამნაშავეს და ხელისშემშლელს კომკავშირელს კი არა, პარტიის წევრიც რომ იყოს, არ დავერიდები, დიად, არ დავერიდები. სწორედაც იმიტომაა ჩვენი პარტია ძლიერი, რომ არავის დაერიდება. შითხარი რაშია საქმე?

— შენ არ იცი, რომ წუხელის ნაშუაღამევს კომკავშირელებს მოლა ნური დაუპატიმრებიათ?

— არა.

— ხოჯისას რომ მიცვენილან და კარების შეღეწვა მოუნდომებიათ?

— პირველად მესმის.

— მაშ ვისი დირექტივებით მოქმედებდნენ ისინი?—უფრო აღელდა თავმჯდომარე.—დღეს მთელი სოფელი აწრიალებულია, ხოჯას იკერენო, მოლა დაგვიკირესო, აწი ჯამესაც დაგვიშლიანო. ხომ იცი, ამხანაგო ანდრო, ჩვენი მთავრობის პოლიტიკა?

— ძალიან კარგად!

— მაშ, სარწმუნოებისა და ზნე-ჩვეულებების წინააღმდეგ ამ სახით ბრძოლა შეიძლება? დასაშვებია? მოსათმენია?

ანდრომ მხრები აიჩეჩა

— მაშ ვინ მუშაობს თავისი ბნელი ხელებით ჩვენი პოლიტიკის წინააღმდეგ? ვინ არიან ეს ლაწირაკები, რომ ასე მოქმედებენ! ვინ მისცა ნება მოქალაქის დაპატიმრების, ოჯახში მიხდომის. შითხარი ამხანაგო ანდრო. ვის აქვს ამის უფლება?

ანდრომ თავი გადააქნია... გუშინ თოფუზის ოპერაციის შემდეგ ექიმებს გამოყვა. ცოტა ხანს ისაუბრეს. შემდეგ ისინი ცხენებით წავიდნენ და ანდრო მარტო დარჩა. მასთან დალაშქრების კომკავშირის უჯრედის მდივანი შაქირ მენაბდე მოვიდა, თოფუზის ჯანმრთელობა იკითხა და ისევ წავიდა. ანდრომ მას დააეალა ყურადღება მიექციათ თოფუზისათვის. გაანდო საიდუმლოება. სხვა

არაფერი. მაშ ეს რაღაც მომხდარა. სჩანს აქ რაღაც ამბავია კიდევ.

— სადა ჰყავთ პატიმარი?— შეეკითხა ღურსუნს ცოტა ხნის შემდეგ ანდრო.

— ვინ იცის.— უ ზასუხა თავმჯდომარემ.— იქნებ სადმე კიდევაც...

— შეუძლებელია. მაგას ვერ გაბედავდნენ.

— შენ არ იცნობ ამხანაგო ანდრო, ჩვენს ხალხს. ამ ტყეებს რომ ხედავ, იცი შიგ რამდენი ნაღირი დადის? რამდენი ყაჩაღი იმალება? ეს ხალხიც ამ ტყეში გაზრდილია. ესენი რომ არ ჩაიდენენ, ისეთი არაფერია. რატომ გეუბნებოდი ჩემსას დაბინავდა მეთქი. მართალი გითხრა, მეშინოდა. შენ არ იცი და რამდენი დამე გამითენებია თეთრად შენს სიცოცხლეზე ფიქრით. შენზე წინ რომ მომაგრებული ამხანაგი იყო, იმას სამჯერ დაუხვდნენ. მიკვირს, შენ რომ ვერაფერი გაგიბედეს, თუმცა ძალიან დაშინებული კი მყავს ყველა. მაგათ თუ მათრახი და ეს არ უჩვენე— მაუზერი ასწია ხელში.— ისე ვერ დაიმორჩილებ.

ვილაცამ გაბედულად მოაკაკუნა კარებზე...

— მობრძანდით, — გაეხმაურა შიგნიდან ანდრო.

ოთახში შაქირ მენაბდე და ორი კომკავშირელი შემოვიდნენ.

— გამარჯობა, ამხანაგო ანდრო!

— გაგიმარჯოთ! — სათითაოდ გადახედა ანდრომ მოსულებს. სამივეს რევოლვერის ტარზე ჰქონდათ ხელი მოკიდებული და ფხიზელი თვალებით ზვერავენენ ყველაფერს.

— აი, ეს ვაჟბატონებია, — ხელით აჩვენა ღურსუნმა ახალგაზრდებზე და სკამიდან ფეხი ჩამოდგა.

— რომელი ვაჟბატონები? — მოუბრუნდა შაქირი თავმჯდომარეს.

— ის ჩვენ ვიცით. — მაუზერზე დაიდვა ხელი ღურსუნმა.

— ჩვენც რომ ვიცოდეთ, რა უშავს, — წამოიძახა ერთმა კომკავშირელმა, რომელიც კარებთან გაჩერებულიყო.

— თქვენზე ვილაპარაკებთ, — მიუგო თავმჯდომარემ და ანდროსაკენ შებრუნდა.

— უცნაურად ლაპარაკობ, ამხანაგო ღურსუნ, — წინ წამოიწია შაქირი და მაგიდასთან გაჩერდა. — მე მგონია ჩვენ ერთმანეთთან საბრძოლველად მოწოდებული არ ვართ. თქვენ მთავრობის წარმომადგენელი ხართ, ჩვენი არჩეული. ჩვენც ორგანიზაციის წევრები ვართ. რატომაა, რომ რაღაც მწყურალ კილოზე გველაპარაკები. რა დიგვიშავებია?!

— ის მე ვიცი, რაც დაგიშავებია. — ველარ შეიკავა თავი ღურსუნმა. — ერთი მითხარი, ვინ დაპატიმრა წუხელის შუალამისას

მოლა ნური ბორდავაძე! მითხარი მეთქი, ვინ დააპატიმრა?!

— ჩვენ,—ამაყად უპასუხა შაქირმა.

— თქვენ!—იყვირა თავმჯდომარემ.—ვინ ხართ თქვენ?! ვინ ხართ მეთქი!—უფრო აუწია ხმას და მაუზერის ტარს ნერვიულად დაუწყო ხელით ტრიალი.

—ვინცა ვართ, კარგად იცით თქვენ, ამხანაგო ღურსუნ, ჩვენ კომკავშირელები ვართ, მოქალაქეები ვართ...

— ჩუმად!—შეაწყვეტინა თავმჯდომარემ სიტყვა.

— თუ შეიძლებოდეს, აქ ნუ გვიყვირო, —გამაფრთხილებელი კილოთი უთხრა შაქირმა.—თქვენსას ჩვენ უფრო ადრე ვიყავით და ვერ გნახეთ. ახლა ანდროსთან ვართ მოსული და თუ გსურთ დაესწროთ ჩვენს ლაპარაკს, კეთილ ინებეთ და მოისმინეთ, თუ არა და, მიბრძანდით. ჩვენ იქ გეახლებით და, როგორც საბჭოს თავმჯდომარეს, ყველაფერს დაწერილებით მოგახსენებთ.—ისეთი ტონით უთხრა ეს სიტყვები შაქირმა, რომ ღურსუნმა სიბრაზისაგან ტუჩები დაიკენიჭა.

— წახდა დროება.—გაიფიქრა მან.

როგორ თამამად ლაპარაკობენ უფროსის წინაშე! აი, დედასა, სადაა ის დრო... მათრახით აუქრელებდა ზურგს. ყურმუსალები... ნაცრიანი მქადით გამოზრდილები, ფეხშიშველა გლეხების გაზრდილები!..

როგორ შეჩვევიან ლაპარაკს!..

ღურსუნმა ზიზლით გაიხედა ანდროსაკენ...

სულ ამისი ბრალი კია. ყველაფერი შეასწავლა, რაც იცოდა. ნამდვილ ბოლშევიკებად მოაქვთ თავი. რომ ამაყობენ კიდევ! მაკაკაცის მოცილებაც რომ არ მოხერხდა! რამდენი ქალაქი გაგზავნა, რამდენი რა არ დასწამა, მაგრამ არაფერი ეშველა. დააწინაურონ მაინც, რომ აქაურობას მოსცილდეს.

ანდრომ სთხოვა ღურსუნს ედროვებია, მოესმინა მოსულები: სათვის და, როგორც იქნა, გააჩერა, მაგრამ მისი ხელები მაინც თრთოდნენ და კანკალებდნენ ბრაზისაგან.

— ამხანაგო ანდრო.—დაიწყო შაქირმა,—ჩვენ წუხელის გადაეპარბეთ, თუ შეიძლება ასე ითქვას. შეიძლება ამ შემთხვევაში სამართლიანი იყოს ჩვენი თავმჯდომარის წყრომა, მაგრამ ჩვენ ხშირად შენგან გაგვიგონია, რომ არის შემთხვევები, როცა ვერ დაელოდება ღირეპტივას და ისე იმოქმედებო. ჩვენც ასე მოვიქეციით. სხვანაირად არც შეიძლებოდა. აი, ახლა, როცა ფაქტის წინაშე ვართ, განსაჯეთ ჩვენი მოქმედება და სათანადო ზომებიც მიიღეთ.— ცოტა ხნის შეჩერების შემდეგ დაუმატა:—ჩვენ დაუპა-

ტიმრეთ შოლა ნური ბორდავადე, გვინდოდა დაგვეპატიმრებია ხოჯა მამული ზერადე, მაგრამ დაგვემალა...

- ვინ მოგკათ ნება?!—ვერ მოითმინა ისე თავმჯდომარემ.

— მოგახსენებთ, ამხანაგო დურსუნ. რატომ დელავთ მასე?.. ჩვენ გვინდოდა დაგვეპატიმრებია იუსუფ-ალაღ...

— რა უფლებით?—კიდევ შეაწყვეტინა თავმჯდომარემ და წელში გასწორდა.

— უფლებებზე აწი ვილაპარაკებთ, ამხანაგო დურსუნ... ჩვენ ჩვენი მოვალეობა შევასრულეთ, ჩვენ ადამიანის სიცოცხლე ვიხსენით და...

შაჰირმა მოკლედ მოუყვა წუხანდელი ამბავი...

კომკავშირელები ფხიზლები უნდა იყონ. ანდრომც ხომ უთხრა შაჰირს, თოფუზს ყურადღება მიაქციეთო. ეს ყველაფერს ნიშნავს. ყურადღების მიქცევაში ყველაფერია ნაგულისხმევი. განა არ იცოდნენ, რომ შოლა თოფუზის მოკვლას მოინდომებდა?! იცოდნენ და იმიტომ მიუჩინეს დარაჯები. ფეხაკრფით შეყვენენ სახლში და უცდიდნენ. ასე დაარიგა მოხუცმა მუჰამედ შეინდაძემ. იმ მოხუცმა, თეთრწვერება რომაა, ანდრომ რომ შვილიშვილები მოუწყუო სასწავლებლებში. დახმარება აღმოუჩინა და მიხედა. სწორედ ის მოხუციც ეხმარებოდა კომკავშირელებს. შორსმჭვრეტელი კაცია, ნახული აქვს ბევრი და ესმის. პირადათ მივიდა შაჰირთან წუხელ. თოფუზას ამბავი იკითხა და რომ გაიგო, ანდროს მოყვანილმა ეჭიმებმა ოპერაცია გეუქეთესო, შეკრთა.

— ბიჭებო, — სთქვა მან, — ახლა საფრთხეშია თოფუზი. მას ბოროტი სულელები დაეცემიან. მიხედეთ. უშველეთ. — და დაარიგა, როგორ მოქცეულიყვნენ...

შაჰირმა გაუმტყუნა მოხუცს. ბოროტი სულელები სად არიან, ბაბულიო, მაგრამ მოხუცმა დაიჩემა. ქვეყანა სიკეთესა და ბოროტებაზე ბრუნავსო. დაუდარაჯეთ, უთვალთვალეთ და ბოროტ სულსაც დაიკერთო... ურუსებმა რომ თოფუზა მოარჩინეს, მაგას არ მოითმენენო. წადით და ნახავთო...

იმ ხნის კაცს ტყუილიც დაეჯერება. ორი კომკავშირელი ქურდულად აეტუზა თოფუზას ოთახის კარებს. ერთი საბძელთან მიიმალა გარედან...

და თავის დროზე ყველაფერი ისე მოხდა, როგორც მოხუცი მუჰამედი ამბობდა. მარტო შოლა ჩავარდა. ხოჯა ვერ დაიჭირეს. დაიმალა. გარეთ იცდიდა ის, დერეფანში ატუზული... ისე კი ერთად მივიდნენ თოფუზისას.

დაქერის შემდეგ შოლამ ყველაფერი აღიარა... დედა-შვილი

უნდა მოგვეკლა და ანდროსთვის დაგვეპრალეზიაო...

— სად არის პატიმარი?—კითხა ანდრომ 'შაქირს.

ამ ამბავის მოსმენაზე თავმჯდომარეს ფერი წაუვიდა. ის ისე კანკალებდა, რომ ყველასათვის შესამჩნევი იყო...

— ამათ საბძელში—ხელით ანიშნა ამხანაგზე 'შაქირმა.—
სამი ბიჭი დარაჯობს.

— ძალიან კარგი. წავიდეთ საბჭოში დურსუნ! თქვენ მოლანური მოიყვანეთ იქ, ამხანაგებო.—ანდრომ პალტო მოისხა, ყაბალახი ყელზე შემოიხვია და გამოვიდა.

დურსუნი უხმოდ გამოყვა. ის ჰგავდა წელგაწყვეტილ გველს, რომელსაც უფრო მეტი გესლი მოწოლია, მაგრამ წასვლა არ შეუძლია და ერთ ადგილას აქნევს თავს. ამ დროს ის თავის სიახლოვეს ეძებს მოწინააღმდეგეს; იბრძვის, ტრიალებს, იგრიხება, წვალობს და თუ ცოცხალი არსება არ ჩაუვარდა ხელში, ქვას მოუჭერს კბილებს, მთელი სიძლიერით დააწეება, გადმოანთხევს რაც გესლი აქვს, ამოსწურავს მისს ფიალას და შემდეგ თავის დანთხეულ გესლშივე მოკვდება.

ასეთი იყო დურსუნ შვინდაძის მდგომარეობა ამ დროს, იმ განსხვავებით, რომ მას აღარც ქვა ჰქონდა კბილების მოსაქერად და დაგროვილი გესლის ამოსანთხევად.

თ ა ვ ი მ ე ზ ვ ი ღ ე

I

მზიანი დღეები წავიდნენ ზედიზედ. ნაადრევად მოსულ ზამთარსა და ნამდვილ ზამთარს შუა პატარა გაზაფხული დადგა. დეკემბერმა მოწმენდილი ცა და ყინვიანი ღამეები მოიტანა. თოვლა თანდათან შეთხელდა და მალე სატელეფონო ხაზის აღდგენა და საფეხოსნო გზის გაყვანა იყო შესაძლებელი.

კარგა ხანია სოფლელები მაზრასთან კავშირს მოწყვეტილი იყვნენ. არც გაზეთები მოდიოდა, არც წერილები, ქვეყანასთან მხოლოდ მოწმენდილი ციხა და მნათობებით იყვნენ კავშირში.

ყველაზე ძნელი იყო ეს ანდროსათვის, რომელიც ყოველ წუთში ელოდებოდა მურადის ამბავს. ან წერილს კი გამოგზავნიდნენ, ან დეპეშას, ან ტელეფონით დაელაპარაკებოდნენ, ხაზი რომ ყოფილიყო.

საბჭოშიაც არეული იყო საქმეები. ახლა უსათუოდ საჭირო იყო ცენტრის დახმარება. სოფლებში ქორები იყო გავრცელებული... ვინ ანდროს წინააღმდეგ გამოდიოდა, წყევლიდა, აგინებდა... ვინ კიდევ საბჭოს თავმჯდომარეზე ილესდა კბილებს, მაგრამ ერთნიც და მეორენიც ვილაცის ხმას მიყვებოდნენ და არც კი იცოდნენ ვისი იყო ეს ხმა.

დაპატიმრებული მოლა ისევ საბჭელში ჰყავდათ დამწყვედელი. კომკავშირელები დარაჯობდნენ რიგრიგობით. საჭირო იყო შირი: გადაგზავნა, გამოძიების დაწყება, მისი მომხრეებისა და ხელშემწყობთა დაპატიმრება, მაგრამ ამის ძალა იქ არ ყავდათ და ამიტომ ხოჯა მამული და იუსუფ-ალა, რომლებსაც ბრალდებოდა მოლასთან ერთად მუშაობა და სხვადასხვა ბნელი საქმეების მოწყობა, ჯერ კიდევ არხეინად დასეირნობდნენ. ანდრომ და ზოგიერთმა ამხანაგებმა, მოითხოვეს იმათი დაპატიმრება, მაგრამ საბჭოს თავმჯდომარე წავიდა წინააღმდეგ. ის ჩადგა შუაში და დროებით გადაარჩინა სიმამრი დაპატიმრებისაგან.

ანდრო აჩქარებდა ახალგაზრდებს, გაყავდა სამუშაოდ, აწმენ-

დინებად გზას, ასწორებინებდა ტელეფონის ბოძებს და აბამდა მათეულებს, რომ მზად შეხვედროდა მაზრიდან წამოსულ სატელეფონო ხაზის შემკეთებლებს.

რამდენიმე დღეში გაიყვანეს ბილიკი მახლობელ სოფლამდე. შემდეგ მათთან ერთად წაიწიეს წინ და მალე გავიდნენ ბათუმ-ხულოს გზატკეცილზე.

ახლა აღარ იყო საჭირო ცდა. მოილაპარაკეს. გადაწყვიტეს.. ხვალ დილით ადრე უნდა დაეპატიმრებინათ შემჩნეული პირები. და მცველების თანხლებით მაზრაში გადაეგზავნათ. თვითონ ანდროც უნდა გაჰყოლოდა თან. ამის შესახებ ანდრომ საიდუმლოდ მოელაპარაკა უფრო დაახლოვებულ კომკავშირელებს და შემდეგ თავმჯდომარესაც განუცხადა.

როგორც გასურდეს.—ცივად უთხრა ღურსუნმა.—მე, როგორც თავმჯდომარე, არავის დაპატიმრებაზე ხელს არ ვაწერ.. და-აპატიმრე ვინც გინდოდეს... მაგრამ გაფრთხილებ, ამხანაგო ბერტაძე, რომ თქვენს დაგებულ მახეში თქვენვე არ გაებათ.

ეს რას ნიშნავს?—ფერი გადაჰკრა ანდროს.

— იმას, რომ მე ვერ მივიღებ მონაწილეობას იმ ბნელ საქმეებში, რომელსაც აქ ზოგიერთები აწყობენ. დიად, ვერ მივიღებ. —ავტორიტეტულად სთქვა ღურსუნმა და მაგიდაზე ნერვიულად აათამაშა თითები.

— მაგრამ შენ ხომ მოვალე ხარ მიიღო ზომები ხელისუფლების მტრების წინააღმდეგ?

როგორც გენებოს, ისე მოიქეციოთ. მე არაფერიც არ ვიცი, ჩვენ ვმუშაობდით ამ დრომდე, აგერ მესამე წელია თავმჯდომარედ ვარ და არაფერი გამიფუჭებია, ახლა...

ყველაფერი მოიგონა, ამოალაგა რაც ჰქონდა სათქმელი. რომ ანდროს მოსვლის შემდეგ მისი ავტორიტეტი დაეცა, ანდრომ გლეხები გადაჰკიდა, ახალგაზრდები გადარია, დასდევენ ვითომც რაღაც ეშმაკებს, ქაჯებს, ატყუილებენ ქალიშვილებს და... კიდევ ბევრი აქვს სათქმელი, მაგრამ...

გაჩუმდა და ზურგი შეაქცია.

— მაშ შენ არ გინდა მიიღო ზომები დამნაშავეთა წინააღმდეგ, დაგვეხმარო და ხელი შეგვიწყო? არ ივარგებს მასე, ამხანაგო ღურსუნ! შენ პარტიამ და ხელისუფლებამ სათავეში დაგაყენა, თემის ხელმძღვანელობა დაგაველა, როგორ ფიქრობ, პასუხისმგებელი ხარ თუ არა მის წინაშე?

— ვიცი, ვიცი.—ხელი ჩაიქნია ღურსუნმა.—სადაც ადგილია, იქ ვიტყვი მაგის შესახებ.. მანამდე კი როგორც გენებოს. აი, თემ-

საბჭო და აპა თქვენს. მართეთ როგორც გენებოს.—უჯრის ვაი-
ლებები ამოიღო ჯიბიდან და მაგიდაზე დაყარა.—აპა, ჩაიბარეთ.—
მიბრუნდა და სწრაფად გავიდა.

ანდრომ თვალი გააყოლა მიმავალ თავმჯდომარეს და როცა
ის მიეფარა, წამოიღვა და ოთახში გაიარ-გამოიარა. უკანასკნელ ხა-
ნებში შეამჩნია ანდრომ, რომ სოფელში ატმოსფერა შეიცვალა.
ცალ-ცალკე და ჯგუფ-ჯგუფად დაიწყეს გლეხებმა მოსვლა საბ-
ჭოში. ზოგი მათგანი კარებიდან შემოიხედავდა, მიაველ-მოაველებდა
თვალს იქაურობას და გავიდოდა, ზოგიც გარედან ათვალიერებდა.
ანდროსთან იშვიათად შედიოდა ვინმე. მარტო კომკავშირელები
და ხუთიოდე გლეხი უტკერდა პირდაპირ. დანარჩენები მომღურა-
ვივით ჩაუყვლიდნენ და რაღაცას ჩაიბურბურებდნენ.

ანდრომ კომკავშირის უჯრედის მდივანი მოიხმო.

— ახლა ვაპირებდი სწორედ შენთან მოსვლას, ამხანაგო ან-
დრო—მოსვლისთანავე უთხრა მან.—ძალიან სახიფათო ზღვომარე-
ობაში ვართ. მე მგონია კარგი ექნებოდა მაზრისათვის გვეცნობებოდა.
რაღაც გლახად იყურებიან ზოგიერთები.

— შეამჩნიე რამე?—თითქოს არათფერი იცისო, ისე ჰკითხა
ანდრომ.

— ვინ ვერ შეამჩნიეს. წუხელის ხოჯისას თათბირი ჰქონიათ.
იუსუფ-ალა ომეროლლის მოლაპარაკებთან და...—მთელი საიდუმ-
ლოება გაეგო შაქირს დაწერილებით.

ალი ომეროლლი ყაჩაღების მეთაური იყო. დიდი ხანია ნა-
ვარდობდა მისი ბანდა. ოცამდე კაცი ყავდა და მთელ ახლომანლო
სოფლებს აწიოკებდა. ხანდახან ახალციხეშიაც გადადიოდა და
იქაც ნავარდობდა. მეტად დაუნდობელი და საზიზღარი ადამიანი
იყო. ზაფხულობით მომთაბარე ქურთებსაც არ იწივობდა, ართმევდა
პირუტყვს, გადაყავდა საზღვარზე და ყიდიდა. კონტრბანდისტებსაც
შეელოდა; მცველებს ატანდა თავის რაზმიდან და გასამრჯელოდ
ოქროს ლირებს იღებდა.

კაცის კვლასაც არ ერიდებოდა, თუ ვინმე კი დაავალებდა
და იმისთვის საჩუქარს შეპირდებოდა. გაგზავნიდა ორ-სამ ყაჩაღს
და დაეალებას შეუასრულებინებდა. უარს ვერავინ გაუბედავდა და
წინააღმდეგობას. მისი სიტყვა კანონი იყო.

ეს ახლა უამბო შაქირმა ანდროს.

— რატომ ამდენხანს არ ვიცოდი მაგ ბრზოს შესახებ?!—
გაკვირვებით სთქვა ანდრომ და შაქირს შეხედა.

— კარგა ხანია არ ყოფილან აქეთ.—მიუგო შაქირმა.—ამ-

ბობდნენ. საზღვარზე გადავიდაო, თურქების მთავრობას შეურიგ-
დაო, მაგრამ ტყუილი ყოფილა. ახალციხის მაზრაში მიმალულა
ამდენხანს. — შაქირი რმდენიმე წუთს ფიქრობდა. — უსათუოდ სა-
ქიროა ვაცნობოთ მაზრის ხელმძღვანელობას. — სთქვა მან ფიქრის
შემდეგ და ანდროს შეხედა.

მოილაპარაკეს. გადაწყვიტეს, ჩუმად გაეგზავნათ ვინმე და
ამზავი შეეთვალნათ, დახმარება ეთხოვათ მაზრისათვის. იქედან
დახმარების მოსვლამდე კი როგორმე გამაგრებულიყვნენ, მზად
ყოლოდათ ძალები და თვალყური ედევნებინათ საექვო პირები-
სათვის.

შაქირმა ითავა გასაგზავნი კაცის გამონახვა. ანდრომ წერი-
ლი გაამზადა და შაქირს გადასცა. წერილში დაწერილებით იყო
აღწერილი მდგომარეობა.

რამდენიმე კაცი იყო დასაპატიმრებელი. საბჭოს თავმჯდო-
მარეც უნდა გადაეყენებინათ და ამაზეც სანქცია იყო საქირო.
დურსუნის დატოვება თავის თანამდებობაზე აღარ შეიძლებოდა.
ძალიან ბევრი მასალა იყო დაგროვილი მასზე და კიდევ მეტი
აღმოჩნდებოდა. ახლავე უნდა დაეპატიმრებინათ, დაეწყათ გამო-
ჩიება, მაგრამ ძალა არ იყო. ახალგაზრდები კბილებს კრეჭდნენ.
მოითხოვდნენ დურსუნის, იუსუფ-აღას, ხოჯისა და სხვა შემჩნე-
ულ პირთა დაპატიმრებას, მაგრამ ანდრო არ შევებოდა. იმ დროს,
როცა სოფელი მოწყვეტილი იყო ცენტრს, როცა არსაიდან დახმა-
რების იმედი არ იყო, ასეთი ნაბიჯის გადადგმა ძალიან სახიფა-
თოდ მიაჩნდა.

გლებობის მეტი ნაწილი კიდევ დურსუნისა, ხოჯისა და იუსუფ-
აღას მხარეზე იყო. ისინი მოლა ნურის განთავისუფლების მოთ-
ხოვნასაც კი ბედავდნენ და ანდროს მოციქულებს უგზავნიდნენ.

ანდრო კარგი კაცია, მაგრამ მოსულთა, დღეს არა, ხვალ წავა,
დურსუნი, ხოჯა და იუსუფ-აღა აქ დარჩებიან, შემდეგ ამ ამბებს
გაგვიხსენებენ და უარეს დღეში ჩავცვივითო, ფიქრობდნენ ისინი,
შეთანხმდითო, ურჩევდნენ ანდროს. უფროსი კაცია, ზოგი დანაშაუ-
ლი უფროსობითაც ეპატიებაო.

ანდროსაც ადანაშაულებდა ზოგიერთი. არ ხართ მარტალი,
ყველაფრიდან მათი გამორიცხვა არ შეიძლებაო, არც საბჭოში
აგვარჩევინე, აღარც კრებებზე ვისწრებო, ეს არაა კარგიო. ანდრო
ჯერჯერობით მშვიდად პასუხობდა მათ. ყველაფერს მოვაგვარებო
პირდებოდა და ამით დროს იგებდა.

დურსუნი უკვე განგანზე იცქირებოდა. არ ელაპარაკებოდა ან-
დროს, არც მის მითითებებს ასრულებდა... მას თავის მომხრეები ყავ-

და და თავისი გეგმები ჰქონდა შემუშავებული.

ორ ბანაკად ირავებოდა სოფელი. ერთ მხარეზე ახალგაზრდობა და ღარიბი გლეხობა დგებოდა, მეორეზე — დურსუნისა და ალების ახლობლები. პირველს ანდრო მეთაურობდა. მეორეს დურსუნი და იუსუფ-ალა.

ზოგნი არც აქეთ იყვნენ, არც იქეთ, მაგრამ ასეთები ძალიან მცირე ნაწილს შეადგენდნენ.

პირველი დავალება იყო, ზორბეგმა რომ მიიღო. გამოსაცდელია და ვნახოთ როგორ შეასრულებო, ასე უთხრა კომკავშირის მდივანმა.

ძალიან გაეხარდა ზორბეგს დავალების მიღება. ის ჯერ კიდევ არ იყო მანდატიანი კომკავშირელი და, რადგან ასეთი საბასუხისმგებლო დავალება მომცეს, სჩანს კარგადაც მცურებენო, გაიფიქრა. ინანა, რომ ამდენხანს არ შევიდა კომკავშირში და სხვებთან ერთად მანდატიანი ვერ გახდა. თუმცა არც მისი ბრალი იყო... დაუშალეს. რა გინდა კომკავშირში, დღეს არა, ხვალ მაგათი სახსენებელიც არ იქნებაო. ზორბეგმაც დაუჯერა... არც შეიძლო არ დაეჯერებინა... არა, ზორბეგს ვერც ასეთი სიტყვებით შეაშინებდნენ, მაგრამ... კიდევ იყო რაღაც მიზეზი... ყველაფერი ხომ არ ითქმება... ახლა არ ითქმება, თორემ თავის დროზე ზორბეგი თვითონ იტყვის. დიად, იტყვის. რა ვუყოთ მერმე ბიძა რომაა. მშრომელი ხალხის კეთილდღეობას ათი ბიძაც რომ შესწირო, არაა ცოდვა... თუ ხალხის მტერია, მაშინ ბიძა კი არა, საკუთარი მამაც არაა დასანდობი... ახლაც გაბედავდა და იტყოდა ყველაფერს, მაგრამ არ ღირს. ისედაც არაა კარგი დამოკიდებულება ანდროსა და დურსუნს შორის და კიდევ რომ დაემატოს, ცუდი იქნება...

— ფრთხილად წადი, არავინ შეგნიშნოს. კომიტეტში მიიტანე ეს ხარატი... აბა შენ იცი — უთხრა შაქირმა და კონვერტი გადასცა.

ზორბეგს გაუკვირდა. როგორ მავალებენ ასეთი საიდუმლო საქმეების გაკეთებასო, გაიფიქრა, მაგრამ...

შაქირმა ყველაფერი აუხსნა. დურსუნის ძმიშვილია ზორბეგი, მის ერთგულად იცნობენ, ექვს არავინ აიღებს მასზე. თავისუფლად შეუძლია იმგზავროს. იქ კი... ყველაფერი უთხრა შაქირმა...

წერილის შინაარსიც გააცნო... მხოლოდ... არავინ, მკ ხორციელმა არ გაიგოსო.

მიხვდა ზორბეგი. სულ შიგნითა ჯიბეში ჩაიღო კონვერტი, თბილად ჩაიცვა და გაემგზავრა. დურსუნის ორლულდანი სანადირო თოფი წაიღო. შეველზე მივდივარ სანადიროდო, უთხრა ბიძას.

სოფლიდან აუჩქარებლივ გამოვიდა. სერ-სერ მიყვებოდა, თოვლში ეფლობოდა, განგებ უხვევდა აქეთ-იქით, მაგრამ მოსცილდა თუ არა სოფელს, ნაკვალევში ჩადგა და მოუსვა. ზეერი გზა ჰქონდა გასავლელი და დღე კი ამდენს არ დააცდიდა. ზვავიც ხვდებოდა აქა-იქ ჩამოწოლილი და ხელს უშლიდა. შორიდან უხდებოდა შემოვლა.

მიდიოდა გახარებული. პირველი დავალება პირველ ქორწილს უდრისო, ამბობენ. მართალი ყოფილა. სჩანს ანგარიშს უწევენ ზორბეგს, თვრამეტი წლის ახალგაზრდას. მერმე ვინ? თვითონ კოზაკ-შირის უჯრედის ხელმძღვანელი. მარტო ის კი არა, ანდროც, დიად, ანდროც, და ანდრო კი პარტიის კაცია. მთავრობის რწმუნებული. სახუმრო დავალება ხომ არაა..

ხელი მოისვა ზორბეგმა უბეზე, იქ, სადაც წერილი ედო, და უფრო აუჩქარა ნაბიჯს. ცოტა ხანს სწორი ბილიკით, შემდეგ პატარა დაღმართი ჩაირბინა და ლელისპირას ქვებთან შეჩერდა.

ბროლივით სუფთა წყალი მიჩხრიალებდა თოვლის ნაპირებს შუა მომწყვდეული. ოხშივარი ასდიოდა ნაკადულს და აქეთ-იქით იფანტებოდა.

აქ ცოტა ხანს შეჩვენა. რამდენიმე თოვლის გუნდა გადაისროლა ხევში და შემდეგ სერს შეჰყვა. ცოტა გზა გაიარა და გადმობურულ ტყეში შევიდა. თოვლს დიდრონი ტოტები ჩამოემტვრია ხეებიდან და აქა-იქ ბილიკი გადაელობა. ზორბეგი მარად ხტებოდა ერთი ადგილიდან მეორეზე და წინ მიიწევდა. განზრახული ჰქონდა სადამომდე ბათუმ—ხულოს გზატკეცილამდე მისულიყო და ღამე იქ გაეთია. დილაადრიათ კი გასდგომოდა გზას.

დავალებული ასე ჰქონდა. თუ ამას შესძლებდა, დიდი საქმე იყო. შესძლებდა უსათუოდ, თუ ხელს არ შეუშლიდა რამე. ამინდი თუ არ წახდებოდა, როგორც ეს ხშირად იცის აქეთ. მთა უზნეურ ბავშვივითაა. ამ წუთში რომ მზე კაშკაშებს, მეორე წუთში გაავდრდება, ნისლი ჩამოწვება, ან ქარბუქი ამოიჭრება. ასეთ შემთხვევას, შეუძლია დააბრკოლოს გზავრი.

ზორბეგს სხვა დაბრკოლება აზრადაც არ მოსდიოდა.

ისევ აიარა აღმართი, ჩაირბინა სერი და ლელეს მიადგა. კიდევ სამიოდე ასეთი აღმართი უნდა აევილო, ამდენივე დაღმართი ჩაირბინა, რამდენიმე ადგილს უნდა გასულიყო ლელეზე და შემდეგ გვიდოდა უფრო სწორ გზაზე.

აქ აღარ შეუწყენია. ლელიზე გაუხტა, შემდეგ თოფი გადაიკიდა მხარზე და აღმართს შეუდგა. ის იყო ადიოდა უღელტეხილზე,

რომ მოულოდნელად ვილაც შეიარაღებული კაცი დაუხვდა წინ.

— არ დაიძრა!—მისცა ბრძანება უცნობმა და მაუზერი შუბლში მიუჩერა. ზორბეგი გაჩერდა.

უცნობს ხუთიოდე კაცი ამოუდგა გვერდით.

— მარტო ხარ?—მიმართა უცნობმა ზორბეგს ისე, რომ მაუზერის ტუჩი ზორბეგის შუბლისათვის არ მოუცილებია.

— აბა ვინ უნდა მახლდე!—უპასუხა თაჰამად ზორბეგმა.

— სწორედ უპასუხე!—და ერთმა დამხვედროთაგანმა შაშხანის დუმა მიარტყა ფეხებზე ზორბეგს.

— ეი, შენ!—შეუყვირა ზორბეგმა,—რა გინდა ჩემგან?

მაუზერიანმა გადახედა მხლებლებს და ზორბეგთან მივიდა.

— რა იარაღი გაქვს თან?

— ამის მეტი არაფერი,—გადაკიდებულ თოფზე ანიშნა.

— სად მიდიხარ?

— ჩემი გზა რად გაინტერესებს!

— პირდაპირ მიპასუხე, თორემ...—მაუზერიანმა მკვანედ ჩახედა თვალებში.

— ჰევანაში მივდივარ,—იცრუა ზორბეგმა.

— ჰევანაში რა გინდა?

— ჩვენმა თემსაბჭოს თავმჯდომარემ გამგზავნა. აი ეს თოფიც მისია.

— რომელ სოფლიდან ხარ?

— წყაენარიდან.

— წყაენარიდან?

— კი.

— რა გვარი?

— შეინდაძე.

— სტყუი!

— რა ზორი მაქვს!—კარგად ახედ-დახედა ზორბეგმა უცნობს და ვერც ერთი მათგანი ვერ იცნო.

— თუ ცრუობ, სიკვდილი არ აგშორდება, — და ერთ მხლებელს ანიშნა რალაც. ის უცებ სადღაც გაქრა, და ორიოდე წუთის შემდეგ ტყიდან გამოვიდა ვილაც თავპირშეხვეული კაცი, რომელსაც მარტო თვალი უჩნდა.

მაუზერიანმა მოსულს ხელით ანიშნა ზორბეგზე, შემდეგ ზორბეგთან ერთი შეიარაღებული კაცი დატოვა და თავპირშეხვეულ კაცს შეჰყვა ტყეში.

კოტა ხანს შემდეგ უფრო დამშვიდებული გამოვიდა ის. მაუზერი ბუდეში ჩაედო. სახეც უფრო მშვიდი კქონდა.

— არ იტყვი, რატომ მიდიხარ კვანაში?—მოსვლისთანავე ციხა მან ისევ ზორბეგს და ნაძალადევი სიბრაზე გამოხატა სახეზე.

— ვისი რა საქმეა რისთვის მივლივარ! საქმე მაქვს და მივლივარ. მთავრობა მაგზავნის.

— წერილი მიგაქვს?—შეუბღვირა მაუზერიანმა.

— არა.

— მაშ?

— ისე მივლივარ,—წუთით იფიქრა, — ეს თოფი გამომატანა ღურსუნმა, კვანაში მიუტანეო ერთ კაცს.

— ვინ კაცია? რატომ მიუტანეო?

— ეს მისი საქმეა. მე რა ვიცი. მითხრა არავის უთხრაო, არც ვინმეს ვეტყვი.

— აღარც მაშინ იტყვი?—ისევ წაივლო რევოლვერზე ხელი მაუზერიანმა—როცა აი, იქ,—და ხეზე მიუთითა.

— რას მერჩით, მთავრობამ ტყვილა რატომ უნდა მომკლას. რა დამიშავებია,—ვითომც ძალიან შეშინდა ზორბეგი, განგებ გადმოყარა ცრემლები.

— მაშ რატომ არ ამბობ?

— რომც მომკლათ, მაინც არ ვიტყვი, აჰა მომკალით,—მკერდი მიუშვირა,—მთავრობა თუ კაცის სიყვდილს იკადრებს. — საწყლად მიმოავლო თვალი იქაურობას და შენიშნა, რომ ხეების ძირში ოცზე მეტი შეიარაღებული კაცი იჯდა.

— გლახა ყოფილხარ!—გაჯავრებით უთხრა მაუზერიანმა,—მაგრამ არც ისე გლახა. გასწი და არავის უთხრა, რომ ჩვენ შეგხვდით. გესმის? არავის... თორემ, ხომ იცი ვინცა ვართ.

— ვიცი,—თავი ჩაიქნია ზორბეგმა,—ბალშევიკები ბრძანდებით.

— გასწი, ბევრს ნუ ლაპარაკობ, თორემ მიიღებ საჩუქრებს. ხომ გესმის, არავის კრინტი... ღურსუნი რას ექცევა ახლა?

ზორბეგი მიუბრუნდა.

— არაფერს,—შემდეგ თითქო დიდი საიდუმლო სთქვაო, ისე ჩასჩურჩულა,—მთავრობის კაცებს ელოდება მგონია. ალბათ თქვენზე თუ ამბობდა.

— ემზადება?

— ზოგიერთები გაფრთხილებული ყავს. კარგად უნდა შეგხვდეთო.

— კარგი, გეყოფა. წადი ახლა შენს გზაზე და გახსოვდეს, რაც გითხარი,—მიბრუნდა მაუზერიანი და ნელი ნაბიჯით წავიდა, მაგრამ, თითქო რაღაც გაახსენდაო, ზორბეგს წამოეწია და გააფ-

რთხილა.—ჩვენი ყოფილხარ. ჭკუით იმგზავრე. გესმის, არავის არაფერი ჩვენს შესახებ.—ხელი დაკრა მხარზე და გაუშვა.

ზორბერგი თითქო გაფრინდაო, ისე მოსცილდა იქაურობას, რამდენიმე წუთში გაიარა საათის სავალი გზა და მახლობელ სოფელში შევიდა.

— ახლა აღარ იცოდა ზორბეგმა საით წასულიყო. მან კარგად იცნო ყაჩაღი ალი ომერ-ოღლი პირახვეულ კაცში, რომელიც ტყიდან გამოიყვანეს მის გამოსაცნობად.

— რალაც დიდი საქმისათვის ემზადებიან, — გაიფიქრა მან. მოაგონდა შაქირის სიტყვები. ძალიან საჩქაროდ გვჭირდება დახმარებაო. მერმე ვინ შესძლებს ამ დახმარების მიწოდებას? ზორბეგმა მთელი ღამე რომ იაროს, მაინც ვერ მიაღწევს ხულომდე. იქედან წამოსული დამხმარე ძალებიც ვერ მოვლენ დღე-ღამის ვანმავლობაში, ხოლო ყაჩაღებს და მათ მასპინძლებს ამელამ შეუძლიათ მოაწყონ თავდასხმა და მთელი სოფელი ააწიოკონ. სოფელს ვინ ჩივა, ანდროს მოჰკლავენ, შაქირს, არც სხვა კომკავშირელებს დაინდობენ. მერმე სირცხვილით სად უნდა გამოყოს თავი ზორბეგმა? ანდროს მოღვაწეობა მოაგონდა.

ერთი წელი არაა, რაც მოვლინებულია, და რამდენი რა გააკეთა. ყველაფერს ფერი და სიცოცხლე მისცა. რამდენი ახალგაზრდა გაწრთენა და მოამზადა. რამდენი გაგზავნა სკოლებში. ერთი წელი კიდევ და მშვენიერი გზაც ექნება სოფელს. ამის მესამედი რომ ეკეთებია სხვა მთავრობას, ახლა ჩვენში ცხოვრებას არაფერი ემგობინებოდა.

— მაგრამ რატომ მაინც არ მოსწონს ზოგიერთებს ეს მთავრობა?—ეკითხება თავის თავს ზორბეგი.

— მერმე ვის არ მოსწონს? ხოჯას, ალას, ბეგის კაცებს.. მერე რა? ჯანდაბას მათი თავი. ნუ მოსწონთ! არც ჩვენ მოგვწონს ბეგები, ალები და ხოჯეები. ჩვენ ხომ მათზე მეტი ვართ.

რა დროს ამაზე მსჯელობაა... ზორბეგმა რაც ძალა და ღონე ჰქონდა მოკურცხლა, რომ შეჩერების დროს ნაცდური აენაზღაურებინა.

აქეთ უფრო გატეხილი იყო თოვლი. ის კარგახანი მიდიოდა სირბილით. შემდეგ მოიქანცა და ისევ ნაბიჯით, მაგრამ აჩქარებული ნაბიჯით წავიდა.

დეკემბრის დღე მალე მიიწურა. მზე გადავიდა მთის გადაღმა და მისი სხივებიც მოსცილდნენ ქვეყანას. ხევში აცივდა და გაუქერქეშდა თოვლის ზედაპირი, ფეხქვეშ ლაწა-ლუწი გაჰქოდა ყინვას. კიდევ რამდენიმე წუთი და ზორბეგი შევიდა სოფელში. აქ

თოვლიც ნაკლები იყო და სიცივეც. თავისი გეგმის მიხედვით აქედან ის აქ უნდა დარჩენილიყო, მაგრამ ახლა გასაჩერებლად აღარ ეცალა. უნდა წასულიყო და უსათუოდ ამელამვე მიეტანს ცნობა კომიტეტში.

ამ გზაზე თითქმის სულ არ იყო თოვლი, მოძრაობას გაეჭროს და წყლად ექცია.

ზორბეგი არ შეჩერებულა, გავიდა სოფლიდან და გზატკეცილს დაადგა.

სიბნელე თანდათან მატულობდა. სიცივეც ძლიერდებოდა, მაგრამ ზორბეგს ოხშივარი ასდიოდა. ყაბალახიც კი დასველებოდა ოფლით.

ოც კილომეტრზე მეტი ჰქონდა გასავლელი და ძალიან აწუხებდა ის, რომ ამ გზას ხუთი საათი მოუხდებოდა, თუ ძალიან ჩქარა წავიდოდა. მისი ფიქრით ალიონზე მივიდოდა ხულოში, ხოლო სანამ კომიტეტში ამხანაგებს ნახავდა და ბარათს გადასცემდა, ამას კიდევ დრო უნდოდა.

მოიქანცა. ახლა ისე ჩქარა ვეღარ მიდიოდა, როგორც პირველ ხანებში. ხუმრობა ხომ არ იყო. ოცი კილომეტრი გზა გამოევიწყო, ქალამნებიც კი გაცვეთოდა.

შორს მოსახვევში გამოჩნდა ცეცხლის ორი თვალი, რომელიც ელვის სხივებით ჰკვეთდა სიბნელეს და წინ მიიწეოდა, მას მოსდევდა გუგუნის ხმა და მძინარე მიდამოს აღვიძებდა.

ხულოდან მომავალი მანქანა მოსრიალებდა დაღმა, ბათუმის მიმართულებით.

— გაეჩერებ, — გაიფიქრა ზორბეგმა. — ვეტყვი გაბრუნდნენ უკან და ხულოში მიმიყვანონ, — შერმე დაფიქრდა, აქვს თუ არა ამის უფლება? ანდა ვინ გაუჩერებს მანქანას ელაც აქარულ ბიჭს!

თავის თავს შეეკამათა ზორბეგი.

უფლება აქვს. უთუოდ აქვს უფლება. მას ხომ სასწრაფო საქმე აქვს, რომელიც საერთო საქმეა და არა კერძო ვინმესი... დიად, ასეთ დროს დიდი პასუხისმგებლობაც აქვს და დიდი უფლებაც.

უცებ გადაწყვიტა... გზის პირას გადმოშვერილი ნაძვის ტოტი ჩამოხლიჩა, ხელში დაიკავა და შუა გზაზე გაჩერდა.

მანქანის თვალებიდან ნასროლმა სხივებმა თითქო გაჰკვეთეს ზორბეგი. მან მაღლა ასწია ნაძვის ტოტი და ამით ანიშნა მანქანას გაჩერება.

სამი კაცი ელვის სისწრაფით ჩამოხტა მანქანიდან და სიბნელეში რევოლვერებმა იელვესა

— არ მესროლოთ! — შესძახა ზორბეგმა და ხელები ასწია...

ერთი კაცი მიუახლოვდა ზორბეგს და ჯიბის ფანარი თვალე-
ში მიანათა.

ზორბეგს ეგონა ესაა მესროლაო და შეუხტა, მაგრამ როცა
შენიშნა, რომ ეს ფანარი იყო, დამშვიდდა.

— ვინა ხარ?—მრისხანედ ჩასძახა მისულმა ზორბეგს.

— წყავნარელი ვარ. ხულოში მივდივარ. ძალიან სასწრაფო
საქმე მაქვს. ფეხით იქ მისვლამდე ვათენდება. მე კი ამაღამვე უნდა
მოვასწრო გამობრუნება... ნუ მაგვიანებთ, მოაბრუნეთ მანქანა. წა-
მიყვანეთ ხულოში, სამაზრო კომიტეტში უნდა მივიდე, დიდი საქ-
მე მაქვს კომიტეტის მდივანთან.

ნაწყვეტ-ნაწყვეტად და აღელვებით ამბობდა ზორბეგი და სიბ-
ნელეში შემოქრილ ჯიბის ფანარს შუქზე ათვალეირებდა უცნობებს.

— რა გინდა მდივანთან?—მშვიდად შეეკითხა ფანარიანი და
რევოლვერი ჯიბეში ჩაიღო.

— მომიყვანეთ იქ და გაიგებ, აქ ნუ მკითხავთ... ვერც გეტ-
ყვი...—ძლიერს ითქვამდა სულს ზორბეგი.

— მე ვარ, ამხანაგო, მდივანი. მოდით აქეთ,—ხელი მოჰკიდა
ერთმა მათგანმა და მანქანის ანთებულ თვალეობთან მიიყვანა, რომ
შუქზე კარგად გაერჩიათ უცნაური ახალგაზრდის სახე.

— მე ანდრომ გამომგზავნა,—მოკლედ უთხრა ზორბეგმა,—
მონაგრებული რომაა ჩვენს საბჭოზე.

— მერე, რაო?—შეეკითხა ისევ ის, მდივნად რომ გააცნო
თავი.

— სასწრაფო საქმეა. წამიყვანეთ ხულოში და იქ გეტყვით.
არა, აქ არ ვიტყვი, რომ გიცნობდეთ, მაშინ სხვაა. ახლა არ ვიცი
ვინ ბრძანდებით. ძალიან გეხეწებით წამიყვანოთ ხულოში. აი, შე-
ხედეთ, სულ გაოფლიანებული ვარ. დიდი საქმე რომ არ მქონდეს,
რატომ ვირბენდი ასე?.. დიად, არ ვირბენდი. სჩანს საჩქაროა.

უცნობებმა ერთმანეთს გადაულაპარაკეს რაღაცა.

— ჩაჯექი მანქანაში—უთხრა ერთმა ზორბეგს და ანიძნა სად
დამჯდარიყო. თვითონ კი შოფერს მიუჯდა გვერდით და მობრუნება
ანიშნა.

— მანქანა ელვის სისწრაფით გაქანდა, მიუხე-მოუხვია, თან-
დათან აიწია ზევით და მალე ავიდა გორაკზე, სადაც ერთი ქვეს შე-
ნობა იდგა და რამდენიმე ხის სახლი, ნაუცბადევიდ გაკეთებული.

ზორბეგი იცნობდა აქაურობას. აქ იდგა მხოლოდ ერთადერთი
სასიკეთო სახლი, რომელშიაც წინათ ჯემალ-ბეგი ხმშიაშვილი
ცხოვრობდა და ახლა ამ სახლში სამაზრო მმართველობა იყო მო-
თავსებული.

სხვა შენობა აქ არ ყოფილა წინათ და ორ-სამ წელიწადში ახალი სახლების აგება არც ისე ადვილი იყო. მიუხედავად ამისა რამდენიმე ხის სახლი აეშენებინათ მუშა - მოსამსახურეებისათვის. აფთიაქისათვის, საავადმყოფოსათვის. აგროპუნქტიც იყო მოთავსებული ერთ ოთახში.

სწრაფად ჩამოვიდნენ მანქანიდან. ახლა დარწმუნდა ზორა ზეგი, რომ მართლაც მდივანი ყოფილა ის, წელან რომ ელაპარაკებოდა. იმ ოთახს მიადგა, რომელსაც კარებზე წარწერა ჰქონდა „მდივანი“. გასაღები ამოიღო, კარები გააღო, შევიდა და კარტოფილის სანთელი აანთო. ღუმელში კიდევ ღვიადა ცეცხლი და ოთახშიაც სითბო იყო.

— აბა, მითხარი ამხანაგო, რაშია საქმე?—საქმიანი კილოთი მიმართა მდივანმა ზორბეგს, როცა ყველანი შევიდნენ ცაბინეტში.

ზორბეგმა უბეში შენახული წერილი ამოიღო. ის სულ დასველებულიყო ოფლიდან.

მდივანმა წერილი ჩუმად ჩაიკითხა და გადასცა მაღალტანიან ახალგაზრდას, რომელსაც ტყავის ქურთუკი ეცვა.

— როდის წამოდი სოფლიდან?—მიმართა მდივანმა ზორბეგს, როცა ტყავის ქურთუკიანმა კითხვა გაათავა.

— შუადღისას,—მიუგო ზორბეგმა.

— იცი შენ, რაშია საქმე, რა სწერია ამ წერილში?

— წერილში რა სწერია არ ვიცი, მაგრამ ისე კი უფრო მეტი ვიცი—მიუგო ზორბეგმა და უამბო გზაზე ნახული. თან დაუმატა, რომ ისინი სოფლის ასაოხრებლად წავიდნენ, რომ ანდროს ემუქრებინან, რომ საბჭოს თავმჯდომარე აწყობს ამას ყველაფერს და რომ ახლავება საჭირო დამხმარე ძალის გაგზავნა.

მდივანმა ამხანაგებს გადახედა.

— უნდა გავემზავროთ, — მტკიცედ სთქვა ტყავის ქურთუკიანმა.—დაყოვნება აღარ შეიძლება.

— რა ძალა გვყავს?—ჩუმად კითხა მდივანმა.

— გვეყოფა,—ამხანაგს მიუბრუნდა—ხასან, მოემზადონ!

ხასანი სწრაფად გავიდა.

დარჩენილებმა ზორბეგს დაუწყეს გამოკითხვა უფრო დაწვრილებით. ძალიან გაუტყვირდათ, რომ ზორბეგი გამოცდილ ვაჟკაცივით მსჯელობდა და იქცეოდა. მას ისე კარგად დაეთვალეურებინა ყაჩაღების ბანაკი, ისე კარგად დაკვირვებოდა, რომ იცოდა რამდენი თოფიანი და რევოლვერიანი კაცი იყო, როგორ ჩაცმულები, საიდან წავიდოდნენ, ვისას მივიდოდნენ და ვის დაეცემოდნენ პირლად.

— ხოჯა და რუსუფ-ალა აწყოზენ ყველაფერს.—სთქვა შან,—
სულ მათი მოხერხებაა. ზოგიერთებიც მიიმხრეს. ჩვენში ჯერ კი-
დეც ბევრია მათი გავლენის ქვეშ... ატყუებენ ხალხს.

შემდეგ მოლას შესახებაც ილაპარაკა: ახალგაზრდაო და ძა-
ლიან მოხერხებულიც. ამხანაგებიც ჰყავსო. სათითაოდ ჩამოთვალა
ვისაც იცნობდა და ვისი სახელიც გაეგონა.

ათი წუთიც არ გასულა, რომ კაბინეტში ახალგაზრდა შემო-
ვიდა თავითფეხამდე შეიარაღებული და მოახსენა, რომ ყვე-
ლაფერი მზად არის.

— წავიდეთ, ამხანაგებო;—სთქვა ქურთუკიანმა და ყველაზე
უწინ გამოვიდა კაბინეტდან.

III

მოულოდნელად ამოიჭრა დასავლეთის ქარი და შავი ღრუ-
ხელი ამოზიდა. მოწმენდილი ცა ჩამობნელდა. ვარსკვლავები გაქრ-
ნენ და კიდეჩამოტეხილი მთვარეც დაიმაღა.

სოფელს ეძინა ჩვეულებრივად ძილით. რომ ძლიერი ქარი არა,
ხეებიც მარმარილოს კერპებივით იღვებოდნენ ჩუმად, მაგრამ ახლა
საშინელი ღრიანცელი აეტეხნათ. იქნევდნენ ტოტებს ძერას ფრთე-
ბივით, იხრებოდნენ, შფოთავდნენ. ახალგაზრდა ნაძვის ხეები მი-
წამდე ხრიდნენ წვეროვებს.

ანდრო მარტოდ იჯდა ბუხართან. წიფლის კუნძებს მსხვილი
ნაკვერჩხალი დაეყარა და ისეთი სითბო დაეყენებინა, რომ ხალათი
გაეხადა და პერანგისამარა დამჯდარიყო. ერთხანს წიგნებს კით-
ხულობდა, შემდეგ წიგნი გადადო და ნაკვერჩხლებს მიაჩერდა...
რალაცნაირ სიტკბოებას გრძნობდა ის ამ დროს. მოლაყლაყე ნაკ-
ვერჩხლები მასში მოგონებებს აღვიძებდა. ბავშვობა აგონდებოდა.
ოჯახში, დედასთან რომ იჯდა და წიგნებს კითხულობდა. ან უფ-
რო პატარა რომ იყო და ზღაპრებს ისმენდა, მღევებისა და ქაჯეპის
ამბებს, ან ობოლი ბავშვის თავგადასავალს. იქიდანვე ინერგებოდა
მის გულში ზრძოლის სურვილები, ობლებისა და ტანჯული ადა-
მიანებისადმი სიბრალული. რამდენი ღამე გაუთენებია ფიქრებში.
მეტადრე მაშინ, როცა მამას დააგვიანდებოდა მოსვლა. დე-
დასთან ერთად მასაც ეღვიძა, ფიქრობდა მამაზე, რომელიც დღიურ
ლუკმისთვის ადრე დილიდან გვიან ღამემდე მუშაობდა ხან ერთ
სა და ხან მეორე ქარხანაში.

ულამაზო ზავშვობა ჰქონდა. ერთხელაც არ გათენებულა მის ოჯახში ნამდვილი მზიანი დღე, ისეთი დღე, რომელსაც რაიმე ცუდი არ მოყოლოდეს. ან მშვივრები იყვნენ, ან შიშვლები, ან სიცივით კანკალებდნენ ჩამქალ ლუმელთან, ჩამდენჯერ უნატრად გათბობა, გაძლომა, სუფთად ჩაცმა-დახურვა და ხის იატაკიან ბინაში ცხოვრება. ცემენტის იატაკზე ჰილოფი ჰქონდათ გაგებული და ისე ეძინათ.

მთელი ის საშინელება რომ წარმოიდგინოს კაცმა, გული შეეწუხებოდა. მწარე მოგონებად მართო ის ამბავიც კმარა, სახლის პატრონი რომ დაუთენებდა. თვე დადგებოდა თუ არა, მაშინვე დაეცემოდა თავზე, დაქვრივ დაემუქვებოდა, გამოსახლებას შეპირდებოდა... ჩამდენი ხვეწნა და ვედრება იყო საჭირო, რომ ორი დღე დაეცადა. შეპირებულ დღისათვის კი უსათუოდ უნდა მიეცათ. ჩამდენჯერ მშვივრები ყოფილან და ბინის ქირა გადაუხდიან.

როგორ სწვავდა ანდროს გულს, როცა დამწუხრებული დედის სახეს შეხედავდა ან დაღვრემილ მამას. მერმე, რა გულკეთილები იყვნენ საცოდავები!

ნაღვლით იესება გული...

ერთხელ სახლის პატრონის ვაჟი მიადგა ამათი ოჯახის კარებს. შემოიხედა, უცებ მიბრუნდა და წავიდა. ანდრო შიშველი იჯდა იმ დროს და დედა ერთადერთ დაკეკილ შარვალს უკერავდა შვილს. დაინახა სახლის პატრონის შვილმა და შემდეგ, სადაც შეხვდებოდა, დასცინოდა. უნიფხვოს ეძახდა. მერმე, როგორ მოქმედებდა ეს ანდროზე! საშინელი ბოღმა გუბდებოდა გულში. ებრძოდა თავისთავს, რატომ უნდა ვიყო ამ დღეშიო. შეშურდა მდგომარეობა მასზე ბევრად უნიჭო გივისა, რომელიც სასწაულელებელში დადიოდა და ნაირნაირი ტანსაცმელებით იყო მორთული.

რატომ არის მამაჩემი მის მამაზე ცუდ პირობებში? ნუთუ მამაზე მეტი უშრომნია მამამისს, ან ახლა მუშაობს მეტს?—ეკითხებოდა თავის თავს. ნაღვლიანი თვალეშით შეხედავდა სამუშაოდან დაბრუნებულ მამას, რომელსაც გამხმარი პური წყალით გადაჰქონდა ხახაში. ჩამდენი ნაღველი იყო მამის სახეზე მაშინ! ჩამდენჯერ უფიქრნია ანდროს, როგორმე შეემსუბუქებინა მამისათვის გასაპირი. დაღონებული გული მაინც გაემხიარულებინა ხანდახან. იმედიანი სიტყვები ეთქვა. სკოლიდან დაბრუნებული დედას ეხმარებოდა, საოჯახო საქმეებს ასრულებდა. თეთრეულს აგროვებდა მეზობლებში და მიჰქონდა გასარეცხად დედასთან. გარეცხილები კი—უკანვე, თავიანთ პატრონებთან.

ერთხელ სახლის პატრონის შვილმა გივიმ სახეში გაარტყა ანდროს. მდგომარეობით ისარგებლა. საშინლად აეწვა ლოყა პა-

ტარას, მაგრამ ლოყაზე უფრო გული, მკერდს ამოსწვა უჩინარმა ცეცხლმა... სიბრაზე ჩაიკლა და ჩაიხარმა ძარღვეებში. ხელზე, საკუთარ მაჯაზე იკბინა და სისხლი დაიდინა. ეს სისხლი უნდა აიღოს ოდესმე ანდრომ. ასე გადაწყვეტა მაშინ.

ბუხარში ნაკვერჩხლებმა თვალი მილულეს. თითქო ძილი წამოეპარა. ანდროს კი მაინც არ ეძინა. რალაცნაირად გატკბა ფიქრები. მოგონებები მწარე დღეებითაა სასე, მაგრამ მაინც არ უნდა მოცდოდეს მას. თითქოს მშობლების სახეს უცქიროს უნდა, განაწამები მშობლების სახეს. ნეტავ ამ დროს მოსწრებოდნენ ახლა ხომ ღიმილით მოიქარგებოდა მათი სახეები. მამას ხომ არ გაუღიმიოდა თავის დღეში, არ უმღერნია და უთამაშნია. ახლა ხომ ახალგაზრდული ცეცხლით შეიმოსებოდა. როგორ უდროოდ დალია სული!

საცოდავი მამა. ვერ გაუძლო უკუღმართი ქვეყნის სიმძიმეს. ჩაიკეტა ტვირთის ქვეშ და მთელი ოჯახი ცოლს დაუტოვა. აბა, შენ იცი, თუ გაუმაგრდებიო, თითქო ჯიბრით უთხრა... რამდენი მილიონის სიცოცხლე დასრულებულა ასე მწარედ...

ახლა აღარ სურს ანდროს კიდევ გაყვეს ფიქრებს. მეტად ჩამობნელდა გული... ჯოხით ნაკვერჩხლებს აურია, გამოათხიზლა მითვლემილი ცეცხლი, იქნებ მოგონებები მოაცილოს, მაგრამ თითქოს ენანება გაწყვეტა ასე უადგილოდ. დედა, დედა უნდა მოგონოს უფრო კარგად, ის უფრო დიდხანს ებრძოდა ცხოვრების სივალახს. უფრო მეტი სითბო დატოვა შეილების გულში. ჯერ მარტო ის რად ღირს, რომ მის კალთაში თავჩადებულს ჩასძინებია. ფრთხილი და აღერსიანი კოცნა უგრძნია ძილში. ან ის როცა... ეჰ, ვისაც არ გამოუცდია, ვერ მიხვდება, ვერ გაიგებს იმას, რაც ანდროს გულშია ამჟამად.

კიდევ გივი მოაგონდა. რა უნიჭო იყო და რა წაჩინებებს აღლევენ. კარგა ხანს იზრდებოდა ორი ერთიმეორის მოწინააღმდეგე ადამიანი ერთ სახლში, ერთ სახურავქვეშ, თუმცა სხვადასხვანაირად. გივის მამა არა მარტო სახლის პატრონი იყო, ორი დიდი სავაჭროც ჰქონდა. მუდამ სასე იყო მათი ოჯახი დოვლათით. წვეულებები და ქეიფი იყო მუდამ მათ სახლში.

სამ მანეთს კი მაინც ახლევინებდა ობლებს. ქვეშ, სარდაფში ჩამწყვდევულ ადამიანებს. ერთხელაც არ მოსვლიათ აზრად რაიმე დახმარება აღმოეჩინათ ამ ოჯახისათვის.

თებერვლის რევოლუციას არაფერი დაუკლია მისთვის. პირიქით, მეტი მოწონება მიეცა. რამდენიმე ათასი შესწირა მენშევიკურ პარტიას. თვითონაც შევიდა შიგ. ჯიბეში მანდატი ჩაიღო და „სოციალისტმა“ ვაჭარმა თავისუფლად ამოისუნთქა.

ასე ზოიქვა მამა, მაგრამ გივი არ გაყვა მამის კვალს. ის ფე-

დერალისტებს მიემხრო და ავტონომია დაიკერა ენაზე. ჩერქესკა ჩაიცვა და თავმომწონედ გაიარ-გამოიარა. არაფრად ჩააგდო მამის მითითება—მენშევიკების პარტიაში უნდა დაეწერო, რომ უთხრა, უფრო მეტი ემხრობა მენშევიკებსო.

გივის ფედერალისტები მოსწონდა. სუფთა ხალხია, თავადი-შვილები. აზნაურები, მღვდლები, მათი შვილები, დარჩეული ქალები ყავთო. ერთხანს მართლაც კარგად ატარებდა დროს. შემდეგ მილიციის შიგნით შევიდა და ბოლშევიკებს ეძებდა. შეუთანხმდა მენშევიკებს და მათთან ერთად მუშაობდა.

ანდროს კიდევ მოახვედრა მან ერთხელ მათრახი. ოც წელში იყო ეს ამბავი. საქართველო „დემოკრატიული“ და „დემოკრატიული“ იყო მაშინ. ყველას თავისუფლად შეეძლო ხალხის ყვლევა.

ანდრო ქარხანაში მუშაობდა. მისთვის და მისი ამხანაგებისათვის ჯერ რევოლუცია არ მომხდარიყო. რუსეთის ოქტომბერი თანდათან შლიდა ფრთებს, მაგრამ აქამდე კიდევ ვერ მოედწია. აქა-იქ ამოვარდებოდა ცეცხლის ალი. აფრიალდებოდა წითელი დროშა, მაგრამ... „დემოკრატიული სახელმწიფო“ ცეცხლითვე მოსპობდა იმ კუთხეს. უმოწყალოდ ელექტნენ დიდსა და პატარას, ვინც გაბედავდა „დემოკრატიული მთავრობის“ აუგს.

მაინც მუშაობდნენ და მაინც იბრძოდნენ. მაინც ლევიდებოდა ნაპერწკალი და ძლიერდებოდა ცეცხლი.

ანდროც მუშაობდა. მუშაობდა იატაკქვეშ. ბეჭდევდა ფურცლებს, მოწოდებებს, გაზეთებს, გააქონდა და არიგებდა მუშებში, გლეხებში, დაბალ ინტელიგენტებში და ამ დროს ჩავარდა.

ჩავარდა და სწორედ იმასთან, ვისთან შეხვედრას მხოლოდ თანაბარ მდგომარეობაში ნატრობდა.

ახლა კი ჩავარდა სხენაირად და ხელებშებორკილი.

სასტიკი გამომეტყველება მიიღო მილიციის უფროსმა ბატონმა გივი მახურაძემ, მრისხანედ ჩახედა თვალებში და წარბები შეხარა.

— კიდევ არ დაანებე ზიკო. შენ თავი მასეთ უკუღმართობას?.

ანდროს არ უნდოდა პასუხი გაეცა, მაგრამ ვერ მოაძინა.

— რომელ უკუღმართობაზე ბრძანებთ!

— აი, იქ, სარდაფში რომ ეწევით.—მათრახის ტარი მიუტანა ცხვირთან.

ანდრომ უკან გადმოდგა ნაბიჯი.

— მალე, ძალიან მალე დავანებებთ სარდაფებში მუშაობას თავს, სატანო პოლიციელო და...

აღარ დაამთავრებინა სიტყვა მილიციის უფროსმა, მათრახი გადაჰკრა და დარაჯებს გააყვანინა.

შემდეგ არ შეხედრია ანდრო მას. ამზობდნენ, მოკლესო. ზოგი იძახდა საზღვარგარეთ გაჰყვა მენშევიკებსო. არაეინ ცოდა სი მართლე.

კიდევ გააღვიძა ანდრომ მიძინებული ნაკვერჩხლები და დასწოლად მოემზადა.

კარგახანი გასულიყო. საათი ორს უჩვენებდა. ქარი ისევ ძლიერად აწვებოდა კედლებს და შიგ შემოვარდნას ლამობდა. ანდრომ ფანჯარაზე ჩამოფარებული ფარდა გასწია და გაიხედა. საშინლად ჩამობნელებულიყო. არსაიდან სინათლეს შუქი არ მოსჩანდა. ანდრომ ისევ ჩამოსწია ფარდა და ლოგინში ჩაწვა, მაგრამ უეცრად სახლის წინა კარებზე ისეთი ბრაგუნის გაისმა. რომ ანდრო უნებურად წამოვარდა.

ყური დაუგდო. ბრაგუნის უფრო გაძლიერდა. უთუოდ ვილა ცა იყო. ანდრომ ჩაიცივა სწრაფად, რევოლვერი ხელში დაიკავა. ოთახიდან გამოვიდა და კარებს მიადგა.

— გავგიღე ანდრო კარი, მოესმა ფრთხილი ხმა გარედან და ანდრომ სმაზე შექერი იცნო.

ანდრომ კარები გააღო.

— რა ამბავია შექერი, — შემოსვლისთანავე ჰკითხა ანდრომ.

— ცუდადაა საქმე. გავიღეთ უნდა სოფლიდან. ბიჭები მზად მყავს. მოლაც გადავიყვანეთ სხვა ადგილას. ეშმაკიც ვერ მიაგნებს... მოემზადე, თორემ გვიან რჩება.

— რა ამბავია, არ იტყვი? — გაუკვირდა ანდროს.

— იუსუფაღასას მოსულან. ალშათ ადრე დილით დაგვეცემიან. საიდუმლოდ გავიგეთ. თვითონ იუსუფაღას პირველი ცოლი იყო ჩემთან, ოცდაშვიდი კაციყო. ათამდე აქაურები გაუბრიყვებიან, ყველა. შეიარაღებულია თოფებითა და რევოლვერებით. ჩვენი თავი ნჯდომარეც იმათთან ყოფილა. დიდ აჯანყებებზე ლაპარაკობენ. აქაურებისთვის უთქვამთ, ბათუმი და ხულო ჩვენს ხელშიაო. ხვალ დილით მთელი ლაშქარი მოგვივაო. ყველაფერი დაწერილებით გაუგია ლუთბიეს. ყოჩალი ქალია. იუსუფაღას საიდუმლოება ყველაფერი იცის. უნდოდა ჩვენთან დარჩენილიყო, მაგრამ არ დაერთუნება. ექვს აიღებდა ალა და უფრო ცუდი იყო.

— ჩვენ რაღა ძალა გვეყავს? — შეაწყვეტინა სიტყვა ანდრომ.

— ოცამდე ახალგაზრდა... უპარტიო ახალგაზრდებიც შევაქუჩეთ. სიამოვნებით დასთანხმდნენ, გაეხარდათ კიდევაც. საქმე იარაღია. შვიდი თოფი გვაქვს მხოლოდ, ათი რევოლვერი, ოთხი ყუმბარა. იარაღი რომ არ გვაკლდეს, ხალხს კიდევ ვიშოვით. ჩვენ ბევრი გლეხი გამოვგყვებო. ნაზიმეც ჩვენთანაა. არ მოგვცილდა, სულ ერთია, თუ თქვენ დამარხდით, მე მაინც არ მა-

ცოცხლებენო. ისევ თქვენთან მოვკვდე ის მიჩვენეაო. მაშამისის-
თვის მოუპარავს თოფი და მოიტანა. კარგი ხელმძღვანელი რომ
გვყავდეს, ომში გამოწაფული, მაგენი ვერაფერს დაგვაკლებენ.
სროლა ყველამ კარგად ვიცით. ხვალ საღამომდე უსათუოდ მოგვის-
წრებენ ხულოდან თუ რომ....—შეჩერდა შაქირი. უნდოდა ეთქვა,
იქაც თუ მშვიდობააო, მაგრამ ანდრომ დაასწრო:

— დარდი ნუ გაქვს, ხულოში არაფერი ამზავია. ის გლებზე-
მოსატყუილებლად უთქვამთ. ნუ გეშინიათ. ხელმძღვანელობას
გაგიწევთ. მხოლოდ უნდა ვეცადოთ, რომ უბრალოდ ვისიმე სისხლი
არ დაიღვაროს.

— მაგის გარჩევა კი ძნელია, ამხანაგო ანდრო. ტყვიამ ბრა-
ლიანი და უბრალო როდი იცის. ვინც ჩვენს მოწინააღმდეგეებთან
იქნება, არ დაეინდობთ... წავიდეთ, ბიჭები გვიცილიან.

ანდრო მიბრუნდა. პალტო ჩაიცვა, ყაბალახით შეიხვია თავი,
ორი რევოლვერი ჩაიღო ჯიბეში და გამოვიდა.

ქარს თოვლის კორიანტელი დაეყენებინა, ახალი თოვლი ხვავ-
რეელად ეფინებოდა გაყინულ თოვლს და სისქეს მატებდა.

ძლივს გაიარეს რამდენიმე ნაბიჯი, ძალზე სასტიკი იყო ქარ-
ბუქი. თვალბში აყრიდა ხოშკაკალა და წყრილ თოვლის ფანტე-
ლებს ერთმანეთში არეულს.

ცოტა ხანს მეზობლის საძძელს მოეფარნენ. შემდეგ ფერდ-
ფერდ აიარეს და საბჭოს შენობაში შევიდნენ.

შაქირს აქ შეეკრიბა ახალგაზრდები. ფრთხილად და სათითა-
ოდ მოეყვანა. ყველას ჰქონდა რაღაც იარაღი—ძველი და ახალი
სისტემის რევოლვერები, შაშხანა, ბერდანა, სანადირო თოფი, უბრა-
ლო ფილთა, ძველებური დამბაჩა და პაპისეული კაჟიანი, მოვერ-
ცხლილი და მოვარაყებული. ✓

მთელი კოლექცია შეგროვდა იარაღებისა. ანდრომ დაათვალიერა
აშხანაგები. თითო-ორ-ორი სიტყვა უთხრა, დაამედა და შეპირდა,
რომ საქმეს მშვიდობიანად მოაგვარებდა.

— არ გვეშინია მაგათი,—იძხუნდნენ ახალგაზრდები,—თუ რუ-
სეთის ახალგაზრდობა მთელი წლების განმავლობაში მშვიერ-
მწყურვალი, შიშველ-ტიტველი თავგამოდებით ებრძოდა მტრებს,
ჩვენ რატომ ვერ ვიბრძობებთ. თუ იმათ მოსპეს შავრაზმელები,
მეფის ლენერლები, ბურჟუები და კაპიტალისტები, ჩვენ რატომ არ
უნდა გავსრისოთ ბეგები, ალები, მოლები, ხოჯები და მძარცველები.

ანდროს გაუკვირდა, — ისეთი სიტყვები წარმოსთქვეს. ასეთ
ბიჭებთან რომ მოვკვდე, არ დამენანებაო, სთქვა გულში.

ოთახში შეიყარეს თავი. ოთხი კაცი დააყენეს გარეთ მორი-
გედ და ორი მხვერავად გაგზავნეს.

ერთმანეთს ეცილებოდნენ წასვლაში, დარაჯობაში. ნაზიმესაც თოფი ექირა და გამოცდილ მებრძოლივით აბრიალებდა თვალებს. არ დამტოვოთო ბიჭებო, ეუბნებოდა ახალგაზრდებს. ანდროსთან იდგა და თვალებში შესცქეროდა.

ოთახში მკრთალი შუქი იყო ბუხრის ახლო შემოდგმულ პატარა ფანრის. ირგვლივ შემოკრებილი სინჯავდნენ, იარაღს და რჩევადარიგებას აძლევდნენ ერთმანეთს.

გარეთ ისევ ეპრძოდა ქარბუქი ხეებს და ემუქრებოდა.

ერთი შეხედვით, სოფელს რაღაც შფოთვა ემჩნეოდა.

ფრთხილადგაღებულ კარების ქრიალი გაეკვრებოდა ხოლმე ადამიანის ყურებს ქარის ხმასთან ერთად. ახალმოფენილი თოვლიც ისერებოდა ადამიანთა ფეხის ნაკვალევით და ამით ადვილი გასაგები ხდებოდა თუ რომელ ოთახიდან რომელი ბანაკის გასაძლიერებლად წასულან.

ახალგაზრდა მწვერაგები უჩინრად მისდევდნენ კვალს და ხშირად იუსუფ-ალას სახლის კარებამდე აცილებდნენ. საკმაოდ მოეყარათ თავი იქ.

მწვერაგები იმახსოვრებდნენ მეზობლის გადადგმულ ნაბიჯებს. მრდიოდნენ ანდროსთან და ყველაფერს ეუბნებოდნენ. შაქირი მიყავდათ ადგილზე და უთითებდნენ ამა თუ იმ სახლიდან გამოსულ ფეხის კვალის მიმართულებაზე.

გაუჩინარებული იყვნენ ერთმანეთისათვის მოპირდაპირენი. მხოლოდ ახალგაზრდა მწვერაგები მისდევდნენ კვალს და ითვლიდნენ იუსუფ-ალას სახლისაკენ მიმავალ ნათესურებს.

აგერ უეცრად, ძალიან ფრთხილად გაიღო მუჰამედ შვინდაძის სახლის კარი, სიბნელეში თითქო სიბნელე გამოვცდა, ხელში გრძელი თოფი უქირავს, მიიხედ-მოიხედა და ფრთხილი ნაბიჯით გაყვა შუკას. ქარი უშლის მას, მაგრამ ლანდი მაინც მიდის.

თითქო გული მოწყდაო, ისე ამოიგმინეს მწვერაგებმა ამის დანახვაზე.

— მუჰამედის ლალატი?!—წასჩურჩულა ამხანაგს პირველმა და თვალი გააყოლა მიმავალ ლანდს.

— დავეწიოთ და მოვკლათ. ბებუთით გამოვლადროთ ყელი. ღირსია მაგის,—ბრაზი ახრჩობდა ახალგაზრდას.

— ჩუ,—აფრთხილებს ამხანაგი. მაგისთანები ვერაფერას დაგვაკლებენ. მაშინ ჩაეაძალოთ, როცა პირისპირ დაიდგეთ.

— უმადური!. ანდროს რამდენი ამაგი აქვს მაგაზე:..

— სუ. შეუხვია,—ორივემ გაუჭკრიტა მიმავალ მოხუცს.

— ნახე თუ ჩვენებთან არ მიდის,—აღტაცებით წამოიძახა პირველმა.

— ვენაცვალე! თუ მაგი ჩვენთან იქნება. ერთი ათთან გავალთ საბრძოლველად.

ლანდი მიუახლოვდა საბჭოს შენობას. ფრთხილად მიმოტრიალდა, დახვერა იჭაურობა და კიბეზე ავიდა.

— ძია მუჰამედ, — ალტაცებით წამოიძახეს ახალგაზრდებმა და შემოეხვიენენ მოსუცს.

— შენც ჩვენთან? — ღიმილით ჰკითხა შაქირმა.

მოხუცმა ყაზალახი მოიძრო, თოვლი დაიფერთხა, წვერებზე ჩამოისვა ხელი და ახალგაზრდებს გადახედდა.

— აბა ვისთან უნდა ვიყო? — შეკითხვითვე უთხრა შაქირს და თვალეში შეაჩერდა.

— ვითომ გვეგონა... — არ დაამთავრა სიტყვა შაქირმა.

— იმათთან? — ხელი გაიშვირა მოხუცმა. — მეყო, კმარა, რამდენი ხანიც დაგყავი მათთან ჩემი სიბეჩით. ახლა ძლიერ გონზე მომიყვანეს და აწი ათასჯერ სიკვდილს ვარჩევ მათთან სიცოცხლეს. — თოფი ასწია ხელში. — მამისეულია. ნუ უყურებთ თქვენ მასე. კაჟიანი კია, მაგრამ მტყუნება როდი იცის. კარგახანია არ მინძარია. გუშინ გამოვიტანე, გავწმინდე, კაჟი გამოვუტკვალე, ახალი წამალი დაეყარე და ახლა... ბევრი არა და სამი კაცის მოცილება შემიძლია. მერმე მეც მომკლან, ეჭითი ხუთი-ექვსი წელი კიდევ მიწოდდა მეცოცხლა, მინდა საბოლოოდ განადგურებული დაეინახო მაგინი. — ანდროს შეხედა და შემდეგ ისევ ახალგაზრდებს გადაავლო თვალი.

არ გასულა ათი წუთიც, რომ კარი გაიღო და მეველუდ კოვზადეც შემოვიდა ნაბადში შეხვეული.

კარგად ხართ ბიჭებო? — და ნაბადი მოიხადა.

— კარგად, — ერთხმად უპასუხეს დამხედურებმა და ახედ დახედეს.

მეველუდი თავითფეხამდე იყო შეიარაღებული. მაუზერი, ნაგანი, მოკლე კარაბინა, ფალასკები. გაქედილი იყო სულ. ბიჭებს ვერ მოესწროთ. მეველუდის დათვალეირება, რომ თევრად ზალადე შემოვიდა, გრძელი უღვაშები ისე დაეგრიხა, რომ ლოყაზე დაფენოდა. მას ხელში ბერდანა ეჭირა და ფალასკაში ოცამდე ვაზნა უჩანდა.

ანდროს ძალიან გაუკვირდა გლეხების ასე მომზადებული ნოსვლა. ვინ აცნობა ამათ, როგორ გაიგეს, რომ აქ ვართ? სად ჰქონდათ ამდენი იარაღიო, — ფიქრობდა ის და ამ ფიქრებს მის თვალეში კითხვის ნიშანი დაეხატა.

თევრადმა გაიხმო განზე ანდრო და ექ გასცა პასუხი ყველაფერზე.

— გინდა იცოდეს როგორ გავიგე? — და უამბო ყველაფერი.

—იუსუფ-აღას უფროსი ცოლი ლუთბიე ყოჩალი ქალია. ახლა მოიჭრა ჩემთან. მითხრა, რომ თქვენ აქ ხართ. ისიც მითხრა თუ რამდენი შეგროვდნენ იუსუფისას. დილაადრიან დაეცვიან ანდროს ბინასო. შემდეგ კომკავშირელებს ამოწყვეტნო. ძალიან მეწყინა, რომ ამდენხანს არ ვიციდი. ისეთ ბიჭებს გადმოვიყვანდი ნაყელავიდან, რომ ლეგიონს შეებმებოდნენ. აი დედასა.—მყერდზე დაიკრა ხელი.

ანდროს იმედი გაუორკეცდა. რახან მტრის საიდუმლოება გაიგო, ახლა მათთან ბრძოლა ადვილი იყო. ჯერ თვითონ შეიმუშავა მოქმედების გეგმა, შემდეგ გამოცდილ ამხანაგებს მოელაპარაკა. თევრადი, გველუდი, შაქირი, ანდრო და მოხუცი მუჰამედი ჩაუჯდა.

გაინაწილეს როლები. ძალაც გაიყვეს, ყველას თავისი უბანი მიუჩინეს. მთავარი ძალა საბჭოს შენობაში დატოვეს. დაზვერვა გააძლიერეს და მოხერხებულ ადგილას ჩასაფრდნენ.

ოცდაათამდე იყვნენ. თუ მოხერხებულად იმოქმედებდნენ, მტერთან შეხვედრა არ გაუჭირდებოდათ. თავის დაცვა მაინც შეეძლოთ, სანამ მაშველი რაზმი მოუსწრებდა მაზრიდან.

IV

გათენებას ცოტა უკლდა. ქარი ჩადგა, მაგრამ თოვლი ისევ მოდიოდა. მზვერავებმა ამბავი მოიტანეს, რომ აღას საბძელიდან იწყეს გამოსვლა შეიარაღებულმა კაცებმა.

ანდრომ განკარგულება გასცა მომზადებულიყვნენ. ჯგუფების ხელმძღვანელებს დარიგება მისცა და ადგილი მიუჩინა. კიდევ გააფრთხილა, არ გაესროლათ, სანამ მოპირდაპირეთა მხრიდან არ გავარდებოდა თოფი. მაშინ კი ყოველი მხრიდან უნდა აეტეხათ სროლა.

ნელნელა ნათლდებოდა. ახალი თოვლი ქრელდებოდა ნაკვალევით. მოპირდაპირენი ემზადებოდნენ ერთმანეთის შესახვედრად.

ახალგაზრდები ჩასაფრებული იყვნენ მოხერხებულ ადგილას. რასაც თავდამსხმელები არ მოელოდნენ და შიშიც არაფრის ჰქონდათ. ისინი აშკარად გამოვიდნენ, ეგონათ ჯერ კიდევ ეძინა სოფელს. პირდაპირ ანდროს ბინისაკენ წავიდნენ. ის უნდა დაეჭირათ, მოეკლათ და შემდეგ სხვებს ვასწორებდნენ. როცა ყველაფერს მოაგვარებდნენ, მოვიდოდნენ და საბჭოს შენობაში დაბანა-

კლებოდნენ. აქ გამოაცხადებდნენ თავიანთ ხელისუფლებას და შემდეგ მთელ აჭარას მოღებდნენ ამბავს. თითქმის ყველა სოფელში ყავდათ თავიანთი კაცები, რომლებიც პატარ-პატარა რაზმებს შეადგენდნენ, ადგილობრივ ხელისუფლებას დაიპყრობდნენ, ერთმანეთს შეუერთდებოდნენ და შემდეგ მაზრისაკენ გასწევდნენ.

ყაჩაღების, აღებისა და ბეგების თითო-ორ-ორი კაცები გაერთიანებულიყვნენ. ხოჯები და მოლები დაერაზმათ ხალხის მოსამზადებლად და ამრიგად ნაძირალესს, ცხოვრებიდან განწირულებს, პატარა სულის ლეშებს დიდი გეგმა შეედგინათ. ამ გეგმის შესრულებას მათი აზრით ხელს უწყობდა ცუდი ამინდი, უგზობა და ამ კუთხის ბუნებრივი თავისებურება—მიუღღგომლობა.

ყაჩაღი ალი ომერ-ოღლი მოხერხებულად ატყუებდა ყველას. მას გვერდით ედგა რამდენიმე გამოცდილი პირი, რომლებიც სხვადასხვა კუთხიდან მისულიყვნენ მათთან; ამ ხალხსაც დაკარგული ჰქონდა უდარდელი, უშრომელი და უზრუნველყოფილი ცხოვრება და, მშრომელთა ხელისუფლების წინააღმდეგ ამხედრებულნი, თავიანთ ბატონობის აღდგენაზე ფიქრობდნენ.

მშრომელ ხალხს უამრავი მსხვერპლი გაუღია თავისუფლებისათვის, საუკეთესო შვილები შეუწირავს რევოლუციისათვის და ადვილად არავის მისცემს ნებას მოპოებული გამარჯვება გამოაცალოს ხელიდან. ასეთი იყო ხალხის გადაწყვეტილება.

უფრო ინათა. უკვე შესამჩნევი გახდა ახალმოფენილ თოვლზე თოვლზე ნაკვალევი, ზოგი ახალი და ზოგი უკვე წაშლილი ხვარჩიელი ნალექიდან.

იუსუფ-ალას სახლიდან გამოსული ბანდიტები სამად გაყოფილი შევიდნენ სოფელში. ერთი ჯგუფი გზასთან, მდინარის პირას ჩასაფრდა, მეორე სოფლის გარეთ გავიდა და გორაკზე ნაძენარში მიიმალა. მესამე კი წავიდა და მურადის სახლს შემოერტყა ირგვლივ, რომელშიაც, მათი აზრით, ანდროს ეძინა.

ანდრო და რამდენიმე ახალგაზრდა, მათ შორის ნაზიმეც, საბჭოს შენობასთან იყვნენ ჩასაფრებული და ბანდიტების ყოველგვარ მოქმედებას ხედავდნენ.

იუსუფ-ალა და მასთან ვილაც ნაბღიანები ჯამეს წინ აივანზე გადმომდგარიყვნენ და იქიდან ზვერავენდნენ სოფელს.

უკვე ყველაფერი ისე მოეწყობა, როგორც უნდოდათ და ახლა მხოლოდ გამარჯვებაზე ოცნებობდნენ. უეცრად მურადის სახლიდან თოფი გავარდა და პირველმა ტყვიამ გაიწულია ჰაერში.

ეს ამბავი ბანდიტებისათვის გასაკვირი არ იყო, მაგრამ ანდროს ძალიან გაუკვირდა. ვის უნდა ესროლა სახლიდან თოფი?—გაიფიქრა მან. ამხანაგებს გადახედა. სროლას რამდენიმე გასროლამ უპასუხა გარედან და სოფელი გამოფხიზლდა.

ანდრომ კარგად შეამჩნია, რომ იუსუფ-ალას საბძელიდან კიდევ რამდენიმე კაცი გამოვიდა და იქითკენ მიაშურა, საიდანაც ისე გაცხოველებული სროლა მოისმოდა. წასულებს გაყუა გზისპირას ჩასაფრებული ჯგუფი და მთელი რაზმი ბანდიტებისა ერთად შეკრებილი გარს შემოერტყა მურადის სახლს და ტყვიები დაუშინა.

ისინი უფრო გათამამებული მიდიოდნენ სახლთან და კარების შეღეწვას ლამობდნენ. თან ხმამალა ყვიროდნენ—გამოდი, დაგვენბდი, თორემ ცეცხლს გაუჭინებ სახლს, ამოგწვავთ შიგო. დარბოდნენ სახლის ირგვლივ და ეძებდნენ სახლში შესასვლელს.

სახლიდან ისევ მოისმოდა სროლის ხმა, ხან კენტად, ხან ერთად, ხან ჯგუფურად. ბანდიტებს ეგონათ, რომ იქ იყვნენ კომკავშირელები, კომუნისტები და მათი მომხრე გლეხები, ამიტომ უფრო გააძლიერეს იერიში და სახლის კედლებს დაუშინეს ტყვია.

ახლა ანდრომ ერთი რაღაც გაიფიქრა, უნდოდა ამხანაგებისათვის გაეზიარებია, მაგრამ ამ დროს ყოველი მხრიდან ატყდა სროლა და სახლთან შექუჩებული ბანდიტებიდან რამდენიმე კაცი დაეცა ძირს.

ამან არეგ-დარევა შეიტანა ბანდიტებში. ახლა სახლს მოსცილდნენ და აქეთ-იქით ეცნენ, მაგრამ უხვად წამოსულმა ტყვიებმა გზა-კვალი დაუბნია მათ და დაიწყეს დაქსაქსვა. ადგილობრივებმა თავიანთ სახლებს მიაშურეს, მოსულებმა ტყეებისაკენ მოუსყეს და იქ გამაგრდნენ, იქიდან დაიწყეს სროლა, მაგრამ მალე შეწყვიტეს და მიიმალნენ.

ანდროსათვის მდგომარეობა გარკვეული შეიქმნა. ის გამოვიდა საფარიდან, წაიყვანა რამდენიმე ახალგაზრდა და ბიჭებს ჩამოუარა:

ექვს ადგილას იყვნენ ჩასაფრებული, ორი-სამი კაცი ერთად. მოხუცი მაჰმუდი მურადის სახლთან ჩამალულებში ერია. სახლის წინ ხუთი ბანდიტი ეგდო, ერთი იმათგანი ჯერ კიდევ არ მომკვდარიყო და ხელებით პოტნიდა თოვლს.

— ეყოფა მაგათ,—იძახდა მოხუცი და ისვამდა თეთრ წვერებზე ხელს,—ჩემი კაციანი თოფი ხომ გამოგწმინდვ. ვეყურბანე ამას—კონდახზე აკოცა.—არა, როგორ მოგწონს ამხანაგო ანდრო, ჩემი მოხერხება? განგებ შევგზავნეთ კაცი შენს ბინაში. ბუხარში გაჩერებული სროლილობდა რევოლვერს. ისე მოვაჩვენეთ თითქოს ყველანი მაგ სახლში ვყოფილიყავით და ცხვრებივით შემოეხვივნენ გარს. ჩვენ კი გარედან დაუშინეთ.

— ყოჩაღ!—ჩამოართვა ხელი ანდრომ. წელან სწორედ ასე გაიფიქრა მან. თავისთავს უსაყვედურა, რატომ დროზე არ მომაგონდა ეს ხერხიო. მაგრამ დახე, მოხუც მუჰამედს სწორედ ასე მოეფიქრებია.

სოფელი თითქოს ქვევრში ჩაძვრა. გაინაბა და ხმა გაკმინდა. ქალები და ბავშვები ბუხრებში მოათარეს, კარები ძელებითა და ურდულებით გადაკეტეს, ფრთხილად იკვირიტებოდნენ ქუქრუტანებიდან.

ანდრომ განკარგულება გასცა გამოდგომოდნენ ყაჩაღებს, მაგრამ წაიწიეს თუ არა წინ და სოფელს მოცილდნენ, მაშინვე ტყიდან სეტყვისავით წამოვიდა ტყვია და იძულებული გახდნენ ისევ უკან დაეხიათ.

ორი საათი ელოდნენ ერთმანეთს. ანდრო და შაქირი ახალგაზრდა მებრძოლებს ამხნეებდნენ, განკარგულებას აძლევდნენ და არიგებდნენ, რომ ფხიზლად ედევნებინათ მტრის მოძრაობისათვის თვალი. იყვნენ ჩასაფრებული მოხერხებულ ადგილას, აძლევდნენ ნიშანს ერთმანეთს, აწოდებდნენ ცნობას ანდროს და მოელოდნენ მტერთან შეხვედრას უფრო გადამწყვეტ და სასტიკ ფორმებში.

ანდრო ელოდა დახმარებას მაზრიდან. თუმცა ეს იმედი ძალიან უსაფუძვლოდ ეჩვენებოდა, რადგან ასეთ ამინდში და ასე ჩქარა დამხმარე ძალების მოსვლა შეუძლებელი იყო. გაგზავნილ კაცს მხოლოდ დღეს შეეძლო მისულიყო ხულოში. იქიდან კი ასეთ ცუდ ამინდში აქამდე მოსვლა ორ-სამ დღეს მაინც მოითხოვდა... მეტი გზა არ იყო, როგორმე უნდა გამაგრებულიყვნენ, დახმარების მოსვლამდე გადაერჩინათ სოფელი აუწიოკებლად.

უკანდასახევი და გასაქცევი არ ჰქონდათ. ან უნდა გამაგრებულიყვნენ, ან სიცოცხლეზე აელოთ ხელი. ჯერ იფიქრეს, იქნებ ამ სასტიკ დამარცხების შემდეგ გაიქცნენ, მიატოვონ აქაურობაო, მაგრამ ეს ფიქრი არ გამართლდა. არც მათ ჰქონდათ გასაქცევი და თავშესაფარი. ყველაზე სუსტი ადგილი აქ ეგულებოდათ. აქ უნდა გაეწყვიტათ ძაფი და სოფელი დაეპყროთ. მათ ამ მოსაზრებას ბევრი გასამართლებელი საბუთი ჰქონდა. მათთან იყო ამ სოფლის მეთაური დურსუნი, გავლენიანი და ცნობილი იუსუფ-აღა, ხოჯა მამული და ორიოდვე გავლენიანი გლებიც. ორ-სამ თვეს რომ გამაგრებულიყვნენ, ისიც საქმე იყო. სხვა სოფლებზე იმოქმედებდნენ და შემდეგ... მიატოვებდნენ აწიოკებულსა და აობრებულს.

აბა ბანდიტების სახელმწიფოს ხომ ვერ შექმნიდნენ. •

იუსუფ-აღა და მისი კაცები კი ასე არ ფიქრობდნენ. ისინი სამუდამო ბატონობაზე ოცნებობდნენ და ამიტომ იყო, რომ ალი ომერ-ოღლის ბანდას ურჩევდნენ, არ მოსცილებოდნენ სოფელს, გამაგრებულიყვნენ მახლობლად, სანამ ხოჯა მამული და დურსუნი სხვა სოფლებიდან მაშველ რაზმებს მოიყვანდნენ. მაშინ ყოველის მხრიდან შემოერტყმებოდნენ სოფელს და ყველას ერთბაშად დაიქერდნენ. როგორც ამბობდნენ, აქარა მთლიანად დაუქერდა მხარს აჯანყებას

და მალე მოიცილებდა კომუნისტებს, რომლებსაც თითქო ახალგაზრდების გარდა არავენ ემბრობოდა. ასეთი იყო იმ ხალხის შეხედულება და სიზმარშიაც თავიანთ დაკარგულ ბედნიერებაზე, თავიანთ სიმდიდრისა და ართმეული ღირსების დაბრუნებაზე ოცნებობდნენ.

როგორც კი შეატყვეს, რომ სოფელში საკმაო ძალა ყოლია ბოლშევიკებს, როცა დარწმუნდნენ, რომ გლეხობის ძალიან მცირე ნაწილი აღმოჩნდა მათთან და ისინიც უარს აცხადებდნენ იარაღით გამოსვლაზე, ცოტა არ იყოს საგონებელში ჩაყარდნენ. ამდენი ხნის მზადება უქმად ჩაუარათ, სულ ნახევარი საათის ბრძოლას ვერ გაუძლეს და ტყვეს შეათარეს თავი.

არ უნდოდათ უკანდახევა. შეუძლებელიც იყო მათთვის ეს. კარგად იცოდნენ, რომ ბოლშევიკები მადლობას არ ეტყოდნენ ამისთვის და არჩიეს ყოველგვარი ზომების მიღება ადგილობრივი კომუნისტებისა და კომკავშირელების ამოსაწყვეტად. დურსუნი და ხოჯა დილაადრიან გაიქცნენ სოფლიდან დამხმარე ძალების მოსაყვანად.

დურსუნს იმედი ჰქონდა გლეხებს გამოვიყვანო, მაგრამ არ გაუმართლდა. ოცამდე კაცი ძლიეს მოაგროვა, ოცდახუთამდე ხოჯამაც შეკრიბა და სოფელ წყაენარას შემოასია.

მოსახლეობა კვლავ ჩაიკეტა. გლეხობის უმრავლესობა დაიშალა. ანდროსთან და შაქირთან მხოლოდ ახალგაზრდები და ათამდე გლეხი შემოიკრიბა.

სოფელში შესავალი გზები იყო გაკავებული და გამაგრებული. საბჭოს შენობაში მოეწყო თოფებისა და ტყვიების საწყობი. რამდენიმე ახალგაზრდა მიუჯდა სანადირო თოფებისთვის ვაზნების მზადებას. ნაზიმემ კიდევ ორი ქალიშვილი აიყოლია და მებრძოლებისათვის საკმელი დაამზადა. თვითონ დაჰქონდათ გამომცხვარი მქადები სანგრებში და არიგებდნენ. სულ რამდენიმე ადამიანი დადიოდა სოფელში და ისიც ქურდულად.

არავენ იცოდა რით დამთავრდებოდა ეს ამბავი. ზოგიერთები ავრცელებდნენ ხმებს თითქო საზღვრიდან გადმოსულია უცხო სახელმწიფოს ჯარი და საცაა ალი ომერ-ოლის ბანდასთან ერთად გამოილაშქრებსო. ამ ხმებს შიში შეჰქონდა ახალგაზრდობაშიაც.

სადილობის დრო მოახლოვდა. სროლა შეწყვეტილი იყო. კომკავშირელმა მზვერავებმა მიიარ-მოიარეს ახლომახლო ტყეები, გორაკზედაც ავიდნენ, მაგრამ არავენ დაუხვდათ. როგორც ეტყობოდა, ყაჩაღებს დაეტოვებინათ სოფელი.

დამშვიდებულნი დაბრუნდნენ და საბჭოს შენობაში მოიყარეს თავი, რომ უეცრად საშინელი სროლა ატყდა.

გამოცვივდნენ. მალლა გორაკები შავად იყო მოფენილი ხალხით. სროლით მოიწვედნენ წინ და საბჭოს შენობას უშენდნენ ტყვიას.

ახლა აღარ იყო სახუმროდ საქმე.

ანდრომ მიიხედ-მოიხედა. მის გვერდით ოცამდე ახალგაზრდა იდგა, დანარჩენები სხვადასხვა ადგილას დარაჯობდნენ. ეს ძალა კარგად შეიარაღებულიც რომ ყოფილიყო, მაინც გაუჭირდებოდა მოსულებთან შეხვედრა. ოთხმოცამდე შეიარაღებული კაცი მოდიოდა და მათში უმეტესობა ძველი ყაჩაღები და სროლაში კარგად გამოწაფული ვაჟკაცები.

—ტყვიას გაუფრთხილდით ბიჭებო, — დაიძახა მოხუცმა მუჰამედმა და თავის კაციან თოფს მოავლო ხელი.

საბჭოს შენობის წინ გაწვინენ თოვლში და სროლა დაიწყეს. ბანდიტები შეუპოვრად მოდიოდნენ წინ. არ უფრთხოდნენ ტყვიას და თანდათანობით ჩამოდიოდნენ გორაკიდან, თითქო არ მოქმედებდა მათზე აქედან განასროლი ტყვიები.

შაქირს ბრაზი მოსდიოდა. აფრთხილებდა ახალგაზრდებს, არ გამოეღიათ ტყვიები და თუ ვინიცობაა დაიხვედნენ, მარაგი ჰქონოდათ.

ანდროც შეფიქრიანებული იყო. მან კარგად იცოდა, რომ თუ ბანდიტები გაიმარჯვებდნენ, არც ერთ ამათგანს არ დატოვებდნენ ცოცხალს. თავისთავზე უფრო აწუხებდა ამხანაგების დალუპვა, რომლებიც, სასიკეთო იარაღს მოკლებულნი, თავგამოდებით იბრძოდნენ.

თვითონ ანდროსაც არ ჰქონდა თოფი. ის რევოლვერამოღებული მოფარებოდა ქვას და მტრის მოახლოვებას უტდიდა. რამდენჯერ ინატრა ერთი შაშხანა თავისი ტყვიებით!

ნანობდა, რომ თავისი ერთგული თოფი სახლში დატოვა.

თანდათან გაძლიერდა სროლა. ყაჩაღებმა მაუზერები აამუშავეს და სულ დაცხრილეს საბჭოს შენობა. შაშხანებისა და ბერდანების ტყვიები უფრო ხშირად მოცვიოდა, მაგრამ ჯერ ერთის შეტბ არ გამოუყვანია წყობილებიდან. იმასაც ფეხში მოხვდა.

დანარჩენები ჯერ კიდევ ყოჩაღად იბრძოდნენ. იშვიათად გაისვრიდნენ, მაგრამ ყოველ გასროლას მომაკვდავ ბანდიტის აყვირება მოყვებოდა.

ათამდე კაცი ჩამორჩა თოვლში გადღებულ კი მომხდურებს, მაგრამ მაინც არ იხვედნენ. ახლა რამდენიმე ასეული ნაბიჯით იყვნენ მოშორებული და თოვლი უშლიდა ხელს, თორემ შეეძლოთ ერთი გამოქცევით მოვარდნილიყვნენ და ხელჩართული ბრძოლა გაჩაღებულიყო.

ანდრომ თვალით ანიშნა შაქირს, რომ ბიჭები უკან გადმოეყვანა და უფრო მოხერხებულ ადგილას ჩასაფრებულებიყვნენ.

ბანდიტები, შენიშნეს რა უკან დახევა, ყვირილით და ვაშას ძახილით წამოვიდნენ და საბჭოს შენობამდე მოაღწიეს. აქ ისევ ახალგაზრდების ტყვიებმა აიძულეს შეჩერებულიყვნენ და თოვლის საფარის გაკეთება დაეწყათ.

ცოტა ხანს თითქო შეწყდა ორივე მხრივ სროლა. ბანდიტებმა საბჭოს შენობის აღებით თავი გამარჯვებულად ჩასთვალეს და წუთით სული ამოითქვს. მოპირდაპირეებმა ახალი საფარი მონახეს და მტრის დასახვედრად მოემზადნენ.

ახლა აღარ იყო კარგი სულიერი განწყობილება ახალგაზრდებში. ტყვიების სიმცირე და მოპირდაპირის მრავალრიცხოვნობა აფიქრებდა მათ.

ანდრომ ახლა ცოცხალი ძალის გადარჩენაზე ფიქრობდა. უნდოდა როგორმე მოეხერხებინა და გაეყვანა მებრძოლები აქედან. ამისათვის ის ჩუმად მოელაპარაკა შაქირსა და სხვა ამხანაგებს.

— ბიჭებო, დელი მურადი!—დაიძახა ამ დროს ერთმა ახალგაზრდამ და ფერდობში დაეშვა. ყველამ იქითკენ მიიხედა.

— მურადი, მურადი—შესძახა შაქირმაც და სიხარულით გაუბრწყინდა სახე.

— ჩვენი მურადი—და აღტაცება მოეფინა ყველას.

მურადი წელამდე თოვლს მოარღვევდა და ისე მოდიოდა. ოფლისაგან სულ გაწუწულიყო. მხარზე მსუბუქი ტყვიამფრქვევი გაედო, აქეთ-იქიდან ორი თოფი ჩამოეკიდნა, წელზე ხელით სასროლი ყუმბარები ჰქონდა.

დაინახა იუ არა ბიჭები, უფრო აუჩქარა ნაბიჯს. ანდრომ და სხვები მიეგებენ მომავალს. ანდროს დანახვაზე მურადს სიხარულის ცრემლები გადმოცვივდა. იარაღი ამხანაგებს გადასცა, მივიარდა და ისე მაგრად ჩაეკრა, გეგონებოდათ შეადულდნენ ერთმა ნეთსო.

— ნუ გეშინიათ ბიჭებო. მოდიან ჩვენები. მე დაეწინაურდი. დიდი თოვლია ეს წყეული. გზაზე შემომხვდნენ და ამდილას აქეთ მოვიარდევით თოვლს... ნაილც მათ მოჰყვება... თქვენ გენაცვალეთ ბიჭებო, ხომ არავინ გაკლიათ? მაგ ბანდიტებს ხომ არ ჩაუთრევიათ ვინმე. შენც აქ ხარ ძია მუჰამედ. გენაცვალე თეთრ წვერებში,— მივიარდა მოხუცთან და მთელი სახე ჩაუკოცნა,— შაქირ, ზია, ალი, როგორ ხართ? თქვენი დარდი მქონდა... ახლა მეტს ვერაფერს გეტყვით. დიდი ხანია მესმოდა სროლის ხმა, ბრაზით ესკდებოდი, რომ ვერ ნოვდიოდი ჩქარა... ვინ იცის ტყვიამფრქვევის სროლა?

იქ ამიხსნეს, მაგრამ არა მგონია შეეძლო, — კიდევ მოეხვია ანდროს.
— შემოგველე, გეყურებანე ჩემო ძამია.

— ნუ გეშინია მურად, — დააელო ხელი ანდრომ ტყვიამფრქვევს, ახლავე ავაკაკანებ. აბა ბიჭო, შაშხანები! მურად, შენ მოისხი რამე, გაოფლიანებული ხარ, — ანდრომ პალტო გაიხადა და მურადს მოახურა.

როცა ესენი ამ ამბავში იყვნენ, ბანდიტები ახალ გამოლაშქრებისათვის ემზადებოდნენ, ზეჟრავდნენ იჭაურობას.

ცოტა ხნის შემდეგ რამდენიმე ბანდიტი გადმოვიდა სერიდან.

— დაყარეთ იარაღი, მოგვიყვანეთ მაგი გიაური და არ დაგსჯით, თორემ ამოგწყვიტავთ ყველას და სახლკარს გადაგიწევთ. — გადმოიძახა ერთმა მათგანმა.

— მობრძანდით და ჩავაბარებთ, — გასძახა გაბრაზებულმა მურადმა და ზედიზედ მიაყარა შაშხანიდან ტყვია.

ორი ბანდიტი ჩავარდა თოვლში, დანარჩენებმა პირი იბრუნეს, მაგრამ მალე ამხანაგები წამოეშველნენ და ყვირილითა და სროლით დაეშვნენ.

გამხნეებული ახალგაზრდები არ ზოგავდნენ ტყვიას და ისევ გამაყრუებელი სროლა ატყდა.

ანდრო, ტყვიამფრქვევთან მიმჯდარი, ჯერ კიდევ ჩუმად იყო. ელოდა ბანდიტების უფრო ახლო მოსვლას და ტყვიამფრქვევი მზად ქონდა.

აი დადგა მომენტით. შეუპოვრად წამოსული ყაჩაღები და მათი დამხმარე ძალები მიუახლოვდნენ მოპირდაპირის სანგრებს, ასტეხეს ყვირილი და სროლა, უნდოდათ იერიშზე გადმოსულიყვნენ, მაგრამ სწორედ ამ დროს აკაკანდა ტყვიამფრქვევი და ზედიზედ ორი ყუმბარა გასკდა მურადის მიერ გასროლილი.

ბანდიტები ამას აღარ მოელოდნენ და აირივნენ. იბრუნეს პირი, მოუსვენს საბჭოს შენობისკენ, მაგრამ ტყვიამფრქვევის ტყვიებმა არ მისცეს საშუალება უკან მოხედვის.

— ვაშა! — დასძახეს ახლა ახალგაზრდებმა და გაქცეულებს გამოუდგნენ, მაგრამ იმდენი ძალა არ შესწევდათ, რომ უფრო შორს გადევნებოდნენ. თავიანთი ნამყოფი პოზიცია დაიბრუნეს და საბჭოს შენობასთან გამაგრდნენ.

ბანდიტები მიიმაღ-მოიმაღნენ ტყეებში, ახალი საფარი გამო-ნახეს და კანტი-კუნტად სროლილობდნენ. ერთი ტყვია შაქირს მარჯვენა ხელში მოხვდა, მაგრამ ამხანაგები არ მიუტოვებია. კრილობა შეიხვია და მარცხენა ხელით სროლილობდა, დანარჩენები ჯერ კიდევ უვნებლად იყვნენ. აღარ ეშინოდათ მტრის. ახლა თვითონაც კმაროდნენ. ხუმრობა ხომ არ იყო, ტყვიამფრქვევი და

ხელუშვარები ჰქონდათ, შეეძლოთ გამაგრებულყვენ თუნდაც ერთ კვირას.

დამარცხებულმა და შეურაცყოფილმა ბანდიტებმა აღარ დააყოვნეს, გადაეწყვიტათ, რაც უნდა დაჯდომოდნენ აელოთ სოფელი და შეეპყროთ მოპირდაპირენი...

ისევ მალე შეკრიბეს უკანასკნელი ძალები და უფრო გაბედული შეტევით შემოვიდნენ. ახლა ჯგუფ-ჯგუფად გადმოდინდნენ ხსვადასხვა მხრიდან და ამით უფრო ახერხებდნენ თავიანთი თავის მოფარებას... შემოუტიეს ზემოდან, შემოუტიეს სოფლიდან, ასტებეს სროლა ჯამედან, მინარეთიდან და ისევ რკალში მოამწყვდიეს ახალგაზრდები.

დაიძაბა მდგომარეობა: იგრძნეს ტყვიების ნაკლებობა, მაგრამ თავიანთ პოზიციას მაინც არ სტოვებდნენ. ანდრო აქეთიქით აძლივდა ტყვიამფრქვევს მიმართულებას. სროლილობდა დაზოგვით და მოხერხებულად. მოპირდაპირენიც აძლიერებდნენ ცეცხლს და ისევ უახლოვდებოდნენ დანატოვებ სანგრებს. ბოლოს იმდენად გათამამდნენ, რომ იხუვლეს და თავგანწირვით გადმოვიდნენ იერიშზე. უეცრად მიღმა რამდენიმე ტყვიამფრქვევი აკაკანდა და სეტყვასავით დაეშვა ტყვიები თოვლში. ამას მოყვა ხშირი სროლა შაშხანებიდან და იერიშზე გადმოსულებმა იკადრეს გაქცევა.

—ვაშა!—დასძახეს ახალგაზრდებმა და გაქცეულებს გამოუდგნენ.

ახლა ბანდიტებისათვის უკვე აღარ იყო საეჭვო დამარცხება და ამიტომ თავისთვის უნდა ეშველნათ. რაც ძალა და ღონე ჰქონდათ მოუსყეს, მაგრამ სალამომდი ბევრი მათგანი მოიყვანეს დაქერილი და საბძელში დაამწყვდიეს.

V

სოფელმა თავისუფლად ამოისუნთქა. გლეხებმა გააღეს ჩაკეტილი კარები. ქალები და ბავშვები გამოვიდნენ გარეთ და კვლავინდებურად ჩაებნენ ცხოვრების ფერხულში.

ოცამდე პატიმარი წამოიყვანეს მაზრაში. მათში შეიდი კაცი ალი ომერ-ოღლის ბრბოს ეკუთვნოდა. დანარჩენები სხვადასხვა სოფლებიდან იყვნენ.

საბჭოს თავმჯდომარეს უკვე გაესწრო. ხოჯა თავის სახლიდან გამოაღორჩის. ის ფიცულობდა, რომ მას არავითარი მონაწილეობა

არ მიუღია თავდასხმაში, მაგრამ ეს აქ აღარავის სჯეროდა. სხვა საბუთებიც ბევრი იყო მის დასაპატიმრებლად. ბინის გაჩხრეკისას მრავალი იარაღი აღმოუჩინეს, სხვათაშორის იპოვეს ის ტანსაცმელებიც, რომლებსაც ხმარობდნენ ქაჯებისა და ეშმაკების როლებში გამოსვლის დროს.

აი, ის ქურჭი, რომელიც თოფუზას სცმია იმ ღამეს, როდესაც მურადის გაგიჟება მოახერხა, შემდეგ კი იმავე მიზნით ანდროს შეხვდნენ. გარკვეულად აჩნდა ფეხთან ქრილობა, რომელიც ანდროს მიერ გასროლილმა ტყვიამ დაამჩნია. ნახეს მეორე ასეთივე ქურჭიც, რომელსაც მოლა ნური იცვამდა. ორივე მოხერხებულად იყო გაკეთებული. მთლიანად ტანზე ჩამოიცმებოდა. ხელების მაგივრად ადამიანს რაღაც უცნაურბრკყალებიანი თათები უკეთდებოდა, გრძელი ყურები და ოდნავ შესამჩნევი რქები. თვლების ადგილას ჩასმული იყო შავი შუშა, რომელიც ღამეში ცეცხლივით ელავდა. გრძელი კუდი და ბეწვებით დაფარული ტანი. ასე, რომ ამ ტანსაცმლით შემოსილ ადამიანს ადვილად შეეძლო შეეშინებია ადამიანი და მართლაც შეეშალა გონებიდან.

მთელი სოფელი დადგა ფეხზე. ახლო-მახლო სოფლებიდანაც იწყეს მოსვლა „ქაჯის“ ტანსაცმელების სანახავად. დიდი, პატარა, ქალი და კაცი, ყველა დაინტერესებული იყო...

ყველაზე უფრო იყვნენ გაკვირებული მოხუცე კაცი, რომელთაც ჯერ კიდევ არ სჯეროდათ ამ ამბავის სინამდვილე და კიდევ ხოჯისა და იუსუფ-ალას მხარეს იჭერდნენ. ახლა, როცა ხოჯასთან ერთად ის „ქაჯების“ ტანსაცმელებიც ანახეს და ხოჯას პირით მოისმინეს მისი საქმიანობის ამბავი, თავბრუ დაესხათ.

— ფუი, შენს სინდისს, შენ გაიძვერავ, შენ! — მიაფურთხა ერთმა ღრმად მოხუცებულმა გლეხმა ხოჯას, — რათ ჩაიდვი ჩემი ცოდვა ხოჯავ! რად დამიღუპე ერთადერთი შვილი, რად გამიღველე? უსინდისოვ! ღვთისა და კაცის მტერო, ტყვია გერთყა შუბლში და ისე მოგეკლა, არ გენახებია ჩემი შვილის სიცოცხლით წამება... უჰ, შენი ხორცი. შენი სული... — კბილები დააკრაკუნა მოხუცმა და ჯოხით გაეჭანა ხოჯისაკენ, მაგრამ შეაჩერეს...

მოხუცს ტირილი აუვარდა.

— მე შეგონა ღმერთმა დამსაჯა, მან მომივლინა ეშმაკი საწამებლად, ვლოცულობდი, ვევედრებოდი ყოვლის შემძლეს, რომ ეპატიებია ჩემთვის თუ რამე დანაშაული მიმიძლოდა მისსა და ქვეყნის წინაშე. რამდენი დავხარჯე. თვითონ მაგას მივუტანე ნუსხის დაწერისათვის სიმწრით ნაშოვნი ფული... ხოჯავ,

ხოჯავ, რას მერჩოდი, რად ჩამიხშამე მოხუცებულობა!... ძლიერს
ლულულულებდა ის და ცრემლებს ღვრიდა.

კიდევ გამოჩნდნენ ისეთები, რომლებსაც რამდენჯერმე შეხვე-
დროდათ ქაჯი, რამდენჯერმე მიუტოვებიათ მისი შიშით წისკვილი-
დან წამოღებული ფქვილი, ან გასაყიდად წაღებული იალი, ყველი
თუ სხვა რამე ნაწარმი... რამდენჯერ შეშინებიათ ძალზე მეტად
და ამ ნიადაგზე დასნეულებულან! რამდენი ვერ ბედავდა ღამე
არეთ გამოსვლას და რამდენს თვალწინ ედგა საშინელი სახე
წყვეული „ქაჯისა“. ბევრი ბავშვი დაავადებულა შიშისაგან.

საწყალი მშობლები მიდიოდნენ ხოჯასთან, აწერიებდნენ
ნუსხას, აძლევდნენ უკანასკნელ გროშებს, ვისაც ფული არ ჰქონდა,
მიჰყავდათ თხა, ცხვარი, ბატკანი, მიჰქონდათ ერბო, კვერცი, ხაწონი,
რძე, ნიგოზი... ყველაფერს ღებულობდა გამოქნილი ხო-
ჯა, ვითომც და თავისი მეზობლების ხათრისა და სიყვარულის
გულისთვის.

ზოგიერთ შემთხვევაში ავადმყოფი მოიკეთებდა, მორჩებოდა.
მაშინ ხოჯის ვალისგან ველარ ამოვიდოდა კაცი. მორჩენილი
რამდენიმე დღეს უნდა მიხმარებოდა ხოჯას.

საჩუქრებდა მადლობა ხომ სულ სხვა იყო.

ასე სჩადებდა მამედის მამა. ისე განაგრძო მამედამაც.

შვილი მამაზე ძობერხებული გამოდგა. რამდენიმე საფრთხობე-
ლა ტანსაცმელი გააკეთა სხვადასხვანაირი. ერთხანს მარტო იცვა-
მდა, გამოდიოდა და აფრთხობდა ხალხს. მაგრამ ეს კომუნისტები
რომ გაჩნდნენ, მერმე მარტო მუშაობამ ვერ გამოიღო ისეთი ნა-
ყოფი, როგორც საჭირო იყო. თითქო ძალა მოაკლდა ეშმაკსა და
ქაჯს. ნაკლებად ეშინოდათ მისი. რომ ვინმე გაედლებინა, საკმა-
რისი არ იყო მარტო ბნელაში მოჩვენება და ქვების სროლა, ან
სახელის დაძახება. ზოგჯერ შეტაკება, მაგრად მიბეგვეა და გვერ-
დების ჩაელეწვაც იყო საჭირო, რომ შემდეგ ყველა დაერწმუნებინა
ქაჯის არსებობაში. მაგრამ ეს ხოჯას ახლა აღარ შეეძლო. ერთხელ
მოუნდომა ერთ გლეხს დატაკება, მაგრამ როცა შეხედა, რომ შეში-
ნებული გლეხი არა თუ არ გაიქცა, არამედ ჯოხი მოიმარჯვა, —
ველარ გაბედა მასთან მისვლა, საზარელი ხმით ამოიკილა და
ტყეში დაიკარგა.

ამის შემდეგ შეუდგა თანაშემწის ძებნას. მოლა ნური ყველა-
ზე კარგი მოწაფე გამოდგა. რამდენჯერმე ერთად მოახდინეს
გასეირნება ქაჯის ტანსაცმელებით და სასურველ შედეგს მიიღწიეს.
რამდენიმე ახალგაზრდას აუტეხეს გულისფრიალი და სამუდამოდ

დასთხოვეს ღამით გარეთ გამოსვლას. მაგრამ მურადს ვერ მოუხერხეს ვერაფერი, თუმცა რამდენჯერმე გამოეჩვენა.

ამაზე კარგახანს იფიქრეს და იმსჯელეს. მურადი ღონიერი ბიჭი იყო, მას შეეძლო ორივესთვის მაგრად ჩაემტვრია გვერდები თუ, მასთან შებმას გაბედავდნენ, გვერდებს ვინღა ჩოდა, გამომტლავნდებოდნენ და შემდეგ მათი სიცოცხლე რაღად ეღირებოდა.

თოფუზი აირჩიეს თავიანთი მიზნებისათვის. გაიგეს, რომ ის ბატმა შეაშინა, რომ ამიტომ ამხანაგებმა დასცინეს. დაიხვიეს ხელზე ეს ამბავი და თოფუზი შეკერეს. გადაიბირეს. უბრალოდ აუხსნეს: შევაშინოთ და მერმე დავცინოთ, ვეხუმროთ თითქო ეს არაფერიო და ნელ-ნელა თოფუზი დაიმორჩილეს, ჩაითრიეს, ჩააბეს.

გაბრიყვებულმა თოფუზმა ვერ მოახერხა ამ ამბავის გამხელა. ანდროს ვერ გაუბედა თქმა. ღურსუნმა კი იცოდა და უფრო აქეზებდა.

დაუჯერა ზოჯას, ჩაიცვა საფრთხობი ტანსაცმელი და რამდენჯერმე შეამოწმა თავისთავი. როცა დარწმუნდნენ, რომ როლი კარგად იყო შესწავლილი, საქმეს შეუდგნენ.

მურადს რევოლვერი მუდამ წელზე ჰქონდა და ტყვიებიც დასრიალებული კიაფობდა ბარაბანში. საჭირო იყო ამ ტყვიების მოპარვა ისე, რომ მურადს არ შეეტყო.

ესეც მოახერხეს.

დამზადეს წინასწარ ვაზნები, გამოაცალეს შიგ წამალი, წამოაგეს ზემოდან რყვიები და ნამდვილ საღ ვაზნას დაამსგავსეს. შემდეგ ერთ დღეს თოფუზმა მოახერხა მურადის რევოლვერის ხუთი წუთით ხელში ჩაგდება, საღი ვაზნები მაშინვე გამოაცალა და ცარიელი ვაზნები ჩაუწყო.

ამის შემდეგ მურადთან მისვლა ორ კაცს აღარ გაუჭირებოდა. მის ფსიქოლოგიაზედაც იმოქმედებდნენ. როცა ის რევოლვერის გასროლას მოინდომებდა და არ გავარდებოდა, უთუოდ უფრო ძლიერ შეშინდებოდა და ამ დროს ხელდახელ შებმა საკმარისი იქნებოდა მურადის სამუდამოდ წასახდენად.

ასედაც მოიქცნენ და შედეგიც ისეთი მიიღეს, როგორც უნდოდათ. გააგიჟეს, შეშალეს ჭკუიდან კაცი და ოდნავ მოიფხანეს გული...

საბოლოო გამარჯვებისათვის კი ეს არ კმაროდა. ღურსუნმა სიმაძრის ანდროზე მიუთითა და მოლასა და თოფუზს მოელაპარაკა, თოფუზს არ უნდოდა გაემეორებინა ის სცენა, რომელიც მან

გათამაშა. ის ნანობდა კიდევ ჩადენილ დანაშაულს, რომელსაც ერთი ადამიანის დაღუპვა მოყვა, მაგრამ გვიან იყო. უარის თქმა აღარ შეიძლებოდა. ღურსუნი ხომ სულელი არაა, ცოცხალი დატოვოს ისეთი ადამიანი, რომელიც ხელს შეუშლის, ან მისი საიდუმლოება იცის და მის გვერდით არ არის?

მაუზერი დაანახვა და აგრძნობინა, რომ ახლა ყოყმანი აღარ შეიძლებოდა.

რას იზამდა. დასთანხმდა თოფუზი და შეურიგდა ბედს.

ძნელი შეიქნა ანდროს რევოლვერის ხელში ჩაგდება და ვაზნების შეცვლა, თორემ სხვა ყველაფერი მზად იყო. რამდენიმე დღე უღარაჯა თოფუზმა, ღურსუნმა, მაგრამ ვერ მოახერხეს ვერაფერი. ფრთხილი ბოლშევიკი იარაღს ხალათშიგნით ატარებდა, ან პალტოს ჯიბეში ჰქონდა შენახული, არც ვინმესთვის უჩვენებია, არც გაუნათხოვრებია, მაგრამ ერთ დღეს, რაც თოფუზმა ვერ მოახერხა, ღურსუნმა შესძლო.

კოოპერატივის საქმეზე მივიდა დილაადრიან ანდროსთან ღურსუნი. ანდრო ის იყო ტანზე იცვამდა. რევოლვერი მაგიდაზე იდო. წუთით პირის დასაბანად გავიდა და ამ დროს ღურსუნმა ყველაფერი გააკეთა.

ის იყო, იმ დღესვე აცნობა ეს ამბავი ხოჯას და საქმეს შეუდგნენ, მაგრამ, როგორც ვიცით, არ გაუმართლდათ. ანდრო შემთხვევით წამოღებულმა კომკაფშირელის რევოლვერმა იხსნა, და საიდუმლოებასაც ფარდა აეხადა. ბნელი ძალების საქმიანობაც გამომზეურდა.

სახალხოვდ გამოტყდა ხოჯა, ილაპარაკა აშკარად, აღიარა დანაშაული.

ახლა ყველამ იცოდა „ქაჯების“ ამბავი და ხალხი მათს სავსებით განადგურებას მოითხოვდა. გლეხები საშინლად აღელვებული იყვნენ, მიიწვედნენ დაპატიმრებულებზე.

— აქვე გავასამართლოთ!

— ჩვენვე ჩავჭოლოთ!

— ყელები გამოვლადროთ!

— ცეცხლში ჩავწვათ მაგათი ხორცი!

იძახდნენ... ყოველ მხრივ შეკრეს გზები. თხილამურებით წავიდნენ მთებში, რომ ღურსუნი და ზოგიერთი მისი მხლებელიც დაეჭირათ, საშუღამოდ და საბოლოოდ გაენადგურებინათ მათი სახსენებელი. მოესპოთ ისე, რომ ფესვებიც არ დარჩენოდეთ ცოცხალი.

დაპრილები და დახოცილებიც აკრიფეს, დაათვალიერეს და გასინჯეს. მხოლოდ ორი გლეხი აღმოჩნდა მკვდარი, ისიც მეორე სოფლიდან. ხოჯას გადმოეყვანა, მოეტყუებია და თავის გავლენის

ქვეშ მოექცია. დანარჩენები ყაჩაღები იყვნენ ალი ომერ-ოღლის ჯგუფიდან. ვაჟაკური სახე ჰქონდათ. ზოგიერთ მათგანს საშინელი ნაღველი დარჩენოდა სიკვდილის დროს და ეს ნაღველი მათ შუბლზე იყო აღნიშნული.

— ვინ იცის, იქნებ ესენიც მოტყუილებით ჩათრეული არიან ამ საქმეში, — გაიფიქრა ანდრომ. სათითაოდ დაათვალიერა ყველა. ერთ დაქრილს წერილები აღმოაჩნდა ჯიბეში. სულ გადაიკითხა ის, მაგრამ საყურადღებო არაფერი იყო. თავის შესაქცევად ეწერა მოკლილ დროს ბანდიტს. უფრო დღიურების სახით. ანდრო ნაწერმა ღვაინტირესა, თითქო ასეთი ხელით ნაწერი წერილები კიდევ ენახოს სადღაც... ბევრი იფიქრა, მაგრამ არ მოაგონდა. დაქრილს დაუწყო სინჯვა. ორი ტყვია ჰქონდა მორტყმული, ერთი მკერდს ქვემოთ, მეორე სახეში. სულ გამურული იყო სისხლით. წვერულვაში წითლად ჰქონდა შეღებილი და თვალები მთლიანად გაწებილი შედედებულ სისხლით.

გადაიყვანეს სახლებში დაქრილები, კრილობები მობანეს, მოწმინდეს, მალამო დაადეს და შეუხვიეს. ეს საქმე ქალებმა ითავეს. ნაილე მეთაურობდა მომვლელი ქალების ჯგუფს. ის თითქო გაზრდილიყო ამ თვენახევრის განმავლობაში, დაქალებულიყო, დარბაისლური იერი მიეღო. მისი მხიარული და ბედნიერების სხივებით აღსავსე სახე მთვარესავით ლაქლავებდა. ის გამარჯვებული გმირი იყო და ბევრი შენატროდა მის ბედს.

ქალები, როგორც დაიმარტოხელებდნენ, ფუტკარივით მოეხვეოდნენ, დაუწყებდნენ ამბების გამოკითხვას. მაგრამ ჯერ ნაილეს კიდევ არ ჰქონდა იმდენი თავისუფალი დრო, რომ დაწვრილებით ეამბნა თავისი თავგადასავალი. მოკლედ კი ყველას ეუბნებოდა იმ სასწაულებრივი ექიმობის შესახებ, რომელიც მან ნახა და რომელმაც განკურნა და სიცოცხლე დაუბრუნა მურადს.

მურადს კი სულ არ ეცალა სალაპარაკოდ, მან თხილამურები გაიკეთა და სახლშიაც არ შეუვლია, ისე გამოუდგა გაქცეულებს დასაქერად. მას შეიდამდე ახალგაზრდა გაჰყვა კარგად შეიარაღებული.

ყველასი გზა-კვალი გაიგეს, მაგრამ იუსუფ-ალა ისე გაქრა, რომ ცამ ჩაყლაბა თუ მიწამ, არავინ იცოდა. არც სახლში იყო, არც დაქრილებსა და მკვდრებში ერია. ცოლებმა სხვადასხვანაირად აჩვენეს. ლუთბიემ მიკიბ-მოკიბა. მგონი აქვეა სოფელში დამალულიო. კარგად არ დაასახელა. ხოშნეთი მძიმე ავადმყოფი იწვა და მას არავინ შეკითხებია, ხოლო გულიზარმა ყველაფერი იფიცა, რომ იუსუფი სამი დღეა სოფელში არ არის, ქვანაში წავიდა მოყვრისას და არ დაბრუნებულაო.

არავინ იცოდა სად იმალებოდა ის, მაგრამ ეს არც იმდენად აფიქრებდათ.

დღეს თუ ხვალ ისიც ჩაეარდებოდა.

VI

გაცხოველებული კამათი იყო საბჭოს კრებაზე. ეს პირველი კრება იყო დურსუნის შემდეგ და საბჭოს წევრები უფრო თავისუფლად გამოდიოდნენ. ახლა ლაპარაკობდნენ ყველაფერს, რაც ამდენხანს ბოლშევიკურად სწოლოდათ გულზე და თქმას ვერ ბედავდნენ.

ახალი თავმჯდომარე აირჩიეს და უნდოდათ ძირფესვიანად განეახლებინათ საბჭოს ნუშაობაც. ერთმანეთს უკავშირებდნენ ყველა საჭირობოროტო საკითხებს.

ლაპარაკობდნენ გზის გაყვანის, კოოპერატივის გაძლიერების, სკოლაში მოწაფეების გაგზავნის, სამკითხველოსა და საექიმო პუნქტის გახსნის შესახებ.

ვერავინ იფიქრებდა, რომ ესენი იყვნენ ის უნო და გაუბედავი ადამიანები, რომლებიც ორი-სამი თვის უკან მხოლოდ თავის დაქნევით ადასტურებდნენ თავმჯდომარის, ან სხვა ვინმე პასუხისმგებელი ამხანაგის სიტყვებს, მიუხედავად იმისა, მოსწონდათ თუ არა ის.

ანდრო კმაყოფილი იყო გლეხების ამ აქტიობით. ის უფრო და უფრო ათამამებდა მათ და ხშირად ეხმარებოდა აზრის უფრო კარგად ჩამოყალიბებაში.

მურადი იმშვენებდა თავმჯდომარის მოვალეობას. გამოცდილ კაცივით ხელმძღვანელობდა კრებას და ხანდახან თუ ჩაეარდებოდა უხერხულობაში, ვერ მოუყრიდა თავს საერთო აზრს, გაწითლდებოდა და ანდროს გადახედავდა.

ანდრო მიუხვდებოდა და მაშინვე მიეშველებოდა.

— მაშ ასე, ამხანაგებო, — განაგრძო სიტყვა მურადმა, — აიღებს თუ არა თოვლს, მაშინვე ვიწყებთ საგზაო მუშაობას. მიმდინარე წელს უსათუოდ უნდა დავასრულოთ გზის გაყვანა და შემდეგ უფრო გულდადებულად შევეუდგებით სხვა სამუშაოებს. რას იტყვით? — გადახედა მან საბჭოს წევრებს.

— თანახმა ვართ, — ერთხმად შესძახეს მათ.

შემდეგ კოოპერატივის შესახებ ილაპარაკეს. ამ საკითხზე კომისია მუშაობდა. ეს კომისია თვითონ კოოპერატივის წევრებმა გამოყვეს კოოპერატივის გაძარცვის გამო და ახლა თავისი მუშაობის შედეგი მოახსენა სხდომას.

ძარცვა შიგნიდან მოეწყობო. საქონელი, რომელიც კოოპერატივიდან გაეტანათ, ღურსუნისას აღმოჩნდა. იგი კოოპერატივის დაუბრუნეს, მაგრამ კომისია მოითხოვდა დამნაშავეთა დასჯას. დასასჯელთა რიცხვში თოფუზა კაცაძეც ერია. მას თავის ზურგით გადაეზიდა ყველაფერი ღურსუნისას. ის ამჟამად მწოლარე იყო. ფეხი ჯერ კიდევ არ მოჩჩენოდა, მაგრამ კომისია საჭიროდ სცნობდა, წამოდგებოდა თუ არა, დაეპატიმრებინათ და სასამართლოსთვის გადაეცათ. ღურსუნის სახლკარი და ყოველივე ქონება საბჭოს გადაეცემოდა. ასევე უნდა გადასულიყო საბჭოს ხელში ქონება ხოჯა მამუდის, იუსუფ-ალასი და იმ პირებისა, რომელთაც ბანდიტები შემოიყვანეს და სოფლის აწიოკებას შეეცადნენ.

ძნელი გადასაქრელი გახდა ეს საკითხი.

ზოგი შიშობდა, ზოგი ერიდებოდა, ზოგს კი მათი ცოლშვილი ეცოდებოდა და თავს იქერდნენ ასეთი სასტიკი ზომების მიღებისაგან.

ბოლოს მაინც დაადგინეს: მოღალატეებს ჩამორთმეოდა ყოველგვარი ქონება და გადაეცემოდა საბჭოს. ამ საკითხის საბოლოოდ დადასტურებას ითხოვდნენ ცენტრალური აღმასრულებელი კომიტეტისაგან.

მესამე საკითხზე გადავიდნენ, როცა ნაილე შამოვიდა და ანდრო გაიხმო.

— ის კაცი კვდება. . . თხოულობს შენს ნახვას,— უთხრა მან ანდროს.

— მართლა? — სთქვა ანდრომ და მურადს ანიშნა, რომ უნდა წასულიყო.

მურადმა თავის დაქნევით მისცა დასტური.

ნელნელა თოვდა. ჩვეულებრივი ბნელი ღამე იყო და ძლივს ჩამოვიდნენ კიბეზე. ნაილე წინ მიდიოდა. ხშირად უცდებოდა ფეხი და მუხლამდე ეფლობოდა თოვლში.

ანდროს უნდოდა მიშველებოდა, ხელი მოეკიდებინა, მაგრამ უხერხულად მიაჩნდა, რომ ვინმეს დაენახნა, სხვანაირად მიიღებდა. ისიც დიდი გარდატეხა იყო, რომ აქარელი ახალგაზრდა ქალი ასე დაუახლოვდა მას, ასეთ დროს მასთან გავლასაც ბედავს.

იშვიათი მოვლენა იყო ეს. ბევრი უყურებდა ამას უარყოფითად.

ზოგჯერ კიდევ ჩაუკრავდნენ ნაილეს, ხან ხუმრობით, ხან ისე, მაგრამ ნაილე მათ ყურადღებასაც არ აქცევდა. თბილისში ყოფნისას მან უფრო მეტი შეიგნო და ნახა.

აღამიანს ყველგან შეუძლია იყოს გარყვნილი, პატიოსანიც. თუ ქალაქში შეიძლება ქალ-ვაეი იყოს ურთიერთშორის ამხანაგურ

დამოკიდებულებაში, სოფლად რა დაშავდება. გაქირვების დროს ნაილე ხომ სრულიად უცნობ კაცს გაყვავა, დამეხმარება, გზას მასწავლისო. რა ვუყოთ მერმე, თუ ის გაიძვერა და გარყვნილი გამოდგა, სამაგიეროდ გაიცნო ათეული და ასეული ამხანაგები, რომელთაც მართლა შეუძლიათ ამხანაგობა, თანაგრძნობა, დახმარების აღმოჩენა.

ცხოვრება არც ისეთი ყოფილა, როგორც ერთხანს მას ეგონა. როგორც ჯერ კიდევ ჰგონია ბევრს. როგორ გაუქვირდა ნაილეს, თამარი რომ რაღაც უცნაურ წიგნებს კითხულობდა. რამდენხანს ფიქრობდა იმაზე, რომ როგორმე ეთქვა თამარისათვის. ნუ კითხულობ მასეთ წიგნებს, ანგელოზივით ქალი ხარ, ნუ დაიღუპავ თავსო. ჯერ ვერ გაუბედა, მაგრამ ბოლოს, როცა კარგად დაუახლოვდა, მაინც უთხრა.

მერმე? სასაცილო მდგომარეობაში ჩავარდა. ძლივს შეიკავა თამარმა სიცილი: მივიდა, გვერდით მიუჯდა და წიგნი გადაუშალა.

— უიმე, ნენევე, — შესძახა ნაილემ საშინელი სურათების დანახვაზე, მაგრამ. . . ყურები აეწვა შემდეგ. ეს სახელმძღვანელო წიგნები ყოფილა თურმე. სირცხვილი იმისი კითხვა და სწავლა კი არ ყოფილა, არამედ უსწავლელობა. მერმე როდი შეზარებია იმ წიგნებში ჩახედვა. როცა მურადის ჯანმრთელობა გაუმჯობესდა და ნაილე დამშვიდდა, სულ ის წიგნები ექირა ხელში. თურმე თუ ასეთი წიგნები არ იკითხვ, როდი შეიძლება ექიმი გახდე, ადამიანი განკურნო. თამარიც ექიმობას სწავლობს და აბა როგორ უნდა მოიქცეს.

რამდენიმე ისეთი სურათებიანი წიგნი ნაილემც წამოიღო. ჩუმად კითხულობს. ძალიან დასჭირდა ახლა, როცა დაჭრილების მოვლა მიანდევს. გამოცდილ ფერშალივით უხვევდა კრილობებს ავადმყოფთ. ესეც იქ ისწავლა. რამდენჯერმე ახლდა თამარს საავადმყოფოში, სადაც უამრავი ავადმყოფი იყო.

ვინ იცოდა იქ მორიდება და სირცხვილი. სრულიად შიშველი ადამიანები შედიოდნენ ექიმთან, ყოველ ნაკვეთს სხეულისას უჩვენებდნენ აშკარად.

ეს როდი ყოფილა დასაძრახი და სირცხვილი.

ადამიანი ხომ შიშველი იბადება! მას ხომ დედის ძუძუ კვებავს. ის ხომ სჭამს, სვამს, მოძრაობს, აქვს, ყოველგვარი მოთხოვნილება, რომელთა შორის ზოგიერთის დასახელებას, დაწერას ან თქმას ჩვენ ვერიდებით, გავურბივართ. სირცხვილად მიგვაჩნია! ხშირად ამ სირცხვილის მიზეზით დიდ, საშინელ ტკივილებსაც ვითმენთ, უცნაურ სენის გავრცელებას ვუწყობთ ხელს.

რატომ? რისთვის?

რატომ არ უნდა იცოდეს ყოველმა ქალმა დედის მოვალეობა,

მშობიარობის საქმე, განაყოფიერების საიდუმლოებანი, ცოლქმრული ურთიერთობის შედეგები. ბავშვის მოვლა და პატრონობა.

ასეთი სიტყვით მიმართა თამარმა ნაილეს და აბა რა უნდა ეთქვა გამოუცდელ ქალიშვილს.

— ელბეთ მასეა საჭირო, — დაეთანხმა ნაილე და გაბედულად ჩახედა წიგნში.

— ეჰ, რა ბედნიერი ხარ, თამარ, — დაეხარბა ამხანაგის ბედნი, — ნეტავი შენ!

თამარი სხვანაირი ქალია. თანაგრძნობით შეხედა ნაილეს და იცით რა უთხრა?...

ფეხის ფრჩხილებამდე გაწითლდა ნაილე, როგორ წარმოიდგენდა, რომ თამარი ეტყოდა ამას, სად თამარი და სად ნაილე. სადაური შედარებაა, ნაილე როგორ გაბედავს იფიქროს ისეთ რამეზე. ამაზე ფიქრი რომელიმე სახელმწიფოს დედოფლად გახდომაზე ფიქრს ემსგავსებოდა.

თამარმა კი თვითონ უთხრა, ვინ იცის იქნებ ეხუმრა, მაგრამ მეორედაც რომ განუმეორა! ქეთოსათვისაც ეთქვა.

არა. ყოვლად შეუძლებელია. სიბრალულმა ათქმევეინა უთუოდ, აბა ანდროსთან როგორ გაბედავს თქვას ისეთი სიტყვები. თამარი ქალია თამარი, მაგრამ ძმას მაინც ვერ გაუბედავს ასეთი სიტყვა უთხრას.

ყველაფერი ახლა მოაგონდა ნაილეს. ფიქრებში გატაცებულს ფეხი დაუცდა და თოვლში წაიქცა.

— ხომ არაფერი იტყინე ნაილე? — ხელი მოავლო ანდრომ.

— არა, — უპასუხა ნაილემ. აყვა ვაჟის ხელს და ტანში ჯერ განუცდელი სიამოვნება იგრძნო.

რა თბილი და მიშხიდველი იყო ანდროს ხელები.

მაინც ჩქარა გამოსტაცა თავისი ხელი და გულზე აიკრა, თითქო შეეშინდა არ მომტაცოსო.

ახლა იგრძნო ანდროსადმი რალაც სულ სხვანაირი სიუცხოვე.

მართლაც რომ თამარის სიტყვების ასრულება შეიძლებოდა. მართლა რომ ანდრო. . . აუთრთოლდა გული და ძარღვებში ცხელი სისხლი აჩქეფდა.

არა, არა, არასოდეს არ შეიძლება ეს! ანდრო არ არის ჩვეულებრივი ადამიანი, მას ქალი და კაცი ერთნაირად მიაჩნია. არ შეიძლება რომ. . . ან ვინ გაუბედავს? ხომ უბრალო ვინმე არაა. არც კი მიკადრებს. ის კი არა, ბეგის ქალიშვილიც რომ იყოს, იმასაც არ შეირთავს. ნასწაველი ქალი უნდა ნასწაველ კაცს. . . თამარმა კი სთქვა, სწავლას რა უნდა ამდენიო, ხუთ წელიწადში საშუალო ცოდნას მიიღებო, მაგრამ... მართლაც რა უნდა ამდენი, დრო და საშუალება თუ დაგირჩა კაცს. . . მერე? ნაილეს დროც

აქვს და საშუალებაც. რომ უთხრას ანდროს, ხვალვე გაგზავნის თბილისში. იქ კი თამარი, ქეთო და ამხანაგები დაეხმარებიან. მართლა, იქ არ არის ცეკა?!. ყველაფერს მოუწყობენ. ახლაც ეხვეწეს დარჩიო, მაგრამ მურადი ვერ გამოუშვა მარტო. . . რალაც იღუმალი ძალაც იზიდავდა ანდროსაკენ... არა, სიყვარული სრულიად არ იყო ის. . . ისე, შეჩვევის მიზეზია. . . შეეჩვია ახალგაზრდა კაცს და ენატრება მისი ნახვა, თორემ... შეყვარებაზე ხომ არც კი გაუფიქრნია... როდის ჰქონია უფლება აქარელ ქალს თავისუფალი სიყვარულისა? ვისაც მიათხოვებდნენ, ის იყო მისი შეყვარებულიცა და ყველაფერი თამარმა, თამარმა ჩაუწვთა ყურში და შეიძლება განგებ, ან იხუმრა იქნებ. მაგრამ ნაილეს გულში თითქო ფესვები გაიდგა და თანდათან ძლიერდება. . . ჩემი რძალი უნდა გახდეთ. ახლაც ესმის თამარის ხმა.

ვითომ რა იქნება ასეთი? მუსლიმანებს ხომ მოყავთ სხვა სარწმუნოების, სხვა ტომის ქალები?.. რა დროს სარწმუნოებაა. აქ სარწმუნოება არაფერ შუაშია. ნაილე ასეთ რამეს ანგარიშს არ გაუწევს. ნუ გეშინია, მშობლები არ ყავდეს, რომ დაუშალონ. მურადი კი სრულიად არ წავა დის სურვილის წინააღმდეგ. . . სწავლა ყოველთვის შეიძლება, ოცდასამ წლამდე რომ ისწავლოს, მაინც საკმაო ცოდნას მიიღებს და შემდეგ...

უჰ, რას ამბობს. როგორ ტყუილად ფიქრობს განუხორციელებელ ამბავზე. ანდროს რომ ცოლის შერთვა უნდოდეს... რამდენი ლამაზი ქალია თბილისში... თამარის ამხანაგები რომაა. რა კობტად დადიან, რა სიტყვა-პასუხი აქვთ, როგორი საქციელი. რამდენ ენაზე ლაპარაკობენ, როგორი ჩაცმულ-დახურული არიან. დაკრიპლებული ფრჩხილები და სანთელივით ჩამოქნილი თითები... თუმცა თითები არც ნაილეს აქვს ცული.

ბევრს მოეწონა ქალაქში მისი გრძელი თითები და შავი თვალ-წარბი. რამდენჯერ შეაქვს, მაგრამ... სად ისინი და სად ნაილე. მათ ყველაფერი კარგი აქვთ. კარგი. რომ არ იყვნენ, ისე არიან მოვლილი, რომ მაინც ლამაზა და მიშხიდველი მოსჩანან.

კიდევ ჩაეფლო წელამდე თოვლში. ახლა თვითონ გაუწოდა ხელი ანდროს და როცა ვაგის ხელის მოკერა იგრძნო, თითქო არაქათი გამოეცალა და მუხლები მოეკვეთა. ძალას აყვა, ვაგის ხელის ძალას, რომელმაც ის ასწია ზევით.

— ხშირად ეცემი ნაილე, — ანდროს ხმაში გაბზარული ზარის ხმა იყო. ნაილეს კი არც ასეთი ხმა დარჩენოდა საპასუხოდ. მარტო გული ძვრდა უჩვეულოდ და ის ძვერა ისე ძლიერი იყო, რომ ანდროსაც ესმოდა.

მაინც საჭირო იყო გალაპარაკება.

— ფეხსაცმელები სრიალებენ. ნაყინავი თოვლია ქვეშ და,—
კიდევ წაიფორხილა, მაგრამ ანდრომ სწრაფად წააელო მკლავში
ხელი და შეაკავა.

ილიაში ვაჟის ხელის გათამაშებამ უცნაური ძალით დაიბ-
რინა მთელ ტანში. მუხლები მოჰკვეთა და თავზე ცხელი წყალი
გადააელო.. ძალადაკარგული ჩამოეკიდა ვაჟის მკლავს და სიბნე-
ლეში რამდენიმე ნაბიჯი გადადგა ისე, რომ ანდროს ხელი ილია-
ში ჰქონდა. ქალაქში ნაილეს ბევრი ქალ-ვაჟი დაუნახავს ასე მიმავა-
ლი. ერთხელ ახალგაჯობილმა ახალგაზრდამაც შეაშველა ხელი
ნაილეს, როცა ისინი თეატრში კიბეზე აღიოდნენ, მაგრამ ნაილე
შველივით გაუხტა განზე. ხელისხელ ის მხოლოდ თამარს გაყვა რამ-
დენჯერმე და მაშინ ისწავლა, რომ ასეთი სიარულის დროს საჭიროა
ერთნაირად ადგამდნენ ფეხებს ორივენი. ქალაქში არავის გაუკვი-
რდება, მაგრამ აქ რომ ვინმემ ხელიხელგაყრილი დაინახოს, ვინ
იცის რა მოხდება... თუმცა ახლა ბნელა და. მერმე რა ტკბილია
ასე სიარული. ნეტავ ასე ატარა რამდენიმე წუთს კიდევ... წუთს კი
არა, წლები ატარა ასე.

ანდროს ტანშიაც უცნაური ცეცხლი აგუზგუზდა, მაგრამ მას
მაგარი სადავე უკირავს ხელში. ყოველთვის შეუძლია გრძნობების
ალაგმვა და ახლაც ისე მოიქცევა... გაიყვანს ნაილეს მშვიდობიანად,
ხელის მოკიდება ხომ დასაძრახი არაა. ანდრო ხშირად მოქცე-
ულა ასეთ შემთხვევაში ასე, მაგრამ აქ რაღაც სულ სხვა რამეა.
გულიც უფრო ძლიერად სცემს და ხელებიც თრთის ზედმეტად,
თითქო სიცივემ აიტანაო. თუმცა სხეული ზედმეტ სითბოს გრძნობს.

ალაგეს მიადგნენ. ეზოში უნდა ჩასულიყვნენ და ანდრომ ხელი
გაუშვა ნაილეს. შეუხტა ალაგეზე, გადავიდა და ნაილეს წამოეშველა.
ნაილემ ცალი ფეხი შესდგა ალაგეზე, შემდეგ მეორე უნდა აეტანა,
რომ უეცრად ორივე დაუსხლტა და მეორე მხრიდან მოშველებულ
ანდროს ხელებში გაეხვია.

წამით ქალვაჟის გულმკერდი ერთმანეთს შეხვდნენ და ეს
წამი მთელი საუკუნის სიცოცხლეს. შეედრებოდა. ორივემ სცადა ამ
ძვირფასი წამის გახანგრძლივება, მაგრამ ვერ შესძლეს, უფრო კი
ვერ გაბედეს, ხოლო როდესაც სახლის კიბეზე აღიოდნენ, ანდრომ
ისევ ხელმოკიდებული აიყვანა ნაილე და როცა ერთმანეთთან ისე
ახლოს მოემწყვდნენ, ვეღარ გაუძლეს გრძნობების დაწოლას. უფრო
და უფრო დაუახლოვეს სახე და... ტუჩები თავისთავად შეეწებნენ
ერთმანეთს. რომელმა გადადგა პირველი ნაბიჯი, ვერ გაეგოთ,
ანდრომ თუ ნაილემ... რომ გეკითხნათ, რომელი გამოდგა ასეთი
გამბედავი, ქალი თუ ვაჟი,—ვერ გიპასუხებდნენ. ორივე ერთად აფე-
თქდა და...

ღამე იყო, სიბნელე, და მათი კოცნაც დაუნახავი ღარჩა.

მკრთალი შუქი ანათებდა პატარა ოთახს. კუთხეში მიდგმულ ტახტზე ადამიანის გაცრეცილი სახე მოსჩანდა. იქვე სკამზე მოხუცი მუჰამედი იჯდა და ღრმა ფიქრებში წასულიყო.

ანდროსა და ნაილეს შესვლაზე მოხუცი წამოიწია ასადგომად, გაცრეცილი სახე კი უფრო გაიცრია და შეხვეული თავი შეინძრა ბალიშზე.

ანდრო მივიდა მწოლარესთან. დააცქერდა და ხელი დაადო შუბლზე. — ვკვდები, — ძლივს წარმოსთქვა ავადმყოფმა, — ვკვდები და ამ დროს შენი ნახვა მომინდა, — ააცმატურა ტუჩები და ცალი თვალი უფროდაუფრო გააღო.

ანდრომ არ იცოდა რა ეთქვა ამ კაცისთვის. ენუგეშებინა თუ ხელი ჩაეჭნია და ეთქვა, ძალი ძალღურებ უნდა მოკვდესო. ბანდიტი, მძარცველი, კაცის მკვლელი, რა ღირსია შებრალებისო. მაგრამ ამ დროს გული რაღაც სიბრალულს მაინც გრძნობს. მიტომ იყო, რომ იმ დღეს, ვინც დაიჭრა და ვისი გაგზავნაც შეიძლებოდა, ანდრომ ყველა გაგზავნა მაზრის საავადმყოფოში. უაჭიმებენ, მოუვლიან ისე, როგორც ჩვეულებრივ ავადმყოფს, მოარჩენენ და შემდეგ სასამართლომ დასდოს მსჯავრიო. ამასაც გააგზავნიდა, მაგრამ აღარ შეიძლებოდა, ძალიან მძიმედ იყო დაჭრილი და არჩიეს, გზაში სიკვდილს, ბარემ აქ მოკვდესო..

მაინც უვლიდნენ და პატრონობდნენ. ასმევდნენ და აქმევდნენ, თუმცა ყველაფერი უქმი და ურგები იყო მისთვის.

— დიალ, ვკვდები, ანდრო ბერტაძე, და ბედნიერი ვარ იმით, რომ შენ გხიდავ ამ უკანასკნელ წუთებში. დიალ შენ. პირველად ცხოვრება რომ დავიწყე, შემხვდი, როგორც მოპირდაპირეს — ენა მოისვა გამხმარ ტუჩებზე და ისევ განაგრძო: — ბედნიერი ვიყავი მაშინ, კმაყოფილი... და მეგონა, რომ ქვეყანა ჩემი იყო. შენ და შენს ბედში მყოფ ადამიანს ადამიანად არ ვთვლიდი. გახსოვს, ერთხელ რომ გაგარტყი? რა გიკვირს? ნუთუ ამდენხანს არ გიცენივარ. დიალ, დიალ, გივი ნიახურიძე გახლავარ! მეგონა მიცანი. მე კი პირველი შეხედვისთანავე გიცანი. ვიცოდი აქ იყავი. მართალი გითხრა, ძალიან მინდოდა შენახე. ასე სისხლგამოლეულს, ასე დაცემულს კი არა, ჯანლონით სავსეს. რატომ მინდოდა არ ვიცი. მეჯავრებოდი თუ შენი ბედი შემშურდა, ვერ გეტყვი. საზღვარგარეთ ერთი წელი ძლივს გავეძელი. ვერ შევეგუე უცხო ქვეყანას, უცხო ზნე-ჩვეულებას. იქაურობა მომეჩვენა დიდ საროსკიპოდ, სადაც ადამიანს მხოლოდ ქონებით აფასებენ. წინათ მეც ისეთი აზრისა ვიყავი. მეც ქონებით ვაფასებდი ადამიანს, მაგრამ ალბათ იმიტომ, რომ ქონება მქონდა. ქონება... რა სასაცილოა... იმდენი ქონება კი თურმე არაფერი ყოფილა... მე ქვეყნები ვნახე, მე ხალხი ვნახე, მე ცხოვრება ვნახე და... რომ ზედმეტი

თავმოყვარეობა არ გადამლობებოდა წინ, გადაეწყვიტე მოესულიყავი, მეღიარებინა ჩემი დანაშაული და მიმელო სასჯელი. რა სასტიკიც არ უნდა ყოფილიყო ის სასჯელი, ჩემთვის მაინც ყველაფერს აჯობებდა... ერთი წყალი მასვი...

ანდრომ მიაწოდა წყალი.

— დიად, იმას ვამბობდი. ბედნიერი ვიქნებოდი რაც უნდა სასჯელი მიმელო, მაგრამ ასეთი ყოფილა ჩემი ბედი. ყაჩაღებს აყვევი და ახლა შენც ხედავ, სანამღე მივალწიე... შენ გამარჯვებული გამოხვედი. წინადაც ვგრძნობდი, რომ გაიმარჯვებდი. ეს აუცილებელი იყო. ისე უგუნური კი არ ვყოფილვარ, რომ არ მიემხდარიყავი. ვიცოდი, რომ გაზაფხულის მოსვლას ვერაფერი შეაჩერებდა, მაგრამ მეგონა, რომ ჩემი სიცოცხლე მაინც გაივლიდა ისე, როგორაც ის დაიწყო. მოვტყუილდი.—კიდევ მოითხოვა წყალი, მოსვა, ოდნავ უფრო ასწია თავი და ამოიოხრა—დარწმუნებული ვარ მაპატიებდი ყველაფერს და მაკოცხლებდი, რომ ჩემი მოსამართლე ყოფილიყავი, მაგრამ ახლა შენმა ნასროლმა ტყვიამ შენს სამართალსაც დაასწრო და შენს გრძნობებსაც... იმიტომ გიხმე, რომ ეს სიტყვები მეთქვა შენთვის. მეგონა მიცანი და რომ არ შეიმჩნიე, გამიკვირდა...

დადუმდა... რამდენჯერმე მიმოავლო თვალი იქაურობას და ნელნელა გადააჰკიდა თავი.

— კვდება,—ფრთხილად სთქვა მუჰამედმა და ანდროს შეხედა.

ანდრო უძრავად იდგა. მის თვალწინ აშლილიყვნენ მოგონებები ფერადფერადი და ნაირნაირი. ბრძოლები, დამარცხებები და ბრწყინვალე გამარჯვებები, რომელთა წყალობით ქვეყანა თავისუფალ და ბედნიერ ცხოვრებას ეწევა. ის კარგა ხანს იდგა უძრავად მტრის გაციებულ გვამთან და არ იცოდა. ცრემლი მართებდა ამ დროს თუ მხიარულება და ღიმილი.

— ამხანაგო ანდრო, ერთხელ შენ გვიამბე, რომ როცა მუშების ცოლშვილს ხოცავდნენ, ხალხის მტრები ხარხარებდნენო.—დაბალი ხმით უთხრა ნაილემ გამოურკვეველ მდგომარეობაში მყოფ ანდროს.

— მართალია,—მიუგო ანდრომ და გაუკვირდა, რაზე დასკირდა ამ სიტყვების მოგონებაო.

— მტრის დამარცხება კი ჩვენ უნდა ვიზიემოთ,—უთხრა უფრო თბილად, ახლოს მივიდა და მხარზე დაადო ხელი.

— დიად, გამარჯვება უნდა ვიზიემოთ,—მტკიცედ მიუგო ანდრომ და გადახედა მოხუც მუჰამედს, რომელიც მიცვალელებულს თავს უსწორებდა.

შეიცვალა ნაილესა და ანდროს დამოკიდებულება იმ საღამოს შემდეგ. თამამი და მოუკრიდებელი ნაილე თითქო დამორცხვდა, უფრო ერიდება ანდროს თვალების გამოხედვას, ლაპარაკშიაც მოკრძალებულია, მაგრამ გულში კი უფრო ახლოა ამ ადამიანთან და უფრო შინაური.

იმ ღამის შემდეგ ისინი ისე მარტოდ არ შეხვედრნიან ერთმანეთს, ისეთ მდგომარეობაში არ მოხვედრილან და ამიტომ თითქოს აღარც კი სჯეროდათ, რომ ის ფაქტი ნამდვილად მოხდა მათ შორის. ერთმანეთის დანახვისას მოაგონდებოდათ და ისე გაუწითლდებოდათ სახე, რომ გამოცდილი თვალები მათს თვალებში დამნაშავეს გამოიცილობდა.

მურადმაც შენიშნა რაღაც სხვაგვარი დამოკიდებულება. მართალია, ნაილე არაჩვეულებრივ მორცხვობას იჩენდა და ერიდებოდა ანდროს, მაგრამ ხშირად ჩუმად და ქურდულად შეაპარებდა თვალებს ახალგაზრდა კაცს და თუ იქიდან მოპირდაპირე გამოხედვა წამოეპარებოდა, უცებ მოწყვეტდა ცქერას და სხვა საგანზე გადაიტანდა.

ანდროც გრძობდა ამ ქალისადმი განსაკუთრებულ მიდრეკილებას. მოსწონოა. იმ საღამოს შემდეგ უფრო შეიქრა მის გულში ნაილეს სიყვარული, მაგრამ ამის გამომჟღავნება არ უნდოდა. უხერხულიც იყო... პირველ ხანებში კიდევაც ქორიკანობდნენ ზოგიერთები, დელი მურადისას იმიტომ დაბინავდა, რომ ნაილე უნდა მოატყუოსო, ნამუსი ახადოსო, მაგრამ ანდროს საქციელმა და თავდაპერილობამ ენა ჩაუგდო მათ. ახლა მას ბევრი ახალგაზრდა ქალთაგანი არ ემალებოდა. არ მიაჩნდათ ცოდვად არც სირცხვილად. დალაპარაკებოდნენ მას. არა მარტო მას, არამედ, საერთოდ, მამაკაცებს. ბევრი ქალი დადიოდა კრებაზე, გამოდიოდნენ სიტყვებით, ასრულებდნენ დავალებებს, უმეგობრდებოდნენ, უახლოვდებოდნენ ერთმანეთს და ერთ დღეს წარმოდგენაც კი დადგეს სოფლის სკოლაში.

ზამთარი ნელნელა მიდიოდა. სოფელი ცოცხლდებოდა და მზეც მატულობდა ძალას, მაგრამ ჯერ კიდევ ყინვები იყო, მეტადრე საღამომობით, როცა დასავლეთის ქარი ამოიქროლებდა და ყინვების სუსხს ამოიტანდა.

გრძელმა ზამთარმა გააჭირვა საქმე. მეტადრე პირუტყვის კვების საკითხი იყო ცუდად. გლეხები დილაადრიან წავიდოდნენ ტყეში, დაქრიდნენ წყავის, ბაძვის და შიქრის ტოტებს და მოქონდათ. დამ-

შეუღლი პირუტყვი ღეროებიანად სკამდა ამ მისთვის არასასამონი. საკმელს, რომელსაც ხედა დროს კბილსაც არ შეავლებდა.

უგზობა უფრო უშლიდა ხელს სოფლებს და ძნელებდა მიმოსვლას. ახლა უკვე შეჩვეოდნენ გაზეთების მიღებას, ახალახალი ამბების გაგებას და ფოსტის მოუსვლელობა აწუხებდათ. მეტადრე ახალგაზრდები სწუხდნენ. ხშირად მიდიოდნენ ფეხით მაზრაში და მოჰქონდათ ჟურნალ-გაზეთები.

უკვე აღარ იყო საჭირო აგიტაცია გზის გასაყვანად. ყველა მზად იყო, აღნებოდა თუ არა თოვლი, მაშინვე შედგომოდნენ მუშაობას. იმ ამბებმა და გამოცდილებებმა, ხალხს თვალი აუხილა, დაანახვა მტერ-მოყვარე და სწორ გზაზე დააყენა. რამდენიმე ახალი წევრი მიემატა კომკავშირს. კომპარტიის რიგებში შესასვლელადაც შეიტანა ზოგიერთმა ღარიბმა გლეხმა განცხადება და სკოლაშიაც აღარ უშლიდნენ ბავშვებს სიარულს.

სოფელი თითქო ახლა გაშენდა აქ და ნამდვილი ცხოვრება დაიწყო.

ანდრო კმაყოფილი იყო. ის ხედავდა შესამჩნევ გარდატეხას. ათიოდე ახალგაზრდა ყავდა გაგზავნილი მოსამზადებლად კურსებზე, თუ სასწავლებელში, ზოგი ხულოში, ზოგი ბათუმში და ახალი კადრების მოლოდინში უფრო გაცხოველებულ მუშაობას აწარმოებდა.

ყოველდღე მოდიოდნენ მთხოვნელები, რომლებსაც შეიღის გაგზავნა უნდოდათ ქალაქში, რომელიმე სასწავლებელში, ან კურსებზე. ზოგი თვითონ თხოულობდა სწავლას. მათ შორის ნაილეც იყო, მაგრამ მას ჯერ კიდევ ვერ გაეპედნა ანდროსათვის ამის თქმა. იმ შემთხვევის შემდეგ მაინც სულ დაება ენა. ანდროს თვითონ უნდოდა ეთქვა გაგზავნილი, მაგრამ ჯერ დროც არ იყო. ქალების გაგზავნას ასე შორს კიდევ ერიდებოდნენ. ამას გარდა, ნაილე აქაც საჭირო იყო, როგორც საუკეთესო ორგანიზატორი და ქალებში საკმაოდ კარგი გავლენის მქონე.

ერთ საღამოს კრებიდან ერთად დაბრუნდნენ ანდრო, მურადი და ნაილე. უკვე მოახლოებული იყო გაზაფხული. აქა-იქ ლილოკრელი მოსჩანდა მთებზე. სოფელში კი თითქმის სულ აღარ იყო თოვლი. ფერდებჩაცვნილი პირუტყვი ბანცალით დადიოდა შუკაში და ნედლ ფიჩხს ავლებდა პირს.

ვახშამი ჩვეულებრივ წინასწარ ჰქონდა ნაილეს გამზადებული და ერთად ივახშმეს.

ნავახშმევს ანდრო თავის ოთახში გავიდა და სამუშაოს მიუჯდა ჩვეულებრივ. მურადი ისევ საბჭოში წავიდა. ის თითქმის აღამებდა და ათენებდა იქ. რაღაც გეგმებს ადგენდა, სწერდა, გლეხებს ესაუბრებოდა, კითხულობდა და, ერთი სიტყვით, გვიან ღამემდე არ მოდიო-

და დასაძინებლად. მალე, ძალიან მალე მოიხვეჭა სახელი და შეიქმნა ავტორიტეტი. ახალგაზრდა თავმჯდომარე მთელი სოფლისათვის საყვარელი ხელმძღვანელი გახდა.

მარტოდ დარჩენილი ნაილე, ათასნაირმა ფიქრებმა გაიტაცა. მისი ცხოვრება საკმაოდ შეიცვალა სულ მოკლე ხნის განმავლობაში და ეს ცვლილებები მისთვის შეუმჩნეველი არ დარჩენილა.

ქალაქში ყოფნამ, იქაური ხალხისა და ცხოვრების გაცნობამ მასში კიდევ სულ სხვა და ახალი სურვილები გააღვიძა.

წინათ, ქვეყანა იქ თავდებოდა ეგონა, სადაც ცა იყო მიმაგრებული მზაზე და იმ მთის გადმოღმა აქარის წყალი მოჩსრიალებდა.

ახლა კი...

რამოდენა ეჩვენა ბათუმი. რამდენი დიდი სახლი იყო, რამდენი მანქანა და გემები, რამოდენა ზღვა... რა დიდი ყოფილა ქვეყანა... გაუქვირდა რომ უთხრეს, თბილისში არიან დიდი სპეციალისტები, დიდი ქალაქია თბილისიო.

მართლაც რა ყოფილა. მგონია ერთი თვე ვერ დაივლის კაცი. რამდენი ხალხია და რამდენი სახლი.

მოსკოვი უფრო დიდიაო... ნეტავ თუ მართლა. თბილისზე დიდი?!. როგორ აკვლევს ადამიანი გზას? ✓

ყველგან ასეთი ქალაქები, ასეთი ცხოვრება და აქ კი, მთის ძირში მიქობვილი სოფელი, გზა არა აქვს და კვალი. შუქი და ნათელი...იქ ღამეც ღლესავით იყო განათებული.

ნაილეს თითქო გული შეუღონა საკუთარ სოფელში სამუდამოდ დარჩენაზე გაფიქრებამ.

ქალაქი სჯობია. იქ, სადაც მუდამ სიცოცხლე და მოძრაობაა, სადაც არ არსებობს სიბნელე და ღამე, არასოდეს არაა მყუდროება და სევდის მომგვრელი ნისლი.

ნეტავ რამ აიძულა ანდრო ისეთი ქვეყნიდან წამოსულიყო? აქ გაზეთი ენატრება წასაკითხად, იქ კი ყოველ საღამოთი თეატრებში შეუძლია იაროს, ტრამვაითა და ავტომობილებით ისეირნოს, სუფთად ჩაიცვას და დაიხუროს.

პარტიამ მიბრძანაო... ჰო, რახან პარტია უბრძანებს, რა გაეწყობა... მაგრამ ძნელი კია ისეთი ადგილის მოცილება.

თანდათან შედის ნაილე ფიქრებში და თავისთავს ეკამათება.

ანდრო მართალია... მას პარტიამ უბრძანა. მაგრამ ასეც რომ არ იყოს, ნასწავლი კაცი სოფელსაც ხომ სჭირდება. აი, რამდენი საქმე გაკეთდა მას შემდეგ სოფელში, როგორ გამოიცვალა ყველაფერი... თუ ასე წავიდა საქმე, სოფელშიც არ იქნება ცუდი საცხოვ-

რებელი... გზას რომ გადაკეთებთ, მანქანები მოვლენ და იმით ვივლით ბათუმამდეთ, ანდრო ამბობს. საშუალო სასწავლებელი აქვე გვექნებაო. კინო-თეატრებს მოვაწყობთო, კლუბსაც ავაშენებთო.

მართლა თუ ეს ყველაფერი გაკეთდა...

„თუ“ რად უნდა ამას. ხომ კეთდება ყველაფერი.

ნაილეს კი მაინც რაღაც სხვა აწუხებს. ნუთუ იმით უნდა დამთავრდეს ყველაფერი. მხოლოდ ერთი... მოაგონდა ის ღამე... თოვლიანი ღამე და კიბეზე ასვლა.

ნეტავ რას ფიქრობს ახლა ანდრო? ნაილეს ყურები აეწვა. როგორ მოხდა, რომ ორივენი ერთმანეთს ისე მოულოდნელად, ყოველგვარი წინასწარი მოფიქრების გარეშე...

არაფერი არ ახსოვს ნაილეს, როგორ მოხდა. მხოლოდ ის წუთი ჩარჩენილა მის გულში ამოუშლელად. სხვა არაფერი იცის.

— ნაილე გძინავს?— მოესმა კარებიდან ამ დროს.

— არა... ათრთოლებული ხმით გაეხმაურა ის, მივიდა და კარები გააღო.

— ბოდიში, ნავთი გამოლეულა ლამპაში და თუ დამავალებთ... სამუშაო მაქვს თორემ არ შეგაწუხებდით,— და კარებიდან მიაწოდა ლამპა ანდრომ.

— ჩემი სიკვდილი. დამვიწყებია,— სწრაფად გამოართვა ნაილემ ლამპა, მიბრუნდა და ნავთის ჩასხმას შეუდგა.

განგებ აგვიანებდა. უნდოდა ანდროსთან რაიმე საგანზე საუბარი გაეხატა, მაგრამ როგორღაც თავისთავს ამჩნევდა, რომ ლაპარაკის დაწყების შეძლება აღარ ჰქონდა, ისე ძლიერად უცემდა გული.

ანდრო კარებთან იცდიდა. თამბაქოს აბოლებდა და თან ნაილეს მიჩერებოდა.

— მე შემოგიტანთ ოთახში, ხელებს დაგისვრის,— და უნდოდა ნაილეს გაეტანა, მაგრამ ანდრომ მაინც გამოართვა და მადლობა გადაუხადა.

— მადლობა რა საჭიროა,— ღიმილით შეხედა ნაილემ და თვალებიდან თითქო ნალვერდლები გადმოუცვივდა.

ანდრომ უსიტყვოდ გაუღიმა, მიბრუნდა, თავის ოთახის კარებთან მივიდა და ნაილეს მოუხედა.

— თამარს წერილს ვუგზავნი. რას შეუთვლი?

— თამარს? მოკითხვა. ძალიან დიდი მოკითხვა... მაგრამ მე თვითონ მივწერ. ამალამვე დაწერ, — ღია კარებში გაჩერდა ნაილე.

— შენ თუ მისწერ, უკეთესი იქნება. იცი რა, მოდი შენ მისწერე ყველაფერი რაც მოხდა. არ შეაშინო კი...

— მივსწერ... საწერკალამი უნდა მათხოვო,— საშინლად აუძგერდა გული და ტანში ქრუანტელმა დაუარა.

— ინებეთ,—უთხრა ანდრომ და ოთახში შევიდა.

ნაილე ცოტა ხანს იდგა კარებში. თითქო ვერ ბედავდა ფეხის გადადგმას. შემდეგ დასძლია და ანდროს ოთახის კარებთან მივიდა.

— მობრძანდით,—უთხრა ანდრომ და თვითონვე შეატყუო თავს, რომ რალაც უცნაური ემართებოდა.

ნაილე ფრთხილად შევიდა. მაგიდასთან მივიდა, უნდოდა საწერკალამი აეღო, მაგრამ ხელები გაუჩერდა.

ანდრომ თვალები აარიდა ახალგაზრდა ქალს. წიგნი აიღო და მეორე ადგილას გადადვა. თითქო ამით უხერხულობიდან გამოვიდა. არასოდეს არ ჩავარდნილა ის ასეთ მდგომარეობაში. ნაილე ხშირად შესულა მასთან, სადილი ან საუზმე შეუტანია. ის ღამე, მურადი რომ ცუდად გახდა, სულ ერთად გაატარეს, ერთად იჯდნენ, ერთად გაათენეს, მაგრამ ერთმანეთისადმი ასეთი მორიდება და შიში არ ჰქონიათ, ახლა კი...

— კარგი წერა რომ არ ვიცი,—თავი დახარა და ისე ჩაილაპარაკა ნაილემ,—თამარი ნასწავლი ქალია და... დამცინებს.

— მერე რა. შენს ნაწერს მშვენივრად წაიკითხავს,—ახლა უფრო გათამამდა ანდრო.

— კი, მაგრამ.. რა კარგია, რომ მეც ნასწავლი ვიყო.—სიწითლე შეეპარა სახეზე.

— ძალიან გინდა სწავლა?

— ნეტავ შეიძლებოდეს... ნასწავლი რომ ვიყო..—და მორცხვად გახედა ანდროს, რომელიც უმიზნოდ ატრიალებდა ხელში რალაც წიგნს.

— ვითომ რა იქნებოდა?

— რა იქნებოდა?...—ცოტა სიჩუმის შემდეგ ჩაილაპარაკა ნაილემ,—კარგია, ქალაქში ვიცხოვრებდი, ქვეყანას ვნახავდი. ცხოვრებას გავიცნობდი. სულ სხვაა ქალაქის ცხოვრება...

— ასე გგონია?

— ასეა. აბა მე რა ვარ. ამ ტყეში დავიბადე და აქ უნდა მოკვდე.. შენს ადგილას რომ ვიყო, აქ არ გავჩერდებოდი... ძნელია ასეთ ადგილას ცხოვრება...

— მართალია, მაგრამ ჩვენ აქაც გავხდით ცხოვრებას საამურს. ისე მოვაწყობთ ყველაფერს, როგორც ქალაქებშია. ყველაფერი გვექნება. აი ნახე, მომავალ წელს როგორი გზა დავვირჩეს, როგორი სკოლა ავაგოთ, კლუბი გავხსნათ, კინო-წარმოდგენები გავუშვათ. მაშინ ეს სოფელი ბევრად ემჯობინება ქალაქს. ასეთი მშვენიერი ბუნება სად არის ქალაქში.

— მოგწონს აქაურობა?

— რატომაც არა. როცა ყველაფერს მოვაგვარებთ, აქ ცხოვრება ნეტარება იქნება.

ნაილემ ღიმილით შეხედა ანდროს.

— დარჩები ჩვენში საცხოვრებლად?—კითხა მან და უფრო წამოუწითლდა სახე.

— თუ საჭირო ვიქნები...

— შენისთანა კაცი მუდამ საჭიროა.

ანდრომ ჩაიციხა.

— მალე ჩემზე უკეთესი ძალები ეყოლება ამ კუთხეს. როგორ გგონია, მურადი ცუდად ერკვევა საქმეში? ცოტა მომზადება კიდევ და საუკეთესო ხელმძღვანელი იქნება.

— შენ ხომ მაინც დარჩები? საჭირო ხარ. შენ რომ არ ყოფილიყავი, ისე კი არ გაკეთდებოდა საქმე.—თავდახრილი ლაპარაკობდა ნაილე.

ანდრომ ხელი ჩაიქნია.

— ეს არაფერია. ჩვენს პარტიას ასჯერ ჩემზე უკეთესი მუშაკები ყავს. მე არ ვიქნებოდი, სხვა იქნებოდა. პარტია თავის ხაზს მაინც გაატარებდა, როგორც ჩემი საშუალებით ატარებდა და ატარებს ამ სოფელში. მე კი შემოდგომამდე დაერჩები და შემდეგ ისევ უნდა განვაგრძო სწავლა...

— სწავლა?—გაიკვირვა ნაილემ.

— მაშ.

— შენ სწავლა უნდა დაიწყო?! შენ?!..

— მერე რა!

— რა უნდა ისწავლო კიდევ? ამდენი წიგნები წაგიკითხავს. იმდენი იცო. კიდევ რა გაქვს სასწავლი?

ანდრომ გულიანად გადაიხარხარა.

— ჯერ სადაა ჩემო ნაილე, სწავლას ასე ადვილად დაასრულებს ადამიანი? სწავლა სიკვდილამდევო, ამბობს ჩვენებური ანდაზა.

— მე კი მეგონა, რომ... რად გინდა ამდენი სწავლა?... რა კარგია, რომ. მეც მინდა ვისწავლო, მაგრამ... თავი დახარა და თვალები ცრემლებით ავესო.

ანდრო თანაგრძნობით მისჩერებოდა ამ უმანკო არსებას, აქაურ ბუნებასავით სპეტაკსა და ჯანსაღს, სიცოცხლით სავსეს, ჯეირანივით მარდსა და შევლივით დაუდევარ ადამიანს. უცქერდა და თან ფიქრობდა იმ მშვენიერსა და ლამაზ მომავალზე, რომლის შექმნას ის ნაილესთან ერთად აპირებდა.

კარგა ხანს სდუმდნენ. ანდრო ნაილეს მისჩერებოდა, ნაილე მაგრადს დაყურებდა თავდახრილი და ლამაზ აითებებს თავისდაუნებურად ათამაშებდა.

ბოლოს ისევ ანდრომ დაარღვია მყუდროება. მივიდა, ხელი მოჰკიდა ქალიშვილის ხელს და ფრთხილად ასწია ზევით.

ნაილეს თავი არ აუღია, ისე ააყოლა ხელი ვაჟის ხელს.

ანდრომ მეორე ხელი მიაშველა. ორივე ხელებით აწეული ნაილეს ხელი ტუჩებთან მიიტანა და მაგრად, ძალიან მაგრად აკოცა. ნაილე შეკრთა. თითქო ელდენი შეიუერთდა მის სხეულს. გული კინაღამ ამოვარდა ზევით.

— რას შვებები! — ძლივს ამოიძახა შან, მაგრამ თავის აწევა და პირდაპირ შეხედვა მაინც ვერ გაბედა. გაუწითლდა ლოყები, თვალემა თიოქოს სინათლე დაკარგეს და სხეული თრთოლვამ აიტანა.

ორივე სხეულში მთის ნაკადულივით აჩქეფდა სისხლი და ძარღვებში დაირბინა.

ორივე დაიმორჩილა უხილავმა, მაგრამ ყველაზე ძლიერმა გრძნობამ და ერთ ადგილას გაყინა წუთით.

ქალი ისევ თავდახრილი იდგა, მაგიდაზე დადგმულ სამელნეს მისჩერებოდა და უყურებდა მას, თითქო ყველაფერი რაც ქვეყანაზე ხდება, იმ სამელნეში ყოფილიყოს მოთავსებული.

ანდროს ქალის ხელი ეპირა ხელში. ხან ლამაზად ჩამოქნილ თითებს დააცქერდებოდა, ხან ნაილეს აწითლებულ სახეს გახედავდა, ხან თავდახრილ ქალს ზემოდან ბეჭებზე და კისერზე ჩამოშლილ თმაზე დაყურებდა.

ცქერამც ვერ დააკმაყოფილა გრძნობა: ვერც თვალემა გააძლო მშვენიერი ასულის ეშხმა, ვერც ხელებზე კოცნამ ამოიტანა ტუჩებიდან დამამშვიდებელი სიტკბობემა, ვერც ერთმანეთთან ახლოს სუნთქვამ გააძლო გული და ვერ დაამშვიდა სხეული.

ანდრო ნელნელა დაიხარა. ფრთხილად მოხვია ხელი სრულიად აცახცახებულ და ათრთოლებულ ნაილეს, მაგრად ჩაიკრა გულში და მხურვალე ტუჩებით ქალის ტუჩებს ჩაეწემა.

ნაილეს ძალა გამოელა. მუხლები მოეკვეთა. თითქოს საწამლაე მიიღო მისმა სხეულმა ვაჟის ტუჩებისაგან. მოწყდა, მოეშვა და ანდროს მკერდზე მიესვენა.

ორიოდე წუთის შემდეგ მოვიდა გონზე, ფრთხილად მოიცილა ვაჟის ხელი, თავი გაინთავისუფლა და კარებისაკენ გაიქცა. ცოტა ხანს დაიცადა კარებთან თავდახრილმა, შემდეგ სახეალეწილი და დაომრცხვებული მობრუნდა, გვერდი აუარა ანდროს, მივიდა მაგიდასთან და საწერკალაში აიღო.

ანდრო კიდევ მივიდა მასთან, ხელები დაუქირა და თვალემაში ჩახედა.

— წერილს ნულარ სწერ. ორ დღეში თვითონ გაემგზავრები თბილისში, ისწავლი, — დაბალი, დამარწმუნებელი ხმით უთხრა და გაუღიმა.

ნაილემ დიდრონი თეალები შეანათა მას და გაკვირვებით მი-
აჩერდა.

— ყველაფერს ეტყვი თამარს, ის როგორც საჭიროა, ისე მო-
იქცევა. მე ხშირად გნახავ. შეგიძლია მურადსაც გააცნო ჩვენი და-
მოკიდებულნება. ჩვენი სიყვარული ურყევი იქნება ნაილე—და ვაჟმა
ქალის ხელებს მაგრად მოუჭირა ხელები.

ნაილემ ღიმილით ახედა ანდროს და თავისი ტუჩები ერთხელ
კიდევ შეაგება ვაჟის ცეცხლოვან ტუჩებს.

თ ა ვ ი მ ე რ ვ ე

I

ბაჩალიბული მუშაობა იყო გზაზე. ამტვრევდნენ ქვეებს, აფეთქებდნენ კლდეებს, გაჰქონდათ მიწა და ზვინავდნენ გზას. მთელი გაზაფხულის ტანმავლობაში მუშაობდნენ და რამდენიმე კილომეტრი ახალი გზა მიემატებინათ შარშანგაყვანილი გზისათვის, ოთხ-ხუთ ადგილას ახალი ხიდი შენდებოდა. ხიდეებზე ქალაქიდან მოსული მუშები და სპეციალისტები მუშაობდნენ. ისინი მთავრობის ხარჯზე იყვნენ გამოგზავნილი და სოფლელები მათ მხოლოდ ხე-ტყით აშარავებდნენ.

შემოდგომამდე უნდა დამთავრებულიყო ეს გზა.

დილიდან გვიან საღამომდე ისმოდა წერაქვების ხმა და ნალმების გრიალი. ვეებერთელა ლოდები სქდებოდა და ეშვებოდა ხევში. ლაწალუწი გაჰქონდა მოხეთქილ ხეებს.

სოფლელებს შეეგნოთ გზის მნიშვნელობა. ახლა აღარ ეშინოდათ კარგი გზით ამოსულ მთავრობისა.

ჯერ სამი წელიც არ გასულა და ქვეყანა საფსებით შეიცვალა. მარტო ანდროს კაიკაცობა როდი გააკეთებდა აჰდენ საქმეს. მთავრობასა და პარტიას დაუვალეებია და ანდროც ისე მუშაობს... თუმცა ანდროს ღვაწლიც არ შეიძლება დაეიწყებულ იქნეს. კარგ მუშაობაზე ბევრია დამოკიდებული.

აფასებენ ანდროს შრომას.

ყველაფერს უჯერებენ, პირველ ხანებში თუ არ მოეწონათ მისი საქციელი, უხეშად ეჩვენებოდათ, მოურიდებელ კაცად თვლიდნენ, შემდეგ შეეჩვივნენ და ახლა მასზე უკეთესი არავინ ჰყავთ.

ნაშუადღევი იყო. გზაზე მომუშავენი ისვენებდნენ. ნაწილი გლეხებისა კი მდინარის პირას ჩასულიყო აბდესის ასაღებად. სარწმუნოება და ღმერთი კიდევ სარგებლობდა მათი სიმპატიებით. ერთბაშად ვერ აეღოთ ხელი მამაპაპის ნაანდერძე მავნე ჩვევებზე. კიდევ მაგრად იყო გამჯდარი მათ ტანში დამბეჭავებელი მოძღვრება და თაყვანს სცემდნენ მას.

ანდრო არ ჩარევია მათ საქმეში. ერთხელაც არავისთვის უთქვამს ნუ ლოცვილობო, ნუ მარხულობო, მაგრამ როცა საუბ-

რებს ატარებდა, მაშინ მის სიტყვებში აშკარად მოსჩანდა სარწმუნოებისა და ლოცვა-ვედრების საწინააღმდეგო აზრი. ის აზრი თანდათან მიდიოდა მსმენელთა გულში და ამის მიზეზი იყო ის, რომ ახლა მხოლოდ ნაწილი გლეხობისა იცავდა რელიგიურ წესებს.

ანდრო გაზეთს კითხულობდა. მის ირგვლივ ახალგაზრდები შემომჯდარიყვნენ ქვებზე. ზოგს წერაქვი ეპირა, ზოგს ბარი. ბეჯითად უსმენდნენ და ხანდახან რომელიმე მათთვის გაუგებარი აზრის ახსნას ითხოვდნენ.

ცოტა მოშორებით მუჰამედი იჯდა. ეტყობოდა მოქანცულიყო მოხუცი. მკადის ნატეხი ეპირა ხელში და ღრღნიდა. მოქანცულ ყბას ძლივს აქანებდა და თეთრ წვერებს აცანცარებდა.

ანდრო ახლა დაუკვირდა ამ მოხუცს. მას ეგონა სალოცავად იქნებოდა წასული და აქ რომ დაინახა, გაუკვირდა. წამოდგა, გაზეთი შაქირს გადასცა, თვითონ მოხუცთან მივიდა და მის ახლოს ქვაზე ჩამოჯდა.

მოხუცმა წყალით გადაიტანა მშრალი ლუკმა და შემდეგ მიუხედა ანდროს.

— მოვხუციდი, ბავშვივით მინდა ყოველ წუთში საქმელი, — წვერებზე დაისვა ხელი და ფინჩხები ჩამოიბერტყა.

— ნუ გამოდინხართ ძია სამუშაოდ. სახლში დარჩით. იქ ბალჩაშიაც მოსძებნით თქვენს შესაფერ საქმეს. — უთხრა ანდრომ. შეებრაღა მამისტოლა მოხუცი.

— ეწყინებათ... ესეც არ იყოს, მეც მინდა მონაწილეობა მივიღო ამ სასახელო საქმეში... ჩვენს სოფელში გზის შესვლა უბრალო საქმე არაა. შეხედე ამ მთებს, რამდენი სიმდიდრეა. გზა რომ ყოფილიყო, რად ეღირებოდა აქაურობა. მართალი გითხრათ, გაურბოდით გზა-კვალს. კარგი არაფერი მოჰქონდა ჩვენთვის გზას. გადასახადები, ბეგარა და მათრახები შემოჰქონდათ... ეჰ, შვილო, რამდენი უბედურება ახსოვს და რამდენი ტანჯვა-გაპირვება აუტანია ამ ხალხს—მდინარის პირას მყოფ თავდახრილ მლოცველებს გადახედა.

— აი, რა დროს გრძნობდნენ ისინი ოდნავ სიმშვიდეს: როცა მიწას თავს დაადებდნენ და ალღახს შეევედრებოდნენ. ამ დროს ავიწყლებოდათ ტანჯვა-წვალება და ეს წუთები იყო მათს ცხოვრებაში ყველაზე ტკბილი.

ანდრომ ჯერ ქვემოთ მლოცველებს გადახედა და შემდეგ მოხუცს მიუბრუნდა.

— თქვენ არ ლოცულობთ?—კითხა მან ფრთხილად.

მოხუცმა თავი გაიქნია.

— ოც წელზე მეტია არ მილოცავს. ამიტომ იყო ჩენი ხოჯა

ჩემზე გაბრაზებული. რაც ცუდი რამ მოხდებოდა სოფელში, ყველა ფერს მამრალეზდა. ყველაფერის მიზეზი მე ვიყავი.

— მართლა?

— ჰო, შენთვის არ მითქვამს. ისე კი მინდოდა მეთქვა... როცა თავისუფალი დრო გვექნება, ვეტყვი,—კიდევ მოსვა წყალი მოხუცმა.

— საინტერესოა.

— კია შეილო საინტერესო. ახალგაზრდობაში მეც ძალიან მიყვარდა ლოცვა. სხვა რა სიკეთე ვიცოდი, მაგრამ—და მოხუცმა მოუყვა მისი თავგადასავალი.

ცოლშვილიანი იყო მაშინ. ოჯახში არაფერი სიკეთე ჰქონდა. ნახევარჯერ მშვიგრები იყვნენ. ახლო-მახლო სამუშაო არაფერი იყო, და ლოცვით თავი არ ირჩინებოდა.

ერთხელ ბათუმში ნიგოზი წაიღო გასაყიდად. პირველი ჩასვლა იყო. ძალიან მოეწონა ქალაქი. გამოიკითხა და გაიგო, რომ ქარხანაში მუშებს ღებულობენ. ერთმა გურულმა უთხრა, მე წავიყვანო. აცოცხლოს ღმერთმა, თუ ცოცხალია. კარგი კაცი იყო... მოხუცი დაფიქრდა, მაგრამ ვერც სახელი მოიგონა და ვერც გვარი.

ჰო, იმ კაცმა მიიყვანა „ზაოდში“. ნოქარს სთხოვა მიეღოთ. მაგრამ ნოქარმა უარი უთხრა, აქარლევს ვერ მივიღებთო. მუჭამედს გული მოუვიდა, მაგრამ არც ის კაცი გაბრაზებულა მუჭამედზე ნაკლებად. კიდევ სთხოვა. ადგილი გაქვთ, სამუშაო არის, რად არ უნდა მიიღოთ ეს კაციო.

არაა ხერი მავათი მიღებო, უთხრა ნოქარმა. დღეში სამჯერ უნდა ილოცონ, სამჯერ ხელ-ფეხი დაიბანონ, გაიხადონ, ჩაიცვან. ამას ყველას დრო და საათები მიაქვს.

— ჰმ,—ჩაიცინა მოხუცმა,—ერთის მხრივ მართალი იყო ის კაცი. ის თავის სარგებელს ეძებდა. ბევრი დრო მიჰქონდა უსარგებლო ლოცვასა და მარხულობას. ზოგჯერ ისე დაწვადებოდა კაცი რემაზანში, რომ შემდეგ კაცად არ ვარგოდა. ხუმრობაა ვაჟკაცისათვის მთელი დღე უქმელ-უსმელი ყოფნა? უქმელობა კიდევ აიტანება, მაგრამ უსმელობა პირდაპირ გულს ახმობს.

— ჰო და, იმ კაცმა მირჩია... თუ მუშაობა გინდა, ჩემო ძმაო, ლოცვას დაანებე თავიო. რა გზა მქონდა არ დამეჯერებია. სამუშაოს ვერ ვიშოვნოდი.

— ეჰ, ვერ ვივარგე მაშინ, თორემ,—თავი ჩააქნია მოხუცმა,—თუმცა რა უნდა გააკეთოს უსწავლელმა კაცმა. წერა-კითხვა რომ მცოდნოდა, უკეთესად კი მოვაწყობდი ჩემს საქმეს. კიდევ იმ კაცს უნდა ვუმადლოდებ... დიდი დახმარება გამიწია.—მუჭამედს ძალიან სწყინდა, რომ შემდეგ არ იკითხა იმ კაცის ამავეი. არაა კარგი, პა-

ტივისცემას რომ დაივიწყებს კაციო.

მოხუცს თანდათან მოაგონდა წარსული.

— ჰო, იქ გავიგე მე ყველაფერი. მტერი და მოყვარეც იქ გავიცანი, ქარხანა სკოლა ყოფილა ადამიანისათვის. ასე მივარდნილ ადგილას რომ არ ვყოფილიყავით და გზა-კვალი გვქონოდა დღემდე, შენ გგონია, ასე დაბეჩავებული ვიქნებოდით? უსწავლელობის და უცილობის ბრალია შვილო ყველაფერი ეს, რასაც ხედავ.— მოხუცმა გადაიხედა ქვევით, სადაც მლოცველები მიწამდე თავდახრილი იყვნენ.— მალე, სულ მალე აღარ იქნება ეს ხალხი ასე ყრუ და შეუზნებელი. მალე ასწევენ თავს ზევით და ისე მიაფურთხებენ იმ ალღახსაც, როგორც ხოჯას მიაფურთხეს.— დაამთავრა მოხუცმა და წამოდგა.

II

დალამდა. მოწმენდილ ცაზე ვარსკვლავები აკიაფდნენ. დასაველეთიდან დაძრულ ნიავს რძის ფერი ნისლი ამოყვავდა და მთის კალთებზე გაიშალა.

აგრილდა. გაოფლებულმა მუშებმა თავი დაანებეს სამუშაოს, იარაღები შეაქურჩეს ერთ ადგილას, იქვე მოჩხრიალე წყაროსთან ხელპირი დაიბანეს და სიმღერით წავიდნენ სოფლებისკენ. მომარბულე გლეხები უფრო ადრე წასულიყვნენ. მზის ჩასვლამდე დაანებეს მათ თავი სამუშაოს, ვეღარ გაუძლეს მთელი დღე უქმელ-უსმელი ყოფნას და სახლებს მიაშურეს. ისინი ახლა მთელი დღის ნაცდურს ივსებდნენ. ხამნაკრავივით იტენიდნენ ლუკმებს, თუნგით სვამდნენ წყალს და გაფართოებული თვალებით დაჰყურებდნენ მათ წინ გაწყობილ სუფრას. ზოგიერთს ჰამის მადაც დაჰკარგოდა, არაქათგამოცილები მიწოლილიყვნენ ტახტზე და მხოლოდ წყალის სმით ცდილობდნენ დაკარგული ძალის აღდგენას. სამჯერ უნდა ექამნათ მთელი დამის განმავლობაში. სრულიადაც არ რჩებოდათ ძილისათვის დრო. დილით, სანამ ვარსკვლავებს არ დაეკარგათ ელვარება, ნასადილევი უნდა ყოფილიყვნენ. შემდეგ კი— მორჩა, სალამოდღე მათი პირი ვერაფერს ეღირსებოდა. მეტი უნდა ექამნათ, მეტი უნდა ესვათ, მთელი დღის საზრდო მოემარაგებინათ კუჭში. სხვა დროს ეს კიდევე შეიძლებოდა, მაშინ როდესაც მთელი დღის განმავლობაში არაფერს აკეთებდნენ, მაგრამ ახლა, ამ გაცხარებული მუშაობის დროს, ძნელი იყო მარხვის შენახვა. უსმელობა უჭირვებდათ უფრო საქმეს და თამბაქოს მოუწევლობა, თორემ უქმელობას კიდევე აიტანდნენ.

ახალგაზრდების ნაწილიც მარხულობდა. ჯერ კიდევ ვერ მო-

ახერხეს კომკავშირელებმა მათი გადმობირება. ზოგიერთებს სცხვე-
ნოდანთ მამაპაპისეულ ზნეჩვეულების უარყოფა. ზოგიერთები კი შე-
გნებულად გიუტობდნენ. განზე იდგნენ და განზე იხედებოდნენ. ბეე-
რი რამ არ მოსწონდათ საბჭოთა ხელისუფლების, მაგრამ წინააღმ-
დეგობის გაწევას ვერ ბედავდნენ. გამოცდილებას დაემტკიცებინა
მათთვის საკუთარი ძალების უძლურება და ახლა ისევ ოჩან ცხენი-
ვით მიდიოდნენ ხელისუფლების ნაჩვენები გზით. წყალის გამოყენა-
ზედაც მუშაობდნენ, სკოლის შეკეთებაზედაც. არც გზაზე გასვლაზე
უთქვამთ უარი, მაგრამ ემჩნეოდან, რომ მაინცადამაინც არ ეხა-
ლისებოდან ამ გზის გაყენა.

ახლა, როცა მარხულობის გამო საბაბი ეძლეოდან რამდენ-
ჯერმე ლოცვის, სამუშაოზე გვიან მოსვლის, ადრე წასვლის—ფარ-
თოდ იყენებდნენ ამ უფლებებს და რაც შეიძლება მეტ დროს ან-
დომებდნენ სარწმუნოებრივ ცერემონიებს. ზანტად იხდიდნენ ფეხზე,
ბეჯითად იბანდნენ ხელფეხს და ვაცილებით მეტ ხანს ანდომებ-
დნენ ლოცვას.

არავინ არაფერს ეუბნებოდან მათ ამისთვის. ანდროს ვაფრ-
თხილებული ყავდა ამხანაგები ხელი არ შეეშალათ მათთვის, საბაბი
არ მიეცათ გულის მოსვლისა და უქმაყოფილების გამოთქმის. ისე-
დაც იყენენ უქმაყოფილონი. ამდენი ხანია ხოჯა არ ყავდათ და ჯა-
მე დაკეტილი იყო. მართალია, მურადმა ნება მისცა, ვისაც გსურს
ხოჯა გყავდეს, წადით, დაიჭირავეთ, ზოიყვანეთო, მაგრამ ამ სიტ-
ყებმა ვერ მოაწესრიგა საკითხი. ათ მოსახლემდე ძლივს აღმოჩნდა
ხოჯის დაჭირაების მომზრე, მაგრამ, როცა საკითხი ფულის გადახ-
დაზე მიდგა, ყველამ უარი სთქვა.

— მაშ, მთავრობა ვერ დაგიჭირავებს თქვენ ხოჯას,—უთხრა
მათ მურადმა,—ჩვენ არ გეჭირია ხოჯები და ალები. არც მათი ლო-
ცვა და ყურანი,—და თავისი აზრი გააცნო.

სკოლა უფასოდ ავაგეთ, მასწავლებლებს მთავრობა გზავნის,
გზები გაგვყავს, ექიმებს, აგრონომებს, ფერწლებს უსასყიდლოდ
გვიგზავნიან, წამლობა, ექიმობა უფასოა. მოითხოვეთ კიდევ რაც
გნებავეთ, ოლონდ თქვენს მოთხოვნილებას საფუძვლად ედოს თქვენი,
მშრომელი გლეხობის სარგებლობა, რომ ყველაფერი ხალხის კეთილ-
დღეობისაკენ იყოს მიმართული და, იმ მოთხოვნილებასაც სიამოვნე-
ბით დავაკმაყოფილებთ, მაგრამ...

ხოჯები არ გვინდა...

ჩვენ ვაფრთხილებთ, ვეუბნებით: რომ ცულ საქმეს სჩადის.
ეურჩევთ თავი დაანებოს, ნუ იხშობს გონებას.

მაინც არ იწლის?

თვითონ დაიქირაოს...

უქმყოფილად გადახედეს ხოჯის მოყვანის მომხრეებმა ერთმანეთს. მურადს ვერაფერი შეჰკადრეს.

დასწყევლოს ეშმაკმა, როგორ დაებნათ გზაკვალი. აღარ იციან რომელი სჯობია...

ამ მთავრობას რომ ეს ხოჯები და აღები არ ეჯავრებოდეს, ნამდვილი მისაღები იქნებოდა. გზები გაყავს, სკოლებს აგებს, დახმარებებს იძლევა, ყველას პატივსცემს, ეკითხება, ირჩევს, აგზავნის, ერთი სიტყვით, ყველაფერს კარგს სჩადის, მაგრამ...

ხოჯასაც რომ დაიქირავენდეს;—ჩაუკრავდნენ სიტყვას.

— უკაცრავად თქვენთან, — შეაწყვეტინებდნენ კომკავშირელები.

— ვერ დაინახე, რას აკეთებდა თქვენი ხოჯა?

— ქაჯების ტანსაცმელებით რომ დადიოდა!..

— ქალებს რყვნიდა...

— ყაჩაღებს ინახავდა...

უამრავი მასალა იყო ხოჯის წინააღმდეგ და კომკავშირელებიც უხვად იყენებდნენ მას.

სიმღერით შემოსულ ახალგაზრდებს სოფლის ბავშვები შეეგებნენ. უფრო ახმაურდა და გაცოცხლდა სოფელი. კიდევ რამდენიმე კვირა და გზას სოფელში შემოიყვანდნენ. მდინარეზე დაწყებული იყო ხიდის აგება და მოკლე დროში დამთავრდებოდა. იქვე იდგა გზის მტკეპნავი, რომელიც დილიდან საღამომდე მიდი-მოდიოდა ახალმოზღინულ გზაზე. ამ უბრალო და მარტივ მანქანას უამრავი მნახველი ყავდა. შორი სოფლებიდანაც კი მოდიოდნენ მის შესახებდად. ადგილობრივი ბავშვები ხომ ბუზებივით ეხვევოდნენ თავს.

ლამით დარაჯი იდგა ლოკომობილთან. რიკრიგობით მორიგეობდნენ ახალგაზრდები. მართალია იმსისხო მანქანის მოტაცება არავის შეიძლო, მაგრამ მისი დაზიანება შეიძლება ვინმეს მოსვლოდა აზრად და ამიტომ არჩიეს მორიგეობის შემოღება. შაქირი იდგა პირველ ღამეს. შემდეგ—რიგის მიხედვით... ამალამ თოფუზს მოუწია. ეს პირველი დავალება იყო მას შემდეგ, რაც ის ამხანაგებს დაუბრუნდა გამოჯანმრთელებული. კარგა ხანს ეუბნებოდნენ უარს, არ ლებულობდნენ. ისეთი დანაშაული, როგორც მან ჩაიდინა, მიუტავებელ ცოდვად მიაჩნდათ. თვითონაც აღიარა. რამდენჯერმე გამოვიდა საკუთარი თავის კრიტიკით, რამდენჯერმე დაგმო თავისი საქციელი და პატიება ითხოვა.

ისევ ანდრომ აპატია. გამოცდის ვადა დაუნიშნა და დავალებებით დატვირთა, ამხანაგებს კი თვალყურისდევნება დაავალა.

თოფუზი ცალფეხზე ისევ კოკლობდა. კარგად არ შედუღებოდა ნატყვიარი ერთმანეთს, მაგრამ ამას ვინ ჩიოდა, სიცოცხლე რომ

შერჩა და არ დაიღუპა. მერე როგორ უნდა დაღუპულიყო! როგორი სახელით უნდა ჩასულიყო მიწაში. ამხანაგების მოლაღატე, კაცის მკვლელი, მკვლელზე უარესი. ახლა მაინც შესძლებს გამოისყიდოს თავისი დანაშაული. თუ კომკავშირშიაც მიიღეს და აპატიეს ყველაფერი, მაშინ ხომ ერთი-ათად უნდა გააძლიეროს მუშაობა.

კარგა ხანს არაფერს ენდობოდნენ. მარტო ამალამ დაავალეს გზის მტკეპნავეთან მორიგეობა და ამ გარემოებამ ნახევრად გაბზარული გული გაუმთელა.

თანდათან მიწყდა სოფელში მოძრაობა. შენელდა ხმაურობა და მალე სულ დადუმდა.

მთებზე უფრო გასქელდა რძისფერი ნისლი, თანდათან დაიწია ძირს, ნელნელა წამოეპარა სოფელს და მალე უჩინარი გახდა ის.

თოფუზი ყოჩაღად დადიოდა ლოკომობილთან, ხელში კარაბინი ეჭირა და ხშირად შეათამაშებდა, თითქო ენატრებოა მისი ამოქმედება. ის მხიარული იყო, კმაყოფილი. რახან თოფი მისცეს, ასეთ ადგილას დარაჯობა მიანდევს, სჩანს შეცვლილა ატმოსფერო, შეიძლება თანდათან დაიხსლოვონ ამხანაგებმა და აპატიონ ყველაფერი...

ნეტაე მართლაც მიიღებდნენ კომკავშირში. ახლა კი იცის როგორც უნდა იმუშაოს, როგორ მოექცეს მტერსა და მოყვარეს. რა ბედნიერი იქნებოდა, სასწავლებელში მოეწყობოდა, ან სადმე კურსებზე წავიდოდა. ხომ ხედავს, მურადამ როგორ აიწია საწყალი მურადა. როგორ აბუჩად ყავდა აგდებული ყველას... დღეს ნახე, როგორ უძღვება საქმეს. რა ყოფილა სწავლა. თოფუზიც არაა უნიკო. სწავლა მასაც არ ეზარება, მაგრამ შეაცდინეს, დაღუპეს. არც მათ დაყრიათ ხეირი. კიდევ კარგი, რომ თოფუზი გადაჩა, თორემ რა საშინელი სიკვდილი იქნებოდა.

გააქრეოლა. კიდევ შემოუარა ლოკომობილს. იქვე ახლო ელაგა სამუშაო იარაღები, მასალები, სპეცტანსაცმელი და, ყველაფერი დაათვალიერა. შემდეგ გაიარ-გამოიარა ახალგატეპნილ გზაზე, გადაიხედა ხევში, სადაც ვეებერთელა ლოდები. ელაგა გზიდან დაგორებული. მოაგონდა როგორ დადიოდა ის ამ ხევში „ქაჯის“ ტანსაცმლით. როგორ ფიქრობდა მურადის შეშინებას. მაშინ მხოლოდ უბრალო შეშინებაზე ფიქრობდა. უნდოდა დაეცინა ისე, როგორც მას დასცინეს ერთხელ. მაგრამ უბრალო შეშინება როდი გამოდგა. თურმე სულ განადგურებას ფიქრობდნენ ხალხის მტრები. რა იცოდა მაშინ თოფუზმა, რა მაზნით ეხმარებოდნენ მას მოლა ნური, ხოჯა და ზოგიერთი სხვებიც. ბრმა იარაღად იყენებდნენ თურმე ჯანღონით სავესე ახალგაზრდას და გამოუცდელ ნიჭს.

საკუთარი თავი შესძაგდა თოფუზს. ნეტაე რაიმე ძნელი საქმის

შესრულებას დამავალბდნენ, რომ მისი გაკეთებით ოღნავ მაინც გაეიწმინდო სინდისი და პირნათლად წარესდგე ამხანაგების წინა-შეო,—გაიფიქრა მან.

ამ დროს მთიდან ვეებერთელა ქვა დაგორდა მოულოდნელად. მთელი სიძლიერით დაეშვა ქვემოთ და ისე ძლიერად დაეტაკა ლოკომობილს, რომ ამოდენა სიმძიმის მანქანა შეტორტმანდა.

თოფუზმა აიხედა ზევით. ახლა მხოლოდ კენკები მოჩხრიალებდნენ ლოდის ანაგორებზე.

„ეგ რა ეშმაკია“,—გაიფიქრა და მანქანასთან მიიბრინა. ლოდი მიწოლოდა მანქანას და ადგილსამყოფელიდან ოღნავ გადაეჩოჩებინა.

თოფუზმა მიიხედ-მოიხედა. თვალი ააყოლა ზევით, ხომ არავინააო, მაგრამ როცა ვერაეინ დაინახა, მივიდა და შეეცადა ლოდის დაგორებას. კეტი დაუდო, მაგრამ ადგილიდან ვერ დასძრა. კარგახანს ეწვალა. უნდოდა როგორმე მოეცილებინა მანქანისათვის, მაგრამ ვერ შესძლო. ეწყინა, ძალიან ეწყინა, რომ ასეთი უბრალო საქმე ვერ შესრულა. ვინ იცის, როგორ მიიღებენ ამხანაგები. ხომ შეუძლიათ იფიქრონ, თოფუზმა განზრახ დააგორა ქვაო, მანქანის გაფუჭება უნდოდაო, მერე ეს უნდა ახლა თოფუზს? რაც ძალა და ღონე ჰქონდა მიაწვა ლოდს, მაგრამ ოღნავაც ვერ შეარხია. შემდეგ კარაბინი მიაყუდა, წერაქვი აიღო და შეუდგა ლოდს ქვემოთ მიწის გამოთხრას, რომ ამით გასაქანი მისცემოდა ქვას, მანქანას დასცილებოდა და იქით გადაგორებულყო.

კარგა ხანს მუშაობდა. სულ გაიწურა ოფლში. საკმაოდ გამოთხარა მიწა, ახლა ზემოდან უნდა დაწოლოდა კეტით დი ქვაც დასცურდებოდა. წამოიწია, უნდოდა კეტი აეღო, მაგრამ ამ დროს რალაც მახვილი მოხვდა გვერდში და მკერდამდე გაუარა.

— ჰოი,—ამოიგმინა თოფუზმა და მხეცივით გავარდა. გვერდიდან ცხელმა სისხლმა ამოასხა და უბეში აჩხრიალდა ნაკადულივით.

— ესეც შენ,—მოესმა მას ყურში და ახლა მეორე გვერდში გაისრიალა მახვილმა. იქედანაც ავარდა სისხლის ნაკადული.

შეტორტმანებული ვაეკაცი დაეცა მიწაზე. მას უკვე აღარაფერი ესმოდა. ცხელი სისხლით ივსებოდა უბე და საყელოდან ამოდოდა. მომაკვდავის გულის ძეგრა ჯერ კიდევ არ შეჩერებულყო. გონება უკანასკნელად კიდევ ებრძოდა სიკვდილს და ზოგიერთ რამეს კიდევ უკარანახებდა მომაკვდავს. ჯერ კიდევ ფეთქდა უკანასკნელი სისხლის ჩქერები და ამ დროს მასში უფრო ძლიერი იყო გადარჩენისა და შებრძოლების ინსტიქტი. წუთით გაუჩერდა საშინელ კრილობას, მაგრამ შემდეგ უეცრად ავარდა თავმოქრილ მამალივით,

ვეფხვის ძალით შემოტრიალდა ირგვლივ, გაშმაგებული დაეტაკა რა-
ლაცას თუ ვილაცას, მაგრად მოუქირა ხელები და მასთან ერთად
დაეშვა მიწაზე... ქვა არის, — უნდა გასკდეს, რკინაა — გაიწელოს, ხეა —
დაიფშვანას, ცოცხალი არსებაა — გაისრისოს, ისეთი სიძლიერით
შემოქერია მომაკვდავი ადამიანის ხელები მას. თოფუზის ხელები
შეაცივდა, შეაკვდა და შეახმა რაღაც რბილ საგანს. თითქოს ადა-
მიანის ყელია ის რბილი საგანი. ის მოხვდა მას პირველად სელებში
და ვისიც არ უნდა იყოს იგი, თოფუზის ხელებმა უნდა გამო-
ლადროს, გასრისოს...და რაღაც ახროტინდა და აფართხალდა
მასთან ერთად. ორი ადამიანის ლეში გორაობს სიბნელეში და ერთ-
მანეთს ებრძვის. ვინ ვის დასძლევს, რომელი რომელს მოერევა...
მაგრამ ორივე მოეშვა და მოღუნდა მომაკვდავმა დაიყოლია მოწი-
ნააღმდეგე. შური იძია და გვერდით მიიწვინა. ახლა ორი სიკვდი-
ლი ზეიმობს. სიკვდილი, რომელიც თოფუზას ლეშს დადგომია და
სიკვდილი, რომელიც მის გვერდით გაწოლილ სსეულს დასცქერის.
ლამე მიდის. შორიდან კოტის გულშემზარავი კვივლი ისმის,
რძის ფერი ნისლი დაზოზინობს მათების კალთებზე...დანამულ ბალა-
ხებს ყურები დაუცქვეტნიათ.

სოფელს სძინავს. ჩამი-ჩუმი არ ისმის. ხანდახან თუ აფორხილ-
დება პირუტყვი ბოსელში, ან შემკრთალი ქათამი შეფართხალდება ხეზე.

გათენებას კიდევ უკლია, მაგრამ ლამე გადატეხალა შუაზე. ბუ-
ნება დილის შესაგებებლად ემზადება. საცაა მორწმუნენიც წამოდ-
გებიან. დილაზე უნდა მოასწრონ ქამა, თორემ შემდეგ პირაკრული
დარჩებიან. რა ტკბილია ამ დროს ძილი. არავითარი სიამოვნების
გულისათვის არ მიატოვებს კაცი ლოჯინს. ბევრს სძლევს ძილი, ვერ
დგება დროზე და შემდეგ მთელი დღე მშვიერია.

გაციებულ გვამთა შორის ერთის ტუჩებიდან გაქროლებულ
ნიავეს თბილი სუნთქვა აყვავდა. სუსტი, მაგრამ მინც სიცოცხლის მანი-
შნებელი. თანდათან ძლიერდება ის და...უცებ სისხლიდან დაკლილი
სხეული ამოძრავდა. კი არ ამოძრავდა, ოღნავ შეირხა მხოლოდ.
შეირხა და გაყინულ თითებში სითბო შეიქრა, როგორც თუჯის
მილში ცხელი ორთქლი. ოღნავ გამთბარა გაციებული სხეული და...
უთუოდ ჯერ კიდევ სიცოცხლე იმარჯვებს.

თოფუზის მიბნედილ თვალებს ლამის სიბნელე შეეგება.

გააღო და ისევ დახუჭა. სად არის იმდენი შეძლება, რომ თვალები
ღია გააჩეროს. სხეული დაწრეტილია სისხლისაგან. გვერდებში ისევ
ტრიალებს ბასრი მახვილი და სკრის ყველაფერს. ფეხები თითქო
მოუკვეთნიათ. არც ხელები აქვს. მარტო გული უნდა იყოს ცოცხა-
ლი, კიდევ — თვალები. გული ძნელი მოსაკლავი ყოფილა. რომ ადა-
მიანს არ ჰქონდეს მკერდში ჩამწყვდეული და უამრავი ძარღვი

დაბმული, საოცარ ამბავს მოახდენდა. ვინ იცის, სად არ გაფრინდებოდა, რა სისწრაფეს არ განავითარებდა.

უცნაური მანქანა ყოფილა...

თოფუზს უბრუნდება სიცოცხლე. სიცოცხლე როდი ჰქვია ამას, მაგრამ აღარც სიკვდილის მსგავსია. არა, ნამდვილი სიცოცხლეა. მაშ ასე რომ არ იყოს, როგორ გრძნობს ყველაფერს. დიად, გრძნობს, როგორ არა! აი, ახსოვს ყველაფერიც.

მანქანაც, სამუშაო იარაღებიც, თავისი მოვალეობაც ახსოვს, მაგრამ...

კიდევ გაახილა თვალები და უფრო მეტ ხანს ჰქონდა დიად. სჩანს სიცოცხლეს ძალა შემატებია. ნეტავ საიდან მოდის ეს ძალა?

თბება სხეული და თოფუზმა იგრძნო, რომ მას ხელები აქვს. დიად აქვს ხელები, აი, თითებიც აამოძრავა. რა უსუსური ყოფილა ადამიანი!

გული კი ისევ იბრძვის, თანდათან უმატებს ძევრას, ჰკრილობა მიწით ამოგლესილა, მიწა სისხლით შეზეულია და ჰკრილობას გადაკვრია, მაგრად გაუგლისხავს ზედაპირი. სისხლიანი პერანგი გადაწებებია ზემოდან ამ ჰკრილობას.

კენტად იყვილა სადღაც მამალმა და თოფუზმა იცნო, რომ ის მამალი მისი სახლიდან ყიოდა. მისი მამალია, ძველი მამალი, იმიტომ აქვს ისე ბოხი და ჩახლეჩილი ხმა.

მაშ ცოცხალი ყოფილა თოფუზი. მას ესმის, ეყურება და ცნობის უნარიც აქვს. ცოცხალია, მაგრამ, თუ ცოცხალია, აქ რა უნდა.

ასწია თავი, მაგრამ უცებ გაუფარდა მძიმე ლოდივით და ისე მაგრად დაეცა, რომ რამდენიმე წუთით გონება დაჰკარგა.

იმ ლოდზე მძიმე ეჩვენა საკუთარი თავი. მართლა, რა მძიმე ლოდი დაგორდა. ნეტავ მანქანას თუ ავნო რამე? მანქანას... რალაცამ გაიღევა თავში.

მანქანასთან ხომ თოფუზი იდგა დაჩაჯად. მერე! შეასრულა თავისი მოვალეობა? თუ მანქანა გაიტაცეს, გზა დაანგრის, ხიდეები ააფეთქეს და თოფუზს ზომები არ მიუღია.

ახლა ყელიც გაუჩნდა თოფუზს. კი არ გაუჩნდა, ჰქონია. რომ არ ჰქონოდა, არც ეს სიბრაზე მიაწვებოდა ყელში. საშინლად აწვება სიბრაზე.

ნუთუ ისე წახდა თოფუზი, რომ ერთ მანქანას ვერ მოუარა? მტრებს გაატანა. ფუ, ასე გამოისყიდა დანაშაული? აკი ამბობდა, ფიცს სდებდა, სიტყვას იძლეოდა. ოღონდ მიმიღეთ, დამსაქმეთ, მენდეთ და თავს შეეწირავ სახალხო საქმესო. თავი მართლაც შესწირა, მაგრამ რა! ვის არგებს ასეთი თავშეწირვა?—მტერი რომ დაემარცხებინა და მაშინ მომკვდარიყო, სულ სხვა იყო, ახლა კი...

მუხლები დაესერა.

როგორ, ფეხებიც აქვს?! სჩანს არაფერი არ აკლია მის სხეულს. თავი, ხელები, ფეხები, გული. მეტი რაა საჭირო სიცოცხლისათვის? სიცოცხლისათვის... ვის უნდა ასეთი სიცოცხლე. ნეტავ მომკვდარიყო! მომკვდარიყო, მაგრამ ვის უნდა. მოეკლა? მართლა. ვის? ვის და, აი იმ კაცს... აბა ეშმაკი ხომ არ იქნებოდა. როგორი მახვილი დანა ჰქონდა, რა საშინლად გაისრიალა გვერდებში...

აეწვა გვერდები. საშინელი ტკივილი იგრძნო. ამ ტკივილმა თითქო ძალა შემატა, თითები მოუჭირა რალაცას მაგრად და კბილებიც გააკრაქუნა.

ამდენხანს არ გრძნობდა ამ ტკივილს, მაგრამ არც შეგრძნობა შეეძლო. გვერდები არ ჰქონდა და გვერდების ტკივილს როგორ გრძნობდა? ახლა კი, სხვებთან ერთად გვერდებიც ჰქონია. ნეტავ არ ჰქონდეს. რა საჭიროა ამდენი რაამები. ჰქონდეს მარტო თავი, გული, ხელები და ფეხები. დანარჩენი არაფერი ვამოსადეგია.

— ვკვდები, — ამოიძახა და თავისი ხმის გაგონებამ შეაკრთო. ნახევარზე უფრო ნაკლები მთვარე ამოსრიალდა მთის გადაღმიდან და თეთრი შუქი მოჰფინა მიდამოს. მამლები რამდენჯერმე გაეხმაურნენ ერთმანეთს და დაღუმდნენ.

თოფუშმა — რამდენიმე ხმა გამოიცნო. ბევრჯერ სმენია მას მამლების ასეთი ხმა და გამოუცენია ვისი ეზოდან რომელი ყოიდა.

— უჰ. — ამოითქვა ძლიერად სული, ისე როგორც კარგად ყოფნისას ითქვამდა, მაგრამ ფერდებთან რალაც ახრიბინდა, თითქო იქაც ითქვამდა ვინმე სულს. კიდევ საშინელი ტკივილები იგრძნო და ისევ საშინლად მოუჭირა თითები რალაცას, მაგრამ ეს რალაცა ისე რბილია, რომ თითები ეფლობა შიგ. თანაც საშინელი ცივია.

ოდნავ შესძლო თავის წამოწევა. ძლივს გაახილა თვალები და შუქზე გაარჩია გარემო.

მანქანა დგას მდევვივით. ლოდი ისევ მოწოლია ზემოდან. წერაქვები, ნიჩბები და ბარებიც იქვეა და...

თოფუშის გვერდით გაშოტილი ახმახი კაცის ლეში გდია. მუქის ოდენა თვალები გადმოცვენილა უპეგბიდან. თოფუშის ხელები მარწუხბებივით შემოჰკერია ყელზე და ისე გაუწელავს, რომ ყორყის ხრახნილი გაწყვეტილა.

ვერ გაუძლო ამ სურათის დანახვას თოფუშმა, მოწყვეტით დაუშვა თავი ძირს და თვალებიც დახუჭა.

თანდათან იწვევს მთვარე ზევით. უფროდაუფრო ახლოვდება დილა და სიცოცხლესაც ძალა და ენერგია ემატება.

— ეჰ,—კიდევ ამოიძახა თოფუზმა და ახლა მეტი ძალა იგრძნო სხეულში. წამოსწია თავი და კიდევ მიიხედ-მოიხედა.

იგივე სურათი იყო. თითები შეკვდომოდნენ, შედუღებოდნენ იქ მდებარე ადამიანის გაციებულ ყელს. ძლივს შესძლო ამ თითების განთავისუფლება. თითქო ლეში აღარ უშვებდა მათ.

გაციებულ სახეს დააცქერდა. თვალები გადმოცვენილი იყო, სახე ტალახით გასერილი. მხოლოდ კბილები ჰქონდა დაკრეპილი და თოფუზმა ოქროს კბილებზე იცნო იუსუფ-ალა.

— იუსუფ-ალა!—აღტაცებით წამოიძახა მან და თითქო ყველაფერი მოურჩა.ძალაც მიეცა მუხლებში, მაგრამ ეს ძალა მხოლოდ გადასაბრუნებლად იყო. გვერდი იცვალა და ოდნავ სიამე იგრძნო.

— როდის გათენდება,—ამოილაპარაკა და ცას შეხედა. სწყურროდა საშინლად, ასე ეგონა მთელ მდინარეს ამოაშრობდა. ნეტავ შეეძლოს ჩახოხდეს მდინარესთან, რომელიც რამდენიმე ნაბიჯით არის დაშორებული აქედან. სულ შთანთქავდა იმოდენა წყალს...

კიდევ წამოიწია და იუსუფ-ალას გაციებულ გვამს დახედა. რა საშინელი შესახედავია. როგორ დაუკრეპია კბილები... მიაფურთხებდა, ნერწყვი რომ არ ჰქონდეს ამომშრალი. იმდენი ძალა მაინც მისცა, წამოდგეს და ფეხებით ჩაულეწოს ხელოვნური თუ საკუთარი კბილები.

თოფი მოაგონდა. „ნეტავ სად არის თოფი?“ გაიფიქრა და ლოკომობილისაკენ გაიხედა. თვალებს სინათლე მომატებია. თითქო ყველაფერს გარკვევით ხედავს. კარაბინა ცოტა მოშორებით გდია მიწაზე. ნეტავ მიწვდებოდეს. გასწია ხელი, მაგრამ ვერ მიწვდა. ძალა დაატანა თავს. ძლივს აათრია წელი და წაიწია წინ. კორობინას კონდახში მოაგლო ხელი და თავისთან მოათრია. შესვენება დასკირდა სანამ საკეტს მოაბრუნებდა. შემდეგ სასხლეტს გამოსწია და თოფიც გავარდა: კორობინა ცოცხალ არსებასავით შეუხტა ზევით და შემდეგ ისევ დაეცა. სროლის ხმა მთებს გადაწვდა და რამდენჯერმე განმეორდა ხევიდან ხევში. ძაღლები გამოეხმაურნენ უჩვეულო დროს გაგონილ ხმას.

თოფუზმა მეორეხელ გადააბრუნა საკეტი და მეორეხელ დაიგრიალა თოფმა.

სოფელს თითქო სულღ ჩაუდგა მოულოდნელმა გასროლამ. რამდენიმე სახლის კარი აჭრიალდა და მკრთალი მთვარის შუქზე ამოძრავდნენ ლანდები.

მურადი წუთშივე გაჩნდა საბჭოს შენობასთან. მასთან იყო ანდრო. ორიოდ წუთში შაქირიც მოვარდა და მალე მთელი სოფლის ახალგაზრდობა იდგა ფეხზე.

შერეული იყვნენ ნაუცბადევად მომზადებასა და გამოსვლას

ყველას იარაღი ჰქონდა და თალასკები. მზად იყვნენ. კიდეც ელოდნენ მტრების გამოჩენას. იცოდნენ, რომ ყოფილი თავმჯდომარე, იუსუფ-ალა და მისი ამყოლები, რომლებიც მაშინ ხელიდან წაუვიდათ, არ მოისვენებდნენ, კიდეც შეეცდებოდნენ თავიანთ საზიზღარ კბილების გამოჩენას. ჩამოდენივე დღის წინ აკი სკოლას წაუკიდეს ცეცხლი. ამას წინათ კიდეც ახალაგებული ხიდის აფეთქება მოინდომეს. რომ სიფრთხილე არა, დიდ ზარალს იზამდნენ, მაგრამ, ახლა მაინცადამაინც ვერაფერს ახეზებდნენ. ხანდახან საქონელსაც გარეკავდნენ, ან კლდეზე გადაჩეხავდნენ, ან ვისმე გაქურდავდნენ, წერილი საქმისთვის მოეკიდნათ ხელი, მაგრამ თუ შეამჩნევდნენ სიფხიზლის მოდუნებას, იერიშზე გადმოვიდოდნენ. ამიტომ იყო საგუშაგოები რომ დააწესეს. კოპერატივთან, ხიდებთან, საბჭოსა და სკოლის შენობასთან. ლოკომობილთანაც ამიტომ დარაჯობდნენ.

ჩუმად მოსდიოდა ცნობები შურადს. ერთი ხანია მძებარ ძალივით ეძებდა იუსუფ-ალას ნაკვალევს. თითქოს სუნი აედო, შემოპარულ მტერს უთვალთვალებდა.

თოფი მესამეჯერ გავარდა და ყველასათვის გასაგები გახდა საიდან იყო ის. იმ წამშივე სირბილით გაეშურნენ იქით და ორი-ოდე წუთის განმავლობაში გაჩნდნენ ლოკომობილთან, სადაც სისხლში გასვრილი თოფუზი მიწაზე ებრძოდა სიკვდილს.

დაფაცურდნენ ახალგაზრდები, აანთეს ეინელიები, დაათვალიერეს იქაურობა და ნახეს იუსუფ-ალას გაციებული გვამიც, რომელიც თოფუზს ცოტა განზე მიეწია, რომ მასთან ახლოყოფნას არ შეეწუხებინა.

— წყალი.—ეს იყო თოფუზის პირველი სიტყვა. შემდეგ როცა მის გარშემო შემოკრებილი ამხანაგები დაინახა, ოდნავ ღიმილი აუთამაშდა ტუჩებზე.

— ნახეთ.—და იქით გაიშვირა დასავეებული თითი, საითაც იუსუფ-ალას გვამი ეგულვებოდა.

— ჩავიძალღებია, ამხანაგო თოფუზ,—ჩასძახა შაქირმა, თავზე გადაუსვა ხელი და განკარგულება გასცა მის წამოსაყვანად.

მოაწყვეს ყველაფერი. ფრთხილად აიყვანეს, ორ ჯოხზე გაკრულ ბრეზენტზე დასდეს და ფრთხილად წამოიყვანეს სოფელში.

ინათლა. ნისლი შეჰყვა ფერდობებს. მზემ შორეული მთის წვეროებს სტყორცნა სხივები და ოქროსფრად შეღება. ფრინველები ეივილ-ხივილით მოედნენ სოფელს.

ჩამოდგა სიცოცხლე.

სოფელი ფეხზე იდგა. საბჭოს წინ შეგროვილიყვნენ ქალი და კაცი, დიდი და პატარა. იქვე ხის ძირში ეგდო იუსუფ-ალას ლეში. სკოლის შენობაში შეეყვანათ თოფუზი, რომელსაც ზასტაევი-

დან სასწრაფოდ გამოძახებული სამხედრო ექიმი დადგომოდა თავზე, კრილობა მოებანა, სისხლის დენა შეეწყვიტნა და მაგრად შეეკრა.

ანდრო ტელეფონთან მიმჯდარიყო და ბათუმს ელაპარაკებოდა.

ხალხი ღელავდა, აღშფოთებული იყო.

თოფუზას დედას ჩამოებლოტა ლაწვები. მას უკვე დავიწყებოდა ყველაფერი, გარდა მისი საყვარელი შვილისა. იგი არავის ერიდებოდა.

საზიზღარი მტრის გაყინული ლეში მიწაზე ეგდო. მის გარშემო გაისმოდა რამოდენიმე ათეული ადამიანის წყევლა-კრულვა, რომელიც ბინძურ ლეშს ჩაყვებოდა სამარეში.



თავი მესხე

I

უქანასკნელი მერხი შეიტანეს სკოლაში და კედელთან დადგეს. შავად მოელვარე დგამებს სპირტნარევ საღებავის სუნი ასდიოდა.

სკოლის ეზოში შეგროვილი ბევშვების ჟრიაბულის ხმა სოფელს სწვდებოდა, ჩვეულებრივ ხალისითა და ალტაცებით ეგებებოდნენ ისინი სასწავლო წელს, ხტოდნენ, დარბოდნენ, მღეროდნენ.

ახალგაზრდები დილაადრიან მოსულიყვნენ და გაცხოველებულ უშაობაში იყვნენ გართული. ორი საბარგო მანქანა გადმოეტვირთათ დილას აქეთ, ახალმოტანილი ავეჯი გადმოელაგებინათ, სკოლაში კეჭიდათ და თავთავის ადგილას დაეწყათ.

ხუთამდე ქალიშვილი ერია. ახალგაზრდებში. ისინი ნაზიმეს მოეყვანა და მისივე მითითებით მუშაობდნენ, იატაკი მოერეცხნათ, შუშები დაეწმინდათ და ახლა სურათებსა და რუკებს ჰკიდებდნენ.

სკოლა საკმაოდ შეკეთებული და გალამაზებული იყო. არავის ეჯავრებოდა ახლა მისი შეხედვა. არავინ გაუბოდა, არავინ იზარებდა მისთვის დახმარებასა და ხელისშეწყობას.

სანიმუშო სოფლად გამხდარიყო წყავნარა.

თითქო ერთბაშად შეცვლოდა იერი. გამოცვლოდა სანხე.

ბევრი საქმე გააკეთა გზის შემოყვანამც.

თურმე ქვევარში ყოფილან დამწყვედული დღემდე. ჯერ ერთი წელიც არ გასულა გზის შემოსვლის დღიდან და სოფელი საესებით გადასხვაფერდა.

სახლების სახურავებზე როდი აწყვია ქვები ყავრების დასამაგრებლად. ლუსმანი და მავთული შეიტანა კოოპერატივმა უხვად. ნავთი, მარილი, შაქარი, ტანსაცმელი, ფეხსაცმელი აღარავის აკლდა.

ოჯახის ავეჯებიც შეიცვალა. ჯამების ნაცვლად თფფშები გაჩნდა, საერთო ტახტის ნაცვლად, რკინის ტახტები დაიდგეს და ზოგიერთებმა განიერი ფანჯრებიც გაუკეთეს სახლებს.

ყველაფერი ეს შეუმჩნევლად, თითქო ყოველგვარი მითითებებისა და ავტოტაციის გარეშე გაკეთდა.

ჯერ კიდევ რამდენს აუხილა თვალები ხოჯის, იუსუფ-ალისა და ყოფილი თავმჯდომარის ოინებმა. რამდენს დაანახა მტერი და მოყვარე, გააცნო ავ-კარგი.

გზის გაყვანა და მისი საზეიმოდ გახსნა კი დაუფიწყარი შეიქმნა ყველასათვის.

ახლაც ლაპარაკობდნენ მასზე. აღერთოვანებით იგონებდნენ. რამდენი ავტომობილი ამოვიდა... რამდენი მანქანა!

მთელი მილეთი დაესწრო იმ ზეიმს.

მთავრობაც იყო. თვითონ ზთავრობის თავმჯდომარემ გასჭრა ზონარი, რომლითაც გზა იყო გადაკევილებული. მან გამოაცხადა გზა გახსნილად.

რა მთავრობა გეყოლია! უბრალო, ჩვეულებრივი ადამიანები. ყველას ანხანაგურად ართმევდნენ ხელს. ელაპარაკებოდნენ. ესაუბრებოდნენ...

ეს კი მართლა მუშურ-გლეხური ზთავრობაა, ნამდვილი ჩვენი მთავრობა...

რამდენს უკბინა გულზე მის მიერ წინად ნათქვამმა მთავრობისადმი საყვედურმა. გაახსენდა და თავისთავის წინაშე შერცხვა.

ასეთ მთავრობაზე იტყვის მშრომელი ადამიანი საყვედურს?

ხარბად შესცქეროდნენ და ისმენდნენ მოსული ამხანაგების სიტყვებს...

იყვნენ პარტიისა და სხვადასხვა ორგანიზაციების წარმომადგენლებიც.

მუშები, მუშა-ქალები, ახალგაზრდები, კომკავშირელები, პიონერები, ოქტომბრელები. დროშებით, პლაკატებითა და ლოზუნგებით მოერთოთ მანქანები, ყვავილებით შეემკოთ..

სოფლებიდან მოსულ ქალებს ჩაჩაბი აეწიათ. სახე გამოეჩინათ და მომღიპარი უცქეროდნენ სტუმრებს.

ზოგს ჩადრიც არ ჩაეცვა. სრულიად თავისუფლად წამოყოლოდნენ ქმრებს. ბავშვებიც წამოეყვანათ.

— ჰაუ, რამდენი მაშინებია!

— სამ საათში ამოსულა თურმე ბათუმიდან.

ცნობისმოყვარეობით ათვალეირებდნენ უცნაურ მანქანებს.

ზეიმი ახალდაწყებული იყო, რომ მთის წვეროდან გუგუნით მოისმა. თითქო ვეებერთელა ორბი, ან არწივი გადმოფრინდაო, გუგუნით გადმოიარა და ქორივით დაიწყა ტრიალი ცაში, სწორედ იმ ადგილას, სადაც საზეიმოდ შეკრებილიყვნენ.

— ჰაერობლანი!— დაიძახა ვილაცამ და უამრავი თვალები აიმართა ცისკენ.

მალლიდან ფერადი უურცლები გადმოიშალა ყვავილებივით და ფარფატით დაეშვა ძირს. ბავშვები ხეებზე აცოცდნენ. იქედან შეეგებენ მოფარფატე ქალალდებს. დიდი ალტაცებით იქერდნენ.

ფეხზე იდგა მთელი სოფელი. მარტო ეს სოფელი კი არა,

მთელი ახლომახლო სოფლები. გადაღმელებიც მოსულიყვნენ დიდიან-
პატარებიანად.

ნაზიმე ამხანაგებით მოსულიყო. ის სხვებზე თამამად იყო, მაგრამ სტუმრებთან მაინც იჩენდა სიმორცხვეს. ვინმე წამქეზებული რომ ყოლოდა, უსათუოდ მიიღებდა მონაწილეობას ზეიმში. ისამებ-
და (იციკეებდა), იმღერებდა, ითამაშებდა. ნაილე!.. ნაილე რომ იყოს აქ, ის ყველაფერს გააბედვინებდა.

რა თამამია ის გოგო!

მეორე წელია უკვე თბილისში სწავლობს და მხოლოდ ერთხელ ინახულა სოფელი.

როგორ დამშვიდებულა ის ეშმაკი. გალამაზებულა.

ააჯანყა მთელი სოფელი იმ ცელქმა.

არა, ჩვენი ცხოვრება რალაც ძალიან ცელქი და მოძრავი გახდა... აღარ იცი კაცმა სად გაჩერდე, რომელ საფეხურზე. სულ მწვერვალებისაკენ მიგიწევს გული.

მთელმა სოფლის ქალიშვილებმა მოიძვრეს ჩაჩაბი, გადააკეთეს მოკლე კაბებად ჩადრი. ყველა ნაილეს ბაძავს, ყველას უნდა ისეთი გახდეს.

სწავლა მოუნდათ. ქალაქისაკენ უქირავთ თვალი. ახალ ჩვევებს მისდევენ. წიგნები გაიჩინეს და მასწავლებლებთან დადიან სალამის სკოლაში.

გრძელი და ნაოქიანი კაბები დამოკლდა. აბრეშუმის წინდები გამოჩნდა და კობტა ფეხებიც გამომწეურდა.

ასე უფრო ლამაზი ყოფილა ცხოვრება...

ლიმილი სახეს ამშვენებს, გულს უხდება, სიცოცხლეს ალამაზებს! მაშ, რატომ არ უნდა ვილიმებოდეთ?

და მთელი მოსახლეობა ლიმილით შეეგება სტუმრებს.

ეცნობოდნენ ერთმანეთს ქალაქის მუშები და სოფლის გლეხები, ქალაქისა და სოფლის ქალები, ქალაქისა და სოფლის ბავშვები.

— ჩვენ მუშების შვილები ვართ, თქვენ—გლეხების. ჩვენ ორთა-
ვენი მშრომელების შვილები ვართ, ერთმანეთის ძმები და შემკვიდ-
რები. ვისწავლოთ, ვიშრომოთ, ვიბრძოლოთ. ვიყოთ მზად!

— მზად ვართ!—შესძახეს პატარებმა და ტაში დაუკრეს პატარა ორატორს, რომელიც მანქანაზე გაჩერებული ამბობდა სიტყვას.

ერთმანეთს გადახედეს სოფლის ბავშვებმა. პატარა ზეკიეს დაავა-
ლეს საპასუხო სიტყვის თქმა.. გოგონები უფრო გაბედულნი არიან.

— ხისიმები ვართ. ძმები ვართ. ჩვენი სალამი ჩვენს სტუმრებს!
— უცებ ჩიმობტა ზეკიე და ბავშვებში მიიმალა.

ეგონა, დამცინებენო, მაგრამ ტაში დაუქრეს. გამოიყვანეს და საჩუქარი მისცეს—პიონერის ტანსაცმელი და წითელი ყელსახვევი.

რა ლამაზი იყო ის დღე! მას შემდეგ სულ ლამაზი დღეები თენდება.

ზექიესა და მის ამხანაგებს კი არასოდეს არ დააფიწყდებათ ის.

სკოლიდან გამოსული შაქირი მურადს შეეგება და უპატაკა.

— სკოლა მზად გახლავს ამხანაგო თავმჯდომარე. — უთხრა და კარებისკენ გაიშვირა ორივე ხელი, — მობრძანდით.

მურადმა ღიმილით გადახედა ამხანაგს. მკლავში მოჰკიდა ხელი და გაიყოლია.

— ძალიან კარგი — უთხრა მან და გლახებს მიუბრუნდა. — შევიდეთ, ვნახოთ, როგორ უმუშავნიათ. — კარები გააღო და სკოლაში შევიდა.

ოთხი ოთახი ლამაზად მოერთოთ. სულ ახალი მერხები იდგა, ახალი მაგიდები, კედლებზე ახალი რუკები და სურათები.

— წელს ოთხი კლასი გვექნება. ორი ქალი-მასწავლებელი გვეყოლება. ორი ქალი-მასწავლებელი საკმარისია ჩვენი ქალიშვილებისათვის. რას იტყვი ნაზიმე შენ?

ნაზიმემ ეშმაკურად გაულიმა. შემდეგ ამხანაგს წასჩურჩულა ჭალაცა და გადიკისკისა.

— მე ვფიქრობ, მაგათ ვაჟები ურჩეენიათ. — იხუმრა ერთმა გლეხმა, ქალიშვილებს გადახედა, მათში თავისი შვილიც დაინახა და ესიამოვნა, რომ მისი ქალი ამხანაგებს არ ჩამორჩებოდა სილამაზითა და ეშხით.

— ოცნი მასწავლებელი არ გვეყოფა მურად. — ჩაერია ლაპარაკში ერთი თმაშექადარებული გლეხი. ის საბჭოს წევრი იყო და უფრო მეტ მოთხოვნილებებს უყენებდა თავმჯდომარეს.

— რახან ვთქვი ორი იქნება-მეთქი, — მიუბრუნდა მურადი მას, — ორი მასწავლებელი ქალი იქნება, ორიც — ვაჟი. შეიძლება ორი მასწავლებელი კიდევ წაეართვა განათლების განყოფილებას. შემპირდნენ. ვნახოთ.

— ჰრა-კერვის სკოლისას არაფერს ფიქრობთ? — მოკრძალებით იკითხა ქერათმიანმა ქალიშვილმა. სირცხვილისაგან აეწვა ლოყები და ინანა, რამ ამომალებინა ხმაო.

მურადმა ქალიშვილებისაკენ გაიხედა და ქერათმიანს რომ შეხედდა, მასაც აუწითლდა ლოყები.

— ჰრა-კერვის სკოლას რა აკლია? — იკითხა მან და წუთით შეაჩერა ხედვა ნაზიმეზე, რომელიც დარცხვენით ამხანაგს ამოდგომოდა გვერდით.

— ბინა არ გვივარგა — ამხანაგის მაგივრად უპასუხა ნაზიმემ, შემდეგ დარცხვენით ამხანაგს მიუბრუნდა.

— შენც ხომ ბინის შესახებ გინდოდა გეთქვა სურვიე?—კითხა მან ქერათმიანს და თვალებში ჩახედა.

— კი.—მოკლედ უპასუხა ამხანაგმა და უფრო მოემატა სიწითლე მის ლოყებს. რატომ ავლაპარაკდიო, კიდევ ინანა მან, ხომ იცოდა, რომ მურადთან არ შეეძლო ჩვეულებრივი სითამამე ჰქონოდა, რაღაც უცნაურად უცემდა გული მუდამ, როცა მურადის სიახლოვეს გრძნობდა. აკი ამხანაგებიც ჩაუკრავენ ხოლმე ხშირად და...

ნეტავ ასრულდებოდეს! უნატრია რამდენჯერმე. მაგრამ... არა, როგორ შეიძლება ასეთი რამ ინატროს ქალმა?... რა სისულელეს ამბობს? ვითომ რატომაა სისულელე! სურვიე ისეთივე ქალია, როგორიც საერთოდ ქალები, როგორიც მისი ამხანაგები, როგორიც ნაზიმეა, ანდა ნაილე, ან კიდევ მასწავლებელი ქალები. რა შუაშია აქ სირცხვილი. სურიეს მოაგონდა, რომ მან განცხადებებ დააწერინა და კომკავშირში შეიტანა. კომკავშირელებს ხომ არ სწამთ ღმერთი არც სარწმუნოება... ამიტომ სურიესაც აქვს უფლება არ იწამოს არც ღმერთი, არც მოციქული. იყოს ისეთი ურწმუნო, როგორიც ყველა კომკავშირელია! უფლება აქვსკი არა, ასედაც უნდა მოიქცეს. ასე ახსნა ამასწინად მომხსენებელმა. მამ სურიემც ეს რწმენა უნდა მიიღოს.

თამამად მიიხედ-მოიხედა.

—იმდენი ქალები ვერ ეტყვიან პატარა ოთახში,—სთქვა მან გაბედულად.—ტყუილია თუ?—ამხანაგებს მიუბრუნდა.

—მართალია.—ერთხმად დაუდასტურეს ამხანაგებმა.

— ეგ კი არ მიფიქრია—მიიღო შენიშვნა მურადმა.—შაქირა, შენ ხომ არ გეგულება რიგიანი ბინა?

შაქირმა მხრები აიჩჩია.

— თითო სასტუმრო ყველას აქვს, მაგრამ...

— სასტუმრო სკირდებათ. არა, ისე თუ აქვს ვინმეს თავისუფალი ოთახი. ქირას მივცემთ.

-- ქირას ვინ აიღებს მურად? ნეტავ კი მქონდეს, თორემ ვინ დაიზარებს. ჩვენი საქმეა. აბა, მაგასაც ხომ მთავრობას ვერ მოვთხოვთ.

— მართალია, ხუსეინ ემიავ, ჩვენს საქმეზე ცოტა ჩვენც უნდა ვიზრუნოთ... შეკეთებას თუ არ დაიზარებთ, მე მოგვემდით ჩემს სახლში ორ ოთახს, მაგრამ მოუფერებელია. მოვხუცდი, ვერ მივაქციე ყურადღება. ლამაზი კი არაა, თქვენ გთხოვოთ სახლის შეკეთება მაგრამ...—უხერხულობა იგრძნო მეჰამედმა და გრძელჯობს დაუწყო ხელში ტრიალი.

— ბინას ჩვენ შევაკეთებთ, თუ შეეღვი—უთხრა შაქირმა.

— შევაკეთებთ ძია,—სთქვა მურადმაც და ცალი თვალი გააპარა სურიესაკენ—რას იტყვი სურიე, გამოდგება ძია მეჰამედის ოთახები? სურიეს არ გამოუხედავს ვაეისაკენ, ისე უპასუხა, კარგიაო.

— მაშ ითავებ შაქირ მაგ ბინის მოწყობას. ამხანაგები დაგეხმარებიან, ხელიდანვე შეუდექით, დრო ცოტა დაგვრჩა და სირცხვილი არ ვქამოთ.

აივანზე რომ გამოვიდნენ, საბუკოს შენობის წინ გაჩერებული ანდრო დაინახეს. ის სუფთად ჩაცმულ-დახურული იყო. ახალი კოსტიუმი ეცვა. სკოლის წინ შეგროვილი ხალხი რომ დაინახა, ამათკენ წამოვიდა.

გლეხებმა ანდროს დანახვაზე ერთმანეთს გადაულაპარაკეს რალაც. შაქირი მურადთან მივიდა და გვერდით ამოუდგა.

— რა იქნება მურად, რომ ვთხოვოთ?—უთხრა მან თავმჯდომარეს.

— არაფერი გამოვა.—უპასუხა მურადმა და ნაღვლიანი თვალებით გაიხედა ანდროსაკენ.

— ძალიან საჭიროა ჩვენთვის.

— მართლა?

— შენ თვითონ იცი.

— მერე?

— ვთხოვოთ-მეთქი. სთხოვე ჩვენი სახელით, შემდეგ ჩვენც ვთხოვთ. ერთ წელიწადს რომ კიდევ დარჩებოდეს, დიდ რამეს ნიშნავს.

— ხომ გაიგე, რომ სასწავლებელში მიდის?—ცოტა არ იყოს წყენით უთხრა მურადმა.—ერთი წელი დარჩა ჩვენი ხათრისათვის. შარშან ჰქონდა ქალაქლები მზად, საოლქო კომიტეტიც აძლევდა. მივლინებას. წელს რა პირით უნდა ვუთხრათ დარჩიო, მადლობის ნაცვლად ხელი შევეუშალოთ? არა, მე არ შემიძლია ვურჩიო კაცს მაგრე.

შაქირს ხმა არ ამოუღია. თვითონაც მიხვდა, რომ არ იქნებოდა წესიერი ასეთი თხოვნით ანდროსადმი მიმართვა.

— ვისზე ამბობთ?—დაინტერესდა მოხუცი მეჰამედი.

— ანდროზე,—მოკლედ მიუგო შაქირმა.

— რაო?—დაასწრო მოხუცს ერთმა გლეხმა.

— ანდრო მიდის, და...

— მიდის?!—ერთხმად შესძახეს გლეხებმა და ახლოს მოიწიეს.

— მიდის,—დაუდასტურა მათ მურადმა,—ორ წელზე მეტია გვემსახურება და მადლობის მეტი რა გვეთქმის.

წუთით ყველამ თავის გულში ჩაიხედა.

ნაზიმემ ქალიშვილებს გადაუფურჩულა რალაცა. იმათ გაკვირვებული გაიხედეს მომავალ ანდროსაკენ.

— მართლა?—ჩუბად შეეკითხა სურიე ნაზიმეს.

— ნაილემ გამანდო. ახლა მურადმაც იცის მგონია.

— ბედი ჰქონია იმ გოგოს.

— არც შენ გაქვს ურიგო ბედი,—ეშმაკურად ჩაუკრა თვალი ნაზიმემ და მურადზე ანიშნა.

სურიე თითისფრჩხილებიანად გაწითლდა, ენაც ვერ მოაბრუნა პასუხის სათქმელად.

— რად გრცხენია? თვითონ მურადმა მითხრა. ტყუილა მიშალავ.

სურიემ ველარ შესძლო დარჩენა. სკოლაში შეივრბინა, უკანა კარებიდან გავარდა და შინისაკენ გაიქცა.

ანდრო კიბეზე ამოვიდა და საერთო სალამი მისცა იქ მყოფთ. შემდეგ კარებთან მივიდა და სკოლაში შეიხედა.

— როგორ მოგწონთ, ამხანაგებო, კარგად მოუწყევიათ? მიმართა მან გლეხებს.

— ძალიან კარგია, ამხანაგო ანდრო,—უპასუხეს ცალ-ცალკე გლეხებმა.

— არა უშავს,—გაიხედ-გამოიხედა ანდრომ შენობაში,—მომავალისათვის ურიგო არ იქნება ახალი შენობის აგებაზედაც თუ იზრუნებთ. წელს რამდენი კლასი იმეცადინებს?—მიუბრუნდა მურადს.

— ოთხი... ექვსი მოწაფე გვეყოლება მეოთხეში.

— სამაგიეროდ პირველი გადაიტვირთება,—ჩაერია შაქირი.

— ბევრს ელოდებით?

— ორმოცზე მეტი გვეყავს აღრიცხული. ზოგიერთები ათითორმეტი წლისანი არიან, მაგრამ უარს ვერ ვეტყვი. უნდა მივიღოთ ისევ პირველ კლასში. ერთი-ორი თოთხმეტი წლისაც ურევია.

— უსათუოდ უნდა მივიღოთ.—დაუდასტურა ანდრომ.

ხელახლა შევიდნენ სკოლაში. ანდროსთან ერთად დაათვალიერეს მეორეხელ ოთახები და გამოვიდნენ.

შეცვლილიყო დამოკიდებულება ანდროსადმი. მას ახლა ისე თამამად აღარ უყურებდნენ, არც ისე გაბედულად ელაპარაკებოდნენ, ვერც გახუმრებას უბედავდნენ. რაღაც უფრო მოკრძალებული იყვნენ. ზედმეტი სიყვარულით უცქეროდნენ ყოველ მის სიტყვას უკვირდებოდნენ. ყველას უნდოდა რაღაც უჩვეულო სიტკბო და სიყვარული გაეტანებინა ამ კაცისათვის, რაღაც ძვირფასი და მომხიბვლელი სიტყვები ეთქვათ მისთვის. ზოგს სისველე ჩადგომოდა თვალებში და ანდროს შეხედვაზე უბრწყინავდა მარგალიტის მსგავსად.

— ბევრი რამე გავაკეთეთ, ამხანაგო ანდრო, და თუ კიდევ დაგვეხმარები, უფრო მეტს გავაკეთებთ,—სთქვა ერთმა გლეხმა, გამოეყო ამხანაგებს და ანდროსთან გაჩერდა.

ყველამ ყურადღება მიაქცია მას. მოედინ ჩათაძის სიტყვა არავის გაეგონა ჯერ. ის მუდამ მღუმარებდა და ახლა რომ ხმა ამოელო, ყველას გაუკვირდა. ანდროც კარგად იცნობდა მოედინს და მისი სიტყვა რომ გაიგონა, ესიაშოვნა.

— თუ კი რაიმე შემძლეა, დახმარებას არ დავიზარებ, ამხანაგო მოედინ. მისახურეთ ამხანაგებო.— გადახედა იქ მყოფთ, რომლებიც მას მისჩერებოდნენ. ანდრო მიხვდა, რომ მათ სულ სხვა აინტერესებდათ. სხვაგვარი სიტყვა უნდოდათ გაეგონათ ანდროსაგან.

ანდრომ გასცა პასუხი მათ უსიტყვო შეკითხვას.

ანდრომ როდი გააკეთა ყველაფერი ის, რაც ამ მოკლე ხანში გაკეთდა. ერთისა და ორის კარგი ბიჭობით როდი აშენდება ქვეყანა. ჩვენში კოლექტივი მუშაობს. პარტია ხელმძღვანელობს და მთავრობა ჩვენი ქვეყნის მშენებლობის საქმეს. პარტიული და უპარტიო ამხანაგები აკეთებენ ყველაფერს. ბოლშევიკები კი ლენინისა და სტალინის მითითებებით მუშაობენ. ანდრო, მურადი, შაქირი და სხვები ერთნაირად არიან მოვალენი ასრულონ პარტიის დავალებები. ანდრო იმას აკეთებდა, რასაც პარტია უკარნახებდა, რასაც მთავრობა ავალებდა. ყველგან ხომ ანდრო არ მუშაობდა, მაგრამ ყველგან აკეთებდნენ საქმეს. გაყავდათ გზები, აგებდნენ სკოლებს, უწევდნენ დახმარებას მშრომელებს, მტრებსაც ებრძოდნენ.

ღიად, ანდროს ვაჟკაცობა აქ არაფერ შუაშია. მართალია, ესა თუ ის ბოლშევიკი უკეთესად მუშაობს, ესა თუ ის მუშაკი — უფრო სუსტად, მაგრამ ყველგან და ყველაფრის გეთაური და გამკეთებელი პარტია და ხელისუფლებაა, მშრომელები და მთლიანი კოლექტივია.

— გაუმარჯოს ჩვენს პარტიასა და ჩვენს მთავრობას! — აღტაცებით დაიძახა მოედინმა. მივიდა და მაგრად ჩაჰოართვა ხელი ანდროს.

გლეხებმა ტაში დაუკრეს.

მურადი სვეტზე მიყრდნობილი უცქერდა ამ სურათს. მას ძალიან სწყინდა ანდროს წასვლა, მაგრამ ვერ ამქლავებდა. ბევრი კარგი ახსოვდა ამ კაცისაგან. მთელი მისი ცხოვრება ანდროს ყურადღებამ შემოაბრუნა ასე, თორემ ვინ იცის რამდენხანს დარჩებოდა ის დელი-მურადად. რამდენხანს უნდა ეტარებია დელის სახელი.

მას თვალწინ ედგა ანდროს შეხვედრის წუთები. ცხენს რომ ქვები დაუგორდა, როგორ გაბრაზებული მივიარდა მაშინ მურადი ანდროსთან და როგორ შეუტია. შეიძლება ეცემნა კიდეც, მაგრამ... ახლა სცხეენია მაშინდელი საქაელის. ნუთუ მართლაც

ისეთი იყო? მერმე ამ ორ წელიწადში როგორ გაიზარდა ასე? მართლაც წუთობით ვიზრდებით თურმე.

ახალგაზრდებს გადახედა. ყველანი გაზრდილან. დაწინაურებულან:

რა ბედნიერი ადამიანები ვყოფილვართ! სიხარულმა გაუხსნა გული.

ნაილე მოაგონდა. საყვარელი დაი, დედის მაგიერი. რა უბედური იქნებოდა, რომ ეს დრო არ მოსწრებოდა? ახლა კი თბილისშია, მალე ნასწავლი ქალი იქნება.

ანდროს შეხედა მურადმა. მან წუხანდლამდე არათფერი იცოდა ანდროსა და ნაილეს დამოკიდებულების შესახებ. მხოლოდ წუხელის გაუმტლავნა ანდრომ. შეიძლება არც გაემტლავნებინა, მაგრამ მოეწყო ისე საქმე.

ბარგს ალაგებდა ანდრო, მურადი რომ შევიდა ოთახში. ორი ჩემოდანი გაეხსნა და რიგრიგობით აწყობდა შიგ ნივთებს. მურადმა ნაილეს სურათი დაინახა ანდროს ჩემოდანში. ასეთი სურათი მასაც ჰქონდა დის გამოგზავნილი, მაგრამ ანდროს წინაშე ის არასოდეს არ უნახავს. აქ გასაკვირი არათფერი იყო. ნაილეს ვერაფერს დასძრახავდა ანდროსათვის სურათის გამოგზავნის გამო. არც ანდროს გაუმტყუნებდა ვინმე, ნაილეს სურათი ოთახში მაგიდაზე რომ ჰქონოდა, მაგრამ ჩემოდანში შენახვა სურათისა, რალაც სხვა იყო.

სიყვარულს მუდამ. საიდუმლოდ ატარებს წესიერი ადამიანი...

აქ გაუქროლეს გულში ექვებმა მურადს. ესიამოვნა. კმაყოფილების ღიმილიმა გადაჰკრა. ჯერ სურათს გადახედა. შემდეგ ანდროს. რამდენჯერ გადაიტან-გადმოიტანა ხედვა ერთიდან მეორეზე.

კარგახანს იჯდა ჩუმად და უცქერდა, როგორ ალაგებდა ბარგს ანდრო. შემდეგ წამოდგა, ფანჯარასთან მივიდა, სიბნელეში გაიხედა და ისე ზურგშექცევით უთხრა:

— იმ გოგოს შენ უნდა მიხედო ანდრო.— შემდეგ მობრუნდა და ისე განაგრძო:— შენს მეტი ახლობელი ვინ ყავს?— კიდევ გადაიხედა ღია ჩემოდანში, მაგრამ იქ დის სურათი ვეღარ დაინახა, ის უკვე დაემალა ანდროს.

— დარდი ნუ გაქვს, მურად. ნაილეს არათფერი გაუქირდება, — სახეზე სიწითლე წამოჰკრა და ყურისძირამდე მივიდა.

— ქალია და...— უნდოდა ეთქვა სამწყესავიანო, მაგრამ ამის თქმა უადგილოდ ჩასთვალა. მწყემსი პირუტყვის უნდაო, გაიფიქრა.

კარგახანს ილაპარაკეს. მურადს აწუხებდა, რომ მარტოდ რჩებოდა სახლში, ხმის გამცემი არ ეყოლებოდა. მარტო ცხოვრება ერთ დროს უყვარდა მას, მაგრამ მაშინ სულ სხვა იყო, მაშინ ადამიანს ვერ ხედავდა. ყველა მხეცივით უყურებდა მას. დასცინოდა

და აბუჩად იგდებდა. ახლა? ახლა ცხოვრება მხოლოდ ადამიანებშია, თუმცა ეს ადამიანები სულ სხვა ადამიანები არიან. ახლა რომობოლივიით იცხოვრო კაცმა... სახლში მოსვლაც შეზარდება. ესეც არ იყოს, შეჩვეული იყო ანდროსთან. თითქო ცრემლები მოაწვა თვალეებზე მურადს და გული აუჩუყდა.

— რომელიმე მასწავლებელი დააბინავე ამ ოთახში. შენთვისაც კარგია, შეგიძლია იმეცადინო კიდეც მასთან.— ურჩია ანდრომ.

მურადი ქერს მიაჩერდა. კარგახანს არ ამოუღია ხმა, შემდეგ მიიხედ-მოიხედა ოთახში და ხმადაბლა სთქვა:

— ასე უნდა მოვიქცე, მაგრამ...

— არა უშავს, ჩვენ ერთმანეთს კიდევე შევხვდებით. მიწერ-მოწერაც გვექნება, შენც ამოხვალ თბილისში, ჩვენც გეწვევით... მურადს სახე გაეხსნა.

— თამარი შემპირდა გეწვევით, მაგრამ შენ რომ არ იქნები აქეთ... არ წამოვა. ისე კი ძალიან მინდოდა... დიდი პატივი მცა. ჩემს სიცოცხლეში არ დამავიწყდება... ძალიან მინდოდა ენახნა ჩემი ოჯახი. თუმცა რა ოჯახი მაქვს...— ისე მიმოავლო თვალი კედლებს.

— ტყუილა ემდური ოჯახს, ჩემო მურად.— გაუღიმა ანდრომ. — არ გაკმაყოფილებს რაც გაქვს?

— არა, როგორ არა, ყველაფერი მაქვს და მეშოვება ახლა, მაგრამ ხომ იცი, რაღაც უნო, ლაზათი და სითბო აკლია.

— ჰოო. მაგ სითბოს კი ქალი მოიტანს. ეს ახლო მომავლის საკითხია. იცოდნე ქორწილი არ აგვაცილო.— მხარზე დაჰკრა ხელი. — არ იფიქრო მოლხენა არ ვიცოდნე? საჭიროებისა და თავის დროზე ვიმღერებთ, ვიცეკვებთ, მოვილხენთ, დავლევთ კიდეც და გავიხუმრებთ...

მურადს გაეღიმა.

— მაშ როგორ გგონია? ჩვენს ცხოვრებას მეტი სილამაზე უნდა მივცეთ. კარგი ბოლშევიკი ისაა, რომელმაც შრომაც... იცის, ბრძოლაც, დასვენებაც, მოლხენაც და დროს ტარებაც... ჩვენ ბურჟუაზიას იმიტომ კი არ ვებრძოდით, რომ სიმდიდრის მტრები ვართ. პირიქით, სიმდიდრე და ქონება გვინდა ყველას ჰქონდეს. სხვისი შრომით არ უნდა მდიდრდებოდეს სხვა. ჩვენ კი თვითონ გვინდა ვიყოთ მდიდარი. ყველაფრის მქონე. არაფერიც არ უნდა გვაკლდეს. ჰო, ეს ამბები შენც იცი. როცა სოციალისტურ სიმდიდრეს დავაგროვებთ, მაშინ როდი დაგვკირდება ამდენი შრომა. უფრო მეტი დასვენების საშუალება გვექნება, გასეირნების, მისვლა-მოსვლის. ასე, ჩემო მურად. შენ განაგრძე შენებურად ბრძოლა და შრომა.

საქმაოდ მომზადებული ამხანაგები გყავს, ზენც გამოქედილი ხარ და მომავალში უფრო გამოიქედები.

ანდროს სიტყვები მალამოსავით ევლებოდა მურადის გულს. ის ბავშვივით ალტაცებაში მოდიოდა, სიამოვნებით უცემდა გული და თვალეში სიხარულის ნაპერწკლები კრთოდნენ.

— მართალი ხარ, ანდრო! ჩენი ქვეყანა სიხარულითა და ბედნიერებით აივსო, ჩენი გული სიამით ძვკრს, მაგრამ მე ამასთან ერთად მინდოდა, რომ ერთმანეთი არ დაგვეკარგა.—ხმა აუთრთოლდა, შეჩერდა და ანდროს შეხედა.

ანდრომ გაიღიმა. მივიდა მაგიდასთან, სქელი წიგნიდან რალაც წერილი ამოიღო და მურადს გადასცა.

ორჯერ ჩაიკითხა მურადმა წერილი. კითხვის დროს ხშირად აუვლ-ჩაუვლიდა ფერი. კითხვა რომ გაათავა, თავი დახარა და იატაკზე რალაც წერტილს მიაჩერდა. არ იცოდა ამის შემდეგ როგორ გალაპარაკებოდა ანდროს, საიდან დაეწყო, ან როგორი ტონი მიეცა ხმისთვის. კარგახანს ფიქრობდა, შემდეგ თითქო იპოვა სიტყვა, მოისაზრა სათქმელი და თავი ასწია.

— და შენ როგორ ფიქრობ?—გაუბედავად ჰკითხა მან. უხერხულობა იგრძნო და ისევ ამოჩემებულ წერტილს მიაჩერდა.

— სიტყვა საქმედ უნდა იქცეს—მოკლედ მიუგო ანდრომ. კიდევ უნდოდა რალაც ეთქვა, მაგრამ ვერაფერი მოახერხა.

— „ობლის კვერი ცხვა, ცხვა, გვიან გაშოცხვა, მაგრამ კარგად გამოცხვაო“—ჩაილაპარაკა თავისთვის მურადმა.—მომილოცავს. ბედნიერი იყავით. მე კი ჩემზე უბედნიერესი აღამიანი მეორეც არ მეგულება ამ ქვეყანაზე.—წამოდგა, ანდროსთან მივიდა, მოეხეია, ძმურად გადაკოცნა და სიხარულის ცრემლები გადმოცვივდა მისდაუნებურად.

ეს იყო წუხელ. დღეს კი ანდრო მიდის და მისი წასვლა ყველას სწყინს.

საბკოს შენობის წინ მოელვარე მანქანა გაჩერდა და რამდენჯერმე დაიბღვლა.

— მეძახის,—მიუბრუნდა ბოძზე მიყრდნობილ მურადს ანდრო. მურადი ახლა გამოერკვა ფიქრებიდან. იქ მყოფ ახალგაზრდებს გადახედა და მათ შორის ორი ამოირჩია.

— თევრად, ზორბეკ, წავიდეთ, ანდროს ბარგი ამოვიტანოთ, —უცებ ჩამოირბინა კიბე და სახლისაკენ წავიდა ახალგაზრდებთან ერთად.

სანამ ისინი დაბრუნდებოდნენ, ანდრო გლეხებთან ლაპარაკობდა.

ერთმა გლეხმა ანდროს მოსვლის პირველი დღე მოიგონა.

— ეჰ ჩემო ძმაო, შეუგნებელი და უსწავლელი რომ არ ვყოფილიყავით, ვერც ისე აბუჩად აგვიგდებდნენ. ცივად, ძალიან ცივად შეგეგებეთ ამხანაგო ანდრო. ძალიან ცუდად დაგიხვდით და მიგიღეთ, მაგრამ ვაშა შენს ვაჟაკობას. ჩვენ, გლეხები გუღლია და წარბაგხსნილი არასოდეს არ ვყოფილვართ. გულჩათხრობილი და თავდახრილები ვიყავით. ხშირად მას ვაქებ-ვადიდებდით, ვინც გვეჯავრებოდა, ვინც ჩვენი მტერი და ორგული იყო. ვერ ვარჩევდით მტერ-მოყვარეს და ყველაფერი მისი მიზეზი იყო. ახლა... ხედავ, როგორ ვლაპარაკობთ, როგორც გახსნილია ჩვენი წარბები, როგორ მომღიმარია ჩვენი სახეები. დღეს ვიცით ვინ არის მტერი, ვინ არის მოყვარე, ვიცით და არამართო ამ ცოდნით ვკმაყოფილებით, არამედ მტერსა და მოყვარეს თავთავის შესაფერად ვხვდებით. გულდახურული, წარბშებრილი დაგიხვდით, მძულვარებით შეგეგებეთ, მაგრამ გვეპატიება. ნაცვლად ახლა გატანთ ძვირფას მადლობას, მხიარულ გულებს, უღევ სიყვარულსა და სიხარულს. — მივიდა, ყელზე მოეხჭია, გადაკოცნა და შემდეგ სხვებს გადახედა.

— აი, ამ გლეხების სახელით მადლობა გადაეციოვნენ პარტიას, ჩვენს მთავრობას, ჩვენს ძმებს—მუშებსა და მოსამსახურეებს.

ბევრს აუბრწყინდა სიხარულის ცრემლები თვალებში ამ სიტყვებზე.

ყველა ეუბნებოდა თითო-ორ-ორ სიტყვას ანდროს. უნდოდათ გაეტანებინათ ამ კაცისათვის ყველაზე ძვირფასი და ყველაზე უკეთესი გრძნობა.

მანქანის საყვირმა კიდევ მისცა ნიშანი.

ანდრო და გლეხები ჩამოვიდნენ სკოლის აივნიდან და ლაპარაკით საბჭოსაკენ წამოვიდნენ.

გზაზე ნაზიმე დაუახლოვდა ანდროს. მკლავზე მოჰკიდა ხელი, ერთ ადგილას შეაჩერა და ორი წერილი გადასცა.

— ერთი ნაილეს გადაეცი, მეორე ბათუმში დატოვე... არა, არა. ახლა ნუ წაიკითხავ მისამართს.—თავისი ხელით ჩაუღვა ჯიბეში,—ბათუმში რომ ჩახვალ მაშინ წაიკითხე. არავის უთხრა თორემ... — ეშმაკურად გაულიმა და თვალებში შესედა.

— თორემ? —

— თორემ ჩვენც ვიცით, რალაცა და... — კიდევ შეაფრქვია მხიარული ღიმილი.

ანდროს ყურები აეწვა. არ ეგონა თუ სხვამც იცოდა ნაილესა და მისი ურთიერთობის ამბავი, მაგრამ სჩანს ნაილეს თავისი მესაიდუმლეც ყოლია.

— კარგი, ვასრულებ თქვენს დავალებას, — ღიმილით უთხრა ანდრომ. მაინც მოასწრო კონვერტზე წარწერილ ერთი სიტყვის

წაკითხვა და მისთვის გასაგები გახდა ვის ეკუთვნოდა ის.

— აკი უარს ეუბნებოდით?—ჩაუკრა ანდრომ სახეწამოწითლ-
ბულ ქალიშვილს:

— არ მიყვარდა... მე რე შემეყვარდა... უფრო კი იმიტომ არ
მინდოდა, რომ ჩემი არჩეული არ იყო. — პირზე აიფარა ხელი.—
ნენევ, რაებს ვლაპარაკობ, — შერცხვა და თავი დახარა.

მანქანა ადგილზე ძიგძიგებდა. თრთოდა. შოფერი საქვს მი-
ჯდომოდა და განკარგულებას ელოდა.

მანქანის ირგვლივ მთელი სოფელი შეკრებილიყო. ქალებიც
გარეულიყვნენ, ბავშვებიც, მოხუცებიც. თითქო ყველას ენანებოდა
ანდროს წასვლა. ბავშვები ყვავილეზით რთავდნენ მანქანას.

— მაშ, გამარჯვებით ამხანაგებო!— გადახედა ანდრომ იქ
ძყოფთ და მანქანაში შევიდა.

მოხუცი მუჰამედი მივიდა მანქანასთან, გრძელი ჯოხი მიაყუდა
განზე, ხელები ასწია და ანდროს მიუშვირა.

— კარგად იყავი, შეილო, კარგად იყავი, — მიმართა მან, —
კარგად იყოს ის მთავრობა, რომელმაც ჩვენში ამდენი სიხარული
და სიყვარული დააგროვა. ერთნაირად ააფართქალა მოხუცისა და
ყრმის გული. ერთნაირად გაგვინათა ყველას. — მანქანის საფეხურ-
ზე შესდვა და ხელები მოხვია ანდროს — ჩვენს მთავრობას, ჩვენს
პარტიას ვეხვევი, ჩვენს მთავრობას, ჩვენს პარტიას ვკოცნი. —
რამდენჯერმე აკოცა, შემდეგ მობრუნდა, თვალები ამოიწმინდა,
თავის ჯოხს მოავლო ხელი და მურადს მიუბრუნდა.

— მურად, შენ შემოუძები — შენ გააცილე ჩვენი ძვირფასი
სტუმარი.

მურადმა გაიღიმა, მივიდა ანდროსთან, ჯერ ხელი ჩამოართვა,
შემდეგ მოეხვია და გადაკოცნა.

— მე გაგაცილებ — უთხრა მან ანდროს, მანქანაში შევიდა და
გვერდით მიუჯდა.

მანქანა ნელნელა გამოძვრა ირგვლივ შემოხვეულ ხალხიდან,
ვაკეზე გამოვიდა და განიერ გზაზე გასრიალდა.

სარჩევი

	გვერდი
თავი პირველი .	5
მორა	63
მესამე	78
მორთხე	104
„ მეხუთე	145
მეექვსე	167
მეშვიდე	191
მერვა	241
მეცხრა	255

მკითხველებს

გთხოვთ მოგვაწოდოთ თქვენი შენიშვნები ამ წიგნზე შემდეგი მისამართით: ბათუმი, აჭარის საბჭოთა მწერლების კავშირი.

პ. ლორია.

რედაქტორი—ნ. მაღახონია, ტექნიკური
და კორექტორი—ნ. პაიჭაძე,
გამომშვები—ე. ჩიქოვანი.

* * *

გადაეცა წარმოებას 7/1 1939 წ.
ხელმოწერილია დასაბუქდად
20/VII 1939 წ. მთავლიტის
რწმ. № 538. ტირაჟი 500.
სასტამბო ფურც —17,
სააეტორო ფურცე-
ლი—16¹/₁.
დაკვეთის
№ 127.

ფასი 10 მან.

უღა 1 მან 50 კაპ.

აჭარის ასსრ ადგ. შრეწე. სახ. კომისარიატის სტამბა-ლითოგრაფია.
ბათუმი, ლუქსემბურგის ქ., № 22.

მთავარ უცვლელმათა განყოფილება

გვ.	სტრიქ.	დაბეჭდილია	უნდა იყოს
37	ქვ. 14,2	თევზით	თევზით
77	ზევ. 8	მურადი	მურადმა
86	4	მდგომარეობას მიხედვით	მდგომარეობის მიხედვით
96	ქვ. 13	ანდროს	ანდროს
212	19	თოვლზე	ქაცის
231	11	ნიახურაძე	მახურაძე